

BARGEO (Pietro Angeli)

SYRIAS (10004 vers)

Le texte proposé ici a pour base celui donné par le site 'Poeti d'Italia in lingua latina', version numérisée de l'édition de 1591 de cette épopée chrétienne, version numérisée remarquable par le nombre de lacunes, de fautes de lecture grossières, de vers inscandables qu'elle contient.

N'ayant pu nous procurer un fac-similé de l'édition de 1591, nous ne pouvons qu'émettre des hypothèses :

- cette édition elle-même était de médiocre qualité ; toutefois, à cette date, l'auteur était encore vivant et il est peu probable qu'il n'y ait pas jeté un oeil ;
- l'impression est de facture médiocre, et l'O.C.R. utilisé sans contrôle humain (comme toujours sur ces grands sites plus soucieux de quantité que de qualité) a très souvent erré.

Quoi qu'il en soit, nous avons dû faire quelques centaines de corrections et de restitutions. Certaines paraissent s'imposer, d'autres sont de simples hypothèses, quelques unes de purs expédients pour rétablir la métrique du vers.

Il va de soi que nous serions très heureux de revenir sur ce travail, au cas où un lecteur nous indiquerait où trouver un fac-similé de ce texte.

PETRI ANGELII BARGAEI SYRIAS HOC EST EXPEDITIO ILLA CELEBERRIMA  
CHRISTIANORUM PRINCIPUM QUA HIEROSOLYMA DUCTU GOFFREDI BULIONIS  
LOTHARINGIAE DUCIS A TURCARUM TIRANNIDE LIBERATA EST

LIBER PRIMUS

S\_1        v.1        Hesperia acies, magnoque accepta Tonanti  
              2        arma cano et variis exhausta pericula in oris,  
              3        jactatosque diu populos morboque, fameque.  
              4        Quorum incredibili Solymis virtute reclusis,  
              5        Christicolae extremi potuere a finibus orbis  
              6        visere deposita dubiae formidine vitae  
              7        Bethlema et Isacidis promissa parentibus arva.  
              8        Tu vero, cujus claro de lumine lumen  
              9        exoritur nobis, tacitosque exsuscitat ignes,

10 unde altam afflati mentem caelestibus auris  
11 deferimus populos et habentes nubila terras,  
12 verus amor patris, natiq̄ue aeterna voluptas  
13 spiritus, hinc atque hinc pariter qui profluis, et qui  
14 cuncta movens te tota hominum in praecordia fundis,  
15 mortalique doces ore immortalia fari,  
16 sancte fave, praestoq̄ue adsis ingentibus ausis.  
17 Ac me, delectis dum sumpta heroibus arma  
18 dicere et Ausonias conor vulgare per oras,  
19 da, reges memorantem, altas evolvere causas  
20 bellorum et tanti narrare exordia motus :  
21 da, quoscumq̄ue animis diuturna silentia nostris  
22 exemere viros, revocare ad lumina vitae :  
23 nec tenebris, atraque ullos caligine tectos  
24 ire sinas, quos una sui fidissima merces  
25 sustulit ad caelum virtus, vastosq̄ue coegit  
26 trajicere Ionii fluctus, perque invia Thracum  
27 unanimes gravibus caput objectare periclis :  
28 cum miseris Asiae gentes, pressamq̄ue nefando  
29 eripere jugo dextris victricibus urbem  
30 hanc, ubi sancta suis olim vestigia plantis  
31 impressit, vitaeq̄ue dedit praecepta futurae  
32 illa Dei soboles, certae dux ille salutis  
33 mundi opifex, nostroq̄ue uno pro crimine passus  
34 ludibria et poenas, letumq̄ue informe sepulchro  
35 excivit sese et manifesta in luce refulgens  
36 victor ad aetherei sedes remeavit Olympi.  
37 Presserat insolitis nigri regnator Averni  
38 suppliciiis omnes, latum quicumq̄ue per orbem  
39 terrarum Christi cultum, nomenq̄ue professi  
40 suspicerent veros verae pietatis honores.  
41 Et nusquam deerant ficto de crimine poenae  
42 in miseros, nusquam Divum bene cedere sueta  
43 religio nostras properabat linquere terras,  
44 Europam, ditemq̄ue Asiam, Libyamq̄ue patentem :  
45 praecipue populos, quoscumq̄ue Aegyptus et una  
46 laeta Palaestinis regio pascebat in arvis.  
47 Illic dedecorum maculae et genus omne proborum,  
48 contemptusq̄ue acres, ignominiosaque passim  
49 dicta sequi, nec verberibus, nec caedibus ullis  
50 parcere sed sanctae saevire in corpora gentis.  
51 Quin etiam templa ipsa manu subversa nefanda,  
52 effusique aris calices atque hostia foede  
53 proculcata solo, raptusq̄ue in vincla sacerdos,  
54 dum se caelicolum Regi purissimus offert,  
55 attollitq̄ue oculos et sanctum numen adorat.  
56 Quingentae aestates, quingentae ex ordine brumae  
57 transierant, nullusq̄ue aderat finisque, modusve  
58 Christicolum adversis jam tot per secula rebus :  
59 cum pater omnipotens Solymorum ad moenia vertit  
60 ultores oculos, tacitoq̄ue haec pectore fatur.  
61 En iterum infando populos Aegyptia tellus  
62 servitio, duraq̄ue premit jam compede nostros ?  
63 Impiaq̄ue assuetis deturbat honoribus aras ?  
64 Non ita namq̄ue etsi debent mihi plurima poenas  
65 ingentes seris nocitura nepotibus olim

66 flagitia et certae subito sine vindice fraudes :  
67 extinxisse tamen populi scelerata rebellis  
68 regna juvet : solioque alto pepulisse tyrannos,  
69 qui modo longinquos sese profitentur Erembos  
70 liquisse et Scythiae campos fugisse malignos.  
71 Haec genitor, celeremque ad se vocat inde ministrum  
72 aligerum e coetu, sanctam qui protinus urbem,  
73 quique Palaestinos populos, Syriamque tuetur.  
74 Vade age, fide vigil, quo jam pulcherrima rerum  
75 urbs Judaea suas altis in collibus arces  
76 ostentat mole ingenti et testudine templis  
77 marmorea augustum Nati complexa sepulchrum.  
78 Huc praestantem animis et magnum ingentibus ausis,  
79 et miro impulsum verae pietatis amore  
80 advenisse virum Celtarum a finibus usque  
81 scimus et incoeptis, animus quae destinat, aptum.  
82 Illi vita insons, illi suadela, leposque,  
83 et dictis vis acris inest : nec sanguine cretus  
84 obscuro, solum montis secessit in antrum,  
85 cum primum obduxit teneras lanugine malas,  
86 verum ut liberior cultum pietatis obiret,  
87 et mihi sinceros animi libaret honores.  
88 Is nunc et macie confectus et obsita pannis  
89 membra ferens, supplex oculos ad sidera tollit :  
90 "Utque velim finem miseris imponere rebus,  
91 ac tot suppliciis Solyms prohibere fideles,  
92 per mortem testatus et incunabula nostri,  
93 perque resurgentis factum memorabile Nati,  
94 cum fletu, precibusque petit ; luat impius ergo,  
95 seu fit Arabs, seu Persa fugax, mihi sanguine poenas  
96 tantorum scelerum. Tu, quo succedere possint  
97 ocius et mentem hanc nostram rata jussa sequantur,  
98 i celer atque illum tacitis hortatibus imple.  
99 Dic abeat quamprimum Italas delatus ad oras,  
100 nostraque Pontifici referat mandata : piorum  
101 concilium cogat, regesque inducat amicos,  
102 Gallosque, Ausoniosque duces, fortesque Britannos,  
103 suscipere unanimes, tantumque capessere bellum.  
104 Ipse ego nusquam abero." Dictis his Aliger altae  
105 militiae, ventis et fulminis ocior aura,  
106 illicet immensum rapidis secat aethera pennis.  
107 Jamque inter nubes terras delatus ad imas  
108 aspicit innumeris viridantia litora palmis,  
109 Sirbonisque lacum fluitante bitumine et orae  
110 oppida Samariae geminas despectat Iamnes.  
111 Mox et humi propior, qua se Galilaea propinqua  
112 finibus insertat Syriae, supereminet ales.  
113 Cervus atque undas amnis veneratur amoenas  
114 Jordanis, sterilemque agrum, duraque salebra  
115 horrentem tractum, riguamque perennibus arcem  
116 fontibus, ingressus peregrinum heroa salutat.  
117 "O animos olim regum impulsure feroces  
118 in bellum et flammis pro libertate meorum,  
119 ipse preces, fletusque tuos Pater audiit aequis  
120 auribus et populo praesens succuret egeno.  
121 Tu modo, cum primum stellas aurora fugarit,

122 surge celer, rectaque Jopes ad litora gressus  
123 tende : ubi jamdudum ventos exspectat euntes  
124 navis in Italiam merces vectura Sabaeas.  
125 Nec prius in Belgas et patria regna recurre,  
126 quam positam Arvernibus Elaver prope flumen in oris  
127 urbem adeas, sanctumque Patrem, qui praesidet orbi,  
128 hortantem populos ad bellum videris, hujus  
129 latus tanti mercedem et praemia facti."  
130 Haec ait atque illum procumbere in ora volentem  
131 suppliciter, fletusque humiles, lacrimasque clementem  
132 deseruit, tenuesque abiit resolutus in auras.  
133 At pius insolita laetatus imagine rerum  
134 surgit et aeterni veneratus numinis aram,  
135 has secum tacito fundit de pectore voces.  
136 "Summe Pater, cujus sedes stellantia caeli  
137 claustra premit, sic nulla usquam gens incolat orbem,  
138 quae laudes, nomenque tuum non tollat ad astra,  
139 et meritos confessa uni tibi reddat honores :  
140 cujus et in medio solus non pectore regnes  
141 et fieri videas quicquid vis ipse, jubesque  
142 non secus ac purae cum jam mortalia mentes  
143 exuerunt, labemque omnem exemere, luemque.  
144 Da, Pater omnipotens, summo mandata referre  
145 Pontifici, regumque animos accendere bello :  
146 adde et opes, adde et vires, quibus impius hostis  
147 pareat, aut multo vitam cum sanguine fundat."  
148 Sic memorans, humiles properat Simeonis ad aedes :  
149 Isacidae Simeonis, erat qui maximus unus  
150 Christicolum princeps patrum, custosque sacrorum  
151 jura ministrabat populo, patriasque benignis  
152 hospitibus assuetus opes effundere, cunctos  
153 ipse domi Solymam peregre accipiebat euntes.  
154 Ergo illum festinus adit, laetumque salutat  
155 laetus et ingentes volvens sub pectore curas.  
156 "Scis Simeon, scis ipse, inquit, quibus ante querelis  
157 res fratrum afflictas et tantae flevimus urbis  
158 excidia et magni polluta altaria templi :  
159 sume animos ; tetigere Deum tua vota, precesque.  
160 Ipse mihi, dum genua gravi titubantia somno  
161 forte labant, medioque tholi sub fornice victa  
162 procumbunt, clarus manifesta in luce refulsit  
163 nuntius aeterni referens mandata Parentis  
164 atque haec palmiferae cedentem ab litore Idumes  
165 Ausonio patri narrare incendia jussit,  
166 cogat ut innumeros, armetque in proelia reges."  
167 Tum Simeon : "Eadem ista mihi modo visa loquentis  
168 effigies, somnus lassos dum serpit in artus,  
169 aligeri effigies lacrimantem et multa timentem  
170 affari et fletum placidis compescere dictis.  
171 Ergo age rumpe moras et te, quo prospera rerum  
172 tantarum series vocat atque aeterna voluntas,  
173 siste volens : Deus ipse bonis bonus annuit orsis."  
174 Haec illi inter se vario sermone serebant :  
175 ac templum ingressi puro ter flumine frontem  
176 aspersere suam : sanctis ter fulsit ab aris  
177 flamma repens, templumque insueta luce replevit.

178 At petrus (namque ipse Petri pius advena noto  
179 nomine dictus erat) precibus, sacrisque peractis,  
180 caelestisque cibo mentem, potuque refectus,  
181 alta Palaestinae Phariis regnata tyrannis  
182 moenia deseruit, portumque, Jopemque petivit.  
183 Nec mora mutati spatia in contraria venti  
184 aspirant flantes Eoi ab limine Solis  
185 in puppim facilis salsas volat illa per undas.  
186 Atque Aegyptiaci late maris aequora sulcat.  
187 Jamque procul videt et Cretam scelerata secutam  
188 arma Jovis : summa qui pulso e sede parente  
189 mortali, est ausus Divum sibi poscere honores.  
190 Exin Sammonii rupes, atque ardua montis  
191 saxa legit : dextraque Cason, celsamque relinquit  
192 Carpathon et salebris duram Pholegandron acutis,  
193 mox Diam, Melonque illic gens Attica quondam  
194 exstinxit miseros tenera cum prole parentes.  
195 Nec non et rigidas Cranaes inamabilis oras  
196 praeterit : illicitos ubi primum infamis adulter  
197 Tyndaridi dedit amplexus, castumque cubile  
198 polluit injustae pariturum incendia Trojae.  
199 Inde autem Maleae scopulos, undasque sequaces  
200 exsuperans, placido cursu Messenia radit  
201 litora et Aenussas Euro impellente relinquit.  
202 Illam etiam scopulosa Ithace mirata volantem est :  
203 miratae Ionios celerem percurrere fluctus,  
204 quae modo devictos testantur Echinades hostes  
205 Thracas et undisono submersas aequore classes  
206 Hesperiae scelerum poenas solvisse merentes.  
207 Et vos Leucatae nimbose cacumina montis,  
208 fulminibusque altam percussa Ceraunia frontem,  
209 protinus ingressam Adriacas vidistis in undas  
210 Peucetios petere et tuto se condere portu.  
211 Qualis ubi aerii summo de vertice saxi  
212 illicet aurarum strepitu commota columba  
213 avolat et magni praeceps secat aetheris oras,  
214 et tandem patria laetam se turre recondit,  
215 sic illa, indomitum postquam tranaverat aequor,  
216 litus adit victrix, claraeque allabitur urbi :  
217 quam quondam (ceu prisca ferunt monimenta priorum)  
218 Daedalides, omnemque agrum, qua Daunia tellus  
219 culta patet proprio ducens e nomine nomen  
220 fecit Iapygiam : seri sed deinde nepotes  
221 dixerunt Barium : primi unde insignia regni  
222 sceptraque, purpureosque habitus, sacrumque tiaram,  
223 sumere tum reges Siculique, Italique solebant.  
224 Ergo ipsi optata tandem potiuntur arena,  
225 votaue solliciti persolvunt debita nautae  
226 Nicoleo, cui templum altis sublime columnis,  
227 marmoreumque, ingensque calet fumantibus aris :  
228 et circum Arabiis permiscet odoribus auras.  
229 In medio sacram testudo intercipit urnam  
230 aurea, quae Divi cineres atque ossa sepulti  
231 complexa, ambrosium summo de marmore fundit  
232 (mira quidem, sed certa fides) injussa liquorem.  
233 Huc pius ingrediens heros sanctissima primum,

234 aurea pyxis ubi niveum complectitur orbem  
 235 caelestis crusti, mysteria pronus adorat.  
 236 Mox humilis, supplexque altam contendit ad aram :  
 237 ac pressa genibus terra sic voce precatur.  
 238 "Dive, Myram Lyciae cui sex ex urbibus unam  
 239 innumeris illustrem atavis, populoque frequentem  
 240 insueta patres olim dant sorte regendam :  
 241 qui puer et nutricis egens lactantis ab ipsis  
 242 uberibus, quoties lux quarta et sexta refulsit,  
 243 avertens faciem seras jejunos in horas  
 244 sensisti gelidae venisse crepuscula noctis :  
 245 mox et opes patrias miseris largitus egenis  
 246 sancta Palaestinae visis loca et undique navem  
 247 jactatam ventis, agitatum et fluctibus atris  
 248 ipse Deo supplex optato in litore sistis  
 249 incolumen, saevique expertus vincla tyranni,  
 250 post tristes casus, post dura incommoda tandem  
 251 discedis, curasque hominum, terrasque relinquens  
 252 in caelum sublimis abis, unde arduus orbem  
 253 despicias et tantos tecum miserare labores :  
 254 sis bonus, o nostrisque fave, sanctissime, coeptis."  
 255 Dixerat et caelo supplex immota tenebat  
 256 lumina, largifluo spargens sibi flumine pectus :  
 257 sustuleratque ambas, quasi raptus ad aethera, palmas :  
 258 cum senior, cui prima sacri custodia templi,  
 259 curaque perpetuis adolere altaria flammis  
 260 supplicis aspectu subito commotus et ore.  
 261 "Dic nobis, dic hospes, ait, nomenque, genusque,  
 262 quisquis es : et mensas hodie dignare paratas.  
 263 Namque diem sollemnem agimus, quo maximus heros  
 264 hinc abiit clara caeli in statione locatus."  
 265 Sic memorans, dextra apprensum in sacraria ducit,  
 266 atque auro e solido solidas ostendit acerra,  
 267 et pateras, calicesque graves, purosque lebetes  
 268 vasa ministeriis, cultuque accommoda templi :  
 269 ille autem admirans placido est sic ore loquutus.  
 270 "Non equidem sine mente Dei, sine numinis aura  
 271 adveni has primum terras et Iapygis urbem,  
 272 quam victor populorum heros Patareius unam  
 273 protegit et fidus praeses, custosque sacrorum  
 274 ipse suis patrociniis tutatur egentem.  
 275 Jam Solymae manifesta salus, jam Persidis atra  
 276 caede Palaestinis tepescient flumina campis.  
 277 Desierat fari senior, cum talia Alethes  
 278 miratus magno scitandi ardescit amore,  
 279 quae sit tanta salus, quae caede tepentia crescant  
 280 flumina, quos ducat victrix Europa triumphos.  
 281 Subjicit haec igitur cupienti habitator eremi.  
 282 Non ullus (mihi crede) furor, non ulla futuri  
 283 vana superstitio percellit imagine mentem :  
 284 verum animo tanti praesens, fiducia Divi  
 285 addita et Ausoniae felix adventus ad oras,  
 286 quas ego concepi spes imo in pectore cunctas  
 287 integrat et coepto suadet dare vela labori.  
 288 Namque Palaestinas nuper novus advena terras  
 289 dum peragro et Solymae vestigia cuncta videre

290 pressa Deo juvat atque ipsi advigilare Sepulchro,  
 291 et modo Carmeli montes, modo visere Idumem  
 292 palmiferam et sacros Jordane ex amne liquores  
 293 sumere, tum si qua est regio testisque, memorque  
 294 mortis et exactae per tot miracula vitae,  
 295 aut lacus, aut rupes, aditum perrumpere et ad se  
 296 ire jubet : vidi eversas, proh dedecus, aras,  
 297 templaque cornipedum praesepia facta ferorum.  
 298 Sed me dicentem jam deserat auricomus Sol,  
 299 si foedas ignominias, si dura piorum  
 300 exitia et saevos casus memorare libebit.  
 301 Exarsere ignes animo : subit ira ruentem  
 302 ulcisci pietatem armis : scelera inde nefanda  
 303 deturbare procul, nostrisque afferre salutem,  
 304 immanis quos ipsa premunt regna impia gentis.  
 305 Ergo ego primores Solymae juvenesque, senesque  
 306 alloquor et miseris quae sit sententia posco.  
 307 Ast ollis (neque enim certae de dedere morti)  
 308 jam dubitent, tempus siquando id postulet et res)  
 309 omnibus idem animus populos e sede superbos  
 310 dejicere imperii, saevosque expellere reges,  
 311 aut ultro cunctos uni dare collasecuri.  
 312 Haec eadem Syrii, quos flumine magnus Orontes  
 313 alluit, Antiochi veteri cognomine dicti.  
 314 Haec Cilices, Lyciique volunt : haec Olbia, cujus  
 315 Ascanius placido perfundit moenia fluctu :  
 316 nec qui Byzanti populo dominatur et unus  
 317 obtinet imperium, qua se fera Thracia pandit,  
 318 quaeque adeo Pelopis tellus circumdatur undis  
 319 auxilium jam ferre neget sed viribus impar  
 320 non audet lapsis Asiae succurrere rebus,  
 321 exspectatque tacens dum se Germania bellax  
 322 excitet, aut Italum virtus miserata ruinas  
 323 imperii, labesque graves, aut Gallia fortes,  
 324 Gallia magnanimum mater generosa virorum,  
 325 cogat in arma duces, belloque ea regna lacesat.  
 326 Ac mihi versanti tantam sub pectore molem,  
 327 nuntius in somnis alto delapsus Olympo  
 328 constitit ante oculos et coepta capessere jussit.  
 329 Quare ego nunc primum vestras appulsus ad oras  
 330 Ausoniae ingredior reges aditurus et ipsum  
 331 Christicolum patrem, septem qui collibus urbis  
 332 praesidet atque hominum mentes, sensuque potentum  
 333 impellens stimulante Deo regit unus, agitque."  
 334 Desierat, cum longaevus sic infit Alethes.  
 335 "Magna quidem, magna, o hospes, neque temporis hujus  
 336 coepta paras et ni me animi sententia fallit,  
 337 nulla ope mortali, nullo superanda labore.  
 338 Namque inter sese divisa potentia regum  
 339 infregit solidas bellorum ad munia vires  
 340 jamdudum, imperiique Italos spoliavit habenis.  
 341 Si tamen haec audere potes, si fixa voluntas  
 342 ista tibi, precibusque tuis Deus applicat aures,  
 343 accipe quae primum studio suscepta, fideque  
 344 perficias neque enim, tanti quem gloria facti  
 345 certa manet, nobis haec intentata relinquant,

346 exitus omen erit nam res opis indiga et uno  
 347 vindice digna Deo coeptis bene gesta favebit,  
 348 et spem non dubiam dubiis modo mentibus addet.  
 349 Hanc partem Italiae, belloque et pace potentem,  
 350 imperio postquam patrio cessere Quirites,  
 351 Thracibus et Tiberis dominatum amisit avitum,  
 352 externi tenere duces nos ante superbo  
 353 servitio oppressi jussisque, minisque Getarum  
 354 parvum nos saepe Arabum sumus impia passi  
 355 imperia et victi poenas expendimus Afris.  
 356 Postremo dum compositis jam rebus avaras  
 357 Graiorumque manus et mores ferre protervos  
 358 cogimur, atque animo placidas assuescimus artes,  
 359 extremis orbis gentes in finibus ortae,  
 360 inde ubi vicinam spectant Electrides Arcton  
 361 insulae Oceano in magno, venere Chadeni,  
 362 Bastarnaeque truces et fortia pectora Cimbri,  
 363 quos patriae, veterumque aetas ignara locorum,  
 364 nec tamen ignota terrarum a parte profectos  
 365 nostra haec Normannos invento nomine dixit.  
 366 Quippe ea gens Septem gelido subjecta trioni  
 367 liquerat et campos et inhospita saxa Chalusi :  
 368 ac post eversas ipsis cum moenibus urbes  
 369 Gallorum et miseris passim viduata colonis  
 370 rura, ferox nostris regionibus intulit arma,  
 371 nacta duces magna virtute et fortibus ausis  
 372 Tancredum praestantem, opibusque et sanguine clarum,  
 373 et forma insignem et numerosa prole beatum.  
 374 Namque illi fines, alienaque regna colenti  
 375 bisenos natos fecunda creaverat uxor,  
 376 edoctosque sitim in silvis perferre, famemque  
 377 saepe graves caeli tolerare coegerat aestus,  
 378 saepe etiam pedibus rigidas calcare pruinas,  
 379 immanes dum luce feras, dum nocte sequuntur.  
 380 Ceu sus innumeros limo durata nepotes  
 381 quae post terga trahit, valles ingressa profundas  
 382 decussae ingentes glandis populatur acervos  
 383 et procul inde ursos fugat et genus acre luporum :  
 384 solaque fecunda saltus et pascua silvae  
 385 insidet atque epulis pinguescere pergit opimis.  
 386 Ipse etiam genitor natis comitantibus, omnes  
 387 expulit obsessis Insubrum e finibus hostes  
 388 et vitreo quaecumque vado Ticinus et ingens  
 389 Eridanus, quaecumque vagus secat Ollius arva,  
 390 Abduaque et tenuis gelido cum flumine Rhenus,  
 391 in leges jurare suas devicta coegit :  
 392 imposuitque jugum populis a litoris ora  
 393 Adriaci ad fines Samnitum et ab amne Phiterno,  
 394 qua fluit in longum regio ditissima, adusque  
 395 Hydrunti et mollis cultissima rura Tarenti.  
 396 Nec satis haec Siculos Afris extrema luentes  
 397 supplicia, hinc urbes, illinc populantibus agros  
 398 defendit, peditesque omnes delevit, equosque.  
 399 Post etiam caede ingenti congressus iniquas  
 400 prostravit turmas et funere mersit acerbo  
 401 innumeros at tu dictis Argive maneres,



402 pactaque victrici deferres praemia genti.  
 403 Mox veteris custos mori, legumque severus  
 404 gessisti vindex regnum Roberte paternum :  
 405 acri animo, claraque ingens virtute, tuaque  
 406 ante alios omnes pietate insignis et armis.  
 407 Brundusium tibi se terra oppugnata, marique  
 408 dedidit urbs, Graiis longe discedere jussis  
 409 et tua Trinacrii venere in jura, fidemque.  
 410 Ac nisi mors tantis obsisteret invida coeptis,  
 411 victrices superata manus jam Thracia, jamque  
 412 barbara servitium quae gens minitatur acerbum  
 413 Europae (sic spes fuerat) sensisset et arma.  
 414 Quorum adeo veriti virtutem animosus Acarnan,  
 415 et latrocinii, raptoque exercita pubes  
 416 Aetola, imperium dextrae subiere potentis  
 417 ultro omnes, ultro invicti sunt regia passi  
 418 jussa ducis verum postquam discordia fratrum  
 419 impulit inter se miseros concurrere cives,  
 420 descivere omnes et nos liquere rebelles.  
 421 Nam soboles natu major virtute secundus,  
 422 haud aequo patiens animo, quod frater ademptas  
 423 ferret opes, regnique unus poteretur habenis,  
 424 Italiam repetens victor dimisit Achivos.  
 425 Ac nunc germani saevo premit oppida bello :  
 426 depopulatur agros : altaeque in moenia Melpes  
 427 arietat, excidiumque urbi, populisque minatur.  
 428 Hos motus, ni forte parum Deus obstet amicus,  
 429 comprimere atque iras primum sedare necesse est :  
 430 quando hic militiae veteris grave robur, opesque  
 431 ingentes, nec non classes, navalia, portus,  
 432 unde ad palmiferam facilis trajectus Idumem."  
 433 Vix haec fatus erat aevi maturus Alethes,  
 434 cum sese ad templum victor Boemundus agebat,  
 435 vota soluturus Divo, quae fecerat ante,  
 436 Nicoleo, ut caperet sine caede et sanguine Melphem.  
 437 Ergo aderat circum ducibus stipatus amicis,  
 438 et corde et vultu quaerens a numine pacem,  
 439 suppositum genibus pressit pulvinar et ambas  
 440 ad caelum palmas humili cum voce tetendit.  
 441 "O, qui coniectos Byzanti in vincla tribunos,  
 442 damnatosque neci per fraudem et crimen iniquum,  
 443 servasti incolumes, meritas tibi maxime grates  
 444 en agimus, laetique tuis advolvimur aris.  
 445 Ac tu, sancte pater, si, quod te poscimus, aequum est,  
 446 si justum gerimus bellum cum fratre, piumque,  
 447 da positis odiis certo nos foedere jungi  
 448 concordem, sumptisque ambos discedere ab armis."  
 449 Haec ille ut secum tacito sic ore precatus,  
 450 surgit et ex ebano nigranti, alboque elephanto,  
 451 quam mira Assyrius fabricaverat arte Phraates,  
 452 et cocco et denso famulus constraverat auro,  
 453 augusta sese sublimem in sede locavit.  
 454 Mox alii circum proceres capita ardua nudi  
 455 stabant, incoeptisque sacris intenta tenebant  
 456 ora, sacerdoti linguisque, animisque faventes :  
 457 heroemque omnes Lyciae, Pataraeque potentem

458 orabant humiles, ducis ut sine labe juventam,  
 459 et vitam il longos facilis produceret annos :  
 460 Germanosque ira inter se, belloque diremptos  
 461 concordēs stabili fratres sociaret amore.  
 462 Mox autem precibusque piis, sacrisque peractis,  
 463 occurrit venienti ultro longaevus Alethes.  
 464 "Inclyte rex Robertiades, tibi gratulor (inquit)  
 465 victori : atque istam, peperit quam vivida virtus,  
 466 laetitiam rebus nusquam variantibus oro  
 467 perpetuam, ut dulci placitam cum pace quietem  
 468 nactus, in externos vires atque arma tyrannos  
 469 convertas, Graiumque oras et litora Thracum  
 470 imperio adjicias et barbara regna lacesas.  
 471 Quod virtus tua promittit : quod gloria gentis  
 472 postulat, unde genus juvenis fortissime ducis.  
 473 Quodque adeo fuit invicti cura una parentis  
 474 conficere et regni longe producere fines  
 475 Ausonii : populisque feris imponere leges :  
 476 juraque nobilium reparare amissa Quiritum.  
 477 Nam memini, cum Tarpeia de rupe rebelles  
 478 dejecit cives victor, caesisque manipulis  
 479 Henricum, faulrix cui tum Germania fasces  
 480 detulerat, procul urbe fugam celerare coegit,  
 481 eximere oppressum longa obsidione, metuque  
 482 Pontificem, sanctaeque in scepra reponere sedis :  
 483 cujus ab auspiciis bello multo ante gerendo  
 484 impositus, munusque obiens insignis honoris,  
 485 bis Venetos, bis secum ausos concurrere Graios  
 486 contuderat, geminasque imo sub gurgite classes  
 487 merserat atque acie victor dimiserat Orco  
 488 millia multa virum : jamque affectabat ad oras  
 489 Byzanti festinus iter, jam Thracia vastis  
 490 concipiens animis invadere regna parabat.  
 491 Ipse ego, quem secum casus deduxit in omnes  
 492 sacra ministrantem festis peragenda diebus,  
 493 mirabar sublimem animum, mirabar et una  
 494 ad decus intentum, stimulosque cupidinis acres  
 495 egregiae et magnos curarum in pectore fluctus  
 496 volventem, quorum impulsu jam concitus ibat  
 497 supra omnes, regnisque Asiae, Libyaeque ruinam  
 498 molitus tacita capiebat gaudia mente."  
 499 Tum Robertiades lacrimis Boemundus obortis,  
 500 "Haec, ait, haec nobis, quae nunc, pater optime, narras  
 501 nota nimis, semperque animo genitoris imago  
 502 fixa haeret justa in Thraces capere arma monentis,  
 503 atque Asiae campos bello vastare jubentis ;  
 504 nec semel ante oculos in somnis constitit ipse,  
 505 qualis erat, facieque minax, vultuque severus,  
 506 oppida cum prostravit humi Taulantia et arces,  
 507 altaque Dyrrachii subvertit moenia victor :  
 508 aut cum Cassiopes moriens prope litus, acerbae  
 509 Cassiopes litus, cunctarum infame sepulchrum  
 510 virtutum, extincto quae tum periire parente,  
 511 maerentem dictis consolabatur amicis.  
 512 Nate, tui effigies et spes fidissima patris,  
 513 nate Italīs, nate externis exercite bellis,

514 tantorumque, adeo socius, testisque laborum,  
 515 quos ego suscepi, quos nunc ego linquere cogor  
 516 effusos (sic certa Deo, stabilisque voluntas)  
 517 ipse vides, alacres quam te comitentur euntem  
 518 ferro accinctae acies, quamque undique circumstant  
 519 agmina multa virum et nostri studiosa juvenus  
 520 nominis, obscurae jampridem inimica quietis.  
 521 Haec tibi pacatis, qui nunc obstare videntur,  
 522 hostibus, ingentem summis heroibus addet,  
 523 imponetque sacrum capiti gavisam tiaram :  
 524 quem modo longinqua Deus in regione paratam  
 525 servat et impense per mille pericula rerum,  
 526 perque adeo varios casus, durosque labores  
 527 quaesitum, si vera olim mihi numine plenus,  
 528 afflatusque Deo cecinit longaevus Ionas,  
 529 spectabunt laeti propecta aetate nepotes.  
 530 Hac pater ingenti natorum accensus amore,  
 531 ne regni causa Italici discordia fratres  
 532 divideret, viresque adsumeret invida nostras.  
 533 Quamquam, o sed noxae, quarum persolvere poenas  
 534 cogimur, innumerae mentemque, animumque benignum  
 535 avertere Dei : qui nos amittere passus  
 536 propterea tot regna armis quaesita, manuque  
 537 invicti genitoris, avitae et robora gentis.  
 538 Verum haec, sancte senex, uni cui cura piandi  
 539 flagitia et summi placandi numinis iram  
 540 credita, si precibus non dedignabere castis  
 541 exorare Deum, nostri, ut rerumque misertus  
 542 extinguat clemens tanta haec incendia regni  
 543 Ausonii et coepti discordia semina belli :  
 544 idem etiam fortasse viam monstrabit et altum  
 545 sternet iter, sceptrum evertens Orientis, opesque."  
 546 Vix, haec desierat fari, cum magnus Alethes  
 547 subjicit : " O ingens patris decus, o nova gentis  
 548 gloria, quae nam in te regum fortissime primum  
 549 laudarim ? Pietatem animi, roburque juventae ?  
 550 An belli audaces, an pacis amabilis artes ?  
 551 Omnia quae pariter saeculis venientibus aetas  
 552 suspiciens, pariter magnum super aethera tollet  
 553 et tibi divinos famae instaurabit honores.  
 554 Non temere, astuteve aliquid fortissimus heros  
 555 ipse tuus genitor, quod veri effeta senectus  
 556 acta metu solidas animi languescere vires  
 557 senserit, extrema est titubans in morte locutus.  
 558 Namque eadem aetatis sublimina prima ruentis,  
 559 cum belli arderet studiis, persaepe canebat  
 560 ista mihi de te puero non Appula tellus,  
 561 non et Iapygiae, quae Daunia finibus haeret,  
 562 jam capere hunc possit, cum primum adoleverit et se  
 563 noverit haud usquam patriae virtutis egentem.  
 564 Et nunc si veri quicquam mens augurat, ingens  
 565 tantarum nobis rerum est oblata facultas.  
 566 Namque hic adveniens Solymarum nuper ad oris,  
 567 Judaea ex media ciet alta ad praemia reges  
 568 Ausonios, totamque Asiam promittere praedam  
 569 non dubitat populorum uno vos ore vocantum

570 in regna et dominos cupientum expellere Turcas."  
571 Haec memorans, ardorem animis injecit, ut ultro  
572 Christicolum cuperet narrantem audire labores.  
573 Nec mirum : namque ipse Deus, qui pectora regum  
574 unus obit, sensumque movens alternat et urget.  
575 Jamdudum mentem divino afflaverat aestu,  
576 insuetoque imas accenderat igne medullas.  
577 "Ergo ait, o utinam summi regnator Olympi  
578 haec inter reges componat foedera et acres  
579 excitet Europae populos, quos conscia virtus  
580 ipsa sui stimulet tam justa in bella, feroxque  
581 sponte sua pubes raptis sese induat armis.  
582 Ipse ego, quem praesens germani injuria versat  
583 immeritum, propriisque palam deturbat ab agris  
584 haeredem et summo secum contendere jure  
585 cogit, ut armatis in mutua vulnera dextris  
586 fraternos Italo foede(ris) sanguine campos,  
587 victas dedo manus victor, regnisque paternis,  
588 si modo quod memoras hospes venerande, sequatur  
589 foedus amicitiae, jam nunc discedere certum est.  
590 Sin autem secus ac volumus, res cesserit et nos  
591 exitus ingenti de spe dejecerit omnes,  
592 tum tu Pontificem Romae exorare memento,  
593 litibus imponat nostris finemque, modumque,  
594 suspiciens uno dignam se iudice causam.  
595 Quoque id commodius, nisi forte indebita posco,  
596 conficias, certos nostra hac ex urbe legemus  
597 quam primum, tecum quos dimittamus amicos,  
598 componi orantes constanti foedere pacem.  
599 Interea (neque enim tantis conatibus instes,  
600 illorumque expers hominum, ignarusque locorum,  
601 quique adeo teneant Asiae vel regna, vel urbes  
602 undique praesidiis et multo milite vinctas)  
603 dic age, nec cupidis notae tibi nomina gentis,  
604 cujus ad haec tenuis famae loca pervenit aura,  
605 auribus invideas, quique arma capessere contra,  
606 qui conferre manus, qui bello audere ferantur."  
607 Haec Robertiades Boemundus at inclytus hospes  
608 ex alto repetens diri primordia regni :  
609 "Expulerat Parthos armis victricibus, inquit,  
610 imperii fines adoriri Heraclius ausos,  
611 auxilio populorum usus, quos incola terrae  
612 Arabiae felix proprio de nomine dictos  
613 ipsa suo quondam Romana in proelia misit.  
614 Militiae sed enim postquam, morumque periti  
615 bellandi cunctas didicere artesque, dolosque,  
616 ingentique aestu atque insueto frigore corpus  
617 durarunt, hostesque sua virtute subactos,  
618 disjectosque duces, desolatosque maniplos  
619 videre et maestas vertere in terga phalanges,  
620 descivere fide, seque adjunxere volentes  
621 imperiis Arabum, tum primum in bella secuti  
622 Abdaridem : quo non alter versutior umquam,  
623 seu sit opus varias populis intexere fraudes,  
624 deceptasve semel compellere ad impia mentes,  
625 eversorem Asiae, portentum immane, luemque

626 excitam barathro, qui verum e pectore cultum,  
 627 inque Deum pietatem omnem subvertere doctus  
 628 et miseros imis animos damnare tenebris,  
 629 dum simulat sese venienti numine totum  
 630 afflari, mentemque Deo, sensusque teneri :  
 631 illicit ingenti, turbae rudis auctus opum vi  
 632 Aegyptum aggreditur, Syriamque in jura, fidemque  
 633 cogit et eversos Persas belloque, fameque  
 634 occupat, ac miseris ritus describit habendos  
 635 sacrorum et faciles infanda ad crimina leges.  
 636 Inde igitur firmis legionibus undique septus  
 637 Judaeam invadit, Solymosque oppugnat et urbis  
 638 moenia, dejectis passim custodibus atrox  
 639 aequat humi, populosque pios obtruncat et aedes  
 640 templeaque, quae Christo transacta dicaverat aetas,  
 641 excscindit, sacratque sibi, pro dedecus, aras :  
 642 infandas aras illic, ubi nuper Iesus  
 643 vera Dei soboles, summique exemplar amoris,  
 644 ad caelum monstrarat iter, sublatus iniquis  
 645 judiciis, duraeque cruci data victima, primi  
 646 morte sua luerat peccatum immane parentis,  
 647 infernasque domos victor recluserat : illic  
 648 fundamenta jacit diri teterrima ritus.  
 649 Ulla nec immemores etiam dum cura nepotes  
 650 (heu labem sceleris numquam ulla in gente relictam)  
 651 tangit et in populos vindex agit ira rebelles.  
 652 Sexcentos jam capta annos infamibus aris  
 653 servit adhuc Solyma et culta in convalle Damascus.  
 654 Nec pudet egeledi Daphnen ad litus Orontis,  
 655 quae populos Christi de nomine prima vocavit  
 656 ausa suos, nec non Biblon, Sidona, Tyronque  
 657 oppressa cervice jugum perferre, suaque  
 658 desperare omnes de libertate : nec ullam  
 659 partem Asiae, magna quae non dicione prematur  
 660 Turcarum atque Arabum. Quando gens illa nefanda  
 661 acta fame quondam Scythiae deserta reliquit  
 662 et vitae ingrato quaerens alimenta labore  
 663 ipsa suas operas Persis famulata locabat.  
 664 Sed simul ac juvenum coetu florere, virumque  
 665 coepit et instructas potuit discernere turmas,  
 666 in dominos ausa est proprios convertere dextras,  
 667 atque acie fuis patrias imponere leges.  
 668 Sic Medos, sic Armenios, Cilicesque feroces,  
 669 et Lycos, Lydosque manu superavit et audax  
 670 intulit arma Arabis nec erat tum viribus aequis :  
 671 congressi tamen in pugnam, seque inter adorti  
 672 discessere pares, foedusque his legibus ictum :  
 673 esset it his idem atque illis Deus, impius idem  
 674 cultus et Abdarides unum modo numen utrisque.  
 675 Ac veluti par acre canum, cum valle latentes  
 676 impulsu quaerunt odiis immanibus apros,  
 677 saepe illi inter se rixam committere sueti,  
 678 ambo animis paribus, paribusque aetatibus ambo,  
 679 undantes cohibent irarum in pectore fluctus,  
 680 donec ad expositae direpto in tergore praedae  
 681 pervenere dapes ; subitas ibi protinus acti

682 in furias, pedibusque pedes atque oribus orae  
683 impliciti dubiae ruperunt foedera pacis,  
684 alter in alterius fauces, jugulumque ruentes  
685 mutua vulnificis laniarunt dentibus artus.  
686 Atque hic ipse Asiae status est : haec denique rerum  
687 cunctarum facies, dux invictissime, quando  
688 jamdudum imbellis sua jura amisit Alexis  
689 Graius et imperii vix ipsum a finibus arcet  
690 irrumpentem hostem flumen Tanaisque, palusque  
691 Maeotis, Pontusque ingens et Bosphorus et quae  
692 influit Aegaeas dimissa Propontis in undas.  
693 Quem tamen Europae si pars conjuret, opemque  
694 differat et regno, saevaque tyrannide pressis,  
695 praecipitemque, actumque procul fugere inde videbis  
696 ad montes Scythicos atque incunabula patrum,  
697 rursus et in caecas Arabum remeare cavernas.  
698 Nam quis tam timidus, quem desperare coactis  
699 non pudeat tanti populorum viribus ipso  
700 defensore Deo ? Cujus si certa voluntas  
701 Christicolum rebus non adversata favebit,  
702 ipse ego mille acies peditum, mille agmina solus  
703 contemnam, aériasque suis cum molibus arces."  
704 Dixerat atque animo volventem talia regem,  
705 ararum et populi custos compellat Alethes.  
706 "Optime dux Italum, saeculis decus addite nostris,  
707 quem modo stelliferi moderator maximus orbis  
708 opportunum ad nos, ipsoque in tempore misit,  
709 his tectis quamquam angustis, quamquam hospite tanto  
710 indignis, pater ipse tuus successit et altae  
711 victor Iapygiae nostra haec ad limina adibat  
712 et tenues mensas et res dignatus egenas.  
713 Tu quoque si contemnere opes, luxusque beatos  
714 nunc potes, ingreditor nostros, Boemunde, penates  
715 et dapibus laetus jamdudum accumbe paratis."  
716 Sic ait : actutumque hilares ex aede profecti  
717 una (tum) omnes abire domum senioris Alethae.  
718 Hic ipso in medio, quo se spatiosior aula  
719 explicat, antiqua ex cedro, laevique cupressu  
720 induerant mensas niveis mantilia villis ;  
721 et mira picti pendebant arte tapetes  
722 parietibus : quippe impositas ex ordine plagas  
723 Aegypto tatrix depinxerat aemula, primum  
724 flumina purpureo currentia tota cruore,  
725 sanguineos etiam rivos et stagna, lacusque.  
726 Praeterea (horrendum visu et miserabile) siqua  
727 vasa domi privos olim servantur in usus,  
728 omnia cernere erat taetro fluitantia tabo.  
729 Strataque mox querulis ranis adoperta viarum,  
730 obsessasque fores, obsessa cubilia, nec non  
731 consumptum omne penus turba accedente loquaci.  
732 Ipsi etiam culices tellurem atque aera magnum  
733 complentes, hominumque genus, jumentaque passim  
734 laedere et impressis maculosos dentibus artus  
735 livere : ac magnas muscarum implere catervas  
736 atria nobilium, thalamosque, aulasque patentis :  
737 quadrupesque feras grassantem extinguere pestem :

738 ulceribus periisse homines, periisse videres  
739 quicquid habet pecudum regio ditissima Nili :  
740 usque adeo magnae magni stant caedis acervi.  
741 Post quae fulminibus summus circumsonat aether ;  
742 verberat et grando sata laeta, boumque labores  
743 et subiti e densis descendunt nubibus imbres,  
744 pinguiaque innumerae populantur rura locustae :  
745 quae virides avido segetes absumere morsu  
746 pergentes, strictim detonsa novalia relinquunt.  
747 Parte alia caeca nigra caligine nubis  
748 contectas terras credas horrere perennes  
749 aeternae tenebras ventura in saecula noctis.  
750 Postremo, quae prima usquam sunt edita primis  
751 partibus et prima in lucem venere, diemque,  
752 sive sit ancillae, seu regis amabile pignus,  
753 seu pecudum fetus, misere sublata jacebant :  
754 turbaque Pellaei luctum male sana Canopi  
755 miscere et tantis haerere incredula monstris.  
756 Haec dum oculis, animoque ingens simul hospes et heros  
757 mirantur, pueri magnis a patribus orti  
758 dant manibus lymphas et candida lintea puris.  
759 Tum vero supplex animis atque ore sacerdos  
760 adstitit, inque preces solemnia verba resolvit :  
761 "Summe Pater rerum, nobis qui cuncta benignus  
762 suggeris et varias largiris egentibus escas,  
763 adsis o praesens epulis et numine lustra  
764 ipse tuo hunc coetum et castae convivium mensae."  
765 His dictis sedere omnes, dapibusque paratis  
766 injecere manus laetique medentia siccis  
767 faucibus hauserunt generosi sobria vini  
768 pocula, festivo tempus sermone trahentes.  
769 Interea cithara praestans Minturnus eburna,  
770 Minturnus, quem Fibreno cum flumine Liris,  
771 dum fugit exosus nemora inter opaca profanae  
772 antiquos ritus et sacra horrenda Maricae,  
773 miserat instructum numeris atque arte magistra,  
774 invicti cantat laudes et maxima Mosis  
775 facta ducis, tacitosque ortus, ut conditus alveo  
776 pertenui, in summo primum fluitaverit amne :  
777 "Ut puerum virgo saevo prognata tyranno  
778 regia servatum matri mandarit alendum :  
779 utque domi acceptum, postquam primoribus annis  
780 accessere dies, ceu natum amplexa, fovensque  
781 ingenti cura, studioque eduxerit omni.  
782 Addit et Ogygium cum ferro obtruncat et alta  
783 litore Niliaco contectum occultat arena :  
784 cum fugiens odium saevi Pharaonis et iram  
785 tutus ad Arabios se contulit advena fines  
786 et magno genitas septem Raguele puellas  
787 tutatur praesens, sumptisque ulciscitur armis  
788 solus et infestos fugat ipso a fonte latrones.  
789 Inde autem, jussuque Dei, monituque reversus  
790 Aegypto in media sumpta miracula virga  
791 edit et Isacidas misere servire coactos  
792 eximit imperio dominorum atque amne relicto  
793 Arsinoe oppositam ad ripam deducit ovantes.

794 Intentansque manu non enarrabile rami  
 795 robur, Erythraeas undas disjunxit ab undis :  
 796 litoreque adverso potitur, quem pone sequentes  
 797 currusque et turmas equitum, peditumque cohortes  
 798 demergunt fluctus, coeuntiaque aequora in unum."  
 799 Haec vates, citharamque una cum voce repressit.

## LIBER SECUNDUS

S\_2 v.1 Aureus interea medium superaverat orbem  
 2 Phoebus et Oceani properans vergebat ad undas  
 3 cum sic ad regem senior conversus Alethes :  
 4 "Quod felix, fastumque tibi, Boemunde, tuisque,  
 5 Europaeque, Asiaeque omni, Libyaeque patenti,  
 6 jamdudum aspicimus tanti primordia belli,  
 7 ut volumus, resque ipsa suo se pondere librat ;  
 8 et precibus nostris placidas Rex magnus Olympi  
 9 advertens aures, jam nunc fore monstrat, ut olim  
 10 ipse tibi manifesta volens haec omnia firmet,  
 11 tantorumque operum praeclara incoepta secundet.  
 12 Ergo age (quando quidem melior pars acta diei  
 13 admonet haud longe terris instare tenebras  
 14 noctis et Hesperio properare a litore somnum,  
 15 nec cenae dum tempus adest) in tecta vocari  
 16 nostra jube lectos, quos mens tua destinat una  
 17 ire viros, aliam cum primum crastina lucem  
 18 aurora extulerit, vegetosque e mollibus artus  
 19 ingressurus iter stratis erexerit hospes."  
 20 Tum Robertiades vultuque et pectore laetus.  
 21 "Ista, inquit, mihi, sancte senex, tam grata voluntas,  
 22 quam quae olim votis rerum prosperrima nostris  
 23 eveniunt, faustisque preces successibus aequant.  
 24 Namque ego dum tantam tacitus mecum ipse revolve  
 25 hanc curam et partes urbis convertor in omnes,  
 26 te solum statuo, molem qui muneris hujus  
 27 ingentem subeas, qui nostra fidelis ad aures  
 28 Pontificis mandata feras, ac protinus uni  
 29 polliceare fidem, dextramque ad justa paratam  
 30 arma : modo haec reliqui veniant in foedera reges  
 31 Gallorum, quos ille adiit digressus ab urbe  
 32 nuper, ut Abdaridem cunctos accendat in hostem.  
 33 Quoque id commodius confectum ex ordine reddat,  
 34 concilium in mediis nunc primum indicit habendum  
 35 Arvernibus, regesque illuc, populosque vocari  
 36 imperat et magni proponit praemia facti  
 37 ipse mihi praesens praesenti ingentia, fratrem  
 38 dum pacat, mentemque unam conatur utrique  
 39 addere et aeternae calcaria subdere laudis :



40 omniaque incassum nam nos discordia demens  
41 impulit infecta tristem dimittere pace.  
42 Nunc autem, quando haec certo sine numine Divum  
43 confieri nequeunt et jam via lata patescit  
44 hostis ad excidium Scythici, Solymaeque salutem,  
45 ite illuc celeres, postquam lux tertia Solem  
46 extulerit terris et me fore dicite jussis  
47 parentem atque ultro subeuntem pondera rerum  
48 in partem et cunctas ad tanta incoepa paratum  
49 fundere opes, nostri nervos et viscera regni."  
50 Haec ille et, noctis cum jam pars prima sub undas  
51 Oceani stellas secum devexa tulisset,  
52 cenati serae se composuere quieti.  
53 At non et Petrus non et longaevus Alethes  
54 per membra atque artus dulcem fudere soporem  
55 ante, pias quam mente preces et voce tulissent,  
56 aeternum numen concepta in vota vocantes.  
57 Interea roseis Aurora invecta quadrigis  
58 fluctibus ex alti surgit maris et sua caelo  
59 astra fugans, reteggit montes, camposque patentis :  
60 primaque sollicitis hominum corda anxia curis  
61 excitat ad varios terraeque, marisque labores.  
62 Illi igitur, postquam venientem a limine regem  
63 voce salutaturum humili, laetumque precati,  
64 felicemque diem, prior est ita fatus Alethes.  
65 "Quod mandas, fierique jubes, rex opime regum,  
66 en tibi praesto adsum, nec melongaeve senectus  
67 effetaeve queunt incoepo avertere vires.  
68 Conatum modo respiciat dominator Olympi  
69 hunc nostrum et rerum eventu fortunet euntem.  
70 Interea (nisi forte alter videatur) ad aram  
71 Nicoleo sacrum fieri de more jubendum est :  
72 quo communis amor, natiqque, patrique supremi  
73 spiritus a nobis in vota, precesque vocetur,  
74 allaturus opem linguae, cum facta potestas  
75 dicendi fuerit, tua cum mandata referre  
76 Pontifici heroum mediis in millibus unus  
77 cogar inops animi, longoque infractus ab aevo.  
78 Ille mihi persaepe alias praesensque, volensque  
79 affuit oranti, dulcesque ex ore loquelas  
80 extudit et voces, quibus impacata Pelasgum  
81 pectora lenimus, populoque avertimus iras  
82 immanes, ullis opus insuperabile verbis.  
83 Usque adeo magnum est divina afflariet aura."  
84 Haec ait et regem praeceunt ad templa secutus,  
85 primum ambas de more manus, (atque) induit ambas  
86 purpureis plantas soleis : obnubit amictu  
87 candenti caput et latos circumtegit armos,  
88 inque crucem filo pectus super impedit acto :  
89 cui Pelusiaci talos currentis ad imos,  
90 inque sinus laxae byssi spatiantis honorem  
91 addit et adducta cohibens premit omnia vitta.  
92 Tum vero e collo tactum prius ore, labrisque  
93 demittit venerans limbum, quem sedula texitrix  
94 ternarum spatiis crucium distinxerat aequis.  
95 Postremo horrentem multum superinduit auro

96 et diti Serum contextam e vellere vestem.  
 97 Mox niveum tegmen, gemino cui vertice duplex  
 98 surgit apex, gemmisque procul radiantibus ardet,  
 99 protinus imponit capiti, quo taenia subter  
 100 demissa hinc atque hinc pendet brevis inde precatus  
 101 aeternum numen, labentem desuper auram,  
 102 sanctam auram, communem auram Natiq̄ue, Patrisq̄ue  
 103 toto animo, tota fundit pia murmura mente  
 104 cer(nu)us et verbis, precibusque potentibus ipsum,  
 105 ipsum unum presso ore Deum, cui pontus et aether,  
 106 cui parent elementa, vocat : venit ille vocatus  
 107 caeleste in crustum et donum (admirabile) Noae.  
 108 Inde autem postquam precibus, sacrisque litatis  
 109 casta sacerdotum series praecessit euntem,  
 110 succedunt proceres, mox turba incondita vulgus,  
 111 longaeuque senes, nec non longo agmine matres  
 112 omnia succensis illustrant compita flammis :  
 113 densa diem, Solemque suum funalia vincunt.  
 114 Ille Deum, genitumque Deo, sanctamque parentem  
 115 voce vocat, caeloque animas, mentesque receptas,  
 116 ordine quamque suo : vocem chorus omnis eadem  
 117 una iterans implorat opem, qua labibus olim  
 118 placatus nostris, oculos mortalibus aequos  
 119 advertat miseris alti regnator Olympi.  
 120 Haec postquam repetita, die sancteque, pieque  
 121 altera et alterius festo lux agmine vidit,  
 122 rege salutato senior discessit Alethes,  
 123 nobilium in primis juvenum comitante corona.  
 124 Quaque adeunt, certis implent rumoribus urbes,  
 125 oppidaque Italiae : bellum exitiale parari  
 126 in Turcas, Arabasque feros, divinitus actam  
 127 advenisse diem, poenas cum penderet hostis  
 128 sacrorum, ararumque Dei, cum libera collum  
 129 exueret Solyne, flueret jam major Orontes,  
 130 ac caelo grates ageret Nicaea, Tyrusque.  
 131 Daunius haec primum, qua panditur Appula tellus,  
 132 audiit et pelago quae brachia porrigit Ancon,  
 133 dives opum, dives pictai vestis et auri.  
 134 Nec non et bellum Rubicon indicere suetus  
 135 hostibus imperii sed nunc civilis amator  
 136 dissidii et patrio qui sanguine foedus abundet.  
 137 Quin pater Eridanus, populi quem mille fluentem  
 138 a dextra, laevaue colunt, qui dissecat arva  
 139 Insubrum, superumque rapax defertur in aequor,  
 140 talibus impulsus monitis commovit ad arma  
 141 ipse suos, miroque animos calefecit amore  
 142 bellandi atque Asiae campos, Syriaeque videndi.  
 143 Mox et Inalpini fama inflammantur eadem,  
 144 Allobrogisque olim rebus gens laeta novandis  
 145 illa quidem, sed nunc regum studiosa suorum.  
 146 Ergo ubi jam Graias horrendi verticis Alpes,  
 147 duraque piscosi superarunt saxa Lemani,  
 148 quaque Araris, Rhodanique una se flumina jungunt,  
 149 accelerant gressus, Nannetumque arva petentem  
 150 et cursu ingenti certantem atque amne Garumna  
 151 transmittunt Ligerim et celebri clarissima fama

152 moenia, quae gelidis Elaver praeterfluit undis,  
153 adveniunt, rigidi subeuntes ardua montis.  
154 Huc Latiae Pater excelsae qui praesidet arci,  
155 terrarumque omnem moderatur legibus orbem,  
156 accierat reges, populisque aeterna ferentes  
157 jura sacerdotes(que), viam, quae tendit ad astra,  
158 ostendunt mediis inter vaga flumina Celtis.  
159 Huc ubi Iapygia venisse ex urbe profectos  
160 audiit ad sese summus Pater, ilicet omnes  
161 imperat hospitio recipi, paucosque moratus  
162 inde dies, dum se longo recreare labore  
163 possent et memori mandata revolvere mente.  
164 Mox autem rerum custodem in tecta senatum  
165 advocat atque una seniore accersit Alethem.  
166 Convenere patres, lectissima corda, suaque  
167 unanimes clara sublimem in sede locatum  
168 Pontificem densa circumsedere corona.  
169 Affuit et procerum virtus et maxima vulgi  
170 undique convenit vis inconsulta, procaxque.  
171 Ac veluti ingenti vitiosae ex ilicis alveo  
172 corticibusque cavis densae simul undique nubes  
173 egrediuntur apum, volitantque ad florea Tempe,  
174 rura catervatim nusquam tamen una petentes ;  
175 sed varios vario populantes agmine saltus.  
176 Haud aliter quicumque urbem, quicumque colebant  
177 Arvernorum agrum, diversa e parte ruebant  
178 in tecta et sacri palatia celsa senatus.  
179 Protinus ingenti strepitu completa remugit  
180 regia et insueto gemuit sub pondere tellus,  
181 pulvereamque altum prorupit in aera nubem,  
182 dum teritur pedibus venientum et pressa fatiscit :  
183 quorum alios propere ingressos spatiosa recepit  
184 aula, alii sub porticibus consistere jussi  
185 vestibulum ante ipsum creber nam rumor ad aures  
186 jamdudum acciderat cunctorum, ab Iapyge rege  
187 mitti oratores, longinquaque bella parari.  
188 Ergo ubi consessu in medio data copia fandi  
189 atque alii tacuere omnes, sic infit Alethes.  
190 "O Pater, o custos populorum, o maxime, cujus  
191 discedens terris, qui nunc tenet ardua caeli  
192 astra Deus, certae voluit committere curae  
193 cunctorum, quicumque aura vescuntur inani  
194 Christicolae, rituque pio assuevere, salutem ;  
195 venimus extremis Daunorum a finibus usque,  
196 emensi Italiae campos, caeloque minantes  
197 et glacie rigidas, nivibusque perennibus Alpes :  
198 venimus huc celeres, jussit ceu maximus armis,  
199 maximus imperio et pietate insignis et uni  
200 ipse libens tibi qui sese et sua regna suosque  
201 subjicit et fasces ultro, saevasque secures  
202 Roberti proles magni Boemundus avitas :  
203 quas Siculi, quas Ausoniae pars maxima, quasque  
204 Illyrii, Graiique omnes venerantur et horrent.  
205 Ille dare in primis sua nos haec oscula jussit,  
206 quae damus et sanctis advolvimur usque volentes.  
207 His pedibus, coramque genu Sanctissime flexo

208 numen adoramus praesens, quo limina caeli  
 209 clausa piis aperis et aperta nocentibus obdis  
 210 certus, iterque hominum nullo reparabile nisu  
 211 obstruis aeternum, sontesque ad Tartara trudis  
 212 impia, ubi certae certam spem quisque salutis  
 213 abjicit et lento consumitur impius igni.  
 214 Mox si forte aliquas generosa pectoris iras  
 215 excitat exoriens Persarum in finibus hostis,  
 216 dum cladem Europae infandam, exitiumque minatur,  
 217 dumque aras et templa Dei, dum funditus imis  
 218 eversurum animis verae pietatis honores  
 219 sperat, opes Asiae late populatus et urbes ;  
 220 hoc uno si forte metus, quo certius ullus  
 221 haud turbare potest mentes, animosque piorum,  
 222 sancte pater (ceu fama refert vulgata) moveris,  
 223 ipse opibus regni, quascumque habet, ipse vetustae  
 224 militiae cunctis se viribus adiuturum  
 225 conatus, nullasque vices bellique, domique  
 226 vitaturum umquam spondet, modo justa parentur  
 227 arma, quibus Turcarum acies, Arabumque rebelles  
 228 perdomitae nostris cedant legionibus agros,  
 229 oppidaque et populos, quorum cervicibus haeret  
 230 turpe jugum, pater, an potius miserabile dicam ?  
 231 Dicam utrumque equidem, nec dicto ludar inani.  
 232 Ecquis enim nescit nostrorum crimine patrum  
 233 crevisse et partis Latium spoliasset trophaeis ?  
 234 Dum se desidia dedunt, dum corpora bello  
 235 fortia desuescunt, dum se somnoque, ciboque  
 236 enervant, odiisque animos civilibus implent :  
 237 sic stravere viam nostram, qua invaderet audax  
 238 hostis et Aegaeas sese penetraret in oras  
 239 et campis Asiae et Libyae poteretur opimis.  
 240 Ac nunc ille quidem Solymae (proh dedecus ingens)  
 241 regnat ovans, Christoque Deo multo ante sacratas  
 242 funditus evertens (quae quis tristissima fando  
 243 temperet a lacrimis ? ) Tolli jubet impius aras ;  
 244 proque aris, templisque suis stabula alta reponit  
 245 dirus equis, nostro quos sanguine pascit, alatque :  
 246 fretus ut iis miseras misero premat undique gentes  
 247 servitio et dura jam compede vinciat orbem  
 248 terrarum, ac media dominum se sistat in urbe,  
 249 pressurus mox colla jugo tibi Galle, tibique  
 250 Germane armipotens, tibi dulcia pignora natos  
 251 ablaturus, ut in mores, ritusque nefandos  
 252 conjiciat, castasque nurus, tenerasque puellas  
 253 e gremio matrum raptas ad stupra reservet.  
 254 Et, quos ad laudem et decora alta Britannos, quosque  
 255 Ausonia et felix ad spem virtutis avitae  
 256 Europa extulerat mater, nec ad ulla creatat  
 257 servitia et labes, ignominiosaque vitae  
 258 dedecora, ingenuos ollis abolentia fastus  
 259 et quicquid virtutis habent a stirpe relictum,  
 260 ad sese abductos (heu dira opprobria) cogat  
 261 jungere semiviros obscaena, incestaque lecti  
 262 foedera, vel Caribus lixis inhonesta, Syrisque ;  
 263 membraque praeduris sectos persaepe flagellis,

264 aut foribus vigiles astare ad limen, herilisque  
 265 observare oculi nutus et verba potentis ;  
 266 aut ancillarum conclusos molibus altis  
 267 custodire greges, quibus improbus ille tyrannus,  
 268 ille Dei, nostrumque hostis teterrimus omnium  
 269 praeficit exsectos ad munia foeda ministros  
 270 et tamen haud magnum fuerit vicisse superbos,  
 271 elatosque animis populos, ubi vincere sueta  
 272 assuetas vinci nulla formidine gentes,  
 273 illa olim redeat nostra in praecordia virtus.  
 274 Namque Itali si forte duces, acresque Britanni  
 275 et Galli coeant una socia arma ferentes,  
 276 seque adeo in privas acies, privosque maniplos  
 277 singillatim omnes populi secernere pergant,  
 278 Abdaridas quotiens in pugnam atque arma vocarint,  
 279 praestabunt numero ; quamvis certamine in ipso  
 280 privatae acies privos adeant peditesque, equitesque.  
 281 Ergo age sancte Pater, quoniam, quod poscere votis  
 282 tota videbatur jampridem Europa, quierunt  
 283 mota odiis inter populos civilibus arma  
 284 et se cessurum fratri Boemundus avitis  
 285 finibus imperii spondet, regnisque paternis,  
 286 scilicet et circum florenti milite septum  
 287 aggressurum armis Asiae, si jusseris, oras :  
 288 vel quemcumque pio statues praeponere bello,  
 289 illius auspiciis in proelia semper iturum :  
 290 aggredere ingenti dignum pietate, quod ulla  
 291 non abolere dies, memorique evellere mente  
 292 possit opus, non ulla animis delere vetustas :  
 293 vel si se toto permisceat aequore tellus  
 294 et rapidis summus conflagret ab ignibus aether,  
 295 absumens aevi monimenta aeterna prioris :  
 296 aggredere o pater atque Asiae miserere, tuum quae  
 297 auxilium implorans, ad te post funera mille,  
 298 mille hominum caedes et versas funditus arces  
 299 confugit et supplex oculis te respicit unum,  
 300 unum orat Solymae plebes miseranda, quod hosti  
 301 serviat Abdaridae, quod iniqua facessere jussa  
 302 cogatur : sed quae nil ferre dolentius umquam  
 303 posse putet, quam quod dominis servire profanis  
 304 illam urbem videat, cujus nulla orbita, nulla  
 305 sint loca, quae Christus pedibus nos presserit et quae  
 306 non habeant nostrae vestigia fixa salutis.  
 307 Haec Boemundus et haec Syriis qui nuper ab oris  
 308 nuntiat adveniens gravia et miseranda relatu  
 309 cuncta quidem, sed longe ipso teterrima visu ;  
 310 ac se praesentem praesens unum omnia saepe  
 311 perpessum et flagris caesum servilibus artus  
 312 testatur, dum sancta pius loca visit et arae  
 313 adsistens humilis divinum numen adorat,  
 314 hic vester, vestra in patria jam natus et altus,  
 315 civis et a puero sanctae vetus incola eremi."  
 316 Haec postquam fari desit grandaevus Alethes,  
 317 cunctorum assensus procerum, vulgique secutum est  
 318 murmur, ut Alpinis cum flabra increscere silvis  
 319 incipiunt, pulsumque aura nemus omne remugit.

320 Utque etiam Zephyrus tumidum cum verberat aequor,  
 321 exagitatque ruens fluctus stridentibus alis,  
 322 scinduntur spumae et scopuli sparguntur acuti.  
 323 Atque aliquis prope se stantes affatus amicos :  
 324 "O utinam vera ut nobis oracula fudit  
 325 iste senex, ita Pontifici videantur et omnis  
 326 protinus Abdaridas Europa armetur in hostes."  
 327 Haec ille. Ast alter : "Subeat modo pectora talis  
 328 cura patrum, me me in partem misisse pericli,  
 329 communique operam juvet impendisse labori."  
 330 Sustulit inde oculos summus pater atque verendae  
 331 majestate manus agere alta silentia jussit :  
 332 oraue prolixa penitus canentia barba  
 333 et multis longae rugis inarata senectae  
 334 vertit ad affusam vulgi, procerumque coronam  
 335 atque haec sedata maestus sic voce locutus.  
 336 "Non his, o procerum lectissima pectora, quae nunc  
 337 audistis, resonat primis conquestibus aures  
 338 nunc primum : fletus quoniam, lacrimasque dederunt  
 339 saepe alias oculi et luctu mens victa resedit  
 340 ipsa suo, dum maesta nihil superesse videret,  
 341 auxilium unde aliquod miseris afferret, opemque :  
 342 tanta olim populos discordia, tantus ubique  
 343 seditionis amor reges in bella vocarat,  
 344 quorum armis, quorum in primis virtute decebat  
 345 defendi imperii fines : procul undique pelli  
 346 Abdaridas ; Solymae jus libertatis ab ortu  
 347 scilicet, inque caput nostrum sine more ruentis  
 348 turbinis, horrida postquam cecidere ruina  
 349 omnia, quae medii disternat unda profundi,  
 350 oppida et Europa longe discludit ab alta.  
 351 Sic tibi, summe Deus, scelerum certissime, vindex,  
 352 cunctorumque operum iudex aequissime, visum.  
 353 Nunc autem quoniam, quod nec conatibus umquam,  
 354 nec votis cessit nostris, quod oportuit, ullis,  
 355 unanimes vincit felix concordia fratres,  
 356 Ausoniis quorum late dominatus in oris,  
 357 gratia magna tibi regum Deus armipotentum,  
 358 mentibus infundis caecis qui lumen, agisque  
 359 et cohibes, quandoque libet, populosque, ducesque.  
 360 Magna quidem sese rerum atque inopina facultas  
 361 offert, o dubii fidissima robora belli,  
 362 o gens armorum studiis exercita Galli ;  
 363 qua cupide arrepta, quis non intelligit unis  
 364 cessurum tanti decus indelebile facti :  
 365 cum praesens Gallos, cum sera fatebitur aetas  
 366 ejecisse Asia e media, corda impia, Turcas :  
 367 cumque urbs sancta Dei Solyme, cum dives Idume  
 368 juris facta sui dicet, se fortibus ausis  
 369 deberi vestris vestra virtute redemptam ?  
 370 Gallorum proavi dextris victricibus usi  
 371 atque animis nullum docti praestantibus usquam  
 372 posse iter occludi, quamquam insuperabile, quamquam  
 373 rupibus obseptum vastis atque undique tutum  
 374 defensore suo ; tamen hi magnamque, bonamque  
 375 Italiae partem quondam tenuere, colonis

376 ejectis, qui tunc illic habuere, marisque  
 377 Ionii superum permensi classibus aequor,  
 378 substructam Delphis mendacis Apollinis aedem,  
 379 aedem auro et gemmis nitidam, sectoque elephanto  
 380 conspicuam et positis opulenta sacraria donis,  
 381 vertere in praedam et populos uno agmine adorti  
 382 in media potuere Asia componere sedes,  
 383 indereque aeternum victis de nomine nomen.  
 384 Et quota Gallorum pars tum fuit illa juvenus ?  
 385 Nec numero certe vobiscum aequanda, nec armis :  
 386 nec pariter belli dubiis exercita rebus,  
 387 sed vaga et imperiis ductorum incommoda pubes.  
 388 Adde quod auspiciis falsorum impulsa Deorum,  
 389 finibus egressa e patriis aliena subegit  
 390 regna tamen, domuitque utros feritate tremendos.  
 391 Vos, quibus ante alias summa est praestantia gentes,  
 392 sive animos, sive egregias spectabimus artes  
 393 militiae et firmas robusto in corpore vires ;  
 394 vos, victor quibus ipse Deus, Deus ipse praeibit  
 395 Christus ovans, circumque atra formidine cinctus  
 396 fulguraque et rapidas demittet ab aethere flammam  
 397 hostilem in turmam, inque acies, inimicaque castra ;  
 398 vos cultu gens una pio gratissima caelo,  
 399 natam in servitium gentem atque infensa Tonanti  
 400 municipia, e Scycticis nuper digressa cavernis,  
 401 non modo regna metu vestra ut solvatis ab atro  
 402 omnibus instantis tam dira a gente pericli ;  
 403 vestra sed ut virtus miseranda ergastula frangat  
 404 Christiculis Asiae, Libyaeque patentis alumnis,  
 405 invasisse pio dubitatis impia bello ?  
 406 At non ille tuus semper memorabilis heros,  
 407 ille tuus quondam fortissima Gallia, ductor  
 408 Martellus, numero quamvis et viribus impar,  
 409 Abdemarum Libyae victorem in regna ruentem  
 410 vestra et Aquitani late fecunda tenentem  
 411 arva soli et circum magnis legionibus auctum,  
 412 occurrens mediis dubitavit sistere campis,  
 413 Celtarumque oris populos prohibere rebelles.  
 414 Ille igitur multo tepefecit sanguine campos  
 415 atque cadaveribus Ligerim complevit inultis :  
 416 et terram innumeris caesorum intexit acervis,  
 417 nullus ut ad diros remearit nuntius Afros  
 418 excidio ex tanto ; sola res didita fama  
 419 Abdaridum, qui longe aberant, tum perculit aures.  
 420 Nec nos decipiat, nostris quod longius absunt  
 421 finibus et caedes alio miscentur in orbe :  
 422 praesto aderunt, ferroque omnes atque aere corusci,  
 423 ulturi strages, quas acceperere suorum.  
 424 Omnis enim iratis facilis via quicquid et illic  
 425 nunc perit, Europae toti perit ; impia si non  
 426 gens exstincta cadat, pia gens cadat omnis oportet.  
 427 Namque ut nulla lupis pax est et mitibus agnis :  
 428 sic et amicitiae ratio, sic jusque, fidesque  
 429 nulla potest inter natos Caelique Erebi,  
 430 esse umquam : vigeant atris infecta necesse est  
 431 corda odiis ; quamquam interdum concordia discors

432 distinet assultus illorum et comprimit iras,  
433 donec ad insidias rursus, caedemque relecti  
434 fallaces animos, perjuraque foedera vertant.  
435 Ergo agite, o juvenes, tantorum sanguis avorum,  
436 certa ducum soboles, rerum spes una labantur,  
437 hoc vos tam justum vobis deposcite bellum.  
438 Ite, aperite viam ferro : vos fortia fortes  
439 facta decent ; ignavia aliis sint otia cordi,  
440 quorum praeclarae tangit praecordia laudis  
441 nullus amor, nullo ad magnas spes suscitatur aestu  
442 gloria, nulla domi majorum inflamat imago.  
443 Ipse sua vos voce vocat Deus ; ipse paravit  
444 jamdudum vobis Asiam victoribus omnem,  
445 quam mox imperio devinctam et lege regatis.  
446 Quamquam aliter si tota cadat res (omen abesto  
447 triste procul, potiusque Arabas se vertat in hostes)  
448 expectare tamen caelestia praemia vestri  
449 conatus, vestrum cui non optabile ? Cui non  
450 et turpe et miserum rediturae parcere vitae ?  
451 Nec spatium angustum brevis et mutabilis horae,  
452 aeternae, ac certae praepone velle juventae  
453 et circumscripto nullis a finibus aevo ?"  
454 Vix ea fatus erat, procerum cum coetus ovantem  
455 sustulit exsultans clamorem ad sidera, qualem  
456 nubibus abruptis dare saepe tonitrua suerunt,  
457 poscentes bellum, seque in longinqua vetantes  
458 tempora perplexis differri ambagibus, idque  
459 unum omnes ore exclamant, unum ore frequentant.  
460 Vult Deus hoc fieri bellum, jubet arma moveri  
461 haec Deus et specubus resonans respondet ab imis  
462 vox eadem : quin ipsae etiam cecidere volantes  
463 tecta domosque super sublimi ex aere lapsae.  
464 Non secus ac Boreae cum jam frigentibus auris  
465 impulit autumnus steriles a vertice silvas ;  
466 arentes labuntur humi, ramosque relinquunt  
467 aereos, passimque fluunt ex arbore frondes :  
468 aut cum maturas decussit ab ilice glandes  
469 horridus, ac suis dat pabula laeta subulcus.  
470 Intremuere Alpes, fluviisque exterritus unda  
471 substitit : atque amnem Ligeris, cursumque repressit  
472 illicet et Rhodanum Volcae stupere morantem  
473 et sese extremo revocantem ab litore Rhenum.  
474 Jamque adeo clamor cum consedisset et omnis  
475 conventus procerum, vulgusque et turba sileret,  
476 percussus subito sanctus Pater omine mentem :  
477 "Extudit hanc vocem vestro Deus (inquit) ab ore,  
478 extudit o proceres, crebroque iteravit eandem  
479 ille Deus, qui se vobis, comitemque, ducemque  
480 exhibet atque animos stimulis accendit acutis.  
481 Subjicit ille faces, quibus inflammatus ad arma  
482 tam pia sollicita pertinet pectora cura  
483 quisque sua, reddatque parem se fortibus ausis.  
484 Vos igitur posthac, quoties il bella, necesque  
485 ventum erit, afflati quam nunc quasi numine vocem  
486 pectore fudistis, memores, repetatis et una  
487 illa eat incepto ceu cognita tessera bello.



488 At tu, clare senex, cujus gratissima nostris  
489 mandata invicti regis vox auribus affert,  
490 in patriam cum te referes, refer ordine quicquid  
491 egimus atque illi grates age nomine nostro  
492 ingentes : hortare tenax persistat, idemque  
493 urgeat incoeptum cunctis memorabile saeculis ;  
494 seque suae egregios causa pietatis honores  
495 speret adepturum capta admirabile urbe.  
496 Nunc autem tanto tantorum ex agmine patrum  
497 ecquis erit, nostro qui nomine primus amicas  
498 consecrari acies poscat sibi et addere sese  
499 audeat, his animo nusquam, nec viribus impar ?"  
500 Vix haec fatus erat, gemini cum sede relicta  
501 surrexere viri, latum quos tonsus in orbem  
502 sacrati capitis vertex, quos linea vestis  
503 circumiens humeros operit candore nivali :  
504 hi sibi commissos fidei, curaque perenni  
505 insigni populos animi probitate regebant,  
506 rite ministerio sacrorum et munere functi  
507 Pontificis, cunctos ceu pignora cara fovebant,  
508 Addemarus Bitrux et Narbonensis Hilelmus :  
509 ambo aetate pares, pariterque ad jussa parati,  
510 coeptaque ad optatum cupidi perducere finem ;  
511 ambo alacres vitam, praesens si postulet usus,  
512 fundere et a claris ambo majoribus orti :  
513 sed qui divitias et nobilitatis honores  
514 promeritis hominum longe postponere suessent :  
515 una utrisque eadem virtus, pietasque ferebat  
516 ingentes animos famamque et amabile nomen :  
517 illi inter Celtas et proxima rura Cadurcis ;  
518 huic inter populos, Isarae qui fluminis undam  
519 suscepturam aliud celebri mox nomen ab amne,  
520 quique tuos sparsis incerta Druentia ripis,  
521 dum Rhodanum ingrederis, tumidumque excurris in aequor,  
522 epotant latices atque arva feracia versant.  
523 Surrexere igitur quamprimum e sedibus ambo,  
524 atque humiles adiere Patrem : tum poplite flexo  
525 ad terram, pedibus dederunt sancta oscula sanctis :  
526 post autem Addemarus supplex sic voce profatus.  
527 "Haud equidem, tanto quod nos dignemur honore  
528 Sancte pater, viresve pares satis esse putemus  
529 tanto oneri et tantae nostros supponere moli  
530 insuetos humeros, ultro nos, nostraque primi  
531 Christicolum audemus communi offerre salutem.  
532 Sed quoniam injussi mandatum linquere munus  
533 esse nefas scimus, ne cum custodia longe  
534 acris abest, pleno lupo insidietur ovili  
535 atque animas ovium raptarum in tartara secum  
536 ducat ovans, ideo nosmet modo sistimus ipsi  
537 sanctos ante pedes, solvique a lege rogamus.  
538 Ibimus unanimes quo tu, Sanctissime, cumque  
539 jusseris et populos ritu lustrabimus illo,  
540 quem semper coluit pietas sincera, colitque.  
541 Ibimus atque armis, opibusque et sanguine nostro  
542 privati socios et tanta juvabimus orsa.  
543 Nec nos militiae nobis deprecemur ullum

544 munus et in nostros jus exercere tribules.  
545 Unum illud concede Pater, capiamus ut arma,  
546 inque hostem adversum servata lege ruemus.  
547 Hoc par erit ; praeaeant alii, nos castra sequemur ;  
548 et primi ante acies, pugnam cum miles inibit,  
549 corpora, quaecumque haec fuerint, sistemus uterque ;  
550 morte obita ut nostris animos addamus, humumque  
551 sanguine perfusam Christo sacrasse feramur."  
552 Haec pius Addemarus : nec multum deinde moratus  
553 pauca quidem, sed plena Deo, subjecit Hilelmus.  
554 "Quicquid erit, seu vita mihi comitabitur usque,  
555 sive illam in mediis continget ponere campis,  
556 cuncta animo stat ferre alacri. Tu pectoris hujus,  
557 Sancte Pater, maculas, quoniam potes, elue cunctas."  
558 Dixerat. Ille autem lacrimantia lumina caelo  
559 sustulit et duplices palmas cum voce tetendit.  
560 "Christe Deus, qui corda hominum succendis et uris  
561 igne novo, miroque novae pietatis amore,  
562 ardorem hunc animis reliquorum immitte, tuosque  
563 da, Pater omnipotens, laetos ex hoste triumphos  
564 ducere et in patriam victricia signa referre.  
565 Vos autem illustres animae, vos ite, vicemque  
566 vos explete meam : dictis et pondus inesto.  
567 Seu bona, sive etiam dira atque infanda precentur  
568 in meritos, jubeantque aris procul esse profanos  
569 Christicolum et communis sonte absistere coetu :  
570 jus tamen Addemarus legati et nomen habeto,  
571 in partemque oneris tanti succedat Hilelmus,  
572 tempus ubi et rerum praesens sic exigat usus."  
573 Haec Pater. Ast illi suscepto munere laeti  
574 discessere ambo, solitaque in sede quierunt.  
575 His actis animum divina impulsus ab aura  
576 ante alios, florensque annis juvenilibus Hugon,  
577 Hugon silvarum latebras consuetus iniquas  
578 quaerere et informes ursos prosternere, aprosque :  
579 regia progenies ; sed qui, nec bella, nec hostes  
580 nosset adhuc, laudisque avidus tamen unius esset  
581 et nota virtute duces complexus amaret :  
582 eximit e numero sese tum primus et ultro  
583 Pontificis praesto parentem hortatibus offert.  
584 Ad quem tum senior Pater est his vocibus usus :  
585 "Macte nova virtute, novum sic fortibus ausis  
586 ad superos aperitur iter ; te nobile quondam,  
587 aeternumque decus memori clarabit in aevo,  
588 grataque te solum reliquis tribuentibus omni  
589 heroum e numero, qui factum illustre sequentur,  
590 posteritas vero Magnum cognomine dicet :  
591 sic volumus, sic nostra libens Deus omina firmet."  
592 Tum vero proceres delecti accedere et una  
593 militiae certatim omnes dare nomina sacrae.  
594 Quorum se longe princeps Goffredus agebat  
595 Tullingus, cunctos humeris et vertice toto  
596 exsuperans, forma insignis, mediaeque juventae  
597 ora intonsa ferens et majestate verenda,  
598 jucundus populis, nec formidabilis ulli,  
599 militiam caste veterum de more colebat :

600 quin et flagitiis dignas imponere poenas  
601 suetus, inoffensas servabat pectoris iras.  
602 Illum olim Eustachio peperit formosa marito  
603 Ida ducum, regumque parens : genitoribus Ida  
604 clara suis, ritusque pii sanctissima cultrix,  
605 praescia venturi vates. Ast acer in armis  
606 Eustachius, Morinos fuerat qui maximus inter  
607 et Gessoriaci rerum flectebat habenas,  
608 jucundo spolians ipsum se nomine patris,  
609 misit in imperium, Leucis quo libera solus  
610 jura daret, pacisque unus, bellique gerendi  
611 arbiter, ut primum liquisset avunculus auras  
612 aetherias. Ergo is regni moderatur adepti,  
613 artibus et clarus pacis, sed clarior armis  
614 et ducibus circum et praestanti milite saeptus  
615 Pontificis placida sic voce est fatus ad aures.  
616 "Summe Pater, cujus nutus et verba jubentis  
617 qui vultu, qui secum animo contempserit audax,  
618 ille hominum dignus qui coetu exclusus ad hostes,  
619 urbe, domo, patrioque solo vagus, exul, inopsque  
620 atque exsors erret vitae communis et expes.  
621 Sed si militiae quis detrectare laborem  
622 hujus amet, pressasque jugo crudeliter urbes,  
623 seu Libyae, seu sint Asiae, sanctumque Sepulchrum,  
624 noster ubi plagis jacuit confossus iniquis  
625 servator Deus, aeternae via sola salutis,  
626 eripere e manibus Turcarum negligat ; ille  
627 ille, Pater, manes diris defixus ad imos  
628 atque ad nigrantum sedes, loca senta, meretur  
629 sentiat ut (se) trudi vel vivensque, vidensque.  
630 Nemo igitur, nisi fallor, erit tam turpiter ortus,  
631 nemo animo tam demisso contemptus, inersque,  
632 tamque sui socors (utero modo terra cadentem  
633 Gallia materno cupidis exceperit ulnis)  
634 abneget ut tantis se nunc accingere coeptis,  
635 ipse equidem, de me quicquid promittere possum,  
636 praesto adsum, vitae, quaecumque est, prodigus hujus  
637 atque hoc in bellum regna effusus, opesque."  
638 Haec ubi dicta dedit Leucorum maximus heros,  
639 pauca refert Pater Urbanus : "Quas dicere grates,  
640 quasve referre parem tibi, dux fortissime ? Quando  
641 nil reperire queam, quod non praestantibus impar  
642 sic meritis, quae te illustrem super aethera tollunt.  
643 Ipse Deus, Deus ipse dabit, mihi crede, laborum  
644 praemia magna tibi, Solymae cum ceperis arces,  
645 signaque submittens sancto victricia templo,  
646 feceris in media nudis vestigia plantis  
647 urbe et adorandam supplex extruxeris aram.  
648 Interea capiti tegmen, cui fausta precati  
649 rite sumus verbis solemni more peractis,  
650 impositum subeat meriti diadematis instar :  
651 et lateri hic noster laevo tibi pendeat ensis,  
652 qui fuget hostiles subito terrore phalanges."  
653 Haec memorans, laetae laetus dedit oscula fronti  
654 et stimulis auctum magni dimisit amoris.  
655 Huic se, Tectofagas inter qui maximus ibat

656 imperio, adjunxit comitem ; cui vivida bello  
657 dextera, consiliisque habitus fidissimus auctor :  
658 omnia mature properabat et omnia certum  
659 ad finem voti compos perducere suerat,  
660 quae peragenda forent : quando nec doctior alter,  
661 seu librare metum, stimulos sive acribus acres  
662 addere et armatas acies atque agmina certis  
663 instruere ordinibus, nec quisquam impellere turmas  
664 promptior in caedes, inimicaque castra, manusque  
665 conserere et pugnae loca commoda nosse futurae :  
666 seu valles, collesve humiles, campive jacentes  
667 instent, seu saltus surgentis in ardua montis.  
668 Illi Atacem quicumque amnem, quicumque rapaces  
669 Illiberimque, Obrimque bibunt, quicumque palustres  
670 agrorum tractus habitant, ubi saepe latentes  
671 fuscina, dum limo innocui vescuntur et unda,  
672 perfossa defigit humo (mirabile) pisces.  
673 Illi etiam munitae arces, quas Cemmenus alto  
674 vertice habet, bellis penitus gens dedita parent ;  
675 parent et celebris cultissima rura Tolosae,  
676 quam gelidus pulchro praeterfluit amne Garumna.  
677 Huic galeam cono insignem, cristisque comantem  
678 dat Pater et pectus thorace inducit aeno ;  
679 verbaque pauca viro non rerum improvidus addit :  
680 "I, bone quo virtus tua te vocat, i, pede fausto,  
681 utque soles, patriam factis decorare memento."  
682 Inde animis, opibusque ingens et providus aestu  
683 ingenii, manibus promptus, facundus et ore  
684 insequitur Stephanus nulli virtute secundus ;  
685 si sit opus tacitas hosti componere fraudes,  
686 occultosve dolos celeri praevertere cursu,  
687 instantemque fuga sociis avertere cladem.  
688 Carnutum pubes, Senonumque effrena juvenus,  
689 laeta virum mediae versantem in limine vitae  
690 insequitur, quando consueta facessere tanti  
691 jussa ducis, permulta manu certamina belli  
692 contulit atque omnis prorsus discriminis expers  
693 saepe domum vacuo rediit tutissima campo.  
694 Illum igitur Pater Urbanus donavit euntem  
695 insigni clypeo, duplex cui circuit oras  
696 undique et in sese rediens subit aereus orbis,  
697 quaque superficies late patet, evomit umbo  
698 inducto ex adamante ignes, monstratque natantem  
699 delphinum, medio qui captet in aequore praedas,  
700 retibus inclusas praedas, inclusus et ipse ;  
701 e quibus ut primum libuit se carcere rupto  
702 liberet et tutas referat se tutus in undas :  
703 atque his ornatum verbis discedere jussit.  
704 "Quas artes olim belloque et pace decoras,  
705 dux animo pariter, dextraque invicte potenti,  
706 exercere soles, tecum sint usque ; nec ulla  
707 immemorem capiant sociorum oblivia, sed te  
708 excitet et virtus dubiis in rebus et acre  
709 consilium, quae juncta una tuta omnia reddant."  
710 Post autem venere duces, duo fulmina belli  
711 Roberti ; non illi, iisdem qui patribus orti,

712 sed qui diversa majorum a stirpe profecti,  
 713 non secus ac gemini fratres sese inter amarent ;  
 714 inque hostem pariter ruerent, gressumque referrent.  
 715 Idem utrique animus, caedisque insana cupido.  
 716 Alter ab Iceno natus patre ; regia cujus  
 717 sponte sua extremi faciebant jussa Britanni,  
 718 et Tule et rigido glacialis Hibernia caelo,  
 719 Oceano disjuncta procul : tamen ipse Caletum  
 720 litora servabat custos, populosque regebat  
 721 assuetos gladio pugnam committere et arcu.  
 722 Alter Rholonis proles fortissima Cimbri,  
 723 imperio qui Lexovios frenaret et armis,  
 724 Aulercosque et Nannetes : cui protinus uni  
 725 pareret gens, Oceanum quae spectat et Arcton ;  
 726 gens assueta leves in gyrum flectere habenas  
 727 assultantis equi et celerem convertere cursum,  
 728 inque hunc, inque illum tela intorquere, facesque.  
 729 Latum illi pectus, impexaque barba, genaeque  
 730 horrentes, rigidis adopertaque brachia setis :  
 731 caedem oculis, caedem vultu, caedem ore minatur.  
 732 Rebus in adversis ad agendum pronus et audax,  
 733 verborum longe parcissimus : unus avorum  
 734 qui facta egregiis aequare ingentia factis  
 735 vellet et in longum virtute extendere famam  
 736 ipse suam, seros olim quae clara nepotes,  
 737 ex se quod prodit, verum decus esse moneret.  
 738 Quin etiam, si quando hostes dare terga fugaces  
 739 cogeret atque acri premeret vestigia planta,  
 740 aequabat celeri Borealia flamina cursu,  
 741 usque adeo pedibus velox et corpore pernix.  
 742 Ergo utrique suam nodis atque aere rigentem  
 743 donat habere viris clavam, geminasque bipennes  
 744 urbanus ; placidoque haec insuper addidit ore :  
 745 "His olim Carolus Libycos est usus in hostes ;  
 746 illius his etiam in pugnam comes irruit Eudon ;  
 747 quos animi virtus ingens, quos dextra, fidesque  
 748 spectata egregii vinclo sociarat amoris :  
 749 accipite ergo hilares et spes hinc discite vestras."  
 750 At postquam cessere retro, vacuique patebant  
 751 unicuique aditus, dubius similisque timenti  
 752 advenit ora ferens casto suffusa rubore  
 753 Arpinus Biturix, quo non formosior alter,  
 754 nec juvenem quisquam robustior ; ille palaestram  
 755 exercere agilem, longaeque ad sidera discum  
 756 mittere er aérias vectem intorquere per auras ;  
 757 quin etiam armatus sublimem ascendere saltu  
 758 suerat equum, versoque super dare corpore gyros  
 759 aërios, seque ipsum alta componere sella :  
 760 rursus et in terram tergo revolutus ab alto  
 761 defluere atque levi vestigia figere planta,  
 762 "Non me quod ducibus credam, Sanctissime, tantis  
 763 aequandum et primi dignum cui dentur honores ;  
 764 his ego nec fastis, nec par aetate, nec usu  
 765 rerum ullo aequandus, magnis heroibus addam :  
 766 verum ut militiae duros perferre labores  
 767 incipiam atque artes bellorum his nosse magistris,

768 quicquid ero, tibi semper ero bellique domique.  
769 Nam me nullus amor patriae, me nulla parentum,  
770 quos ego composui dudum tellure sub ima,  
771 cura subit, dubium coeptis quae avertat ab altis.  
772 Praedia nec mea me mutare, urbemque pigebit,  
773 quam mihi decedens pater ipse reliquerat, auro ;  
774 tu modo virtuti, si qua hoc in pectore virtus  
775 esse potest, laetus linguaque, animoque faveto."  
776 Dixerat, at contra senior sic ore locutus.  
777 "O praestans animo juvenis, praestantior actis  
778 evasure tuis, non te virtutis egentem,  
779 seu sit Arabs, seu Persa fugax, seu Turca, videbit.  
780 Interea, nobis quem mater Iberia misit  
781 Sithonia conceptum aura, Zephyroque tepenti,  
782 portet equus, pugna qui multum exercitus acri  
783 irruit in medias acies, equitumque catervas  
784 aggrediens, rediit spoliis ornatus opimis.  
785 Haec Pater et stabulis promissum munus ab altis  
786 imperat educi ; circum ille hinnitibus auras  
787 personat et crebris cavat ictibus ungula terram  
788 et frenos mandens spumas agit ore nivales.  
789 Nunc parere manu doctus decurrit in orbes  
790 multiplices, seu dextra vocet, seu laeva ruentem :  
791 nunc etiam stabili firmans vestigia gressu,  
792 non secus ac scopulos, media constitit in acta,  
793 interdumque, vagae quoties laxantur habenae  
794 in spatium (vastum), rapidus praetervolat Eurus."  
795 Mox ingens, abiegra, gravis superadditur hasta,  
796 quam gelidae summis in verticibus Pyrenes  
797 expositam Boreae millesima viderat aestas.  
798 "Haec, inquit, Capeti numquam frustrata vocatus,  
799 cum res Gallorum primus sibi vindicat armis,  
800 Senonasque, Remosque jugo subjungit eodem :  
801 vade age et aeternum factis fer ad aetera nomen."  
802 Sustulit inde sacrae decus inviolabile dextrae,  
803 inque crucis speciem circumtulit. Ilicet omnes,  
804 deletis animo maculis juvenesque, senesque  
805 discessere illinc, seque ad sua tecta tulerunt ;  
806 inque vicem crebris acuunt hortatibus iras :  
807 totaque concepta flagrant praecordia flamma.  
808 Omnibus idem animus crudelem excindere gentem,  
809 ulcisci scelera et Solyos exsolvere duro  
810 servitio, populisque piis afferre salutem.  
811 Gallorum extemplo cunctas it fama per urbes,  
812 decretum in Turcas bellum : passim arma parari :  
813 certos esse (tamen), quorum invictissima virtus  
814 excierit fortes tanta ad certamina Gallos.  
815 Nec minus Italiae postquam pervasit ad oras  
816 nuntius atque avidas laetis rumoribus aures  
817 complevit populis, quos fida Britannia, quosque  
818 dives opum et praestans animis Germania nutrit,  
819 certatim expediunt et se belloque, viaeque  
820 injussi accingunt ; hic nervum explorat et arcum,  
821 hic ocreas multo circum squallore, situque  
822 perpolit obductas, galeamque ex aere nitentem  
823 induit atque humeris loricam obtendit ; aduncaequae

824 in gladios abeunt falces, abit omnis in enses  
825 vomis et alterni revomunt sua flumina folles,  
826 dum passim innumerae positae incudibus urbes  
827 tela novant, saevaque acuunt mucrone sagittas  
828 atque hastis, jaculisque addunt inamabile ferrum.  
829 Et spes quisque suas accendere promptus et acer  
830 castigare moras, socios hortatur et urget.  
831 Quae nos desidies, quae mollis inertia lentos  
832 detinet atque Asia jamdudum avertit opima ?  
833 Sunt vestes, sunt arma illic, sunt plurima equorum  
834 armenta et nusquam argenti vis major et auri.  
835 Haec illi, quos Belga pater collegit in unum,  
836 Belga Deo gratus, sed longe audacior aequo,  
837 quemque animi, non certa ducis praestantia raptim  
838 duceret, inque acres cupientem impellere hostes.  
839 Ille igitur festinus iter dum praecipit et se  
840 primus agit, vulgo accurrunt, exercitus ingens  
841 augetur magis atque magis, quascumque per oras  
842 fert gressum, innumeris viduat cultoribus agros ;  
843 inclyta quos eadem raptabat in arma voluntas.  
844 Parte alia misti populis comitantibus ibant  
845 heroes, supraque omnes capita alta ferebant  
846 illustres, veluti sparsa inter nubila quondam  
847 caelestes splendent radiis fulgentibus ignes ;  
848 majores ignes, primaque in nocte micantes.  
849 Quos aliquis forte aspiciens. "Quas, inquit, in oras  
850 hos juvenum flores, hodie, mea Gallia, mittis ?  
851 Et Ver ipsa tuum primum nunc demis ab anno,  
852 heroum dum te tantorum robore nudas ?  
853 Quo sine quis fines nostros tueatur, opesque ?  
854 Contra alius. Nescis quam sit fecunda virorum  
855 Gallia, vel sumptis quantae virtutis in armis.  
856 Vanaque formido te decipit et tamen istum  
857 terrorem Deus infidos avertat in Afros :  
858 Gallorumque decus laetis successibus auctet.  
859 Quod fore non dubiis sperat mens provida signis.  
860 Nam quis nunc tantis obsistere viribus ausit ?  
861 Ipsi Asiam infidi properent nisi dedere Turcae,  
862 undabunt subito madefacti sanguine campi,  
863 omniaque injecti flagrabunt oppida flammis.  
864 Sed tamen immensum miseris terraque, marique  
865 instar iter : tranandi amnes : superandus Amanus :  
866 expugnandae artes : bellum cum gente gerendum  
867 infesta et numquam quae fessa laboribus ullis,  
868 abstulit, invicti quaecumque habuere Quirites.  
869 Haec ille atque alii pagos et compita circum  
870 dum jactant eadem secum repetuntque, vicissim,  
871 ipsae etiam inter se nuptae, inuuptaeque puellae  
872 et fractae longa jamdudum aetate parentes  
873 templa adeunt, reditumque suis et laeta precantur  
874 eventa, ac multis onerant altaria donis.  
875 Post autem coram aggressae natosque, virosque,  
876 quaeque suum, tristi discedere voce queruntur.  
877 Nate meae quondam spes magna et sola senectae,  
878 ecquis praeterea miseram solabitur ? Ecquis  
879 ipse suis manibus morienti lumina claudet ?

880 Tu tamen incolumis (precibus Deus annuat aequis)  
 881 cum Solymam ingressus positas veneraberis aras,  
 882 atque animo supplex sancto advolvere Sepulchro,  
 883 nate, patris (si justa peto) matrisque memento."  
 884 Haec illa. At conjux juvenem complexa maritum  
 885 si qua tenet, mediis interserit oscula verbis,  
 886 inque sinum lacrimas fundens affatur euntem.  
 887 "Nam cur me miseram, desolatamque relinquis ?  
 888 Cur cupidam tecum non advehis ? Ipsa laborem  
 889 ferre viae, saevosque aestus et frigora possum.  
 890 Nil grave, quod tecum patiar, mihi cesserit umquam ;  
 891 sim modo juncta comes lateri ; sim debita lecti  
 892 pars et cura tui : te sarcina fida levabo :  
 893 te sequar et pro te saevis mea pectora telis  
 894 opponam, quotiens inimica in castra fereris."  
 895 At proceres, jamdudum armis, rebusque paratis  
 896 quisque suis, postquam sacris de more litarunt,  
 897 unanimes movere loco fulgentia signis  
 898 agmina et instructas ad sancta incoepta cohortes.

### LIBER TERTIUS

S\_3 v.1 Fama per Hesperias cum primum diditur urbes,  
 2 finibus e patriis facto simul agmine Gallos  
 3 exire unanimes, dulcesque relinquere sedes :  
 4 Ausoniae passim populi, gentesque Sicanae  
 5 conjurant : stimulisque acuunt haud mollibus iras :  
 6 nec jam ferre queunt Italos tam fortibus ausis  
 7 dissimiles pigro nimium torpere veterno ;  
 8 nec celeri ad laudem cursu praevertere quemquam,  
 9 oblitos decoris patrii et virtutis avitae.  
 10 Convenere igitur, quibus haud aversa voluntas  
 11 bellandi atque alio vitam sub Sole trahendi.  
 12 Protinus innumero completur milite tellus  
 13 Appula ; non illos piscosi compita Bari,  
 14 non pagi ingentes capiunt, non oppida quondam  
 15 nominibus celebrata suis, notissima fama :  
 16 Netion et Latii bustum lacrimabile Cannae.  
 17 Non Cilicis fecunda croci, fecunda ferarum  
 18 venatrix Celia et Canusi spatiosa vetusti  
 19 moenia, quae rapida praeterfluit Aufidus unda :  
 20 non, quae ductorem Lybicum florentis amore  
 21 virginis urbs potuit victum mollire, sed omnes  
 22 impediuntur agri : praesens ut cuique facultas  
 23 se dabat hospitiis et ubique incondita pubes  
 24 pernoctat, pedibusque terit conferta viarum  
 25 strata, nec hiberni terretur frigore caeli.  
 26 Quam jussi monitu postquam praeconis in unum



27 convenisse licum vidit rex Daunius et se  
 28 altius exstructa sublimem in sede locavit,  
 29 alloquitur mittens generoso e pectore vocem.  
 30 "Non equidem, o Italum flos, o delecta juvenus  
 31 Ausoniae, veterum sanguis redivive parentum,  
 32 quorum olim virtus gentes invicta subegit  
 33 quascumque Oceanus refluentibus alluit undis  
 34 et Sol e medio circumspicit aureus orbe,  
 35 ut vos ad tanti praesens decus hortet honoris,  
 36 grandiaque ingentis succedam ad praemia coepti,  
 37 nunc primum affari institui ; sed ut omnibus una  
 38 laetitiis aucti Divumque, hominumque parenti  
 39 suppliciter grates (nam res ita poscit) agamus :  
 40 sublatis quod regum odiis radicatus omnis  
 41 Europa in nostri conjuret nominis hostes.  
 42 Ipsaque, quae quondam misere converterat in se,  
 43 Abdaridis tandem decreverit arma tyrannis  
 44 inferre et Solymae sacrata ad moenia tutum  
 45 reddere iter, colloque piae juga demere gentis,  
 46 serva Palaestini quae nunc Jordanis ad undam  
 47 flens sedet atque aditu longe prohibetur ad aedem  
 48 servantem sancti monumentum insigne Sepulchri :  
 49 hic ubi Rex terrae, caelique aeterna potestas,  
 50 postquam illum gens dira trabi suffixit acernae,  
 51 occidit exstinctus, rediitque ad lumina vitae,  
 52 morte triumphata Christus Deus. Atque ubi grates  
 53 egerimus, factumque satis caelestibus aris  
 54 jam fuerit, tum carpere iter, conscendere naves,  
 55 aequoraque Ionii transmitters caerulea ponti  
 56 cura sit et nostros illuc contendere cursus,  
 57 quo commota suis jamdudum a sedibus omnis  
 58 Gallorum pubes, unaque Britannia florens  
 59 innumeris equitum turmis, peditumque maniplis  
 60 pergit et emensa est properans Rhenumque, Mosamque,  
 61 eversura Arabes Solymorum a sede tyrannos  
 62 scilicet aut vitam tantis positura sub ausis.  
 63 Quod decus, o socii, quis jam non credat emendum  
 64 vel vita, quaecumque sibi peragenda supersit ?  
 65 Ipse ego, cui tantum paret terraeque, marisque,  
 66 cui non argenti, non auri copia deficit,  
 67 quique adeo, si totam optem traducere vitam  
 68 delicias inter cunctas atque otia, possim  
 69 secura cum pace frui, tolerare labores  
 70 et varios belli casus, cupioque, voloque  
 71 ire viam primus, patriosque relinquere fines  
 72 atque omnes mecum, genitor quascumque reliquit,  
 73 vestrave jam peperit virtus mihi, ferre per undas  
 74 Ionias, mediosque hostes, quas partiar in vos  
 75 largus opes, superetque nihil, quod commodus ultro,  
 76 quo res cumque cadent, unum et commune mihi que,  
 77 et vobis haud esse velim. Non nunc ego primum  
 78 o socii, vos in belli discrimina duco,  
 79 externasque oras, inimicaque castra volentes.  
 80 Vos patris auspiciis mersistis in aequore classes  
 81 Euganeas, Graiosque acie fudistis adorti.  
 82 Tempore quo vestras, vestra est ea gloria, Thraces,

83       altaque Byzanti trepido concussa tumultu  
84       moenia terribiles iras timuere, manusque.  
85       Vos iidem me saepe alias comitemque, ducemque  
86       in pugnas, acresque hostes, flammasque secuti,  
87       prostravistis humi turres, coepistis et arces,  
88       ducentes vico claros ex oste triumphos.  
89       Nec praedae quisquam immunis discessit et expers,  
90       me praeter : quem nemo umquam tamen abneget ullas  
91       sustinuisse vices, durosque obiisse labores,  
92       vobiscumque sitim pariter tolerasse, famemque,  
93       horrida sub dio perpressum frigora et aestus.  
94       Quamquam regna manent illic opulenta, nec usquam  
95       et vis major opum et multarum copia rerum  
96       argenti cumulos plures promittit et auri :  
97       quaerere quos nobis solita virtute queamus.  
98       Atque haec ipsa a me minime memorata putetis,  
99       quod dubitem vestros ne animos inflammet ad arma  
100       gloria bellandi magis, an vesanus habendi  
101       cogat amor ; neque enim Ausoniam fas credere pubem  
102       et decus et laudem diti postponere praeda.  
103       Non ita nos proavi quondam docuere, patresque  
104       assueti duro longinqua lacescere bello  
105       imperia et certas victis imponere leges ;  
106       ut famam, nomenque sibi immortale pararent.  
107       Quod vos facturos si avis tamen abneget, idem  
108       abneget Ausoniis vos esse a patribus ortos :  
109       et me Gallorum prognatum a sanguine regum,  
110       quos pietas insignis et admiranda coegit  
111       gloria militiae semper comes, omnia vitae  
112       commoda jucundae penitus contemnere et unam  
113       se spectare animis et nobile sumere bellum :  
114       quo neque nos majus, neque post ulla audiet aetas."  
115       Talibus orantem dictis nihil addere miles  
116       passus ad haec. " Uni tibi, Rex invicte, videndum,  
117       quid statuas : nobis certum est parere jubenti.  
118       Nam neque tam longe tellus disjungitur ulla  
119       finibus a nostris, neque gens tam barbara mores  
120       exuit humanos, quo te fortissime ductor  
121       paeniteat, pigeatve sequi sic annuat ausis  
122       ille tuis, qui stelliferum fabricavit Olympum  
123       et coeptum fortunet iter ; nos agmine certo  
124       venimus instructi, rebusque ad cuncta paratis,  
125       militiae jam nunc nomen cuicumque daturi  
126       et vitam in cunctos alacres exponere casus,  
127       ac nullas vitare vices." Sic deinde locutus  
128       et verbis iisdem atque assensu exercitus uno,  
129       conticuit, subitoque ingens per cuncta cucurrit  
130       ora fremor : ceu cum pluviis furialibus aucti  
131       inter saxa ruunt amnes et in arva feruntur  
132       praecipites, placido sueti sua lambere fluxu  
133       septa prius, tenuique vado discludere ripas.  
134       At Robertiades dictis laetatus amicis  
135       subjicit. "O, decora Italiae, fortissima nostrae  
136       pectora militiae, non his sine numine Divum  
137       addixisse animum coeptis reor, omnia quamquam  
138       ante alacri semper studio, quae jussimus, ipsi

139 praestare in primis, confectaque reddere suestis,  
140 quando igitur vestro haec animo sententia sedit  
141 et mecum Adriaci juvat ire per aequoris undas,  
142 finibus inque Asiae bello nova quaerere regna,  
143 servitio Syriam longo, Solymamque levantes,  
144 quod superest, curate aliquo ne crimine mentes  
145 infectos videat Vesper vos crastinus et jam  
146 quisque sacerdoti supplex aperire paret se.  
147 Ut maculas, animo si quae insedere latentes,  
148 eluat, inque hostes Arabas pius induat (arma)  
149 et pius, ut primum puppi vocalis ab alta  
150 aere cavo signum dederit tuba, protinus actam  
151 velisque et remis properet conscendere classem,  
152 cessuram e portu mediae post tempora noctis,  
153 a terra exoriens ventus cum pellere fluctus  
154 incipit et puppes urget levis aura Favoni.  
155 Ite, bonos aurate animos, humilique precati  
156 voce Deum, quales cupere et sperare futuros  
157 nos decet, eventus tantis exposcite coeptis."  
158 Dixerat atque illi foribus per templa reclusis  
159 affusi passim proprias, facta impia, noxas  
160 auribus exponunt castis et ad illa paratis  
161 officia et veniam culparum ex more petitam  
162 nacti omnes, primam cum primum postera lucem  
163 extulit et terris Aurora affulsit apertis,  
164 Caelestem sumpserunt dapem : gratique, piique  
165 inter se amplexus dulces et amica dederunt  
166 oscula ; postremo transacti expleta diei  
167 perpetuis passim mensis jejuna cupido est.  
168 At cum pulsa fames, largeque epulata juvenus,  
169 sublataeque dapes : hi jam sermone quietos,  
170 oblectare animos : illi contendere cursu ;  
171 ast alii dura membra exercere palaestra :  
172 flectere equos, vibrare hastas, manibusque minaces,  
173 explorare arcus, jaculisque attingere signum,  
174 certatim granis librare per aera vectis.  
175 Pondera et ingentes saltu transmittere fossa.  
176 Urius interea, quo non praestantior alter  
177 praesagire auras, qua caeli parte ferantur,  
178 quae mare sollicitent, quibus et commota quiescant  
179 aequora : quaeque dies portendant certa serenos  
180 sidera, seu pluvias terris, imbresque minentur :  
181 Urius Aeolii soboles generosa Pelori,  
182 puppe gubernator residens ita fatur ab alta.  
183 "Quem votis optare licet, rex optime, ventus  
184 en vocat Ionias classem festinus in undas.  
185 Surge, age, tolle moras, naves exercitus intret  
186 omnis, ut in celerem quam primum ad saxa vadosae  
187 Illyriae tendat cursum, subeatque sonantis  
188 ostia Drilonis, procurvaque litora Lissi :  
189 portus ubi et tutae miles se credat harenae."  
190 Haec ille et regis jussu cava buccina Dauni  
191 imperat ad littus properare et scandere naves  
192 et laxos implere foros ; tum protinus omnes  
193 ad sua signa ruunt et scalas agmine complent.  
194 Ceu cum longinqua terrarum a parte volantes

195 advenere greges avium, densaque caterva  
 196 ingentes campos subter telluris inumbrant.  
 197 Mox medio e pastu quercusque, ornosque propinqua  
 198 certatim obsidunt silvae : variisque teguntur  
 199 arboribus ; pressi curvantur pondere rami  
 200 et nemus ingenti circum sonat omne tumultu,  
 201 compositae donec somno suadent requietem.  
 202 Et jam nox medium cursu superaverat orbem,  
 203 frigentesque imis flabant e vallibus aurae :  
 204 Urius in summa residens cum puppe magister  
 205 dat signum, solvique jubet retinacula classi.  
 206 Ilicet una omnes portu cessere relicto.  
 207 Quaque adeo sublatam alte fert regia flammam  
 208 puppis et Ionium rostro secat uncta profundum,  
 209 remigiis actae tendunt : mox carbasus auras  
 210 excipit, ac Zephyris implentur vela secundis,  
 211 spumeaque inflexas circumstrepit unda carinas.  
 212 Et jam purpureo crines infecta colore  
 213 aurora exoriens noctis restrinxerat ignes.  
 214 Cum procul arios montes Epirus et arduas  
 215 ostendit Macedum positas in collibus arces.  
 216 Illae iter incoeptum paragunt, urbemque salutant  
 217 Dyrrachium et litus sublatae ad sidera voces  
 218 dum feriunt, vastae responsant undique rupes.  
 219 Nulla tamen contra solito de more dabantur  
 220 laetitiae signa unanimis, quae Daunius heros  
 221 mirantur, causasque suo cum corde volutat :  
 222 atque animum dubius nunc huc, nunc dividit illuc  
 223 quid faciat ? Rectone petat Taulantia cursu  
 224 litora ? An in dextras proram detorqueat undas ?  
 225 Haec alternanti celeri praemissa phaselo  
 226 nuntia fama refert : obsessum iter omne, nec ullum  
 227 fraude carere locum : conjectum in vincula magnum  
 228 Ugontem et longe Byzantii ad moenia ductum.  
 229 Qui modo Brundusii multis comitantibus urbem  
 230 liquerat et fidis navem commiserat Euris,  
 231 primus ut Emathiam, Thracem emensus adiret  
 232 Bosphoron Euxini fauces et ad ostia Ponti :  
 233 ipse suis opibus praesens muniret euntes  
 234 in bellum et Solymae pro libertate pacisci  
 235 audentes letum, tranquillaque commoda vitae.  
 236 Nuntius haec ; sed enim cursum remorata triremis  
 237 constitit : et reliquas ad se vocat Appulus heros,  
 238 atque ait : "Haud equidem, o socii, cum tanta viderem  
 239 agmina convenisse virum, quos una coegit  
 240 religio et pietatis amor, fore rebar, ut essent  
 241 vitandae insidiae Graiorum, artesque cavendae,  
 242 nimirum servare fidem mens improba nescit.  
 243 Ergo urbem hanc infandam imo stat vertere fundo  
 244 atque omnem ferro. Flammisque excindere gentem  
 245 in nostros tantum sceleris tam turpiter ausam."  
 246 Haec dicens, vultu conceptas detegit iras :  
 247 atque huc atque illuc ardentia lumina volvit  
 248 et puppi tacitus tandem consedit in alta.  
 249 Tum Mentor, quem certa fides, expertaque bello  
 250 dextera et innumeris annis non victa senectus

251 ante omnes gratum Regi jam fecerat unum,  
 252 "Digna quidem sceleris facies, quam vindice ferro  
 253 ulciscamur, ait ; nec, si tibi protinus urbem  
 254 aut capere, aut cinctam longa obsidione liceret  
 255 urgere et bello ingenti vastare, fameque,  
 256 conatus, dux magne, tuos, queis scilicet usus  
 257 abrumpas vincla et captum tuearis amicum,  
 258 damnarim ; sed enim tempus nunc instat eundi,  
 259 quo nos Pontifici nuper data dextra, fidesque  
 260 voce vocat : quoque exspectant multo ante profecti  
 261 Germani, Gallique et fortia corda Britanni.  
 262 Ut minor hoc uno nobis stet gloria ; quando  
 263 et decus et laudem quaevis mora turpis aventi  
 264 quaerere et insigni frontem vincire corona,  
 265 adde quod Euxinum spatio propiore tenentes  
 266 exercere iras facile et terrere tyrannum  
 267 fas erit Odrysium, per vimque reposcere captos.  
 268 Nec tamen interea frater certissimus ultor  
 269 non aderit, multo repetat qui sanguine poenas,  
 270 servitioque premat populos." Haec ille locutus  
 271 conticuit ; tristisque animos, iramque repressit  
 272 Daunius. "Et longe scelerato a litore classis  
 273 omnis eat jam nostra", inquit ; primusque triremem  
 274 remigio impulsam medios convertit in Austros  
 275 et properans Zephyris objectam Aulona relinquit  
 276 a laeva et gelidi transit celer ora Celydni,  
 277 Chaoniamque omnem : mox exsecratus acerbam  
 278 Cassiopem, celsas Phaeacum in collibus arces  
 279 circuit et bimarem cursu defertur ad Isthmum.  
 280 Hic tanti excitus fama et molimine belli,  
 281 obvius occurrit Medix. Ille unus Athenis  
 282 Cecropidum populo legesque et jura ferebat,  
 283 aut bello foret, aut tranquilla in pace regendus.  
 284 Et, quamquam Graiis longe regnaret in oris  
 285 liber, avos, atavosque tamen generosus abusque  
 286 Tuscorum antiqua numerabat origine regum,  
 287 qui quondam ex Osco ducentes nomine nomen  
 288 magnanimae fecere suae cognomina genti.  
 289 Unde etiam seri virtutem hausisse nepotes  
 290 et patriam dicti juvisse ingentibus ausis.  
 291 Barbarus at postquam Scythicis in finibus ortus  
 292 Italia in media regnorum est sceptra potitus,  
 293 et simul infracta est Tyrrhena potentia, partim  
 294 discessere suis paulatim ex urbibus acti,  
 295 aériasque altis posuere in collibus arces :  
 296 partim etiam varios casus et bella secutis  
 297 ad regnum patefecit iter durissima virtus ;  
 298 et pedibus Graios, pedibus subjecit Athenas.  
 299 Hic igitur Medix Tyrrheno a sanguine cretus  
 300 laetus adit Regem : qui primam egressus in actam  
 301 forte recensebat numerum : vultusque suorum  
 302 et quae cuique foret facies, vel forma, vel aetas,  
 303 discebat ; memorique animo mandata notabat  
 304 nominaque et patrias senior quem talia agentem  
 305 alloquitur Medix. "Ego me, fortissime ductor,  
 306 invisam rebar Superis traducere vitam :

307 qui te militiae redivivum exemplar avitae  
 308 affari et coram dextrae conjungere dextram  
 309 non possem Italiae longe disclusus ab ora.  
 310 Quando etiam mentem juvenili accensus amore  
 311 et magni admirans ingentia facta parentis  
 312 ipse tui, patriae fines, camposque reliqui,  
 313 despicit ex alto quos undique Faesula colle ;  
 314 Vulturnique volens accessi ad fluminis undam.  
 315 Innumeras tum dirus Arabs vastaverat oras  
 316 Ausoniae et Capuam longa obsidione premebat.  
 317 Ac, nisi opem afferret genitor tuus, ilicet urbis  
 318 illius exstaret nunc tantum informe sepulchrum.  
 319 Ipse illam solus longa obsidione levavit :  
 320 atque acie victos a moenibus expulit Afros.  
 321 Non ita sublimi defertur ab aethere praeceps  
 322 fulmen agens nimbum, scopulosque et saepta domorum  
 323 eruit et subita miscet collapsa ruina.  
 324 Vidi ego in adversos armato milite saeptum  
 325 irruere et densas ferro perfringere turmas :  
 326 Poenorumque ducem medium differre securi  
 327 Dogrissam, triplici pectus cui texerat aere  
 328 et fronti galeam aptarat Maurusia nutrix  
 329 carminibus sacram magicis et sidere certo  
 330 confectam, ut ferri cunctos contemneret ictus.  
 331 Sed neque verborum murmur, neque profuit astri  
 332 observata dies ; caput illi utrimque pependit  
 333 in geminas scissum scissa cum casside partes.  
 334 Vidi equites, peditesque una cum mitteret Orco,  
 335 cogeret et nostris Arabum dare terga phalanges.  
 336 Quam facile aut Boreae flatus, si vertice ab alto  
 337 incubuit segeti, fragiles infregit aristas,  
 338 arentesve sua decussit ab arbore frondes  
 339 Auster et impulsas ad litora pertulit undas.  
 340 Ille etiam postquam caesorum vidit acervos  
 341 spectator cujusque operum, testisque laborum,  
 342 et serus rediit spoliis indutus opimis,  
 343 ornavit coram virtutem atque acta suorum  
 344 laudibus et merito cunctos dignatus honore est.  
 345 Et mihi, qui densos urgentem in bella maniplos,  
 346 cogentemque fugae versas dare terga cohortes  
 347 comminus aggressus immani corpore Maurum  
 348 ense trucidaram, ferratae pondera clavae  
 349 detulit ipse suae, bellique insigne decorum  
 350 ferre dedit clypeo, Mauri caput ora nigrantis,  
 351 candida circumdat summam cui taenia frontem.  
 352 Ille Diochryso, cui mollis inertia Thracum  
 353 imperium abstulerat, reditumque atque arma paranti  
 354 adjunxit comitem ; mox rerum eventa secutum,  
 355 (namque Arabes crebris Graias incursibus oras  
 356 vastabant) omnis praefecit Achaia bello ;  
 357 armorumque unum jussit, pacisque potentem  
 358 esse et opes, patriosque manu defendere fines.  
 359 Et nunc, ni gravior tardaret membra senectus :  
 360 si foret illud idem defesso in corpore robur,  
 361 quod fuerat, cum acres animos, viresque juvena  
 362 prima dabat, ceu fixa eadem stat corde voluntas,

363 ipse ego te Graiae lecto cum robore pubis  
 364 primus ad ingentem Syriae comitarer Orontem :  
 365 et tibi praecipuum factis testarer amorem.  
 366 Quod quoniam fieri prohibet jam serior aetas,  
 367 hic tecum florens annis juvenilibus ibit,  
 368 quo te cumque ferēs, gnatus meus ; una parentis  
 369 spes et cura sui, patrio cognomine Medix :  
 370 ibit, ut admirans unum te maxime ductor,  
 371 militiam et claros magnae virtutis honores,  
 372 praemia suscepti laetus putet esse laboris,  
 373 saeva manu confecta tua cum bella videbit."  
 374 Dixerat : et regi centum candore nivali  
 375 donat equos, numero ex omni quos legerat et quos  
 376 hinc atque hinc phalerae et demissa monilia collo  
 377 ornabant, strato intectos pugnantis ad usum ;  
 378 ferrea cui spondam lorica utramque tegebat  
 379 surgentem, primamque alvum, lumbosque tuentem  
 380 sessoris firmum in pugna tutamen equestri.  
 381 Munera mox socios large partitur in omnes :  
 382 vina cadis onerata suis, quae plurima Naxo  
 383 jusserat afferri jampridem : ea deinde sequuntur  
 384 depulsae dudum in montes a matribus agnae,  
 385 indigenaeque boves et prima aetate juveni.  
 386 At Robertiades tanti hospitis interventu  
 387 laetatus, pauca haec placido sic pectore fatur.  
 388 "Ipse meum memini, dux o fortissime gentis  
 389 Tyrrhenae, invictam virtutem et facta parentem  
 390 narrare et veras ad caelum tollere laudes  
 391 Medicis Etrusci (namque hoc mihi saepe per aures  
 392 nomen iit, magnique animo defixa remansit  
 393 fama viri, cui nulla umquam se viderit aetas  
 394 ferre parem, aut bello claros aequare labores)  
 395 Medicis, absentem tacita quem mente colebam  
 396 absens et magno mecum venerabar amore,  
 397 quod solum licuit : neque enim fuit hoc mihi tempus  
 398 sperandum, quo te veterem complexus amicum  
 399 hospitii possem jura instaurare paterni.  
 400 Nunc autem quando votis prosperrima nostris  
 401 fors inopia fauci, Caelique occulta voluntas,  
 402 accipio, agnoscoque libens, certumque vetustae  
 403 pignus amicitiae nostro comes usque futurus  
 404 haerebit lateri natus tuus ; illius ingens  
 405 cura animum semper Dauni ductoris habebit."  
 406 Haec ubi dicta, epulis una accubere paratis :  
 407 atque inter sese longo sermone requirunt,  
 408 quae via Threiciam brevior contendat ad urbem :  
 409 si qua loca infestis ; si quas devinxerit arces  
 410 praesidiis : si quos aditus Byzantius armis  
 411 insideat ; Ponti prohibens a limine Gallos.  
 412 Quae postquam ducibus satis explorata, superque  
 413 ostendere palam compendia tuta viarum ;  
 414 jamque exempta fames et amor compressus edendi est,  
 415 aere dari signum jubet ipse et castra moveri.  
 416 Incedunt armatae acies, nec ab ordine quisquam  
 417 liber abit, sociosque suos et signa relinquit :  
 418 pars equitum anteeunt agmen : pars terga tuentur,

419       injusto sub fasce viam dum carpere miles  
 420       festinat, gressumque una maturat eundo.  
 421       Primum illi Boeotum agros, vallesque, lacusque  
 422       praetereunt Oncheste tuos, longeque relinqui  
 423       Parnassi juga summa vident ; mox Othrin et Oetam,  
 424       Sperchiumque amnem, magni cunabula Achillis,  
 425       frondosumque caput celsi mirantur Olympi.  
 426       Tum vada Penei, celeresque Haliacmonis undas,  
 427       Emathiaeque Italo fecundos sanguine campos :  
 428       et quos Mygdonius spatioso flumine colles  
 429       ambit et affusa laetissimus irrigat unda  
 430       Axius, Aegaeum dum se devolvit in aequor.  
 431       Tum demum Ausonius suspecta per oppida Thracum,  
 432       perque agros facturum iter, exercitus omnis  
 433       constitit obliquae declivi in margine ripae.  
 434       Hic certatim omnes ducto circumdata vallo  
 435       castra locant, somnosque petunt et corpora curant.  
 436       At parte ex alia Gallorum interrita pubes  
 437       praetergressa jugum, quo caelo aequatus Adula  
 438       contegitur glacie, nivibusque perennibus horret,  
 439       transierat : nec Vindelici, quos dextra securi  
 440       armat Amazonia, nec proni ad furta Genauni,  
 441       nec rapti celeres assueti vivere Brenni,  
 442       per saltus, vallesque imas potuere morari  
 443       incedentem aciem, dum tela opponere quaerunt,  
 444       ulteriorem Oeni juncto ne flumine ripam  
 445       ascendat victrix et Norica regna peragret.  
 446       Illa igitur Cetii superans altissima montis  
 447       culmina labentem divortia liquit aquarum :  
 448       et gressum in Chalybum rutilis tulit inde metallis  
 449       insignes agros, Istri quos fluminis alveum  
 450       augentes Saus hinc, unda Draus alluit illinc.  
 451       Atque ubi Pannoniae fines et limina primum  
 452       ingressi tetigere duces, castrisque locatis  
 453       corpora praeterito requierunt fessa labore :  
 454       ecce vident ad se properantem et membra trementem,  
 455       fundentemque imo trepidas e pectore voces,  
 456       velitis os, habitumque et velitis arma gerentem.  
 457       Isque, ubi confertas acies ante ora ducumque  
 458       constitit atque armis saeptum se vidit amicis,  
 459       talia deposita tandem formidine fatur.  
 460       "Si patrios postquam fines liquistis et agros  
 461       ulla umquam vestrae tetigit vos cura salutis,  
 462       vertite iter retro, sedesque revisite avitas,  
 463       o, miseri, et terris procul his, procul ite relictis,  
 464       dum licet atque fugam raptim celerare potestis  
 465       incolumes ; vel si dictis parere negatis  
 466       et pudet emensos Alpes atque invia terrae,  
 467       insolito trepidare metu, statuatis oportet  
 468       omnibus esse unam per cladem et vulnera mortem  
 469       sperandam et passim confusa strage cadendum."  
 470       His dictis perculsi animi, tacitumque per agmen  
 471       murmur iit, cupidique inter se quaerere pergunt  
 472       quid ferat et tantum quid fama adversa reportet.  
 473       Tum vero juvenem fidenti interritus ore  
 474       voce vocat dux Leucorum cinctumque corona



475 primorum et cunctis patulas praebentibus aures,  
 476 alloquitur. "Tunc hos animos, haec robora sacra  
 477 militiae solus tantis avertere coeptis  
 478 tendis ? Et instanti pressus formidine, Gallos  
 479 exterrere audes ? Non haec sunt pectora turpi,  
 480 non haec corda fuga sibi quaerere sueta salutem :  
 481 ast aperire viam ferro, mediosque per hostes  
 482 aut vitam retinere, aut pulchrae occumbere morti.  
 483 Sed tu quis tandem ? Quibus aut festinus ab oris  
 484 venisti ? Et quae nos vitare pericula suades ?  
 485 Fare, age et audacter, quae sint ea cumque, volentes  
 486 cuncta doce ; neque enim quisquam re vera locutum  
 487 non amet : et merito gratus non munere donet."  
 488 Ille autem. "O, utinam factae tibi nuntius essem  
 489 et nondum celebris fama vanissimus auctor.  
 490 Sed quid ego haec ? Si mox tantos ex ordine casus  
 491 narrabunt alii, qui foedam evadere cladem  
 492 incolumes potuere : licet vix unus et alter  
 493 Paeonis insidias regis vitarit et arma.  
 494 At tibi, quicquid id est, breviter, dux maxime, pandam :  
 495 nec te ullae ambages, nec longa exorsa tenebunt.  
 496 Concilio in medio postquam regumque, ducumque  
 497 omnis in Abdaridas decrevit Gallia bellum  
 498 extemptura jugum Solymis, quod pertulit annos  
 499 jamdudum innumeros Syriae sanctissima tellus :  
 500 continuo nostras fama est vulgata per urbes :  
 501 extemploque accensi animi, concursus et ingens  
 502 undique et inter se commota per oppida vulgo  
 503 dant dextras ; sua quisque domi, quae repperit arma  
 504 et scabra exesos rubigine corripit enses,  
 505 deformesque situ clypeos ; sibi regna, suisque  
 506 argenti atque auri magnos promittere montes.  
 507 Proinde avidi coeunt non una e gente, nec uno  
 508 e populo : sed tota simul sine more, sine ulla  
 509 lege ruens raptu properat Germania signis.  
 510 Postquam autem turmaeque equitum, peditumque catervae  
 511 convenere simul, nec qui moderetur euntes  
 512 esse vident quemquam, nec qui tot millia certa  
 513 lege regat, poenasque nocentibus irroget aequas :  
 514 cunctantum dubias Amycus temerarius annis  
 515 et pietate ingens Odechalchius occupat aures.  
 516 Ille genus ducens aliorum a sanguine regum,  
 517 cui Nemetum fines, rapido cui flumine Maenus,  
 518 cumque Mocontiaco parebat Bonna, vetusque  
 519 Naeomagnum et primos ultro tribuebat honores.  
 520 Alter, thuricremas Divum qui castus ad aras  
 521 sacra ministrabat populo, verbisque regebat  
 522 suavidicis animos, plebemque in templa vocabat,  
 523 ortus et ipse patrum praeclara a stirpe suorum.  
 524 Isque ubi distractos reperit, ceu cuique cupido  
 525 imperat effrenis. "Quo nunc Germana juvenus  
 526 inconsulta ruis ? Quo te tam turbidus, inquit,  
 527 ardor agit ? Certique parens audacia leti ?"  
 528 Nam nec bella manu solum peraguntur et armis,  
 529 nec solum vires victoria quaerit ; at acre  
 530 consilium, certosque duces, qui ponere capto

531 castra loco, qui firmam aciem, cum postulat usus,  
532 instruere et tuti vitare pericula norint.  
533 Seu differre diem pugnae, seu forte necesse est  
534 praecipere moras omnes : qui praemia forti  
535 digna ferat : qui communes tolerare labores  
536 primus amet, praedaeque unus qui immunis abactae  
537 ipse suos large socios et ditet et ornet."  
538 Talia desierat fari, cum turba repente  
539 scinditur in varias diverso examine partes.  
540 Inde alias alii conferta per agmina voces  
541 jactare et jussis partim parere recusant  
542 atque iter effrenes longe praevertere tendunt  
543 et quaecumque libet praedari, ac vivere rapto.  
544 Partim se ducibus credunt et signa sequuntur  
545 quisque sua et certos pergunt sociare maniplos.  
546 Non secus atque arbor nunc his, nunc flatibus illis  
547 Eurique, Zephyrique caput depressa recumbit  
548 adversam in partem, nec robore fulta fatiscit  
549 ipsa suo : sed utrimque labans, sed utrimque cadenti  
550 assimilis, tamen una olim peritura ruina  
551 cogitur hinc atque hinc parere procacibus Austris :  
552 amittitque omnes divulso corpore ramos.  
553 Sic illi, quorum multi tua castra secuti  
554 Belga pater, cultos, quos irrigat Hippius, agros,  
555 nec numero tenuere pares, nec vivida aequis.  
556 Multi etiam Egerio, quem bello vivida virtus  
557 clarat et illustrem nomen testatur avitum,  
558 haesere et Dacos inter cecidere, Getasque.  
559 At reliqui explentes numero centena virorum  
560 millia, conjunctis inter se foedere dextris  
561 addixere Amyco vires atque arma, fidemque.  
562 Isque, ubi praefectum tanto se vidit honori  
563 et jussis parere suis tot vivida pubis  
564 pectora Germanae, non jam, ceu postulat usus  
565 militiae (quid enim frustra retinere severis  
566 legibus effusos in cuncta opprobria tentet ?)  
567 Palantes revocat legionum ad signa maniplos,  
568 aut injussa loco prohibet sua castra moveri.  
569 Sed passim ingrediens pacata per arva feraces  
570 depopulatur agros et caedibus oppida complet.  
571 Praecipue Abramidum, quorum pars maxima pagos  
572 Pannonios habet et vitam sustentat inermem  
573 exul, inops, expes, cunctarumque indiga rerum.  
574 Non nos aut sexu miserorum, aut ullius ulli  
575 parcimus aetati : sed ceu foret hostia quisque  
576 grata Deo in primis, nullo discrimine habetur  
577 et juvenes, aegrosque senes dimittimus Orco.  
578 Quin etiam turbam ingentem peditumque, equitumque,  
579 Danubium forte ut medium tranaverat amnem  
580 defensura suos infesto a milite fines,  
581 fundimus et vita pulsos spoliamus et armis.  
582 Mox etiam summis munitam moenibus urbem,  
583 et circumfusas spectantem e colle paludes  
584 aggredimur, factaque simul testudine muros  
585 nudatus omni jam defensore subimus,  
586 aequamusque solo atque aditus intramus apertos.

587 Ast olli in summam trepidi se protinus arcem  
588 conjiciunt, notasque vias et tecta relinquunt.  
589 Nos vero (nec ficta loqui me credite monstra,  
590 sed vera et casu nimium testata recenti)  
591 dum ruimus, nemoque obstat, quin urbe potiti  
592 vastemusque aedes vacuas, capiamus et arcem  
593 obsessam, quasi tela illinc inimica, facesque  
594 ingruerent, contraque acies (.....) coiret,  
595 diffugimus suadente metu : nec vertere quemquam  
596 terga pudet : nec caenosa mandare paludi  
597 corpus, ut incolumis fallacibus enatet undis.  
598 Usque adeo subitus cunctorum invadere mentes  
599 percussas potuit caeca formidine terror,  
600 sive illum incussit nobis Deus aethere ab alto,  
601 tantorum ut scelerum culpae meruere nefandae :  
602 seu terror sibi quisque fuit, dum forte latentes  
603 desertae insidias urbis, faciemque timeret.  
604 Ut videre autem cedentem e moenibus hostem  
605 Paeones, infensi summa effunduntur ab arce :  
606 et ferro accincti nostrorum in terga feruntur,  
607 vulneraque infigunt : partimque in stagna, lacusque  
608 proturbant : partim exanimant angusta viarum.  
609 Dumque alios alii, ceu si fuga sola salutis  
610 spem daret et sumptis nemo sat fideret armis,  
611 urgentes turpi properant praevertere cursu,  
612 ecce superveniunt fulgentes aere catervae  
613 et permixtus eques, quem Curta emisit ab urbe  
614 Pannonius fallax : ut, si se forsitan ulla  
615 offerret pugnae non insperata facultas,  
616 sive acie instructa, confertoque agmine nostros,  
617 seu praeda, spoliisque graves, somnove sepultos  
618 caederet et victos ferro deleret ad unum.  
619 Ergo illi primum versas videre cohortes  
620 et fugere et veniam projectis turpiter armis  
621 quaerere : nec quemquam memorem virtutis in hostem  
622 irruere et clypeis armatum obvertere pectus,  
623 a fronte invadunt, oriturque miserrima caedes.  
624 Corporibus sternuntur agri ; fossaeque redundant  
625 sanguine : purpureae labuntur in amnibus undae.  
626 Ipse tamen delapsus equo, dum pugnat et unus  
627 demetit affusos Amycus, prosternitur ictu  
628 ingentis saxi : quo cassis aenea circum  
629 spargitur effracto non una e parte cerebro.  
630 Ipse etiam medios inter jugulatus inermes  
631 concidit : atque animam in tenues Odechalchius auras  
632 fudit, communi solvens pro crimine poenas.  
633 Accepta dum forte fide perjuriam gentis  
634 nil timet et fidem demens sibi credit amicos,  
635 quos insperantes toties data dextera laesit.  
636 Ergo illum non canities, non infula texit  
637 labentem atque imo fundentem haec pectore verba.  
638 At vos pro scelere hoc tanto, pro tristibus ausis  
639 evertat miseros Deus ultor et impia mittat  
640 sub juga, qui nostro foedastis sanguine terram,  
641 inque fidem acceptos leto mulctastis iniquo."  
642 Haec memorans una lumen cum voce reliquit.

643 "Nec sum animi dubius, quin jam silvisque, jugisque  
 644 insideant, tutique parent, quacumque putarint  
 645 ingressuram aciem, Gallorum invadere castra  
 646 haec sunt, quae mea vox potuit tibi maxime ductor  
 647 narrare et brevibus properans exponere verbis."  
 648 His dictis : corde insuetam coepere dolorem  
 649 heroes, primique duces ; tam multa virorum  
 650 agmina, tamque acres juvenum periisse phalanges :  
 651 quorum animis, armisque olim comitantibus usi  
 652 dejicerent saevos Solymorum e sede tyrannos.  
 653 Continuo furere unanimes : exposcere poenas  
 654 commissi sceleris, ferroque, ignique juventus  
 655 vastandos agros, viduandas civibus urbes,  
 656 clamat et hostili caedem jam caede piandam :  
 657 acceptumque uno sanandum vulnere vulnus.  
 658 Ast alii, quorum menti sententia sedit  
 659 tutior, ultrices iras non temporis hujus,  
 660 non fidei, votique ferunt, quo Gallia summo  
 661 Pontifici voluit certas astringere dextras.  
 662 Posse iter incoeptum Calapique, Saoque relictis,  
 663 Illyriae ad fines et saxa Liburnica flecti :  
 664 perque agros Macedum dextro Byzantia cursu  
 665 arva peti ; posse Ausoniis in Doride castris  
 666 Conjungi et vires Gallorum viribus addi ;  
 667 Gallorum, quos Adriaci maris aequor et undas  
 668 Ionias tranasse ferunt, montesque per altos  
 669 Epiri incolumes Hebrum contendere ad amnem.  
 670 Hic quamvis mentem casu concussus acerbo est  
 671 Goffredus, letuque datos miseratus amicos,  
 672 spem simulat vultu tamen atque interritus audit  
 673 consilia antiqua veterum certantia laudi,  
 674 laetaturque omnes animis ardere paratis  
 675 ulcisci socios, perjuram exscindere gentem  
 676 funditus et campos caesorum insternere acervis.  
 677 Sustulit ergo oculos, imoque a pectore dulces  
 678 expromens voces, placido est sic ore locutus.  
 679 "O socii, quos una omnes, eademque voluntas  
 680 impulit unanimes patria discedere terra,  
 681 uxoresque domi, dulcesque relinquere natos,  
 682 aut secum avectos per mille pericula rerum  
 683 asportare gravis solacia blanda laboris,  
 684 ut Solymam, Syriamque jugo eripiamus iniquo,  
 685 acceptumque Deo statuamus in orbe trophaeum,  
 686 quo neque nos majus, neque postera viderit aetas.  
 687 Vos mecum emensi Rhenumque, Albimque per urbes  
 688 innocui fecistis iter ; perque arva : nec usquam  
 689 ullus adhuc praedam a vobis conquestus abactam est,  
 690 aut actum secum quicquam vi vidit ab ullo.  
 691 Qui potius, quas vestra sibi clementia gratas  
 692 jure suo sperare vices et poscere visa est,  
 693 repperit et blandis, vosmet meminisse potestis,  
 694 hospitium, opibusque suis juvisse vocantes,  
 695 praebentesque ultro plenis convivia mensis.  
 696 Et jam Pannoniis tuti consedimus arvis,  
 697 perventuri ulla sine caede et sanguine, quo nos  
 698 vota vocant solvenda Deo, quae fecimus ipsi.

699 Quod si forte viam quisquam dare nolit amicis,  
 700 perque suos fines opponat euntibus arma,  
 701 tum Gallorum animos et justas sentiat iras.  
 702 Interea qui morte graves persolvere poenas  
 703 flagitiis meruere suis, hominesque, Deumque  
 704 laeserunt graviter non uno crimine sontes,  
 705 scilicet ut merito caesos linquamus inultos ;  
 706 cumque illis etiam reliquos, qui talia posthac  
 707 committent, scelerum nihil impia facta verentes.  
 708 Sed quoniam damnari aliquem, qui dicere causam  
 709 ante suam nequeat, turpe est, mittamus, oportet  
 710 ad regem certos ; qui factam exquirere caedem  
 711 possint et justum populis indicere bellum ;  
 712 aut certae inter nos componere foedera pacis.  
 713 Virtutem sic nostram umquam nulla arguet aetas.  
 714 Justitiae Deus atque hominum mens aequa favebit."  
 715 Dixerat et Stephanum, cujus facundus ab ore  
 716 verborum sonus Hyblaeo vel melle fluebat  
 717 dulcior, heroum ex numero selegit et ipsum  
 718 addidit Aulercae pubis regemque, ducemque,  
 719 qui sua Pannonio referant mandata tyranno  
 720 et causam factae cogant evolvere caedis.  
 721 "Dicite, ait, Regi Gallos in utrumque paratos,  
 722 vel scelus ulcisci ferro, vel foedere dextras  
 723 jungere, si populos justas dolor egit in iras.  
 724 Nos vero interea positis considerare castris ;  
 725 et spectare procul quo se sententia flectat  
 726 illius et pacem a nobis sibi malit, an arma.  
 727 Nec tamen, o socii reticenda injuria et ollis  
 728 fidendum semel infestis ea certa salutis  
 729 sit vis, quam sumptis positam speremus in armis.  
 730 Ite igitur, vigilesque aditus servare patentis  
 731 undique : et excubias castrorum indicite portis :  
 732 ut vos sive palam invadant, sive abdita belli  
 733 furta parent, tuti fossa et munimine valli,  
 734 aut etiam instructo, si res sinat, agmine fraudes,  
 735 incursusque omnes et vim infregisse queamus."  
 736 His illi auditis, antiquae ad regia Curtae  
 737 tecta iter arripiunt celeres : cursuque perenni  
 738 transmittunt campos, spumosaque flumina tranant.

## LIBER QUARTUS

S\_4 v.1 Dumque ea consessu in medio fortissimus heros  
 2 commemorat, fidus caelesti ex ordine custos  
 3 unus, qui nutu Patris omnipotentis Olympi  
 4 additus, imperium Turcarum atque arma tuetur,  
 5 intendens oculos caelo prospexit ab alto  
 6 Europae ferro instructos e sedibus omnes

7 jam populos exisse suis, jamque arva teneri  
 8 Pannoniae et Scythicos compleri milite campos  
 9 externo et totum proscindi classibus aequor :  
 10 atque Asiae regnis immanem insurgere molem  
 11 bellorum : fortesque peti tanto agmine Turcas.  
 12 Haec igitur secum dubio dum pectore versat  
 13 et metuit, ne qua sublatis clade repente  
 14 aligerum cuncti nigrantum ad regna ferantur :  
 15 maestus adit Patrem, cujus firmissima solum  
 16 fundamenta manus jaciens agit ; atque potentis  
 17 imperii sedem, si qua est, evertit ab imo :  
 18 et procul assistens placido sic pectore fatur.  
 19 "O, cui siderei servit plaga lucida caeli,  
 20 aeternaeque uni mentes paremus ovantes :  
 21 scit curae mandasse meae tua summa voluntas  
 22 Turcarum invictos populos, gentesque rebelles  
 23 Arabiae atque alios, quos in sua verba coegit  
 24 jurare Abdarides et sub sua Tartara misit,  
 25 seductos cerae cultu pietatis ; ut aras  
 26 infandas, facilesque ad turpia crimina ritus  
 27 excolerent, natiq̄ tui praecepta perosi  
 28 effugerent lucem et venturae gaudia vitae,  
 29 ni caecae obstaret fraudi, tantoque periculo  
 30 instanti tuus altus amor se opponeret unum.  
 31 Hos igitur, quos ipse olim tibi forte reservas  
 32 incolumes coeli nobiscum in parte locandos  
 33 si tueor, causam tueor nostramque, tuamque.  
 34 Nam si Christicolae aliis, quibus ipse ferendum  
 35 hoc onus, hoc proprium voluisti imponere munus,  
 36 militiae aeternae Aligeris defendere fas est,  
 37 cur mihi pro Turcis communem orare parentem  
 38 non liceat ? Precibusque Arabum fulcire salutem ?  
 39 Nec quemquam tamen ipse veto vigilare faventem,  
 40 cui debet : fovet ille suos, foveatque clientes.  
 41 Quos ego servari pariter cupioque, voloque,  
 42 atque inter Turcas, tamquam certissima cultus  
 43 adjuncta tui, vitaeque exempla beatae,  
 44 versari incolumes, atrum ut post funus honores  
 45 caelestem accipiant, ac praemia digna reportent :  
 46 illi autem Abdaridum leges, ritusque nefandos  
 47 abjiciant, arasque tuas et templa frequentent,  
 48 edocti nullum esse alium, cui fidere possint,  
 49 quemque mala sine fraude colant : cui vota, precesque  
 50 concipiant, statuuntque piis altaria templis :  
 51 quemque salutiferum confessi numen adorent :  
 52 atque humiles unum castas venerentur ad aras  
 53 rite, tuum praeter natum, grave pignus amoris  
 54 erga hominum mortale genus : quibus annuis olim  
 55 sidereas arces, vacuique sedilia caeli.  
 56 Ille igitur populum, qui nunc exire fidelem  
 57 gaudet in Arabios, dextrasque armare minaces,  
 58 mecum una laetus finem si spectat eundem,  
 59 nec portu longe diversi erramus ab uno,  
 60 ut quos ipse cupit servari, ego perdere tendam,  
 61 quid prohibet belli tantam restinguere flammam  
 62 summe Pater ? Cur tam certo tot fortia leto

63 pectora non arces ? Cur, qui nunc instat utrimque  
 64 interitus, caecisque dies mutanda tenebris,  
 65 non potius dulcem constanti foedere pacem  
 66 subducturam etiam multos heroas ab Orco,  
 67 in ferrum, inque aciem jam descendantibus affert ?  
 68 Nam, Turcas si forte manu deleveris omnes  
 69 ipse tua et nullus tandem superaverit atro  
 70 excidio, quis jam potis exercere, suoque  
 71 coget in officio gentes perstare sequentes  
 72 jamdudum partae tutissima commoda pacis ?  
 73 Quin illo potius (dicto procul exitus absit)  
 74 otia, desidiamque animo (ni fallor) in omnem  
 75 amoto procul hoste ruent : scelera inde profanis  
 76 inter sese odiis suscepta admittere pergunt  
 77 et cultu et verae spreto pietatis honore."  
 78 Haec vigil Abdaridum custos sic ore locutus  
 79 conticuit : solitaque abiens in sede quievit.  
 80 Ast alius, qui militia selectus eadem  
 81 et Syriam et palmis viridem curabat Idumem,  
 82 astitit ad solium Patris atque ita farier infit.  
 83 "O Pater, aeterno qui mentem impulsus amore  
 84 legisti nostro vigiles ex ordine certos,  
 85 quos populis, quos cuique homini, quos urbibus et quos  
 86 praeficeres regnis certa sub lege ministros,  
 87 quandoquidem tu me voluisti e fratribus unum,  
 88 esse cui sanctae custodia gentis, (vers incomplet)  
 89 seligere et comitem miseris haerere, ducemque :  
 90 qui nunc servitio Turcarum, Arabumque superbo  
 91 oppressi longe a templis arcentur et aris :  
 92 accipe jam voces, populos quibus aethera complet  
 93 ille tuus, placidusque audi questusque, precesque,  
 94 quas ad te statui perferre et quaerere supplex  
 95 tantorum requiem nobis, finemque malorum.  
 96 E quibus haud equidem inficior te suesse frequenter  
 97 innumeros, qui nostra juvent, producere fructus.  
 98 His namque exercere bonos, punire nocentes,  
 99 atque augere soles praemi spes inde futuri.  
 100 Sed miserum tamen huc illuc ferrique, rapique  
 101 insontes, duraque premi sub compede vinctos  
 102 et cogi simul infandos ediscere ritus  
 103 et dirum dirae colere impietatis alumnum  
 104 Abdaridem : aut acres ultro dare corpore poenas :  
 105 inclusosque tuae vexari moenibus urbis :  
 106 ceu pecus et molles mediis in ovilibus agnos  
 107 ore trahunt, manduntque lupi, quos longa coegit  
 108 e silvis exire fames, dum rure profectus  
 109 pastor abest longe, vel somno indulget inertii,  
 110 nec nocturna canum servat custodia caulas.  
 111 Quamquam longa satis monet experientia, nullum  
 112 sperandum esse hominem, cui, si semel ulla licenter  
 113 degendae fuerit vitae permissa potestas,  
 114 mens eadem perstet pietatem amplexa, nec usquam  
 115 rectum animi inflectat ; nam qui per lubrica pergat,  
 116 haud semel in pejus labi consuevit, humique  
 117 oblitus jacet usque sui ; ceu forte revulsus  
 118 aereo scopulos decurrit vertice montis,

119 in praecepsque ruit : nec partem aversus in ullam  
120 flectit iter, donec fundo consedit in imo  
121 unde potis vis nulla usquam removeere jacentem,  
122 non Boreae, non torrentis decursus aquai :  
123 usque adeo sedet immotus. Scio acerba meorum  
124 excidia et quanto coner noctesque, diesque  
125 inde alium atque alium praesens inhibere labore ;  
126 ne quando allecti rerum dulcedine et una  
127 Turcarum longa jam consuetudine victi,  
128 in scelera et mores abeant, ritusque profanos.  
129 Nec sum etiam, veri si quid mens augurat, ipse  
130 inscius inferna missurum a sede ministros  
131 Luciferum, quo se rebus tibi in omnibus aequet,  
132 artibus atque dolis operam quamcumque daturus,  
133 servitio ne forte tuus, quo pressus anhelat,  
134 exeat et dominos populos fuget urbe superbos.  
135 Atque haec si mecum, qui nunc tibi regna rebellis  
136 barbara commendat gentis, quod amica tuorum  
137 interdum celebrantem aliquem commercia diro  
138 servet ab interitu, quod tanta exempla secuti  
139 forte olim Turcaeque omnes, Arabesque receptent,  
140 agnoscantque tuum concordi pectore cultum ;  
141 haec si mecum una ferme consideret, idem  
142 commoda sectari parva atque incerta videbit.  
143 Namque, ut multa tuae spargant pia semina legis  
144 Christicolae Turcas inter, tamen impius ille  
145 Abdarides magis atque magis firmatur in horas,  
146 inque dies crescit, cultumque nefarius auget  
147 ipse suum ; magnamque trahens in Tartara secum  
148 partem orbis, medio fidens exsultat Averno.  
149 Nec tamen exosus Persasque, Arabasque feroces,  
150 everti una omnes ruptis radicibus optem,  
151 exitioque dari. Vincant, quos vincere fas est :  
152 et victi imperio discant parere bonorum :  
153 justitiamque colant docti meliora, tuoque  
154 colla jugo faciles submittere mollia pergant.  
155 Ac tu, mundi opifex et rerum aeterna potestas  
156 summe pater ; Solyme populo si libera utrique  
157 afferet ad certae (nunc) adjumenta salutis,  
158 affer opem magnis (tua laus erit unius) ausis  
159 et procerum pia coepta juva : quos undique ab ortis  
160 convenisse vides patriis ; et tecta, domosque  
161 deseruisse suas, Solymorum ut moenia tantis  
162 eripiantque malis : desertaque templa frequentent  
163 et substructa novis cumulent altaria donis."  
164 Haec ille. At pater omnipotens sic deinde profatur :  
165 "Jamdudum, o vigiles mandata ad nostra ministri,  
166 quod libuit, placuitque semel, decrevimus ipsi,  
167 nec frustra decreta cadent. Vos munus obite,  
168 quisque suum ; bello Syriae miscebitur orbis,  
169 purpureusque fluet multorum sanguine Orontes :  
170 et nunc magnanimis cedet victoria Gallis :  
171 nunc eadem ad Turcas vultu laetissima verget :  
172 ingratasque vices volvet ; ne quaerite causas.  
173 Ipse adero, cum tempus erit." Nec plura locutus  
174 annuit et totum nutu tremefecit Olympum.



175 Mox medio e coetu, quorum chorus excubat omnis  
176 vestibulum ante ipsum, primoque in limine portae,  
177 advocat Aligerum, fidamque affatur ad aurem.  
178 "O nostrae pars militiae dilecte minister,  
179 quem primos inter prima hac in sede locatum  
180 ad nutus praesto esse meos vis cogit amoris  
181 immensi et noctes suadet vigilare, diesque ;  
182 vade age, Pannonias velox delabere in oras :  
183 maximus Ister ubi fines contingit Amantum :  
184 atque amnem adversos totum deflexus in Euros  
185 moenia sublimis praeterfluit ardua Curtae.  
186 Impius hic Colomanus habet : cui frater avitas  
187 Halmus opes, regnumque dedit male cautus habendum,  
188 ausus legitimae studium et suffragia plebis,  
189 testatamque diu patrum contemnere mentem.  
190 Ille tamen posthac commissi criminis acre  
191 supplicium solvet nocti damnatus inertii.  
192 Huc tu quamprimum demissus ab aethere summo  
193 fac populi, quos in nostros metus armat euntes  
194 in Syriam, jam jamque Saum tranare parantes,  
195 mitescant, positaque omni feritate benignos  
196 exhibeant sese, nec coeptum obsaepiat usquam  
197 ullus iter, certamque viam vetet ire : sed ultro  
198 venturis, quacumque potest, ope sedulus adsit."  
199 Dixerat. Ille autem ceu fulgur ab aethere praeceps  
200 labitur : et dicto citius pervenit ad Istrum :  
201 qua medius totum cursu se vertit in Euros,  
202 lambit et antiquae sublimia moenia Curtae.  
203 Hic regem somni expertem, curisque gravatum  
204 repperit et dubios volventem pectore casus  
205 bellorum, trepidumque metu : ne forte ducesque  
206 et proceres, quorum latis exercitus arvis  
207 insidet et populis bellum, excidiumque minatur,  
208 ni sibi ad Euxini fauces via libera detur,  
209 protinus infensi poenas cum sanguine poscant.  
210 Ille igitur formam senis assimulatus Aquinci :  
211 cui templi et rerum princeps data cura sacrarum,  
212 atque fides habita in dubiis certissima rebus,  
213 sive instent belli, placidae seu tempora pacis,  
214 attoniti stetit ante oculos atque ora tyranni  
215 Paeonis, inde imo rumpens e pectore voces.  
216 Non nunc tempus (ait) dubio cum pectore curas  
217 versare et rerum ancipites expendere casus :  
218 hostis adest, non qui vacuos affusus in agros  
219 erret et e patria depellat sede colonos,  
220 ac praedas incautus agat : passimque vagetur  
221 longius a castris : sed qui sua signa secutus  
222 pareat imperio meliorum et jussa facessat.  
223 Certa ducum virtus : juvenum spectata voluntas  
224 et patiens pariter corpusque, animusque laborum.  
225 Hanc tu, si sapias gentem, qua nullius usquam  
226 gloria se tollit major vel pace, vel armis,  
227 praecipue deflens commissa piacula caedis,  
228 omnibus officii sensim lenire memento,  
229 muneribusque tuis ; nam sic (mihi crede) quietas  
230 incedentum acies Gallorum et castra videbis

231 ire viam et dapibus nusquam se pascere inemptis."  
 232 Haec memorans, vulgi strepitum, vocesque ruentis  
 233 audiit ad portas urbis : quo praevia Gallos  
 234 fama volat missos castris, qui moenia Curtae,  
 235 Paeonii sedem regis et limen adirent,  
 236 bellique et pacis secum mandata ferentes.  
 237 Ergo introgressos jubet ipse in tecta vocari,  
 238 seque locat solio residens Colomannus in alto.  
 239 Illi adsunt, regemque prius de more salutant.  
 240 Mox Senonum ductor Stephanus sic ore profatur.  
 241 "Quod nos religio Divum, quod certa voluntas  
 242 effundendae animae pro libertate piorum,  
 243 ac promissa fides, quod nos data dextera cogit,  
 244 concordem bellum Turcis inferre tyrannis  
 245 venimus et saevos Europae a finibus hostes  
 246 arcere in montes Persarum, Arabumque cavernas.  
 247 Nec certe, cum communem pater urbis et orbis  
 248 cogere Gallorum vires decrevit in hostem,  
 249 Pannonios, vellent qui tantum infringere foedus,  
 250 impiaque Abdaridae stabilirent regna rebellis,  
 251 insignes pietate viros, fore credidit umquam :  
 252 sed potius, quod fas fuerat, quod fama ferebat,  
 253 nostrorum aucturus numerum, viresque putavit :  
 254 et bellum auspicio regis, ductuque potentis  
 255 gesturos : cujus pietas gratissima caelo  
 256 esset et in dubiis virtus exercita rebus.  
 257 Quem praeponere nunc caelestum in templa relatum  
 258 et colimus, flemusque simul, si vixet, aperto  
 259 exciperetque sinu Gallos, opibusque juvaret :  
 260 sterneret ipse viam : quae quaque in parte sequenda,  
 261 aut vitanda forent, ultro nos ipse doceret.  
 262 Nunc tibi visum aliter : quando tot millia leto  
 263 nostrorum, qui se dextrae Colomanne, tuaeque  
 264 crediderant fidei, tua missa ex urbe repente  
 265 agmina, contempta Divum pietate, dederunt.  
 266 Atque haec ipsa quidem scitatum venimus, an sint  
 267 consilio confecta tuo ; discrimen utrisque  
 268 hoc solum ostendet, stabilis pax instet, an arma."  
 269 Hic dictis animo cunctantem atque ore tacentem  
 270 aggressus regem. "Non hoc sibi poscit, Aquincus,  
 271 tempus, ait ; nunc certa tibi est oblata facultas  
 272 praeteritae caedis nullorum caede piandae.  
 273 Fare, age, quid dubitas haec tanti incendia belli,  
 274 dum licet, externas longe depellere in oras ?  
 275 Jungereque invictas constanti foedere dextras ?"  
 276 Talia finierat : cum Rex, cui nuntius ales  
 277 jamdudum in Gallos animum, mentemque benignam  
 278 addiderat, curasque e corde revellerat acres ;  
 279 attollens oculos, ore est sic fatus amico.  
 280 "Si vestrum imperium, Galli, si vestra secutae  
 281 jussa forent acies, quas hic Germania fudit  
 282 innumeras, nostra arva suis viduata colonis,  
 283 quae modo vidistis passim squalentia ad Istrum,  
 284 dum coeptum properatis iter, bene culta niterent :  
 285 neu mixto amborum maduisset sanguine tellus,  
 286 funera tot miserans populorum utrimque cadentum :

287 sed potius laetos laeta excepisset amicos :  
 288 et, quibus ipsa opibus poterat, juvisset euntes,  
 289 non adeo longe nostris disjungitur oris  
 290 humanae jucunda comes clementia vitae,  
 291 nec tam religio longe supera alta tementum  
 292 exsulat hinc, vobis ut quicquam obstare velimus  
 293 concordi in Turcas animo sumentibus arma.  
 294 Immo ego, ni regni novitas revocaret et anceps  
 295 vulgi animus, procerumque odia et male grata voluntas  
 296 (credite) non essem tanti pars ultima coepti ;  
 297 et data servarem patriui promissa, fidemque.  
 298 Postulat hoc a me causae commune periculum  
 299 et communis amor famae immortalis et ingens  
 300 gentis honos : cujus praeclaro a sanguine priscos  
 301 Paeonii repetunt proavosque, atavosque suorum :  
 302 inter qui Noarum quondam, Bargumque feraces,  
 303 post acri direpta manu donaria Delphis,  
 304 insedere agros Brenno duce et auspice Brenno.  
 305 Mox patriae sueti late producere fines,  
 306 Pannoniae populos omni dicione subactos  
 307 pressere et victis leges ac jura dederunt.  
 308 Hac ortos patruus nos clara a stirpe volebat  
 309 et patriae a tanta numerabat origine fastos ;  
 310 Tauristasque et Scordiscos, Bojosque feroces,  
 311 quae tum nomina erant, Gallos genere esse docebat.  
 312 Quare agite, o, uno nobiscum sanguine juncti  
 313 invicti heroes, dextris jungite dextras  
 314 atque animos animis et, quae contraria votis  
 315 acciderunt nostris, hilares jam mittite et ipsos  
 316 per patriae fines vobis iter omne futurum  
 317 credite, quae tantis peperit vos inclyta factis.  
 318 Non deerunt, quacumque viam tendetis, amica  
 319 hospitia : et dapibus mensae sine fraude paratis :  
 320 perque agros, mediasque urbes, perque oppida tuti  
 321 ingressus et nusquam ingens non copia rerum."  
 322 Haec ait : et geminas signis, ostroque superbas  
 323 efferri e thalamo vestes et cingula bullis,  
 324 e solido bullis longe fulgentibus auro,  
 325 apta jubet : nec non pretioso vellere martes :  
 326 quas gens perpetuis Scythiae damnata tenebris,  
 327 suetaque Riphaeas pedibus calcare pruinas,  
 328 mittit Hyperboreis terrarum a finibus usque,  
 329 ingentis pretii martes ; his insuper addit  
 330 aurea et Eois insigna pocula gemmis.  
 331 Tum vero, quando ille aliud nil majus habebat,  
 332 Goffredo jubet inclusum, fulvoque decorum  
 333 aere dari sceptrum, cujus pars ima frementem  
 334 desuper urget equum, Nili genitoris alumnum.  
 335 Parte autem in summa rostroque atque unguibus hydrum,  
 336 quem pia defecto jamdudum aetate parenti  
 337 afferat, ales habet diris invisae colubris.  
 338 "Atque haec (inquit) erunt nostri rata pignora amoris,  
 339 ignaramque doli Gallis testantia mente."  
 340 Sic fatus, propere vicina per oppida certos  
 341 dimittit, quorum monitu secura parentur  
 342 hospitia : atque viae loca proxima rebus abundant

343 omnibus humanae ad vitae spectantibus usum.  
 344 Aurigae interea ex altis Elasippus et Aethon  
 345 veloces stabulis simul eduxere quadrigas :  
 346 quae rapidis rapidas anteirent cursibus auras :  
 347 et tutae acclivis superarent devia montis.  
 348 Aurea materies illis curvatur in arcus  
 349 et juga chrysolithis passim variata nitescunt.  
 350 Ulmeus est temo ; duro circumdata ferro  
 351 curvatura rotae, radiosque volubilis ambit,  
 352 non ullis salebris, non ulla aetate domandos.  
 353 At procul expellunt pluviamque, imbremque cadentem  
 354 arte laborare villosa e Castore pelles ;  
 355 quae currum inductae circumque, supraque tuentur.  
 356 His adduntur equi generosa a stirpe parentum ;  
 357 quales Cappadocis prope flumina Thermodontis,  
 358 dum populos armis, dum cursu provocat Euros,  
 359 Antiopen agitasse ferunt atque Orithyam,  
 360 inter Amazonias acies, turbamque sororum,  
 361 effera quae Martem mentiri est ausa parentem.  
 362 Talibus auditis Galli, donisque receptis  
 363 laeti abeunt Curta : pacemque in castra reportant.  
 364 Atque aliquis vulgo e medio, cum forte videret  
 365 intextasque auro vestes, radiataque gemmis  
 366 pocula, cornipedasque feros, pulchrasque quadrigas  
 367 et sceptrum et captas Ursae sub sidere martes.  
 368 "O, quam magna (inquit) virtus ; quamque incllyta fama  
 369 gloria, quam tantis dignatur honoribus hostis  
 370 barbarus, ac prece submissa veneratus adorat.  
 371 Et poterit tanti quisquam diffidere ductu  
 372 herois ? Poterit Turcarum horrescere vultus  
 373 praeterea ? Et rerum non exspectare secundos  
 374 eventus ? Hujusque ingentia praemia belli ?"  
 375 Haec ille. Et defixa solo tentoria laetae  
 376 collegere acies : avulsaque signa secutae,  
 377 quaeque sua, incoeptum peragunt iter : aeraque longe  
 378 sole sub ardenti radiis percussa renident,  
 379 praestringuntque oculos spectantium : Eurique procaces  
 380 cardine ab averso caeli petulantibus auris  
 381 certatim versant, altumque per aera plangunt  
 382 signa suis noscenda notis : quae scilicet una  
 383 omnia sanguineo dirimit Crux utilis ostro.  
 384 Ecce autem diris Erebi e sedibus ales,  
 385 cornua cui surgunt summa infestissima fronte :  
 386 triste rubent oculi : spirant incendia nares :  
 387 et caput intorti lambunt pro crinibus angues :  
 388 curvati in falcem dentes : informis hiatus  
 389 oris : adunci unguis manuum : quarum una flagello  
 390 insonat horrendum : piceam fert altera taedam.  
 391 His simul ac sontes animas in Tartara trudit  
 392 impius, atque Erebo totum se condit aperto,  
 393 contrahit in gyros et crebra volumina caudam  
 394 obscaenam et terras taetris obnubilat alis.  
 395 Quaque iter intendit, nimbique, imbresque sequuntur,  
 396 urentesque aestus, intempestaeque pruinae,  
 397 abruptaeque micant tenebrosa e nube procellae :  
 398 verberat et grando sata laeta, boumque labores :

399 ac mortale genus vexant morbique, famesque.  
 400 Ille autem veteres populorum exasperat iras,  
 401 accenditque odia et reges impellit ad arma  
 402 praecipites, secum portans letumque, metumque,  
 403 inserit et paci, si qua est, nova semina belli.  
 404 Ergo huc Ammerice tum se referebat ab alta,  
 405 Ammerice, cujus nostro dirimuntur ab orbe  
 406 et nobis adversa premunt vestigia gentes :  
 407 templa ubi et innumeras positis altaribus aras  
 408 ture adolent : Stygiaeque umbras et numina noctis  
 409 caedibus, ac fuso miserorum sanguine placant  
 410 regnatae passim Aligeris nigrantibus urbes,  
 411 isque, ubi diversis Europae a partibus omnes  
 412 arma manu populos sumpsisse ultricia vidit,  
 413 quo regno spolient Arabas, jamque arva feracis  
 414 Pannoniae et Graium fines, Thracumque tenere  
 415 victores, neque adhuc ollis se opponere quemquam,  
 416 astitit indignans, una quod tanta coissent  
 417 agmina : et unanimes in se, excidiumque suorum  
 418 conjurasse omnes jam cerneret Europaeos.  
 419 Sic igitur secum. Quae nam socordia, quae nam  
 420 Tartareos invasit iners ignavia fratres ?  
 421 Sublatae ne omnes causae, quibus Itala tellus  
 422 foeta odiis in se converterat impia dextras ?  
 423 Civilis ne adeo sunt obruta semina belli  
 424 et tam certa tenet pax et concordia Gallos ?  
 425 Tamque hilarem ducit pacata per otia vitam  
 426 imperii quondam assertrix Germania, livor  
 427 fortibus alterius coeptis non ullus ut obstet ?  
 428 Sic ex regum animis penitus discordia cessit,  
 429 ut vacet externas armis invadere gentes,  
 430 Abdaridasque meos patriis depellere regnis  
 431 audeat ? Et positas Solymis evertere sedes,  
 432 Lucifero positas sedes, ritusque sacrorum ?  
 433 At gens imbellis, credo et nil tale timendum.  
 434 Nonne eadem Siculis nos haec jam depulit oris,  
 435 exactosque procul remeare in regna coegit  
 436 Afrorum ? Non victrici tot millia dextra  
 437 haec eadem Abdaridum Ligeris prope fluminis undam  
 438 fudit ? Et innumeros caedis cumulavit acervos ?  
 439 Nimirum bello vinci nequit : illa labores  
 440 ausa subit duos : invictaque numen adorat  
 441 illa suum, cultumque suum tutatur et auget  
 442 quotidie magis atque magis ; non ire periculis  
 443 obvia, non aestus renuit perferre, famemque :  
 444 ingrata nec victa siti, nec frigore cedit.  
 445 Absumptae ne igitur vires ? Fraudesque, dolique,  
 446 insidiaeque omnes et noxia crimina desunt ?  
 447 Non dabitur Turcis (esto) concurrere nostris  
 448 et Gallis virtute pari, non robore eodem  
 449 pectoris et belli summam gerere artibus iisdem.  
 450 At dabitur populos odiis versare, dolisque :  
 451 ancipitesque metus pavidis inferre tyrannis :  
 452 infirmare fidem : dubiis confundere pactis  
 453 foedera et hinc atque hinc raptare in Tartara praedas.  
 454 Seu sit Arabs, seu Thrax : numerumque augere nocentum :

455 atque iter innumeris sedes praecidere ad altas :  
 456 "Dejecti unde sumus (miserum) per vimque, nefasque  
 457 Tartarei fratres, summis invisita potestas  
 458 Caelicolis, jussique imas Phlegetontis ad undas  
 459 exercere iram et tenebris dominarier atris."  
 460 His ubi sese acuit dictis inamabile monstrum,  
 461 ardua deseruit caeli convexa, suasque  
 462 demisit Stygias penitus se pronus ad undas.  
 463 Atque illic iratus adit maestusque, tremensque  
 464 regnatorem Erebi. Laxa sedet ille catena  
 465 vinculus et infesto summum petit aera cornu  
 466 nequicquam et rabie consumitur usque furenti :  
 467 quod neque claustra datur, neque vincla exire potestas,  
 468 Christicolumque animis varias intexere fraudes  
 469 et superum regnis speratum indicere bellum.  
 470 It circum Aligerum pubes densata nigrantum  
 471 et voces nutusque silens observat et audit  
 472 illius : ac nusquam nisi jussa abscedit ab aula.  
 473 Tectum ingens, deforme solum, circumdata ferreis  
 474 regia parietibus, quam septem ambire feruntur  
 475 Cocyti stagna alta vadis impervia caecis,  
 476 et pice torrentes, atraque voragine ripae.  
 477 In foribus dirae effigies. Contemptus : edaxque  
 478 Livor et injustae Veneris damnata Cupido ;  
 479 atque morae Furor impatiens aurique micantis  
 480 sacra Fames, Luxusque vorax, et desidis otii  
 481 importuna Quies ; exspesque Accessus ad umbras  
 482 Tartareas, tristisque sedens in limine custos,  
 483 impellit flagris alios, aliosque coercet :  
 484 et semel ingressos prohibet remeare sub auras  
 485 aethereas, placitaeque iterum se dedere vitae.  
 486 Ergo illi caeno informesvolvuntur et illos  
 487 sulphureis demergit aquis niger Ales et unco  
 488 corripit impacto : atque ardenti versat in igne.  
 489 Supplicii nullum desit genus et sua quemque  
 490 poena manet, luiturque suo sub vindice semper  
 491 quicquid apud superos sceleris committitur usquam.  
 492 Huc sese Ammericae veniens demisit ab oris  
 493 aliger et propere portas ingressus apertas  
 494 constitit ad solium, saevique inamoena tyranni  
 495 limina et has imo voces e pectore fudit.  
 496 "En adsum, o princeps tenebrarum, o maxime noctis  
 497 arbiter, externis occulti a finibus orbis,  
 498 quem neque adhuc veterum solers industria patrum,  
 499 nec fors, nec casus, nec vis humana retexit.  
 500 Oceano disjuncta latet pars illa patenti  
 501 et procul aversis penitus depressa sub Austris,  
 502 navigiisque hominum, volucrumque impervia pennis.  
 503 Hic solido ex auro plenae tibi turis acerrae,  
 504 sanguineque humano perfusa altaria fumant,  
 505 hic tibi virgineum florem delibat et aufert  
 506 impius, innumerasque preces et vota sacerdos  
 507 concipit : hic uni magni tribuuntur honores  
 508 et tibi abest : non fama illas perlatus ad oras,  
 509 non dictis, factisve usquam, non nomine notus.  
 510 Ipse illic solus regnas : cultuque frequenti

511 solus adoraris : solum te templa fatentur  
512 et maris et terrae, tempestatumque potentem.  
513 Quod nisi quis fidens animo atque interritus ausis,  
514 Herculeas manibus post saecula prisca columnas  
515 vellat et Oceanum temerarius ire per altum  
516 audeat instabili dirimens vada fervida cymba  
517 atque intentato positas petat aequore terras,  
518 nec scopulos veritus, nec caeco in vortice cautes  
519 navifragas, fluctusque perenni aestate calentes :  
520 illa tibi (si credis) opis non indigna nostrae  
521 serviet aeternum et supplex procumbet humi gens.  
522 Omnibus hic lecti saeculis immota futuris  
523 sacra canent pueri passim, innuptaeque puellae :  
524 ut se Tartareos ultro patiantur ad ignes  
525 mactari et sontes addici immanibus aris.  
526 Verum illic dum regna tibi stabilimus, opesque  
527 maxime rex, cunctosque Indos in jura, fidemque  
528 cogimus esse tuam : peditumque, equitumque catervas  
529 Gallorum unanimes, totamque sub arma coactam  
530 vidimus Europam cunctas effundere vires  
531 in Turcas, Arabasque tuos, jamque agmina mille  
532 conventura simul properant ad litora Thracum :  
533 unde Asiae limes brevibus disjungitur undis.  
534 Hanc tu, si sapias, totam tueare necesse est  
535 imperii sedem et cultus cunabula nostri :  
536 perdendumve ultro statuas, tibi quicquid in isto  
537 paret adhuc terrarum orbi : quosque unus Avernus  
538 Abdarides devovit aquis, ad sidera ituros  
539 doctrinae, vitaeque piae praecepta secutos."  
540 Haec ille et vastas terrae implevere catervas  
541 Tartarea pestes diris ululatibus : ut cum  
542 turba canum queritur stabulis inclusa Molossum ;  
543 quam sibi dives opum juvenis venator alendam  
544 curat, apros, saevosque lupos, ursosque daturam  
545 exitio, ut primum stellis languescere lumen  
546 coeperit et tenebras veniens Aurora fugarit.  
547 Ergo illa interea noctemque exosa, morasque  
548 ingratas, variis resonat latratibus aedes :  
549 dissonaque in longum ducens lamenta, salubres  
550 abruptit somnos miseris custodibus. At rex  
551 nigrantum Aligerum rabie fera colla tumescens  
552 horrendum intonuit murmur : quo protinus omnis  
553 intremuit tellus exterrita : nec minus altam  
554 substitit in montis faciem maris aequor et undas  
555 vorticibus rapidis trepidos effudit in agros :  
556 ipsaque perpetuos mutarunt flumina cursus  
557 et fontes petiere suos ; immugiit ingens  
558 Caucasus et celsi vertex subsedit Amani.  
559 Postquam autem summis caeli gens exul ab astris  
560 invidiae stimulis questus impulsa profudit  
561 et Phlegetonteis indicta silentia monstris,  
562 Lucifer irarum volvens sub pectore fluctus  
563 constitit et solio ex alto sic turbidus infit.  
564 "Non equidem, o magni proles ignava tyranni,  
565 cum mecum ejecti caelo cecidistis in ima  
566 Tartara, vos inter veritus sum defore, qui cum

567 hostibus assiduum belli certamen obiret  
 568 aeterni memor exilii : quo cedere victi  
 569 cogimur aethereas sedes mortalibus aegris :  
 570 quas illi cantus inter, celebresque choreas  
 571 militiae caelestis et inter gaudia numquam  
 572 interitura tenent, segnis rata praemia vitae :  
 573 cum tenebris nos interea volvamur in imis,  
 574 immeritamque hosti poenam pendamus atroci.  
 575 Non equidem timui, quin tanti injuria facti  
 576 fixa animo, ultrices cunctorum accenderet iras.  
 577 Quae numquam genus humanum requiescere, numquam  
 578 pace frui sineret ; verum noctesque, diesque  
 579 fraude lacescitum pugna exerceret iniqua :  
 580 dum nos parta manu summo victoria caelo  
 581 aequaret : nocti nostros addicere hostes  
 582 nobiscum et poena victos cruciaret acerba.  
 583 Nunc autem video, quae vestra ignavia, vestra est  
 584 culpa ingens : solitas desisse intexere fraudes :  
 585 desisse unanimes hortari in proelia gentes :  
 586 et versas turbare odiis urbesque, domosque.  
 587 Non pudet ? O labes, o et turpissima nostri  
 588 dedecora imperii, non vos pudet, ire quietos  
 589 Hesperiae populos in me, excidiumque meorum ?  
 590 Ite procul viles umbrae : quid statis inertes ?  
 591 Quis vos insolita tardat formidine torpor ?  
 592 Flagitia et serae derisa piacula mortis.  
 593 Foedera si percussa, illo si nomine pacem  
 594 compositam, cujus vim Tartara nostra tremiscunt,  
 595 disjicere atque animos tantis avertere coeptis  
 596 non sine ille unus summi regnator Olympi :  
 597 quis vetat invidiae flagris accendere Graios ?  
 598 Ac tentare metu Thracis praecordia regis ?  
 599 Incoeptum qui solus iter remoratus euntem  
 600 consilia et causas cessandi innectat opertas."  
 601 Dixerat ; ast olli vario simul ore fremebant.  
 602 Incusare alios alii : reprehendere fratres  
 603 aeros, quorum talis data cura labori est.  
 604 Dumque adeo ingenti jactant ea verba tumultu,  
 605 exsilit insultans Geniis e tristibus unus,  
 606 infestus scelerum vindex et nomine Alastor :  
 607 monstrum horrendum, ingens, quo non praestantius ullum  
 608 irritare animos et crimina fingere belli :  
 609 exsilit : et ventis et fulminis ocior alis  
 610 se tulit ad superos Stygiis digressus ab oris :  
 611 praecipitique petit Byzantia tecta volatu :  
 612 et tacitum Odrysii limen, soliumque tyranni  
 613 obsidet atque animum postquam persensit in omnes  
 614 Gallorum super adventu diducere curas,  
 615 adstitit : atque locum nactus, tempusque nocendi,  
 616 Thatinno faciem similis furialia membra  
 617 exuit : in vultus et se trasformat amicos ;  
 618 Thatinno, faciem obscaenam cui foeda cicatrix  
 619 turparat : truncaequae inhonesto vulnere nares.  
 620 Artificis mira sed enim mox arte refectas  
 621 discolor obductae certo discrimine limes  
 622 juncturae sceleris poenam ostendebat aperti.



623 Olli oculi in longum porrecti ad tempora et olli  
 624 turbinis in morem caput exurgebat acutum :  
 625 et mentum umbrarat rigidis rarissima setis  
 626 barba : supercilii species depressa jacentis,  
 627 in pectusque humeri contracti utrimque redibant :  
 628 obtutu immotus, collo brevis et pede claudus :  
 629 sed qui consilii unus bellique, domique  
 630 auctor haberetur non futilis : esset ubi hosti,  
 631 aut civi, aut fido fraus innectenda clienti.  
 632 Quae gratum in primis artes potuere tyranno  
 633 reddere Threicio, cunctisque imponere rebus  
 634 imperii, populo pariter, patribusque tremendum.  
 635 Cujus ut adveniens Erebo furialis Alastor  
 636 induit os, humerosque sibi, faciemque manusque,  
 637 nec non et vocem, gressumque effinxit euntis,  
 638 his regem aggreditur dictis et suscitatur iras.  
 639 "Dum tua sollicitis exercet pectora curis  
 640 et metus et patriae vehemens amor et nova semper  
 641 in consulta animum nunc huc, nunc dividis illuc,  
 642 Europae extremis exercitus advena ab oris  
 643 imperii fines nostri populatur inultos.  
 644 Ille quidem ficto praetexens nomine fraudem,  
 645 dum sese, ut Solymis servilia vincula rumpat,  
 646 aggressurum Asiam simulat, Persisque fugatis  
 647 eversurum Arabum ferroque, ignique penates :  
 648 nimirum illud agit tantis conatibus unum,  
 649 ut Graios, quorum nutu nunc omnia parent,  
 650 quaecumque Ionium complectitur aequor et ingens  
 651 amne Saus gelidum refugit qua devius Istrum,  
 652 imperio atque omni spoliatur ditione : tuisque  
 653 excutiat sceptrum manibus, jusque omne Quiritum  
 654 occupet invadens armis. Ea sola cupido  
 655 finibus e patriis Gallos exire coegit,  
 656 non pietatis honos : ritus non cura tuendi  
 657 ulla sui sedes, alienaque regna lacessunt,  
 658 terrarum ut soli vacuo dominantur in orbe.  
 659 Sic olim Thracum fines aggressus et urbem,  
 660 cum Brenno extincto Gallis dux additus iret,  
 661 (nam memini saepe haec priscos narrare Triballos)  
 662 arva Comontorius Byzantia coepit et auri  
 663 vim magnam miseris jussit sibi pendere cives,  
 664 defensa poenam pro libertate, quotannis.  
 665 Verum haec temporibus jamdudum oblita vetustis  
 666 forte fidem, nulli facient exempla, sed illud  
 667 scilicet indicio est, quali sit praedita mente  
 668 Gallia, vel quanta flagrare cupidine suerit  
 669 regnandi, terrasque omni ditione tenendi,  
 670 quod gens ista suis accommoda tempora rebus  
 671 nacta olim imperii titulumque et nomen ademit  
 672 per fraudem et patrio Graios spoliavit honore.  
 673 Et nunc servitio tendit premere ausa superbo  
 674 Thracibus hic quaecumque tuis regnanda supersunt.  
 675 Sed quid ego haec tibi nunc annalibus eruta priscis  
 676 enumerans verbis onero nimis anxius aures ?  
 677 Quando eadem Italia nuper nos depulit et nos  
 678 Illyriae et Macedum cunctis decedere terris,

679       proh scelus et fines nostros sibi linquere adegit.  
680       Ac nisi tum virtus tua sese opponeret ultrix  
681       Threicii regni, regno premeremur inique  
682       Gallorum et patriam nobis fleremus ademptam.  
683       Cur igitur nunc non obstas conatibus istis  
684       nec molire moram ? Si non virtute, manuque,  
685       artibus at saltem fallacibus ; indue vultus  
686       atque animos, quibus imperio Nicephorus olim  
687       detrusus, summo sed enim tibi liquit habendam.  
688       Ne dubita locus insidiis non defuit umquam.  
689       Perge modo et qua se pandit via praevia fraudi,  
690       i celer atque dolis populos everte superbos.  
691       Sperne fidem, provolve Deos : mendacia vincant.  
692       Ipse adero et nusquam vestigia pressa relinquam.  
693       Vertam omnes me in facies : nil prorsus inausum,  
694       aut intentatum patiar mihi, donec ad unum  
695       caedibus absumptos videam, morboque, fameque."  
696       Haec ille et jam certa spe plenus Alexis.  
697       "Immo (ait) o rerum columen Thatinne mearum,  
698       jampridem ad nostras certos dimisimus urbes,  
699       oppidaque et pagos, qui si se forte facultas  
700       offerat audendi, pacemque et foedera rumpant.  
701       Atque ex insidiis, ubi res ferat, agmen adorti,  
702       qua licet, hinc atque hinc inimicum excindere tendant.  
703       Sin minus ; officiis studeant vincire benignis :  
704       et non inviti poscentibus omnia praestent.  
705       Nam si obstare palam (...) sola potentia tantis  
706       non poterit coeptis, Arabas tamen usque juvabit  
707       consiliis, opibusque suis, bellumque morando."  
708       Haec ubi dicta dedit Graiorum ductor Alexis  
709       conticuit : flammisque novis praecordia sensit  
710       accendi : atque animum stimulis vecordibus uri.  
711       Interea, qua parte Saus se fundit in Istrum,  
712       transierat laetus Gallorum exercitus omnis :  
713       arvaque Taurini, lucosque emensus opacos  
714       Mysorum, sublime jugum superaverat Aemi.  
715       Unde hinc Adriacas, illinc Maeotidis oras,  
716       et Pontum spectare licet : brevibusque diremptas  
717       Cycladas inter se spatiis : Asiamque patentem,  
718       cui late affusum magnis anfractibus aequor  
719       fluctifragum glaucis aspergit litus ab undis.  
720       Hinc aliquis tractus, lateque potentia regna  
721       Turcarum longe aspiciens. "Proh dedecus (inquit)  
722       occupat Abdarides tantum terraeque, marisque ?  
723       Nec nos Christicolum, quos jam parere coegit  
724       ille sibi, nec nos memores virtutis avitae,  
725       nec patriae, cultusque pii miseretque, pudetque ?  
726       Scilicet id melius ; bella intestina, necesque  
727       moliri inter nos, viresque absumere nostras  
728       nequicquam et saevum Turcarum increscere regnum  
729       inque dies magis atque magis radicibus actis  
730       altius, ad caelum tolli, pars cetera donec  
731       terrarum discerpta odiis et viribus impar,  
732       ingratis frenum accipiat : cogatur et una  
733       flagitiis servire novis, ritusque profanos.  
734       Discere et in leges gentis jurare rebellis."

735 Talibus accensi dictis funduntur in agros  
736 Odrysius, placido quos flumine lenior Hebrus  
737 lambit et aurifera dives fecundat arena.  
738 Mox autem irriguam gelidis non unius undis  
739 amnis et auctoris dictam de nomine Orestam  
740 praetereunt laeti : positisque ad moenia castris  
741 Byzanti, grates Superumque, hominumque parenti  
742 supplicibus referunt verbis : rebusque precantur  
743 optatum, qualem sperant ante omnia, finem.  
744 Dumque sacris intenti omnes operantur et aras  
745 ante pias astant humiles : animoque labores  
746 exhaustos repetunt et secum iter omne revolvunt,  
747 adventare acies Italum conserta sequentes  
748 signa vident, tectosque equites fulgentibus armis,  
749 non procul inde ad se celerem contendere gressum.  
750 Ergo incredibilis, cunctorumque aucta tumultu  
751 laetitia exoritur subito : seseque vicissim  
752 hinc, atque hinc acies animis et voce salutant.  
753 Et tandem venisse locum gratantur in unum  
754 incolumes ; ingens ferit aurea sidera clamor :  
755 quo septem Byzanti arces, quo ducta coronae  
756 triplicis in morem sublimia moenia ab imo  
757 contremuere solo : fluctusque repressit euntes  
758 Bosphorus : atque iterum, post saecula mille revulsae,  
759 inter se frontem Symplegades infregerunt.  
760 At primi heroum proceres, delectaque pubes  
761 nobilium propere castis egressa reclusis  
762 sublimes in equis Italum ductoribus ultro  
763 occurrunt, dextrasque juvat jungere dextris.  
764 In primis regem Ausonium Goffredus amicis  
765 excipit adveniens complexibus atque ita fatur.  
766 "Maxime dux, nostrarum in quo pars maxima rerum,  
767 curaque suscepti belli, spesque una recumbit,  
768 en tandem ad fines pervenimus Hellesponti :  
769 metimurque oculis angusti litoris oras,  
770 per quas Argivum juvenes transisse feruntur  
771 aurea de trucibus rapturi vellera Colchis :  
772 litoreque in medio pugna stravisse tyrannum  
773 Bebrycium, qui se obtulerat venientibus hostem.  
774 Quod si summa Dei vis, atque immota voluntas,  
775 has voluit primum virtuti opponere fauces,  
776 omen et judicium belli, quodcumque futurum est,  
777 nos quoque Threicii regis videamus oportet,  
778 num fraudem, num vim injustam superare queamus :  
779 et, quos insidiis (longa est injuria) captos  
780 detinet et vinclis jamdudum et carcere clausos  
781 heroas, prima incoepti fundamina nostri,  
782 quod minime putat ille, manu repetamus et armis.  
783 Ne tamen immeritos Thracas credamur adorti,  
784 misimus Odrysius qui bellum indicat Alexi :  
785 et cras, ni nostris properet parere petitis,  
786 vastaturum agros nos passim, urbemque minetur,  
787 haec Tullingus et haec contra sic Daunius heros.  
788 Illum ego tot scelerum poenam debere suorum  
789 et reor et si quid recti mens concipit, opto.  
790 Tu modo fac tecum statuas tibi quicquid agendum

791 esse putes ; ego jussa sequar ; tamen usque cavendas  
 792 (si qua fides) populi fraudes et verba Pelasgi  
 793 expertus moneo ; laudis gens invidia nostrae,  
 794 invida virtutis ferro modo victa quiescet."  
 795 Atque haec dum secum vario sermone volutant,  
 796 considunt acies campo, seque aggere cingunt.  
 797 Sole autem Hesperias mox decedente sub undas  
 798 ter sonitum tuba rauca dedit : quo scilicet omnes  
 799 admoniti genibus flexis et ad ardua palmis  
 800 sidera sublatis Dominam terraeque, polique  
 801 et matrem illius, nostros qui solus ab Orco  
 802 vindicat atque oris animos caelestibus infert,  
 803 voce salutarunt humili : precibusque peractis,  
 804 depellunt dapibusque famem, mensisque reponunt  
 805 vina : quibus laeti sedant curasque, sitimque.  
 806 Interea portas alii, vallumque, viasque  
 807 obsidunt vigiles : alii defessa labore  
 808 membra locant stratis : gelidaeque horrentia Lunae  
 809 frigora et hibernos vitant sub pellibus imbres :  
 810 optatosque petunt somnos, animosque relaxant.

## LIBER QUINTUS

S\_5 v.1 Nec minus Odrysiam cingi custodibus urbem,  
 2 altaque pervigili servari moenia cura,  
 3 cum primum mediis Gallorum exercitus agris  
 4 consedit, densis Italum legionibus auctus,  
 5 jusserat Imperii Thracum moderator Alexis :  
 6 et sese cunctorum oculis subduxerat ultro,  
 7 abdideratque domi, stratis defessa daturus  
 8 membra, maris magni dum Sol delapsus in undas  
 9 solatur dulci mortalia corda quiete  
 10 et caelum reserat stellis ardentibus aptum.  
 11 Ipse tamen pectus curis exercitus atris  
 12 pervigilat, placidoque nequit vincere sopore  
 13 lumina : at in varias animum diducere partes  
 14 cogitur et rerum dubios expendere casus.  
 15 Non secus atque olim diverso ex orbe ruentes  
 16 marmoreum impellunt aequor Boreasque, Notusque  
 17 alternantque vices inter se et mutua regnant ;  
 18 tolluntur fluctus ad sidera : fervet arenis  
 19 aestus et ejecta litus conspergitur alga.  
 20 Jamque adeo mediae spatium volventia noctis  
 21 sidera adoratos Ganges ubi dividit Indos :  
 22 cum post insomnes horas et taedia, molli  
 23 infractos lecto tandem maestissimus artus  
 24 composuit, vigilesque oculos languore remisit.  
 25 Sedibus interea ex imis egressus Averni,  
 26 ne quid inexpertum, ne quid pateretur Alastor

27 intentatum a se, quo tanta incoepta morari  
 28 possit et Abdaridis illatum avertere bellum,  
 29 quaerit in aera fratres regione vagantes :  
 30 depulsos caelo fratres, qui jussa secuti  
 31 impia Luciferi summo detrudere regno  
 32 aeternum volvere hominum, Superumque parentem,  
 33 cunctarum ut rerum domini, caelumque potentes  
 34 ipsi essent, primique alta in statione sederent.  
 35 At genitor, cujus nutum, dextramque tremiscunt  
 36 sidera et aeternae mentes reverentur, ab astris  
 37 dejectos, partim tenebris addixit Averni.  
 38 Partim autem immensum ferri per inane volantes  
 39 jussit et impurae versari in partibus aethrae,  
 40 supplicia et poenas tanto pro crimine dantes.  
 41 Quam multae Libyco turbantur litore arenae,  
 42 Eurus ubi, Zephyrusque mari incubuere profundo :  
 43 aut etiam Arabia in media cum pulveris atrii  
 44 insurgunt campis nubes et lucis egentem  
 45 aera condensae picea caligine condunt.  
 46 Sic caeli obscuras implent immensa cavernas  
 47 agmina et assidue flagris immanibus urunt  
 48 pectora : quorum acres ni vis divina refringat  
 49 conatus, una cunctos in Tartara secum  
 50 ima ferant : tantas properant innectere fraudes  
 51 et tantum miseros gaudent avertere luce  
 52 siderea et noctis tenebris damnare perennis.  
 53 Huc ergo celerem cursum contendit Alastor  
 54 et sedes petit infaustas : ubi foeda nigrantum  
 55 turba habet Alituum, quae per sua somnia miris  
 56 ludit imaginibus mentes et pectora regum.  
 57 Est locus, in terras ruit unde nigerrimus imber  
 58 et teneras grando misere contundit aristas,  
 59 praecipiant nimbi, volvunt maria alta procellae,  
 60 humanumque genus tonitrus et fulgura terrent.  
 61 Illic extorres Genii torquentur et illic  
 62 concilia et coetus agitant, variasque per artes  
 63 circumfusi animis certant illudere nostris.  
 64 Quos penes et facies et monstra immania rerum,  
 65 Scyllaeque, Sphingesque et turpia Centaurorum  
 66 corpora, nec tacitae caedis non conscius horror :  
 67 ac scelerum suadela, novi spes improba regni,  
 68 quaeque adeo pavidas impellit ad impia mentes  
 69 vana superstitio : saevisque adamata tyrannis  
 70 et recti et pravi certa sine lege potestas.  
 71 Quo simul adveniens trepidus successit Alastor,  
 72 accurrere omnes, summaque in sede receptum  
 73 Luciferi inferna furiarum ab sede ministrum,  
 74 Quid mandet, fierique velit toto agmine poscunt.  
 75 Ille autem. "O nostro gens acceptissima regi,  
 76 spes Erebi, Stygiique cohors teterrima fratris,  
 77 immensi quibus ad poenam plaga turbida caeli  
 78 est data, mortali victi cum cessimus hosti  
 79 aetherias sedes et pro caelestibus oris,  
 80 aeris obscurus tractus, terraeque cavernas  
 81 cogimur horrentes habitare et frigora et aestus  
 82 perferre et soli saevos tolerare labores.

83       Usque adeo nihil esse putat Rex aetheris alti,  
84       assiduusque, atroxque ultor memorabilis ausi,  
85       nos coetu e Superum, caelique ex arcibus actos  
86       praecipites, spectare homines ea regna colentes  
87       (proh scelus) in primis generi quae debita nostro.  
88       Cernitis Europae populos, sedisque rebelles  
89       Tartareae, nuper percusso foedere bellum  
90       decrevisse Syris inferre et tollere ritus  
91       consuetos, aliumque animis inducere cultum.  
92       Ut, qui falsa diu fuerint praecepta secuti  
93       Abdaridae, incolumes, perspecta fraude priorum,  
94       serventur, rectaque omnes ad sidera tendant.  
95       Nos autem in duras nobiscum impellere poenas  
96       possimus nullos, penitus quos odimus et quos  
97       post obitum Stygio sontes addiximus Orco,  
98       ditantes praeda semper Phlegethonta recenti.  
99       Erigite ergo animos et, quam pote quisque per artem,  
100       afferat auxilium, praestoque ruentibus adsit  
101       rebus et imperii fines, spatiumque propaget :  
102       communesque altis regionibus arceat hostes,  
103       hoc jubet, hoc vobis mandat rex magnus Averni.  
104       Irritate animos, iraque accendite Graios  
105       in populos, quorum, ceu dira piacula, ritus  
106       depellunt ipsi templorum a limine et aris  
107       exosi patrum decreta aeterna piorum.  
108       Ite igitur, mentesque simul, sensusque profanos  
109       jamdudum caelo aversos spe pascite iniqua ;  
110       insidias ut cum Gallis, Italisque pararint,  
111       ignorent sese pietatis imagine falli."  
112       His dictis accensa cohors furit undique et iras  
113       evomit, ac caelum tenebris obscurat obortis.  
114       Inde autem in populos Graium mille agmina, mille  
115       descendunt acies sublimi ex aere missae :  
116       et corda exacuunt, rabiemque furentibus addunt.  
117       Inque Italos raptim, Gallosque erumpere cogunt,  
118       dum nox atra oculis nebulas offundit opacas  
119       et Lunam occultant densa caligine nubes.  
120       At Morpheus inter Genios notissimus unus  
121       aerios, cui summa olim permissa potestas  
122       omnia vertendi sese in miracula rerum,  
123       ignemque, pluviumque imbrem, glaciemque, nivemque,  
124       effigiesque hominum, saevarumque ora ferarum,  
125       jussus : et pressis lecto superastitit alis ;  
126       Eustratio vocem similis, faciemque, coloremque  
127       et crimen intonsum, rugisque inarata senectae  
128       ora, manusque ambas, malasque aetate fluentes.  
129       Eustratio, qui tum custos populique, patrumque,  
130       sacrorumque adeo princeps perversa doceri,  
131       quae miseri colerent cives, praecepta jubebat.  
132       Ergo illum vultu referens, procurvus eburno  
133       incubuit baculo, talesque e pectore voces  
134       edidit. "O quondam cui res est credita tanti  
135       imperii, Graiorumque vigil tutela sacrorum,  
136       quae ritu ceu vera pii statuere parentes,  
137       perque manus eadem seri excepere nepotes,  
138       surge, age ; (namque) sub (eximio) requiescere casu

139 non licet et totam somno traducere noctem,  
 140 consilio populi moderantem frena, manaque."  
 141 Haec ille affatus tenebris se immiscuit atris.  
 142 At rex Threicius toto de corpore somnum  
 143 excutit atque artus stratis (e) mollibus excit :  
 144 induiturque humeros saturatam murice laenam  
 145 et lateri insignem gemmis accommodat ense.  
 146 Tum vero ancipiti versans sub pectore cura  
 147 consilia et rerum casus, fluctusque severos  
 148 permetuens, ad se fidos accersit amicos :  
 149 Thatinum ante omnes, quos tecta in regia postquam  
 150 convenisse videt, positos ex ordine, primum  
 151 talibus alloquitur solio sublimis ab aureo.  
 152 "Delecti o proceres, regni firmissima nostri  
 153 robor, consilio qui nos fulcire fideli  
 154 consuestis, quotiens dubiis de rebus ad aures  
 155 rettulimus vestras et quae mens esset, aperte  
 156 testati, mecum cives servatis et urbem.  
 157 Scitis ut insidiis exceptum in tecta, domosque  
 158 adduci et vigili cinctum custode teneri  
 159 Ugontem magnis curarum a regibus ortum,  
 160 ductoresque alios, sumptis quos fortis in armis  
 161 Gallia misit avis ad nos, atavisque potentes,  
 162 latronum capita : occiduis qui nuper ab oris  
 163 adveniunt, urbemque armato milite nostram  
 164 oppugnant, positis ipsa haec ad moenia castris :  
 165 quodque magis doleam, ferroque, ignique minantur  
 166 desolatos agrum, stragemque duros  
 167 undique, ni juvenem actutum reddamus et una  
 168 delatis illuc rebus, quarum indiget usus,  
 169 omnibus et Gallos quamprimum, Italosque juvemus.  
 170 Ac jam tempus adest, orta cum luce vocari  
 171 oratorem opus est regum mandata ferentem :  
 172 reddamus quo nostra illis responsa vicissim :  
 173 oblatam ne ultro pacem jungamus, an armis  
 174 imperii sedem nostri tueamur et illi  
 175 experti discant Thracum quid fortia possint  
 176 pectora et unanimes Graiorum in proelia vires."  
 177 Rex haec Threicius. Sed enim mussante Senatu  
 178 Thatinnus, cujus semper sententia quo se  
 179 flecteret, ac rebus laxas daret unus habenas,  
 180 spectabant intenti omnes, sic ore locutus.  
 181 "Si quisquam est, rex magne tuam qui nesciat omni  
 182 perspectam virtutem orbi, qua clarus ab Indis  
 183 sol oriens medias percurrit lampade terras  
 184 et caput Hesperias condit declivis in undas,  
 185 forte putet certi tantis in rebus egentem  
 186 consilii, certas aliorum exquirere voces.  
 187 Nunc autem, quoniam melius quid tempora poscant  
 188 ipse unus, tamquam specula sublimis ab alta  
 189 prospicis, o bone Rex quam quos Byzantia patres  
 190 curia dinumerat, cum convenere frequentes,  
 191 quis dubitet, quin infestos delere latrones,  
 192 non virtute palam praestet, sed fraude petitos ?  
 193 Nam neque nunc demum quaerenda est gloria bello  
 194 ulla tibi, quippe illam olim peperere labores

195 multiplicem et ducti superato ex hoste triumphi.  
 196 Sic vicisse satis quavis ratione superbos  
 197 praedones, quos una suis in sedibus actos  
 198 impulit externos rabies invadere fines  
 199 civilis, patriaque ingens exegit egestas.  
 200 Hos autem si fraude queas evertere, nulli  
 201 objiciens Graiosque tuos, Thracesque periclo,  
 202 tum te insignis honos, tum fama aeterna sequatur  
 203 victorem, laudesque tuas cum laudibus aequet,  
 204 tota quibus priscum commendat Graecia saeculum.  
 205 Cum post innumeros anni, Solisque recessus  
 206 unum te ventura duces mirabitur aetas  
 207 delevisse vagam nostro sine sanguine gentem.  
 208 Dimittendi igitur donis ingentibus aucti,  
 209 quos tua nunc, Rex magne, tenet custodia vinctos,  
 210 cum primum terras radiis aperire patentes  
 211 coeperit exoriens Aurora, intraque vocandi  
 212 moenia ductores, simulato et foedere dextrae  
 213 jugendae, quo nostra hostem pellamus ab urbe  
 214 pacatum, post autem Asiae castella, sitasque  
 215 montibus in summis, cinctasve palustribus undis  
 216 oppugnantem urbes frustra ferroque fameque  
 217 absumamus, opem Turcis, Arabisque ferentes."  
 218 Talia censebat fraudum certissimus auctor  
 219 Thatinnus, nutusque omnes consulta probabant  
 220 impia, cum subito falsis rumoribus aures  
 221 velatis in facem versus complevit Alastor.  
 222 Scilicet excubias omni statione relicta  
 223 discessisse procul nec quemquam castra tueri ;  
 224 desertumque suis custodibus undique vallum :  
 225 nec non et reliquo somno, vinoque sepultos  
 226 ostentare viam, si quis praestantibus ausis  
 227 illustris, Graiumque inter Tracumque maniplos,  
 228 audeat implicitam (.....)  
 229 insuetam tenebris turbam committere pugnam  
 230 et conferre manus, ignarum hominumque, locorumque.  
 231 Hic improvisa mentem commotus Alexis  
 232 tantarum rerum fama, capere ocios omnes  
 233 arma jubet, totaque effundi ex urbe maniplos.  
 234 Interea sese, facti quasi totius expers  
 235 devinctus somno cubet, in penetralibus aureis  
 236 expectaturum, quem tanta audacia finem  
 237 consiliis, rebusque suis imponat et utram  
 238 in partem sua coepta ruant : tum protinus illuc  
 239 venturum, quo se casus, tempusque vocarit,  
 240 aut bellum gerere, aut concepto foedere pacem  
 241 exercere velint, dextrisque adungere dextras,  
 242 legibus inter se et pactis nova pacta ligante.  
 243 "Immo, ait Eurytim, (famae namque illius auctor  
 244 venerat Eurytion, uni cui credita serae  
 245 noctis et obsessi praesens custodia muri)  
 246 jamdudum sumptis populus tuus assidet armis  
 247 pugnae avidus nimiumque moras incusat inertes,  
 248 dum proceres, summique duces recludere nolunt  
 249 objicibus ruptis portam, cui Thracia nomen,  
 250 injussuque tui prohibent erumpere et ipsam



251       linquere noctu, nis vacuum custodibus urbem."  
 252       At bonus Eumedes, cujus praecordia nullis  
 253       attigerant stimulis dirae. Obscaenaeque volucres ;  
 254       sed pietas, cultusque Dei sincerus et una  
 255       intemerata fides, cunctosque illaesa per annos  
 256       virtutis miro mentem inflammarat amore,  
 257       sustinuit paulum sese : mox pronus utrisque  
 258       submissis genibus canos nudavit et ipsum  
 259       in morem venerans adstantem ante ora tyrannum  
 260       incipit atque illum verbis affatur amicis.  
 261       "Maxime Rex, equidem pro te quicumque periculis  
 262       objiciet caput ipse suum, natosque, domumque  
 263       impiger in dubii mittet discrimina martis,  
 264       dum praesens tempus recte sentire fatebor.  
 265       Nil quoniam metuisse, tamen cavisse decebit  
 266       omnia, consiliis patriae qui jura tuetur  
 267       atque unam spectat populi, regisque salutem,  
 268       quis dubitet, quin castra duces, quo densior umbra  
 269       incubuit terris et nox accommoda furtis,  
 270       munierint, dubiosque aditus et strata viarum  
 271       excubiis passim vigilantibus ? Haud mihi quisquam  
 272       suaserit et rigidas glacies superasse, nivesque.  
 273       Perpessosque hiemes, ventosque, imbresque furentes  
 274       incolumes, populosque manu fudisse superbos  
 275       atque viam medios tuto stravisse per hostes,  
 276       oblitos nunc esse sui : laetosque laborum  
 277       ignorare quibus terrarum in finibus errent :  
 278       aut somno et placida oppressos recubare quiete.  
 279       Haud ita Goffredus primis assuetus ab annis  
 280       degere sub dio vitam, tolerare labores  
 281       militiae, noctu numquam se dedere somno  
 282       instituit, Syriae secum quos ducere in oras  
 283       decreerat, bello natos et fortibus ausis.  
 284       Nec nostris nimium notus Boemundus et acer  
 285       virtutis magnum specimen Tancredus avitae,  
 286       artibus instructi patriis, non vivida bello,  
 287       Ausoniae decora alta suae, legisse feruntur.  
 288       Pectora, Dalmaticis olim durata pruinis,  
 289       doctaque sub forti Martem exercere magistro.  
 290       Scilicet hic demum nocturna ob frigora miles  
 291       injussus solito vallum custode relinquat  
 292       exutum, noctemque ratus, tenebrasque profundas  
 293       fraude vacaturas, caelo se subtrahet. Esto  
 294       non satius pacem inter nos et foedera jungi ?  
 295       Communemque hostem communi arcere periculo ?  
 296       Qui nunc Graiorum miseris cervicibus instat  
 297       asper, acerba minans, vix illum Thracius arcet  
 298       Bosphorus atque (utinam vates sim falsus) apertis  
 299       moenibus his tandem, portisque a cardine vulsis  
 300       immittet sese ; sequitur victoria numquam,  
 301       quos bellum premit assiduum et discordia vexat.  
 302       In manibus pax est, Rex o clarissime, nostris  
 303       cum populis, quorum invictas ad proelia vires  
 304       armavit pietatis amor, justumque coegit  
 305       bellum inferre Asiae pro libertate piorum.  
 306       Tu modo, quod nobis sese nunc obtulit ultro,

307 consilii si quicquam in me est, citus arripe et istam,  
 308 quae tibi suspectos Gallos facit, exue mentem.  
 309 Hi tecum jungentur enim certare parati  
 310 officiis, hostesque una depellere Turcas  
 311 et proferre tui longe confinia regni."  
 312 Haec bonus Eumedes : nusquam tamen impia flexa est,  
 313 aut commota in loca Thracis sententia regis.  
 314 Stat casus tentare omnes, quacumque paratam  
 315 ostentat fors ipsa viam, spemque addit aventi.  
 316 Namque illum tantis aversum a rebus agebat  
 317 invidiae dolor usque comes, generosaque pubes  
 318 Hesperiae antiquae, regnum paritura, decusque  
 319 ablatum Graiis Arabum virtute tyrannis,  
 320 terrebat suspensum animum, imperioque timentem.  
 321 Atque ita, consiliis postquam pejoribus uti  
 322 ipse volens statuit, melioraque reppulit, ultro  
 323 Eurytiona vocat, tacitumque educere porta  
 324 imperat instructos pedites, quos candida circum  
 325 vestis eat, retegens humeros candore nivali.  
 326 Dissimulet tamen interea se talia jussu  
 327 moliri alterius, coeptisque insistere tantis.  
 328 Paruit Eurytion dictis : " Populumque sequentem  
 329 sponte sua, Dirisque actum furialibus urget  
 330 ad caedem atque animos cunctorum hortatibus implet.  
 331 Ite viri : vobis oblatum optabile tempus  
 332 fortiter audendi est : nox intempesta tenebris  
 333 usque suis, caelo incumbens vos ad sua belli  
 334 furta vocat : jacet hostis humi madidusque, tremensque :  
 335 nec capere arma queat, quamvis velit, horrida passus  
 336 frigora et insomnis partem vigilare coactus  
 337 noctis ad extremam : nunc somno mergitur alto :  
 338 infractosque artus stravit sub pellibus, ite :  
 339 este viri, patriae memores : victoria nostris  
 340 in manibus : sibi quisque animos, viresque ministret."  
 341 Dixerat : atque illi, rapidi ceu flaminis aerae,  
 342 qua data porta ruunt et spe sibi destinat unum  
 343 quisque ducem, aut caesi exuvias jam praeripit hostis :  
 344 seque cupit, speratque, suam qui primus in urbem  
 345 victor ovans referat quaesitum ex hoste triumphum.  
 346 Ut, cum praecipites summo de vertice montis  
 347 ima petunt aucti pluviis hiemalibus amnes,  
 348 quos circumjectae moles et saxa retardant,  
 349 triste fremunt, cautesque albent aspergine et ingens  
 350 volvitur hinc atque hinc tumefacto gurgite vortex,  
 351 impetus undantum donec praeruptus aquarum  
 352 arctis incubuit claustris et vi via late  
 353 perque humiles vicos, obstantesque acta per agros.  
 354 Haud secus Odrysia prorupit ab urbe juvenus :  
 355 impatiensque morae rapidos contendere gressus  
 356 speratam ad caedem demens pergebat et alter  
 357 alterius celerabat iter ; jamque ardua longe  
 358 moenia Byzanti festina reliquerat alti,  
 359 cum Fabaris, Clytiusque, ducum quibus ultima jussu  
 360 credita contigerat serae custodia noctis,  
 361 senserunt tacitae per amica silentia Lunae  
 362 accedentem hostem, propiusque in castra ruentem.

363 Atque ambo. "Arma, arma fremunt : concurrite ad arma,  
 364 o socii ferte arma manu : date tela, propinquat  
 365 ferro accincta acies et, quae recludere vallum  
 366 audeat, audenti ni tela opposta resistant."  
 367 Hae simul exceptae voces, simul excita pubes  
 368 Gallorumque, Italumque omnis concurrat ad arma :  
 369 ac de more cavis castrorum in turribus hostem  
 370 exspectant stantes alto super aggere, quo tum  
 371 quisque loco veniens primum, quaque arce resedit,  
 372 pontibus insidunt junctis, densique tuentur  
 373 loricam valli lento de vimine textam.  
 374 Ast Itali, Gallique duces Goffredus et acer  
 375 Appulus atque animo praestans Tancredus in unum  
 376 convenere locum ; queis se duo fulmina belli  
 377 addiderunt omnis expertia corda timoris  
 378 Roberti, Stephanusque armis superare, manuque  
 379 doctus et hostiles evertere fraude phalanges ;  
 380 nec non Tectosagum ductor Ramundus avita  
 381 laude ferox, vi saepe tamen qui fretus aperta  
 382 contuleratque manus, victosque fugaverat hostes.  
 383 Affuit et Medix, clarae cui gloria vitae  
 384 dulcis erat tantum, ceu dedecus instar acerbae  
 385 mortis ; adhuc quamvis juvenile inglorius aevum  
 386 egerat assuetus cursu praevertere Cauros,  
 387 aequalesque inter duram exercere palaestram,  
 388 tum primum flava spargens lanugine malas :  
 389 formosae sed enim decus immortale juventae  
 390 absciderat crinem, solidoque obtexerat aere.  
 391 Seque illi veterum generosa a stirpe Quiritum,  
 392 queis post eversas sedes et moenia Romae  
 393 Umbrorum populi se commiserere regendos,  
 394 progenitus, comitem venienti Ursanius ultro  
 395 addiderant forma et juvenili aetate superbus :  
 396 quique adeo magno magnis heroibus iret  
 397 par animo et miro laudis flagraret amore.  
 398 Quare avidus factis illustrem extendere famam.  
 399 Ut primum tanti rumor percubuit ingens  
 400 incoepti, passimque Italis vulgatus in oris,  
 401 contulit extemplo Dauni se in castra, volentem  
 402 scilicet ex tanto pacis, bellique magistro  
 403 discere virtutem jam tum, verumque laborem,  
 404 praecessurus avos longe praestantibus ausis.  
 405 Hic igitur Medici paribus se passibus aequans  
 406 contiguum laevo lateri conjunxerat, ut cum  
 407 sustulit Oceani laetum jubar aequore vultum,  
 408 aeraque illustrans radios effudit Olympo,  
 409 si forte aetherius sese comes addidit ignis,  
 410 aetherius Jovis ignis et ore affulsit honesto,  
 411 incedunt rutili, tenebrasque et nubila vincunt.  
 412 Quos circumfusos acuens hortatibus heros  
 413 Goffredus breviter sic est affatus. "Averem  
 414 ipse quidem, o socii, fratrum generosa meorum  
 415 pectora, in Arabias gentes firmissima coepti  
 416 fundamenta pii, solos invadere Turcas,  
 417 pellereque obsessa Solymorum ex arce : nec enses  
 418 interea Graio foedari sanguine nostro :

419 sed quoniam Euxini fauces transmittere Ponti  
 420 non licet illorum multa sine caede ; sequamur  
 421 quo Deus et rerum series vocat una cietque.  
 422 Haud etenim vis ulla potest non justa videri,  
 423 cujus ope infensos tuti propellimus hostes.  
 424 Quare agite, o proceres, postquam Comnenius ultro  
 425 non petit et vino credit, somnoque sepultos,  
 426 quamprimum votis aliquem decernite vestris,  
 427 qui properet celerem castris educere turmam,  
 428 circumiens medios longis anfractibus agros,  
 429 sentiat exclusos dum longe a moenibus hostes,  
 430 ne faciles cuiquam pateant, tutique receptus."  
 431 Dixit et una omnes tanti sibi munus honoris  
 432 deferri petiere animis et vocibus iisdem ;  
 433 Graiorum, Thracumque dolos et verba perosi.  
 434 Goffredus sed enim splendenti in casside sortes  
 435 misceri, ducique jubet. Dux Appulus urna  
 436 exiit, isque Italos aversae a limine portae  
 437 castrorum egressos latis agit avius agris.  
 438 Atque ubi jam Septem non longe a Turribus ire  
 439 se videt, Ausonium deflectere protinus agmen  
 440 imperat et versos a tergo invadere Thraces.  
 441 Illi autem interea densa testudine Gallos  
 442 agressi jaculis primum, levibusque sagittis  
 443 pugnam ineunt : alii scalis ascendere vallum  
 444 obnixi et curvis divellere falcibus audent.  
 445 Hic Lycabas patre Argolico genetrice creatus  
 446 Ismaria, suetus qui fas miscere, nefasque,  
 447 ausus erat Phyllyres thalamum incestare novercae,  
 448 ac tum Threicio Regi gratissimus unus :  
 449 primus in excelsam conjecit lampada turrim,  
 450 quae lateri astabat portae vagus ignis adhaesit  
 451 parietibus summis : mox ad fastigia tecti  
 452 ascendens, perque ipsa simul dilatus ab Euris  
 453 (nam flabant), nilque illaesum, intactumque relinquit.  
 454 Tunc ille. "O cives, Deus, en Deus ipse secundat  
 455 nostra incoepa, inquit, quos non potuere pruinae  
 456 Illyricae, densaeque nives absumere et imbres :  
 457 scilicet efficiunt objecta incendia, ne se  
 458 expediant, neve arma armis opponere possint.  
 459 Ite viri mecum, mediaque irrumpite porta.  
 460 Haec mea nunc primum valuis impacta securis  
 461 recludetque aditus et castra inimica, dabitque  
 462 corpora multa neci." Jactanti talia guttur  
 463 aggere de summo jaculum transverberat ingens  
 464 atque ictu costas veniens perrumpit eodem  
 465 Phradmonis Arcadii : Lycabam qui forte secutus,  
 466 exul ob infusum fratri, natisque venenum  
 467 venerat in Thracis regnumque, urbemque tyranni,  
 468 haerebatque illi pediti pedes : egit utrumque  
 469 ad mortem vulnusque unum, nox una, manusque  
 470 una eademque Orco sontes demisit et umbris.  
 471 Non secus ac gemini rigidis cervicibus angues,  
 472 vere novo cum forte latent in graminis herba  
 473 impliciti variis circum squalentia nodis  
 474 pectora, si propius messor se contulit, ambo

475 ilicet exsolvunt sese, pariterque feruntur  
 476 horrida porrectis edentes sibila collis :  
 477 ille autem prato falcem supponere doctus  
 478 uno utrumque caput venientibus amputat ictu.  
 479 Vulnere sic Lycabas, sic Phradmon stratus eodem  
 480 abjicere animos et verba minacia, primi,  
 481 qui patrios fuso foedarint sanguine campos.  
 482 Ni prior Eurytion pugnae stimulator iniquae  
 483 et fraudum tantarum auctor, dum fervidus instat  
 484 molibus, eque alto raptas trahit aggere crates,  
 485 percussus dura cecidisse (in) tempora glande,  
 486 effractoque sinum sparsisse et arma cerebro.  
 487 At reliqui, quorum infelix spe pectora inani  
 488 luserat Eurytion, simul ac videre peremptum,  
 489 concessere retro, namque illos grandinis instar  
 490 saxa super, vastaeque trabes et tela ruebant :  
 491 ac dextra, laevaue procul sine more furentes  
 492 liventis plumbi glandes, celeresque sagittae  
 493 emissae arcebant castris, longeque fugarant  
 494 jamdudum exanimes atra formidine Graios :  
 495 praeter eos, qui turbam inter, gemitusque, fugamque  
 496 ad terram dederant perfossum vulnere corpus.  
 497 Nec tamen haec nulla sine caede incoepa suorum  
 498 evenere piis. Nam dum super aggere turres  
 499 castrorum hinc atque hinc properant absumere flamma  
 500 injectae et longe dant clara incendia lucem,  
 501 eminus immissis una periere sagittis,  
 502 quarum acies fuerat letali infecta veneno,  
 503 Iccius, Agravius, Contus, Celtillus et Aegeus,  
 504 cumque Accone Clephis, prolesque Indonis Alauda :  
 505 Indonis, qui quondam inter regnavit Iberos  
 506 praedives, sed enim rebus mox exul iniquis  
 507 fugit inops procul ad fines et tecta Vocatum,  
 508 Tarbellosque Auscosque, Bigerronesque, coactus  
 509 externo patrium Sicorim mutare Garumna.  
 510 Nervius hos, Atrebasque ferox, Morinusque sequuntur.  
 511 Trajectus frontem Morinus, laevamque papillam  
 512 Nervius : ast Atrebas intortae verbere fundae  
 513 aggere semianimis fossam revolutus in imam.  
 514 Ipse tamen Charilas, Cyndesque et fortis Hiempsal  
 515 conferti ordinibus, pontes ut forte tenebant,  
 516 sese oculis Graium certatim ex ponere pergunt,  
 517 invitantque hostes ultro conscendere vallum  
 518 et conferre manum et letum pro laude pacisci.  
 519 "Eia agite, o densis solum confisa tenebris  
 520 agmina, quid statis ? Vos huc, vos orta repente  
 521 lux vocat : en omnes imbrique, geluque jacemus  
 522 torpentes passim, correptaue corpora flamma  
 523 atque oculos caeci fumo comburimur atro  
 524 et nusquam stabiles vestigia pressa tuemur."  
 525 Haec Auscus, bellis Auscus bonus, haec quoque gentes  
 526 inter Aquitanas nota virtute Garumnus,  
 527 Tonsillusque ferox, nocturnaue praelia doctus  
 528 Orgetorix miscere manu et discedere victor.  
 529 Et simul ingestis multos in tartara trudent  
 530 aclydibus, sudibusque etiam, gaesisque, sparisque

531 inque agmen suetus inferri hostile verutis.  
532 Dum haec non una castrorum in parte geruntur,  
533 Daunius a tergo veniens invadit Achivos  
534 aversos, Thracesque sibi nil tale timentes :  
535 atque odiis animum patriis accensus et ira.  
536 "En qui nos (inquit) caecae per tempora noctis  
537 appetiere dolis ? Sunt, en sunt scilicet iidem,  
538 qui vestrum aspectum ferre et consistere contra  
539 Epiro in media numquam potuere, sed armis  
540 devicti vestris campo fugere relicto,  
541 reliquiae infames pugnasque exosa juvenus,  
542 somnique atque epulis et lustris dedita pubes,  
543 ceu persaepe ferae deprensae in sedibus haerent."  
544 Dixit et extemplo vagina interritus ensem  
545 diripit ; illum omnes manibusque, animisque paratis  
546 praecipites primam in pugnam, caedemque sequuntur,  
547 inque aversa ruunt Graiorum terga : rapaces  
548 non secus atque lupi, quos alta excedere silva  
549 dira fames, lucisque vagae mora tarda coegit,  
550 si quando longo pascentes agmine cervos  
551 ire vident, primum taciti vestigia ponunt,  
552 mox propius saltu simul exsiluere, feruntur  
553 una omnes : adiens hic illum eviscerat atris  
554 dentibus : ille alium trajectum vulnere fauces  
555 occupat et rabido discerpit viscera morsu.  
556 Sic Daunius, sic Ausoniae delecta juvenus,  
557 invasere aciem Graiorum in terga ruentes.  
558 Atque hic ante alios ferro Boemundus acuto  
559 aggressus Sagarim (Syrii vetus incola Orontis  
560 ille erat et Turcis Daphnem patefecerat urbem)  
561 sternit humi, gladiumque adigit per colla volenti  
562 dicere, ni vocem pressisset vulnus euntem.  
563 Huic etiam adjungit Cotylan, Phaestumque, Lycumque :  
564 quos Chromio Thraci Boeota eduxerat Arne :  
565 fortunata parens Arne, nisi Daunius ensis  
566 tergeminos vitae spoliasset lumine natos.  
567 Jamque adeo extremum perruperat agmen et alta  
568 caede madebat humus, cum versae in castra cohortes  
569 se sensere premi, frustra sua coepta, dolosque  
570 conatae ad finem perducere : nec sibi Thracis  
571 limen ad Odrysium portae superesse receptum :  
572 quare avidus turbarum auctor, rerumque novarum,  
573 quo prodente olim regnandum accepit Alexis  
574 imperium et patria exegit Nicephoron in urbe.  
575 "Non armis opus est, non viribus, inquit Achilles,  
576 o cives : quod quisque sibi, spesque una salutis  
577 suadet iter, celer arripiat, seque ipse periculo  
578 subtrahat incolumem nec vocem, aut ulla moretur  
579 jussa ducum : cladem ingentem namque Italus illinc,  
580 hinc Gallus fronti incumbens, tergoque minatur."  
581 Talia dicentem, Graiosque in tuta vocantem  
582 opprimit acer eques portis emissus apertis  
583 atque illum agnoscens procerum corpore et armis  
584 indutum variis et clara voce canorum,  
585 accurrens Calabri generosa a stirpe Bryenni  
586 Aegilus, impacto medium discriminat ense.

587 Ille cadit, multoque humectat sanguine terram.  
 588 "I, nunc et dominos, scelus exitiale, potentes  
 589 venali jam prode fide, data praeda jacebis  
 590 alitibusque feris, canibusque voracibus", inquit.  
 591 Mox hominem exosus penitus crudelibus explet  
 592 suppliciis animum merito pro crimine sumptis.  
 593 Inde abiens subit Alcathoum, juxtaque Menaetem  
 594 et Chromim et Peucum et projectis Dorylon armis.  
 595 Ast alia de parte Italum dux Appulus ense  
 596 latum limitem agit, totoque ex agmine lecti  
 597 corporibus passim caesis, agrosque, viasque  
 598 consternunt juvenes, nec quisquam ex hostibus ausus  
 599 praeterea Ausoniis inimicum obvertere pectus  
 600 substitit, aut memor ipse sui, sociumve suorum.  
 601 Ergo illi veluti pecora inter inertia tigres  
 602 qua se cumque ferunt, certo dant agmina leto.  
 603 Ut, cum prima aestas agros flavescere cogit,  
 604 vividus et nusquam graciles alit humor avenas,  
 605 nec pluvia nocturna sitim jam pabula sedant,  
 606 omnia sed raucis resonant arbusta cicadis  
 607 sole sub ardenti, postquam explicuere maniplos  
 608 agricolae, frumenta metunt : jacet ilicet omnis  
 609 fusa seges : campus sectis operitur aristis.  
 610 At pueri, Medix, Umberque Ursanius albo  
 611 vectus equo, galeaque caput contectus uterque,  
 612 ambo annis, animisque pares, quos Daunius heros  
 613 accierat secum nocturna ad proelia ductos,  
 614 in confertam aciem gladios strinxere micantes.  
 615 Hippophilum Medix et Halorum Ursanius, ultro  
 616 dum verbis Graios, Thracesque hortantur et urgent  
 617 in pugnam, certoque loco consistere cogunt,  
 618 interimit Medix demisso in pectora ferro,  
 619 at caput avulsum cervice Ursanius aufert.  
 620 His alios, aliosque addunt et corpora gaudent  
 621 fundere humi, gladiosque una maculare, manusque.  
 622 Ut primum gemini florenti aetate leones,  
 623 postquam visceribus caesarum a matre ferarum,  
 624 sanguineque expleri ventrem assuevere recenti,  
 625 silvarum egressi latebris. Patremque secuti,  
 626 invasere pecus, laeti committere caedem,  
 627 dant stragem atque avidi dentesque, unguesque cruentant.  
 628 Jamque Oriens totum radiis patefecerat orbem ;  
 629 cum tuba Goffredi jussu desistere coepto  
 630 clara jubet, prohibetque ultra procedere pugnam.  
 631 "Non huc, ut Graios patriis pellamus ab oris  
 632 atque animum effuso saturemus sanguine Thracum  
 633 venimus, o proceres, nobis satis inde, superque  
 634 poenarum exhaustum, reliquis ad patria tutus  
 635 moenia sit redivisus." Dixit Goffredus et una  
 636 assensere omnes, sed enim densata juvenus  
 637 Gallorum Ausoniis acies sociarat amicas ;  
 638 inque urbem invitis ductoribus acta ruebat.  
 639 Nuntius interea Regis perfertur ad aures  
 640 Odrysii et trepidis implet rumoribus urbem :  
 641 scilicet innumeros cives cecidisse, ducesque  
 642 et nunc Ausonios, cunctosque uno agmine Gallos,

643 omnia quamprimum ferroque, ignique daturos  
 644 adventare animis immani ardentibus ira.  
 645 Ergo alii ad portum celeres, navesque paratas  
 646 tendere et ignotis sese committere Ponti  
 647 cautibus, ac silvis : alii tellure sepultas  
 648 abdere opes, fidisque aurum mandare latebris,  
 649 pocula, cristallum, vestes, gemmasque nitentes.  
 650 Multi etiam sacris natos, sua pignora, templis  
 651 credentes, miseris rumpebant questibus auras.  
 652 Nulla domus, via nulla novo non mista tumultu :  
 653 hostiles quasi jam ruerent in tecta cohortes ;  
 654 atque antiqua Lygos flammis absumpta jaceret  
 655 et flueret sanguis manantibus undique rivis.  
 656 Audiit exanimis, tristisque exterrita fama  
 657 Irene, veterum claro sata sanguine regum.  
 658 Quae quamvis Thraci conjux optata tyranno  
 659 contigerat, thalamumque volens, lectumque jugalem  
 660 innumeros concordi animo sociarat in annos ;  
 661 Graiorum ritus tamen usque exosa rebelles  
 662 protinus a prima pietatem aetate colebat,  
 663 quam prisca docuere patres ; docet ipse per omnes  
 664 terrarum tractus constanti mente colendam  
 665 Christicolum custos, immensique arbiter orbis  
 666 Romanus genitor rerum cui summa potestas.  
 667 Illa igitur postquam tantum impendere periculum  
 668 Graiorum, Thracumque urbi maestissima vidit,  
 669 extemplo ad Superos palmas utrasque tetendit  
 670 et genibus flexis, sparsoque in terga capillo,  
 671 ante pias, quas rite domo interiore locatas  
 672 Virginis intactae partu sacrauerat aras,  
 673 procumbens imo voces e pectore fudit.  
 674 "Diva parens, cui se totus patefecit Olympus,  
 675 aligerumque chori sublimi ex aethere missi  
 676 nocturnum insueto complerunt aera cantu,  
 677 cum primum in teneras veniens se protulit auras  
 678 filius aeterni patris : quem Nuntius ales  
 679 militia ex alta lectus praedixerat olim  
 680 intactam completurum tibi protinus alvum.  
 681 Si te umquam movere preces castaeque, piaequae  
 682 ullius, auxiliumque ultro miserata tulisti,  
 683 affer opem lapsis, Virgo sanctissima, rebus  
 684 et procul o, tantam nobis averte procellam,  
 685 jungens belli percusso foedere in unum  
 686 Graiosque, Ausoniosque duces, Gallosque feroces,  
 687 qua tota immanes Asia depellere Turcas  
 688 possint et certam Solymis afferre salutem."  
 689 Audiit et tanti partem succedere voti  
 690 Virgo dedit : partem effundi permisit in auras.  
 691 Threicia ut Gallos, Italosque averteret urbe  
 692 annuit at Graios furiata foedera mente  
 693 jungere non vetuit, fraudesque ex more parare.  
 694 Namque ut erat pedibus nudis, lacrimisque decoras  
 695 interfusa genas, thalamum maestissima conjux  
 696 conjugis intravit, solasque ita fatur ad aures.  
 697 "Non ego consilium, Dux invictissime Graium,  
 698 afferre in medium veni : nec, si qua Senatus



699 instituit concors, ausim impugnare : maneto  
700 immotum quicquid tua mens et certa voluntas  
701 immotum esse jubet (quamquam o ! ) sed caeca sequantur  
702 majores consulta patres, res poscere praesens  
703 praesentem me cogit opem, jam moenibus instat  
704 effusus castris Gallorum exercitus omnis.  
705 Et, nisi suppliciis, precibusque represseris hostes,  
706 direptasque domos, spoliataque templa videbis,  
707 inque tuos adigi natos, mea viscera, ferrum."  
708 Dixerat et lacrimis manantibus ora rigabat.  
709 Atque illam verbis sic est affatus Alexis,  
710 arcanum occultans imo sub pectore sensum.  
711 "Jamdudum, o nostri pars jucundissima lecti  
712 Irene conjux, cui summam credere regni  
713 et rebus spectata fides atque anxius in nos  
714 cogit amor, nec non ingens prudentia, certos  
715 misimus, hostiles precibus qui mitibus iras  
716 extinguant, pacemque petant et nomine nostro  
717 excusent tanto maculatam crimine noctem.  
718 Quoque magis, quae nos volumus, confecta reportent,  
719 ductores una Gallorum adjunximus omnes,  
720 quos olim imperii fines hostilibus armis  
721 protinus ingressos acres cepere Liburni  
722 et vinctos misere novam Byzantis ad urbem.  
723 Unde hodie primum recluso carcere laeti  
724 discessere omnes, ostrumque, aurumque ferentes,  
725 munera principibus, farrisque albentis acervos,  
726 dona laboratae Cereris : queis addere visum est  
727 de Methymnaeis liquentia vina racemis :  
728 nec non et domita nondum cervice juvencos,  
729 tergaque caesa suum, vestesque in vulgus inemptas :  
730 multaque praeterea, qua postulat usus et una  
731 ire sacerdotes omnes longo agmine jussi,  
732 supplicis in morem populi, manibusque gerentes  
733 sublimem praeferre crucem : cui fixus inhaeret  
734 rexque, paterque hominum Christus Deus : eque repostis  
735 templorum eductas adytis, arisque verendis  
736 effigies Divum, vitae simulacra beatae ;  
737 ossaque reliquias Procerum, cineresque piorum,  
738 pro clypeis, densisque hastis obtendere sacros  
739 et precibus certam, lacrimisque exposcere pacem  
740 nec tamen interea multo non milite circum  
741 servari obsessae muros mandavimus urbis :  
742 debeat ut jam vis non ulla externa timeri.  
743 "Aude ergo, o conjux, rebus confidere nostris :  
744 nec tantos tibi finge metus : mihi multa supersunt  
745 millia, quae campis ineant certamen apertis,  
746 si sit opus, patriasque domos tueantur et aras."  
747 His dictis, Irene animum laetata recessit,  
748 Quo se mane pius consueta ad sacra sacerdos  
749 indutum lino, tunicaque albente pararat.  
750 Interea castris Gallorum egressa juvenus  
751 venerat Odrysiae vicina ad limina portae  
752 et fors ingenti prostratis ariete muris  
753 illicit irrumpens tremefacta incenderet urbem,  
754 obvia ni patrum series et turba piorum

755 nuda pedes, supplexque oculis lacrimantibus iras  
756 diminuunt, positaque animos feritate retundant.  
757 Nam quos nec procerum voces potuere, nec ulla  
758 jussa ducum subita revocare a caede furentes,  
759 excidioque urbis, ditisque cupidine praedae,  
760 cum primum videre Crucis venerabile signum,  
761 ardentis cecidere animi, compressus et omnis  
762 impetus et cuncti genua inflexere manipuli  
763 abjectis ad terram armis (mirabile visu).  
764 Hic vero laetis exceptus vocibus Ugon,  
765 et plausu, fremituque virum, sic laetus ab alto  
766 fatur equo. "Non ista Dei sine numine certo  
767 eveniunt, qui nunc iras crudescere vestras  
768 non sinit et saevos quamprimum invadere Turcas  
769 nos monet : atque acres stimulos sub pectore vertens  
770 votorum immemores, animique incusat inertis,  
771 otia qui passim ducendo ingrata, moremur  
772 solvere Pontifici, quod jam promisimus et quod  
773 unum se debere Deo mens conscia cuique est.  
774 O socii, en vobis, quos dudum Argivus Alexis  
775 carcere conclusos summa retinebat in arce,  
776 adsumus incolumes cuncti, ferimusque vicissim,  
777 quae tantis addant immensum rebus honorem,  
778 atque incoepa juvent fidei concredita nostrae.  
779 Namque offert rex ipse suas in proelia vires  
780 et facto unanimes sociari foedere dextras  
781 ipse petit, parsque esse cupit non parva laborum  
782 tantorum, nobis quos impendere videmus,  
783 cum primum Syriae fines exercitus intret."  
784 His dictis acies confestim iter omne relegit,  
785 ductores comitata suos : illisque diebus  
786 Threicias arces nullis et castra negatum est  
787 visere et Odrysios impune errare per agros.  
788 Ipsi etiam in speciem contractae foedere pacis  
789 ad caenam proceres iterumque, iterumque vocati  
790 venere ex castris in regia tecta frequentes,  
791 hospitio et dubiis ausi se credere mensis.  
792 At rex eventu rerum deceptus et expes,  
793 viribus indubitansque suis, timidusque futuri,  
794 vertitur huc animo atque illuc, placitumque recusat  
795 consilium in Thrace Gallosque, Italosque morandi.  
796 Ergo alias imo vertit sub pectore fraudes :  
797 quarum ope se, Graiosque suos formidine solvat  
798 praesenti et proceres Arabis concedat in astus.  
799 Jamque epulis inter citharas, cantusque peractis,  
800 postquam exempta dies placido sermone, poloque  
801 postera nocturnas Aurora fugaverat umbras,  
802 accitos ad se verbis affatur amicis.  
803 "Audite, o proceres, animisque haec figite vestris.  
804 Turcarum (ceum fama fidem vulgata reportat)  
805 ductor ad Euphratem trepidus confugit, ut illinc  
806 evocet in Syriam Persas, Arabasque rebelles,  
807 versurus totas in vos uno agmine vires,  
808 quas vel in extremis oriens Sol aspicit oris.  
809 Hinc igitur, Graio si qua est prudentia regi,  
810 si qua fides verbi, si quis rerum insitus usus,

811 corripienda via est : ne qua mora tardior obsit.  
812 Nos classem ingentem dabimus, lembosque paratos,  
813 tertia cum terrae lux orta retexerit orbem.  
814 Quin et consilio tanta haec incoepa, manuque,  
815 auxiliisque novis, fulvoque juvabimus auro,  
816 cum primum Syriis exercitus ingruet oris,  
817 invadetque altas Turcarum interritus arces.  
818 Hanc ultro sine fraude fidem damus ; hoc libet ambos  
819 foedere vinciri populos socia arma ferentes :  
820 communem communi animo oppugnemus ut hostem."  
821 Dixerat et superi Regem testatus Olympi  
822 in templum perrexit, ubi multo ante sacerdos  
823 facturus sacrum sollemnem ornaverat aram :  
824 inque vocaturus demissam ex aetheris oris  
825 sanctam Auram, Graiorum Auram de more vocatam.  
826 Quae simul ac populos perfecta ex ordine sensit,  
827 discessere omnes, seque in sua tecta tulerunt.  
828 At rex Threicius multis comitantibus ibat  
829 nunc septem ostentans surgentem in collibus Urbis,  
830 marmoreasque aedes, factosque ad publica circos  
831 munera, cum ludos exercet laeta juvenus :  
832 nunc templum aeratis centum sublime columnis,  
833 templum immane, ingens, gemmisque, auroque superbum,  
834 aequatum vasti superis opus aetheris oris,  
835 vix ope mortali, vix ullo imitabile saeclo.  
836 His etiam Pario surgentes marmore thermas,  
837 sublimesque arcus atque aere rigentia signa  
838 addit et Hippodromi spatia, immanesque colossos  
839 et tripodas Phoebi, serpentisque ora trifaucis,  
840 magnanimumque olim monumentum insigne Laconum.  
841 "Atque haec victore, inquit, posuere Pelasgi,  
842 unanimis bello Medos cum Graecia fudit ;  
843 et Pelusiacis raptos avexit ab oris,  
844 aetas quos Soli sacrarat prisca obeliscos.  
845 Mox et multiplici substructum fornice pontem,  
846 nec procul astantem fulgenti ex aere draconem  
847 ostendens, matres celebrant ubi sacra Mimanti,  
848 subjicit. Hic steriles (Divi quae gratia) saepe  
849 senserunt gravidum laetae turgescere ventrem,  
850 ni precibus numen surdas obstruxerit aures.  
851 Hinc portum invectos, similem cui nullus in orbe  
852 vidit adhuc, quamvis tutus secreta Monaecus  
853 ostia, et immota jactet statione recessus,  
854 Euxini juvat angustas invisere fauces  
855 et loca delectis lustrata heroibus olim ;  
856 quorum etiam nunc Hesperias vulgata per oras  
857 circumfert meritos fama immortalis honores.  
858 Hic Amycum Pollux immani corpore victum  
859 Tyndarides prostravit humi, Bebrycasque furentes  
860 amissum ob regem, ferro exstinxere Pelasgi  
861 et laeti praedam ad naves egere recentem.  
862 Fluctibus hic iidem jactati, atrisque procellis  
863 pervenere oculis orbatum ad Phinea, quem tum  
864 vexabant raptis epulis ex ore, manuque  
865 Harpyiae immundo foedantes omnia tactus.  
866 Sed gemini juvenes, Boreae fortissima proles,

867 obscaenas Erebi volucres pepulere fugatas.  
 868 Ipse autem meriti Phineus haud immemor hujus  
 869 edocet ignaros Minyas cursusque, viaeque,  
 870 qua ratione queant truculentum irrumpere Pontum  
 871 Cyaneas inter cautes, dum fluctibus actae,  
 872 altera in alterius frontem defertur et imas  
 873 suscitatur in caelum pelago exsultante procellas."  
 874 Talia narrabat prisca non inscius aevi  
 875 rex Thracum et proceres ad facta illustria, magno  
 876 tantarum imprudens laudum inflammabat amore  
 877 et simul Odrysiam laetos revehebat in urbem.

## LIBER SEXTUS

S\_6 v.1 Jamque adeo terras primis nox atra tenebris  
 2 induerat, praicepsque loco demiserat umbram,  
 3 cum proceres, lectique duces in castra reversi  
 4 consilio referunt Thracis promissa tyranni  
 5 et firmata palam constanti foedere pacta,  
 6 quae vulgi fremitu, varioque agitata coronae  
 7 assensu, passim expendi non vocibus iisdem,  
 8 non animis sunt coepta. Velut cum turbidus Auster  
 9 adversa caeli veniens a parte lacessit  
 10 aequor et in pugnam Boream vocat, ille ab alto  
 11 cardine prorupit, medio se marmore fluctus  
 12 incursant, dubitatque maris, cui pareat, unda.  
 13 Quae pater Addemarus (namque illi cura sacrorum  
 14 et tantae fuerat molis commissa) volebat  
 15 unius ad certos nutus et jussa referri.  
 16 In mediis ergo ductoribus haec ita fatur.  
 17 "Cuncta equidem, o proceres, patrio quos orbe profectos  
 18 diversos variae claram Byzantis ad urbem  
 19 potavere viae, bello quaecumque gerendo  
 20 confieri possunt, cura confecta, fideque  
 21 esse reor. Non vos ullae glaciesque, nivesque,  
 22 fluminaque et montes : rapido non Sirius aestu  
 23 difficilesque aditu valles, altaeque paludes  
 24 non Graium insidiae, non tela adversa, facesque  
 25 tantum iter ingressos usquam potuere morari.  
 26 Nunc autem, quando incolumes pervenimus omnes  
 27 Thracis ad imperii fines et litora Ponti,  
 28 quisque suum, cui tum libuit parere, Secuti  
 29 Ductorem, patriae dulces cum liquimus oras,  
 30 inque Arabas, Turcasque pii decrevimus arma,  
 31 quamprimum ex tantis proceres, ductoribus unum,  
 32 quod superest, clarum virtute et fortibus ausis  
 33 praestantem, rerum cunctarum imponite summae,  
 34 consilioque gravem : quem solum exercitus omnis  
 35 spectet et is pacis, bellorumque arbiter esto.

36 Ergo huc, susceptum vobis nisi forte laborem  
 37 frustrari et tantas incassum absumere vires  
 38 vos juvat, unanimes incumbite. Namque ibi nullus  
 39 imperat, imperio multorum ubi quisque necesse est  
 40 pareat atque anceps nunc hinc, nunc pendeat illinc.  
 41 Quod si aliquem inter vos (Deus hoc avertat in hostes  
 42 infandum crimen) nostrae nec cura salutis  
 43 exercet, nec tangit honos, nec gloria ducit,  
 44 nec pudet Arabiis victum dare terga, Syrisque  
 45 atque idem nostra campos spectare calentes  
 46 caede potest, servumque jugo submittere collum,  
 47 ille abeat coetu ex tanto. Vel, si sibi primum  
 48 attribui cupit ipse locum potiora merenti,  
 49 prodeat et tali dignum se ostendat honore.  
 50 Sic autem, quod vos potius praetendere fas est,  
 51 Abdaridas petitis, patriam repetatis ut olim  
 52 totius spoliis opibusque Orientis onusti,  
 53 aut etiam, ut regnis multo sudore paratis,  
 54 externis sedem laeti ponatis in oris,  
 55 procurate viri, quod nos Deus admonet unum  
 56 atque unum fieri res ipsa et suadet et urget."  
 57 Haec pius Addemarus, tacitumque per ora virorum  
 58 murmur iit, qualem in silvis, cum flabra Aquilonum  
 59 paulatim incipiunt frondes agitare virentes,  
 60 audimus fremitum : qualemque ad curva fragorem  
 61 litora, cum primum crispantur leniter undae,  
 62 jamdudum Zephyris bellum meditantibus, edunt.  
 63 Sic illi inter se tractim resonante susurro  
 64 consessum dubii variis rumoribus implent,  
 65 ancipitesque animis : partim in diversa trahuntur,  
 66 partim autem coeptis aequata forte manendum  
 67 censent : praeteritus ne quisquam ex ordine tanto  
 68 Gallusve, Ausoniusve piis discedat ab armis.  
 69 Quandoquidem non de levibus consulta petebant  
 70 rebus at egregium decus et pernobile regnum  
 71 in medio positum fuerat virtute parandum.  
 72 Hinc dux Carnutum Stephanus, ne forte tumultus  
 73 glisceret atque avidas vulgi ferretur ad aures.  
 74 "Quod pius Addemarus, proceres, modo censuit, inquit,  
 75 esse potest nulli dubium, res publica numquam  
 76 non eversa perit, quam vulgi aequata potestas  
 77 huc trahit atque illuc : medio nec in aequore fluctus  
 78 surgere majores, navesque illidere suerunt  
 79 ad scopulos, vastisque actas demergere in undis,  
 80 quam cum bella gerunt adversis viribus Euri  
 81 spirantes, seque hinc illinc superare volentes.  
 82 Sic virtus, quamquam duris exercita rebus,  
 83 si quando erumpens sese in contraria transfert,  
 84 communem avertit populi malesana salutem,  
 85 nec quicquam ratione geri sinit. Hic ego nullum  
 86 esse reor vestrum, cui tantae imponere molis  
 87 non possitis onus, si nos spectare necesse est,  
 88 quam quis bellando laudem meruisse feratur.  
 89 Nam nemo inter vos ferro non perculit hostem :  
 90 non murum ascendit victor : non castra locavit.  
 91 Delecto vallata loco : non contulit ausus,

92 conseruitque manus : dubii non cetera martis  
 93 munia sustinuit : quorum se gloria caelo  
 94 infert et famam veniens extendit in aevum.  
 95 Quo circa, o proceres, quando unum agnoscimus omnes  
 96 Gallorum regem, primi cui dentur honores,  
 97 Ugontem, nam frater is est, cognomine magnum  
 98 divitiisque, opibusque et nobilitate potentem,  
 99 ductorem nostri jam nunc suffragia coepti  
 100 vestra legant, pacisque optent, bellique magistrum."  
 101 Ille haec Tullingo jamdudum infensus et acri  
 102 invidia pectus, stimulisque agitatus amaris.  
 103 Ast Hugon. "Procul esto, inquit, tam dira cupido,  
 104 ipse ut, militia qui numquam exercitus ulla  
 105 praeteritum duxi juvenile inglorius aevum,  
 106 praeficiar bello, tantisque heroibus, immo  
 107 haec mea quo vobis melius sententia constet ;  
 108 nec prae eo certus cuiquam, nec subsequor ullum,  
 109 praeter eum, quem summa pii prudentia primum  
 110 Pontificis rerum summae praefecit euntem  
 111 in bellum, capiti imposuit cum tegmen et ense  
 112 ipse suis manibus Goffredum accinxit acuto."  
 113 Dixerat haec, placidusque sua se in sede locarat.  
 114 Tum Robertiades Italum dux talia fatur.  
 115 "Ipse quidem, o proceres, magnus quem destinat Hugon  
 116 imperio et tanto dignandum munere censet,  
 117 cum primum Ausoniae patrio de litore cessi,  
 118 huic uni solum veni parere paratus.  
 119 Et nunc mens eadem perstat mihi : nec putet inter  
 120 tot proceres quisquam fatis et sanguine clarus  
 121 se fore, qui nostri legionibus imperet et me  
 122 parentem speret dictis. Ego nullius umquam  
 123 imperio regar alterius, neque jussa facessam.  
 124 Ipse hujus mihi dux belli certissimus esto  
 125 Goffredus, quem sponte sequar quocumque vocarit."  
 126 Haec ille atque altum spirans consedit. At olli  
 127 concordem legere Ducem, quem Daunius heros  
 128 jusserat ; ille autem suscepto munere tanti  
 129 imperii et tacito volvens in pectore magnos  
 130 curarum fluctus. "Faxit Deus optimus, inquit,  
 131 prospera sint, nobisque ferant haec acta salutem.  
 132 Ergo ubi terrarum lux orta reviserit orbem  
 133 crastina et humentem caelo dimoverit umbram.  
 134 Dum sacra propterea peraget consueta sacerdos,  
 135 suppliciter votis Superum regemque, patremque  
 136 oremus, quo nostra volens incoepta secundet."  
 137 Haec ait et populos inter diffusa repente  
 138 fama volat dubios tanto in molimine rerum :  
 139 illicet et certa cunctis spe pectora complet :  
 140 laetitiaque fremit, plausuque exercitus omnis.  
 141 Tum vero sua quisque petunt tentoria laeti,  
 142 instaurantque animos epulis et corpora curant :  
 143 hibernam vario noctem sermone trahentes.  
 144 Interea, heroum cum jam conventus abisset,  
 145 protinus Odrysii Goffredum ingentia regis  
 146 flagitia et Graiae secum mendacia gentis  
 147 versantem, ac duro recubantem in stramine, totum

148 complexus fessos altus sopor irrigat artus,  
 149 visa dehinc medio faciem circumdata nimbo  
 150 Ida parens summo descendere vertice caeli  
 151 atque atrae tenebras oculis depellere noctis :  
 152 mox etiam apprensum dextra super aeris oras  
 153 sublimem rapere et longe tellure relicta  
 154 sedibus inferre aethereis stellantis Olympi :  
 155 unde mare et terras late sub utroque jacentes  
 156 vertice despiciunt, vel quas surgensque, cadensque  
 157 hinc atque hinc, media collustrat lampade Phoebus.  
 158 Ille autem admirans, "Quo me sanctissima mater  
 159 ducis, ait ? Quove ire jubes ? Statuisve timentem ?"  
 160 His dictis, Ida has laeto dedit ore loquelas.  
 161 "Nate oculi, vitaeque mea mihi carior ipsa,  
 162 cum pariter quondam vitaeque et luce fruebar :  
 163 hic locus illorum patria est, qui vulnera passi  
 164 pugnando pietatem armis coluere, Deoque  
 165 addixere uni mentes, quae corporis hujus  
 166 carcere disclusae obscuro et compage soluta,  
 167 haerentes postquam maculas caelestis adedit  
 168 ignis et invectum longe scelus omne removit,  
 169 haec in templa volant celeres : quo te quoque fas est  
 170 quattuor aetherius cum Sol expleverit orbes,  
 171 conferre atque iterum laetas invisere sedes.  
 172 Nate adi huc animo, susceptum et omitte timorem.  
 173 Quaeque loquar, cape dicta memor : solatia namque  
 174 condita mente ferent, Ambas age dejice luces  
 175 nate tuas, terramque oculis metire, fretumque.  
 176 Aspice quam parvo complectitur omnia parvus  
 177 orbe globus, quam nec guttae globus instar aquai.  
 178 Pro cujus nate imperio tot deinde labores  
 179 suscipere et latos perfundere sanguine campos  
 180 vos juvat. Heu miseri, non hos concessit in usus  
 181 arma Deus, vestra ut rigidum per viscera ferrum  
 182 transeat et fulva caesorum sternat arena  
 183 corpora regnandi causa : sed ut, impia quae sunt  
 184 corda hominum ad cultum revocent, ritumque piorum,  
 185 Christicolumque adeo fines tueantur et aras :  
 186 in caelum quae certa via est, coetusque beatos  
 187 heroum insontis vitae et sine fraude peractae :  
 188 qui nunc astra colunt laxati corpore et illa,  
 189 quae lucet oculis, hic luce et caligine mersa,  
 190 viventes vitam, quae vita simillima morti est,  
 191 aut etiam mors ipsa. Etenim quid amabile tandem  
 192 ipsa habet et sensu quod non perfundat amaro,  
 193 inficiatque atris inter sua gaudia curis ?  
 194 Namque ut vos votis damnet Deus omnibus, ipsi  
 195 protinus angustos fines tamen addidit aevo :  
 196 nec quicquam esse diu voluit, quod terminet usquam  
 197 certa dies, rerumque adeo immutabilis ordo.  
 198 Omnis enim ad nihilum recidit, cum praeterit, aetas."  
 199 "Ergo hic quandoquidem, genitrix mea, vivitur, inquit  
 200 Goffredus, veraque bonis in luce fruuntur  
 201 cum primum licuit hujus decedere taetro  
 202 corporis hospitio et Divum felicibus addi  
 203 consiliis, stellas pedibus, caelumque prementes,

204 quicumque innocuis agitantes legibus aevum  
 205 mortales, Christi norunt se morte redemptos :  
 206 Quid moror in terris, quin has ego pergere ad oras  
 207 aetherias propero, densasque exire tenebras ?"  
 208 "Non ita, namque etsi (genitrix exceptit) ab alto  
 209 in corpus depressi animi, quos ipse creavit  
 210 aeternus genitor, rerum inviolabile numen,  
 211 corporis exsolvi vinclis et carcere caeco  
 212 impense interdum cupiunt, ad eumque reverti,  
 213 unde prius venire, tamen se jungere sese  
 214 haud licet injussu Superumque, hominumque parentis :  
 215 qui nullum, nisi quem vita spoliaverit ante  
 216 ipse volens, patrio patitur succedere caelo.  
 217 Quando etiam mortale hominum genus hac sola terra  
 218 lege colunt, ne quisquam aestus, ne frigora et imbres,  
 219 atque sitim, duramque famem, saevosque labores  
 220 turpiter oblata fugiat sibi morte, locumque,  
 221 miles ut ignavos, venienti deserat hosti.  
 222 Multa prius subeunta tibi, superandaque restans  
 223 militiae, quam stellantis te regia caeli  
 224 accipiat reducem atque optata in sede reponat.  
 225 Oppida principio, quae tu jam rere tuorum  
 226 capta manu, cernes fervere hostilibus armis,  
 227 sanguineque effuso fluvios manare perennes  
 228 et ferro absumptas passim cecidisse dolebis  
 229 Germanorum acies fidi ductoris egentes  
 230 ante, queas quam densa urbem expugnare corona  
 231 hic, ubi Mysorum piscosa feracibus agris.  
 232 Inserit Ascaniae pulchrum caput unda paludi :  
 233 sed, licet illa piis conata obsistere coeptis  
 234 susceptum remoretur iter, viresque fatiget  
 235 ausa tuas, veniam tandem, pacemque petenti  
 236 ipse ignosce tamen, casusque averte supremos  
 237 et scelerum comiti saevo moderare furori.  
 238 Hic olim Pharium praecepta infanda docentem,  
 239 cujus inaccessos sensus male sana cupido  
 240 impulerat diro pietatem afflare veneno,  
 241 rite refutatum tercentum ex ordine sancti  
 242 damnare patres : damnatum ea poena secuta est  
 243 protinus, effusa qua viscera proruit alvo  
 244 omnia et ultrices vitam exhalavit in auras,  
 245 infernasque domos, sedesque Acherontis avaras.  
 246 Mox animo tristis, sed vultu interritus amnem  
 247 permixto Sagarim spumantem sanguine cernes  
 248 et simul indigna miserorum caede gementem  
 249 in mare purpureum pronos evolvere fluctus.  
 250 Tempore quo rebus properans afferre salutem,  
 251 Ausonios, Gallosque una ulciscere peremptos,  
 252 devictosque Arabas longe in deserta repelles,  
 253 et spoliis, opibusque tuos ditabis opimis.  
 254 Hinc via difficilis, saxosisque aspera clivis,  
 255 desertique situ colles et inhospita tellus  
 256 exceptos una pedites vexabit, equosque.  
 257 Nam neque gramen erit, tenui nec rivus aquae vi  
 258 dulce viatori lasso in sudore levamen,  
 259 cum venit et terram sicco sputat aridus ore,



260 non puteus, non collecto vetus imbre lacuna,  
 261 corpora quae recreet longinquo exhausta labore.  
 262 Quin aestu ingenti passim laxata fatiscent,  
 263 felicesque animas reddent caelestibus oris.  
 264 Tu vero, Goffrede, animo ne defice et instans  
 265 urge iter incoeptum, brevis est mora, jam tibi praesto  
 266 frigidus Hermus adest et Mysi lympha Caici  
 267 atque in se refluens ripa Maeandrus opaca :  
 268 quique amnes alii summo de vertice Amani  
 269 praecipitant, celeresque secant frigentibus undis  
 270 Pisidiae campos, laeto quos ubere glebae  
 271 oppida vasta tenent Lyrbe, Termissus et olim  
 272 Selga ingens celebri fama atque aequissima factis.  
 273 Nunc prostrata solo, magnisque oppressa ruinis  
 274 cuncta jacent, nullique situm, nec nomina norunt.  
 275 Et miseri nobis mortem impendere dolemus,  
 276 infelix hominum genus et cui vita caducis  
 277 frondibus assimilis, Boreae quas aura furentis  
 278 perculit autumnus sub finem abeuntis et omnes  
 279 ilicet et campis et montibus abstulit umbras.  
 280 Sed vos nate diu terris his forte morantes  
 281 incastigatos Rex haud sinet aetheris alti.  
 282 Tu casu in tanto plagas perferre memento  
 283 aequus et usque Deo grates age nate, nec ullis  
 284 ulla loci facies segnem remoretur in oris,  
 285 donec ad angusti vallem delatus Orontis  
 286 constiteris, ubi longa urbem obsidione premendam,  
 287 sanguineque et multo vobis sudore domandam  
 288 nuntio, namque fames et hiems glacialis et ingens  
 289 caelo emissa lues acies rarescere coget  
 290 Hesperias, multosque dabit letoque, fugaeque.  
 291 Quin te etiam Gallique duces, primique tuorum  
 292 destituent, fugientque altam Byzantis ad urbem  
 293 votorum immemores : tamen obdurata manebit  
 294 lecta virum virtus, belloque assueta gerendo.  
 295 Sed non et mansisse volet, tantae undique vires  
 296 advenient : caelumque tegent, Solemque sagittae.  
 297 Hic animis opus est : hic et victricia castis  
 298 poscere signa Deum precibus. Vos pergite muros  
 299 ipse dabit superare urbis, Persasque rebelles  
 300 fundere et innumeras venientum infringere turmas.  
 301 Interea fraterque tuus Baldunus et acer  
 302 Tancredus circum populos in jura, fidemque  
 303 diversi redigent : saevos Tancredus Isauros  
 304 et Cilicum gentes : felix Baldunus opimam,  
 305 Euphrates alto quam flumine lambit, Edessam.  
 306 Opprimet et madidas Romano sanguine Carras.  
 307 Ipse autem ducente Deo, paucisque relictis  
 308 tantarum e numero legionibus, ibis Idumem,  
 309 ne dubita, Solymanque urbem expugnabis adortus  
 310 hic te autem consensu uno populique, patrumque  
 311 regem appellabunt proceres : apicemque volentes  
 312 imponent capiti. Tu parti insignia regni  
 313 rejice nate procul, non illa cingere crinem  
 314 urbe decet rutilantem auro, gemmisque coruscum,  
 315 in qua olim spinis Christus Deus, arbiter orbis,

316 pulchri opifex mundi, regum Rex impia passus  
 317 haerentem fronti gessit paliuron acutis.  
 318 Sceptrum igitur, Goffrede, alios, regnique coronam  
 319 ferre sinas ostro insignes, auroque superbos.  
 320 Tu populis dare jura tuis, legesque memento,  
 321 debellare hostes, placidusque ignoscere victis,  
 322 tum sensim replere animos pietatis amore,  
 323 divorumque aedes una instaurare labantes  
 324 et patres munire opibus ; queis sacra, diesque  
 325 sint curae atque aris sueti reddantur honores.  
 326 Quoque haec ipsa magis properes : vix integer anni  
 327 mensibus exactis vertens explebitur orbis,  
 328 aérias ex quo Solymorum coeperis arces,  
 329 ardua cum caeli reditus tibi ad astra patebit,  
 330 atque haec nobiscum mortali lege solutus,  
 331 quae nunc sub pedibus praesens miraris et optas  
 332 jam tibi certa dari, stellantia claustra tenebis."  
 333 Hic matrem aspiciens laeto sic pectore fatur  
 334 Goffredus. "Quando, o mater, mihi tanta parantur  
 335 gaudia defuncto bellique, viaeque periclis,  
 336 atque aditum ad vasti patet hic quasi limes Olympi,  
 337 quamvis clarorum semper vestigia patrum  
 338 ante etiam institerim, decorique ego gentis avito  
 339 desuerim numquam, tamen hac mercede laborum  
 340 proposita, enitar posthac vigilantius et me  
 341 omnia jam rerum perferre adversa juvabit,  
 342 delictis quaecumque meis infensa minatur  
 343 ira patris summi, qui fons et vita bonorum est ;  
 344 incolumem liceat Solymos modo visere colles,  
 345 expulsis illinc Turcarum, Arabumque tyrannis.  
 346 Sed tu sancta parens (namque haec noctesque, diesque  
 347 urit atrox animum cura atque infesta recursat)  
 348 unum etiam, si justa peto, si pandere fas est,  
 349 quae ventura vides, unum hoc effare precanti.  
 350 Postquam parta manu belli victoria nobis  
 351 cesserit et nostra Solymi ditione regentur ;  
 352 imperiumne Deus veniens producet in aevum  
 353 et loca Christicolis propria haec regnanda relinquet ?"  
 354 Haec pius Eustachides ; mater cum talia rursus  
 355 Ida refert. "Quodcumque rogas Goffrede parentem,  
 356 ipse Deus, series uni cui nota futuri,  
 357 nil hodie te scire vetat. Sub regibus ergo,  
 358 qui tibi non longo succedent ordine, totos  
 359 octoginta octo Solyme regnabitur annos.  
 360 Flagitiis sed enim nostrorum infecta nefandis  
 361 et vexata diu procerum discordibus armis,  
 362 horrebit Pharias rursus superata secures :  
 363 exactisque procul Gallisque, Italisque videbit  
 364 Abdaridae parere Asiam, Thracemque superbam ;  
 365 inque potestatem Turcarum, inque impia cogi  
 366 jura, suo quicquid terrarum interfluit ingens  
 367 flumine Danubius. Quin illi, ubi litore sedem  
 368 Threicio et veteri Byzantis in urbe locarint ;  
 369 Illyrii, Macedumque arces atque oppida Graium  
 370 cuncta sub imperium redigent, immane minantes  
 371 exitium Europae populis, quicumque supersint.

372 Saepe etiam magnis ausi dare classibus Austros,  
373 Ioniumque, Aegaeum sub ditione tenebunt.  
374 Scilicet et nostri poterunt spectare nepotes  
375 in sua paulatim grassantem viscera pestem ;  
376 dum se odiis, armisque palam consumere pergunt,  
377 horribiles nullis cohibentes finibus iras.  
378 Ergo, inquit pius Eustachides maestissima densis  
379 ora, sinusque rigans lacrimis, tot regna, tot urbes,  
380 tot castella manu nostra expugnata, jugoque  
381 erepta ex Arabum, rursus rapiuntur in arta  
382 vincula et Abdaridum jussa exsecranda facessent ?  
383 Nec nostra, o mater, nascetur origine quisquam  
384 corde vicens, gratusque Deo, qui nobile bellum  
385 suscipiat, Turcasque manu qui deleat hostes,  
386 restituatque Deo populos, quos impius olim  
387 abstulit Abdarides, secumque in tartara ducit ?"  
388 Tum mater nati dextram complexa loquentis.  
389 "Parce, ait, o, lacrimis, Goffrede, et comprime fletum.  
390 His quoniam dolor atque omnis metus exsulat oris.  
391 Una et certa queis animis laetissima nostris,  
392 numinis aeterno cuncta haec moderantis amore,  
393 illa quidem semper clemens, sed justa voluntas :  
394 unde aliquem se abstraxe nefas : (tandemque) suorum  
395 virtutis memores Galli et pietatis avitae,  
396 haud semel instituent armis invadere Turcas ;  
397 cumque his concordi veniens in talia dextra  
398 foedera, conjunget generosa Britannia vires.  
399 Atque haec arcentem toto de litore nostros  
400 vastabit Cyprum victrix, sceptroque potita  
401 externis regnum dominis concedet habendum.  
402 At Gallorum acies animis ingentibus urbem  
403 Phoenicum interea post longum tempus adactam  
404 in leges jurare suas et verba jubebunt ;  
405 imperioque caput statuent, sedemque labanti,  
406 expulsosque illic reges in scepra reponent.  
407 Sed Solymos iterum capere et sarcire ruinas  
408 amissi imperii poterit non ipse Britannus,  
409 quamquam audax, quamquam captis Jopesque, Tyrique  
410 arcibus et Phariis ingenti caede fugatis  
411 non Celtae, Belgaeque duces, licet ostia Nili  
412 audaces subeant ruptis reclusa catenis,  
413 atque Aegyptiacas urbes populentur et oras,  
414 inque Paraetonio defigant litore sedes.  
415 Immo etiam haud multo post tempore, Gallia regem,  
416 insignem pietate virum, pia bella moventem  
417 Abdaridis Libyae populis injussa sequetur.  
418 Sed neque tunc etiam tantis Deus annuet ausis.  
419 Nam Pelusiacas ut sese appellet ad oras  
420 ipse animo praestans, procerumque ingentia secum  
421 agmina habens, Arabum ductorem occiderit et mox  
422 Mendesii ditem sine sanguine coeperit urbem,  
423 multorum furiis, caecaque cupidine victus  
424 audebit Gallis funestam invadere Memphim  
425 sed caeli vitio, fluviique palustribus undis  
426 horrida cunctarum subito penuria rerum,  
427 atque lues interclusis, morbosque, famemque

428 afferet exoriens, coeptisque absistere coget,  
 429 amissis misere Gallorum heroibus. At rex,  
 430 quem mox ipse Deus Superum signabit honore,  
 431 inde abiens, repetensque Syras inglorius oras,  
 432 oppida restituet foedis collapsa ruinis :  
 433 nequicquam. Aegyptus rupto nam foedere vires  
 434 colliget : atque iterum nostris lacrimabile bellum  
 435 incutiet, victrixque Tyro potietur, Acemque  
 436 evertet, caput imperii, sedemque Latini,  
 437 reliquias tanti incoepti, nec proderit Afras  
 438 debellasse manu Gallorum regibus urbes,  
 439 cervicesque jugo Libyae pressisse superbas.  
 440 Cuncta iterum Abdaridum dextris subigentur et armis.  
 441 Sic placitum Superum patri, qui sidera fulcit.  
 442 Sed tamen exactos postquam volventibus annis  
 443 sexcentae aestates, sexcentae ex ordine brumae  
 444 addiderint decies centenis orbibus orbes,  
 445 omnibus ex quo lux oculis est reddita nostris,  
 446 nascentur pietate ingens, invictus et armis,  
 447 qui bello aggressus populos contundet Eoos  
 448 et Scythiae duras Libyaeque immittet habenas.  
 449 Tum vero toto surget gens aurea mundo,  
 450 aurea, sinceri quae servantissima cultus  
 451 rite Deum precibus trinumque agnoscat et unum.  
 452 Interea vesana lues, quam finibus ortam  
 453 ipsa suis secum discors Germania primum  
 454 mater alet ; mox invectam, lateque vagantem  
 455 excipient gremio Allobroges, solioque locabunt.  
 456 Inde autem quondam fidissima corda Britannos  
 457 irrumpet toto descendens corpore pestis  
 458 atque hic, atque illic nostras populabitur urbes  
 459 immanis, Gallosque suo funesta veneno  
 460 auferet et sanctis animos abducat ab aris."  
 461 Haec indignanti similis, similisque dolenti  
 462 dixerat Ida parens : cum jam Goffredus in iram  
 463 exardens animis. "Ergo parietur inuri  
 464 ipsa (ait) ipsa sibi furiis agitata nefandis  
 465 dedecoris, scelerisque notam mea Gallia tanti ?  
 466 Gallia, quae toties sumptis defenderit armis,  
 467 jus Latii, cultusque patrum, ritusque piorum ?"  
 468 Talibus orantem sic Ida exorsa vicissim  
 469 solatur natum. "Tuscos, age, respice colles,  
 470 Florentemque opibus vallem, cultuque frequentem,  
 471 flumine quam vitreo dirimit Boeotius amnis  
 472 Arnus et Etruscos cursu secat impiger agros.  
 473 Hic olim nostro Morinum de sanguine surget  
 474 femina, clarorum quae nobilitate parentum  
 475 et forma et magnis animi virtutibus ingens  
 476 anteeat longe veteres heroidas et se  
 477 illustrem fama saeculis Catharina futuris  
 478 constituet regum soboles, parituraque reges  
 479 illa quidem, qui Gallorum moderentur habenas,  
 480 atque ipsis Scythiae populis dent jura vocati.  
 481 Namque erit, exoriens undam qua Vistula fundit  
 482 et magno circum campos rigat amne jacentes,  
 483 cum rege amisso regem sibi Sarmata prudens

484 Henricum asciscet, cujus se subdere dextrae  
 485 audeat et fidei viduum committere regnum ;  
 486 Henricum aetatis decus immortale futurae,  
 487 virtutum specimen, magnorum et germen avorum  
 488 nobile : cui nullus posthac pietate, vel armis  
 489 par eat. Hoc, diros si qua est gens impia ritus  
 490 quae colat, ipsa volens, mitte hanc de pectore curam,  
 491 auspice deponet : seque incusabit et una  
 492 sponte sua cultus dediscet laeta profanos :  
 493 certatimque pias cumulabit honoribus aras.  
 494 At parte ex alia justis premet Austrius armis  
 495 seductos Belgas, magnisque erroribus actos  
 496 in fraudem, bello deserta in castra reverti  
 497 coget et in primis Romanum agnoscere Patrem :  
 498 Romanum Patrem, sibi quem selegit et unum  
 499 ipse suas tum cogere oves, tum pascere jussit  
 500 aeternae lucis Christus Deus unicus auctor."  
 501 Atque haec sedato mater dum singula vultu  
 502 narrat, humi mentem atque oculos defixerat heros  
 503 Eustachides, terramque tacens spectabat et undam  
 504 et, quaecumque jacent extra faucesque, fretumque  
 505 Herculeum, angusto quod Calpem interluit aestu  
 506 atque Abylam, ignoti tunc ostia clausa profundi,  
 507 nunc autem Hesperiiis adaperta et pervia nautis ;  
 508 insulae in Oceano magno cum talia fatur.  
 509 "Quae nam autem, nostris quae se discludit ab oris  
 510 tam longe pars illa orbis depressa latentis,  
 511 o genitrix, hominesne tenent, an saecla ferarum  
 512 ingentes campos ? Pelagoque infracta sonanti  
 513 litora ? Et excelso surgentes vertice montes ?  
 514 Dicam equidem, terrasque tibi multo ante recludam,  
 515 quam quisquam audaci sulcet vada caeca carina."  
 516 Suspiciens sic Ida refert. "Quae, nate, tueris  
 517 finibus a nostris longe distantia, nullus  
 518 ausus adhuc adiit, nec quisquam aggressus adibit,  
 519 ante quatercentum Solisque, annique recessus,  
 520 tempore quo primum Ligurum decus et nova saeculi  
 521 gloria pervadet numquam tentata Columbus  
 522 aequora et Oceani sistet trans litora classem.  
 523 Admiransque illic Orbis nova regna reposti,  
 524 regna insperata et priscis incognita nautis,  
 525 imperio et fidei regis committet Iberi.  
 526 Mox extra Cancrique vias et sidera Librae  
 527 praetergressi alii, priscorum errata parentum  
 528 mirantes, mediam non ullo fervere ab aestu  
 529 spectabunt zonam, nivibusque rigentia densis  
 530 ardua terrarum et gelidis loca tecta pruinis.  
 531 Divitis hic auri venas uberrima tellus  
 532 innumeras habet et fulvae prope flumina arenae  
 533 aurea secernunt passim ramenta legentes,  
 534 qua mercede sagax confestim accurret Iberus  
 535 undique et ingentes auri cumulabit acervos,  
 536 explebitque opibus partis patriamque, domumque  
 537 tum quoscumque alios aditu prohibebit ad oras  
 538 inventas, unique votet sibi sumere totam  
 539 nobilis incoepti laudem, fructumque laboris.

540 Etrusci tamen herois de nomine terram  
 541 illam olim Ammerican aetas ventura vocabit :  
 542 Etrusci herois, cujus celeberrima virtus  
 543 litoraue et montes, vallesque, amnesque recludet  
 544 et loca praeteritis numquam non inuia saeculis ;  
 545 ergo Italiam inventi orbis nova gloria semper,  
 546 semper honos, semper decus immortale manebit.  
 547 Imperio sed enim Hispanus potietur et auro.  
 548 Paucae illic urbes, pauci magalia cingunt  
 549 moenibus et valido claudunt munimine valli  
 550 tecta, domosque suas : quas multi in vallibus imis  
 551 occultant, alii densa super arbore ponunt  
 552 fluminis in ripa stagnive palustribus undis,  
 553 difficiles aditu caveas ceu saepe videmus  
 554 conceptos aquilae nidos spinisque, rubisque,  
 555 annosae ex alto pendere cacumine fagi,  
 556 aut tiliae, aut quercus, aut aerae cyparissi ;  
 557 quos non upilio, quos non frondator et audax  
 558 pastor adire queat. Nudi sub Sole calenti  
 559 incedunt, nudi cum fundit Aquarius imbres.  
 560 Pars Lunam, Solemque colunt : pars nescia cultus  
 561 sinceri, Aligerum precibus simulacra fatigant  
 562 nigrantum, votisque malos et sanguine placant  
 563 daemones, infames quem victima fudit ad aras,  
 564 sive puer, seu sit florenti corpore virgo.  
 565 Quin etiam, quod nate magis mirabere, caesis  
 566 corporibus miserorum avidi vescuntur et illos,  
 567 quos ipsi patres genuere, in viscera condunt."  
 568 Tum satus Eustachio dirae facta impia gentis  
 569 aversatus et arrectis horrore capillis :  
 570 "Haec scelera o mater, cur nam Deus (inquit) inulta  
 571 ire sinit ? Cur non animos in tartara versos  
 572 ad caelum revocat, numerumque integrat et explet  
 573 illorum, quibus ipse volens sua regna paravit ?"  
 574 "O nate, arcanos sensus, secretaque mitte  
 575 consilia explorare Dei, quae pectore versat  
 576 ipse suo, nec praeterea cuiquam abdita pandit."  
 577 Ida ait et tamen his aliquando imponere finem  
 578 flagitiis magnus ; "Cum primum Tarraco classem  
 579 instructam ignotis committere fluctibus ausus  
 580 sub sua palantes populos juga miserit et cum  
 581 tantarum imperium terrarum, orbisque Philippus,  
 582 quae Boreae de parte abiens excurrit in Austrum,  
 583 inque Eurum, Zephyrumque patet, reget Austrius omne.  
 584 Hic populis leges et jura perennia condet :  
 585 moenia certa dabit ; mores avertet agrestes,  
 586 infandosque abiget ritus atque impia gentis  
 587 sacra cruentatis longe depellet ab aris.  
 588 Immo etiam, ne forte putes, o nate, verendum,  
 589 ne, qui Asiam, Libyamque colunt, quos Libia superne  
 590 despicit, aequatis atque aera temperat horis,  
 591 deserti auxiliis olim spolientur, eadem  
 592 tempestate inter proceres nascentur Etruscos  
 593 aliorum soboles longe clarissima regum  
 594 Fernandus Medices, rerum spes fida labantum,  
 595 ante annos animoque ingens, curaque virili,

596 flos juvenum atque Italae gentis lux et nova saeculi  
 597 gloria, nec dubius priscae virtutis alumnus,  
 598 quique adeo nondum signans lanugine malas,  
 599 tempora conspicuus Tyrio circumdabit ostro,  
 600 Patribus et Romae jam tum decus additus urbi.  
 601 Ille fidem populos Latii Pastoris, opemque  
 602 suppliciter sibi poscentes Phariosque, Syrosque  
 603 excipiet gremio et rebus succurret egenis.  
 604 Idemque ad gentes, quarum delapsus ab oris  
 605 inter nigra virum, percoctaque saecula calore  
 606 Nilus Pellaeum vasto petit amne Canopum,  
 607 mittet et Aethiopes ultricibus instruet armis  
 608 in Turcas, cultusque pios, ritusque Sacrorum,  
 609 quorum illi obliti nunc se adjungere fideli  
 610 Christicolum coetu et dum se Tiberinus in undas  
 611 inferet aequoreas, cunctis memorabile terris.  
 612 Sed, quod laetitias nostris ferat omnibus omnes,  
 613 parturiet tandem saeculis abeuntibus aetas  
 614 certa virum, qui longinquis in finibus ortus  
 615 Cantabriae, Hesperias udi prope litoris oras,  
 616 ipse sibi instituet socios et ad alta vocabit  
 617 munia, quos jussu divino impulsus et aura  
 618 caelesti afflatus de nomine dicet Iesu.  
 619 Exiguos numero socios et caelibe vita,  
 620 sed pietate pares ollis, quos prisca tulerunt  
 621 saecula viros, coeptum Altitonans illustre fovebit :  
 622 innumerosque addet primorum exempla secutos.  
 623 Illi autem scelerum puri, mentemque repleti  
 624 doctrina, nullas metuent accedere ad oras,  
 625 quamvis immanes, quamvis pia facta perosas :  
 626 ostendentque viam miseris, quam protinus unam  
 627 insistant, Christumque ducem sectentur, amentque.  
 628 Felices animae, fratrum generosa piorum  
 629 pectora venturi clarissima lumina saeculi ;  
 630 non auri vos sacra fames, laudumque cupido  
 631 coget ad externas gressum contendere gentes  
 632 et certam certos vitae praeponere mortem :  
 633 sed caelestis amor patriae, sed maximus harum  
 634 contemptus rerum, per tela inimica, per ignes,  
 635 perque hiemes atras et vulnera ducet inermes.  
 636 Nam neque supplicii infida Britannia diris  
 637 exterrens coepto pavidos arcebit ab alto :  
 638 nec, quae letiferas adigens in corda sagittas  
 639 Ammerice caesis miserorum vescitur extis.  
 640 Immo etiam assueti diras apponere mensas  
 641 cannibales, monitis vestris meliora sequentur  
 642 exutaque animi penitus feritate, nefandae  
 643 desuescent vitae laeti, sanctosque doceri  
 644 Christicolum exposcent (dictu mirabile) ritus  
 645 quin et magnorum genitrix fecunda elephantum  
 646 Taprobane, Oceano circum vallata profundo :  
 647 infamisque aras Iapo eversura Deorum,  
 648 insula praeruptis montosa atque aspera dorsis  
 649 et celebris passim populis ad proelia natis,  
 650 unius imperio parens nunc insula sed mox  
 651 dissidiis inter proceres divulsa potentes,

652 tum primum supplex Christo delubra, Crucemque,  
 653 sincerosque animo ritus amplexa dicabit.  
 654 Ipsa quoque hospitibus tellus male tuta Sinarum,  
 655 difficilisque aditu, nullisque obnoxia sacris,  
 656 sed tamen in patrios reges propensa, nec aequi  
 657 ante alias omnes cultrix minus illa, bonique,  
 658 audiet orantes et vitae aeterna beatae,  
 659 quae sternunt iter ad caelum praecepta docentes.  
 660 Laudibus haec eadem Ausoniae licet aemula certet  
 661 serica et ambiguo positae sub Sole Molucae,  
 662 excipient laetae vobis suadentibus et se  
 663 aeterno addicent Superumque, hominumque parenti."  
 664 His dictis, Ida ex oculis, medioque repente  
 665 conspectu tenues abiens discessit in auras.  
 666 Ille autem, " Quo deinde fugis ? Quem deseris ? Aut quis,  
 667 alma parens, subito te nunc mihi subtrahit ?" inquit.  
 668 Et simul Eoo tenebris ex orbe fugatis  
 669 perspicit Auroram montes aperire relectos :  
 670 excitus clangore tubae de more jubentis  
 671 consuetis precibus aeternam exposcere pacem  
 672 atque animum rebus solertem adjungere agendis.  
 673 Ergo alacer surgit stratis, supplexque salutatur  
 674 ad terram pressis genibus te maxima Virgo,  
 675 Virgo hominum spes fida, dei certissima mater.  
 676 Mox matutinis perfectis ordine sacris,  
 677 accepit sceptrum et summo praefectus honori est.  
 678 Inde domum rediens magna comitante caterva  
 679 intra tecta vocat proceres : epulisque paratis  
 680 exstructam ad mensam cunctos accumbere jussit.  
 681 Atque ubi jam compressa fames, turbaeque remotae,  
 682 surgit : et ingressus thalami secreta reposti  
 683 sedibus excitos secum jubet ire relictis.  
 684 Quos ubi convenisse videt, mediusque resedit,  
 685 attollens oculos. "Quamquam praesciscere cuique  
 686 Promptum, ait, est animo Graiorum artesque, dolosque  
 687 magna tamen confecta, duces, res, sponte quod ille,  
 688 imperii cui Romani pars altera paret,  
 689 contiguus Arabes attingens finibus hostes,  
 690 postulet adjungi coeptis atque offerat ultro  
 691 vires ipse suas equitum, peditumque catervas,  
 692 armaque et ingentem puri vim prodigus auri.  
 693 Quod si promissis maneat, quae plurima nobis  
 694 ipse dedit, nec facta fidem mutata novabunt,  
 695 tum vero, ut fas est, quae nos communibus armis  
 696 ceperimus, communi etiam ditione regamus.  
 697 Atque haec pacta duces, si vos quoque firma jubetis  
 698 esse, reor cum Threicio facienda tyranno,  
 699 et certa servanda fide. Sic ille nefandi  
 700 et fandi memor, ex altis qui despicit astris  
 701 cuncta, exercituum Deus adsit testis et aequa  
 702 peccantem afficiat poena certissimus ultro."  
 703 Assensere duces : procerumque ex ordine lecti,  
 704 talia qui Thracum regi mandata referrent,  
 705 discedunt propere e castris, urbemque petentes  
 706 una iter arripiunt Commeni ad limina regis.  
 707 Ille autem, Oceanum cum primum Aurora relinquens



708 terrarum, tenebras caelo discussit aperto,  
 709 excierat fessos stratis e millibus artus  
 710 spemque, metumque inter dubius, seu foedera credat  
 711 juncturos secum Gallos, seu lege solutus  
 712 omnia rapturos, memores virtutis avitae  
 713 et scelera exosos jamdudum, artesque Pelasgas.  
 714 Sed tamen assuetus varias componere fraudes,  
 715 haud fore desperat, tacitus quod mente volutat.  
 716 Has inter curas versanti et multa moventi  
 717 grata superveniunt procerum responsa ferentes  
 718 legati : quos ille intra tecta alta vocari  
 719 imperat et solio sese componit eburno  
 720 sublimem atque ostro insignem, sceptroque superbum :  
 721 cui crinem intonsum gemmisque, auroque tiara  
 722 circumiens rutilo poterat splendore tenebras  
 723 vincere et obscuram longe depellere noctem,  
 724 spectantumque oculos radiis praestringere acutis.  
 725 Illi autem ingressi Regem de more salutant.  
 726 Mox forti Rholone satus sic farier inquit.  
 727 "Si nos Hesperiiis patriae discedere ab oris  
 728 suasissent aurisque fames, regnique cupido,  
 729 externasque manu populorum invadere sedes,  
 730 foedere Rex tecum nullo nunc pacta ligarent :  
 731 sed potius bellum, quod te incoepisse negabunt  
 732 nulli umquam, nostrosque armis petiisse priorem,  
 733 non fraude, aut furto (quando hunc fortissima morem  
 734 Gallorum pubes jamdudum et damnat et odit)  
 735 sed virtute palam, sed aperto Marte gerendum  
 736 susciperet, pulsisque sua de sede colonis,  
 737 ipsa ultro veniens placitis consideret urbes.  
 738 Et quoniam, quod et ipse vides, ad moenia vestrae  
 739 millia jam sexcenta virum convenimus urbis  
 740 bellantum, quos una omnes, eademque voluntas  
 741 impulit in ferrum, certosque armavit in hostes,  
 742 verteret in praedam quicquid rapuisse liberet.  
 743 Nunc autem nec nos Graium populare penates  
 744 venimus, aut Thraces patriis evertere regnis :  
 745 verum praecipites Turcasque, Arabesque fugemus  
 746 ex Asia, Solymaeque pias statuamus ut aras,  
 747 abjectoque metu tandem loca sancta colantur  
 748 Christicolum populis, cujus si te quoque laudis  
 749 tangit amor, tantique cupis tibi sumere belli  
 750 partem aliquam coeptis socium te adjungere nostris  
 751 et placet et jam nunc una hac in foedera lege  
 752 accipimus laeti venientem atque omnia posthac  
 753 oppida, quae nos cumque Deus communibus armis  
 754 annuerit capere et nostra ditione teneri,  
 755 haec fore spondemus nobis communia tecum :  
 756 inque haec verba sacros Goffredi nomine libros,  
 757 aeternae libros dantes praecepta salutis  
 758 et Christi simul acta Dei miranda docentes,  
 759 tangimus et testes Superosque, Deumque vocamus."  
 760 Dixerat haec Rholone satus : cum Graius Alexis.  
 761 "Accipio, amplectorque libens, fortissime ductor,  
 762 quae dantur, faustumque precor si utrisque, volentes  
 763 quod statuisti, ait. Nos quae promisimus ultro,

764 praesto aderunt, naves cum primum ascendere et oras  
765 linquere Threicias, Bebrycumque invadere fines  
766 coeperitis, jamque innumeras astare carinas  
767 cernitis et pandas praetexere litora puppes,  
768 unde iter in fines, cursusque brevissimus undis  
769 Mygdonios, caecae surgunt ubi moenia gentis.  
770 Vos duce Thatinno, cui nos confidere tuti  
771 suevimus et regni vel totam imponere molem,  
772 Graiorum delecta manus comitabitur usque.  
773 Ille unus belli expertus, gnarusque locorum  
774 incolumes rapidum ad Syria vos sistet Orontem."  
775 His dictis duci jubet e praesepebus altis  
776 tercentum alipedes ostroque, auroque nitentes.  
777 Goffredo ex omni numero lectissima centum  
778 corpora sed reliquos reliquis quos mittat habendos  
779 militiae tantae ductoribus insuper addit  
780 et sagula et Tyrio fulgentes murice laenas,  
781 nec non et chlamydes vario subtegmine pictas,  
782 quaeque imbres, rapidosque arcent tentoria soles.  
783 Ergo ita compositis infida in foedera rebus  
784 legati redeunt hilares in castra diemque  
785 partim epulis celebrant laetis, partim ardua belli  
786 commemorant, juvat exhaustos meminisse labores  
787 et spectare procul terras, collesque feraces,  
788 quos ingressi Arabum poterunt invadere fines.  
789 Liquerat interea placidos Sol aureus amnes  
790 Oceani et largo vestibat lumine montes :  
791 cum Gallos, Italosque una cava buccina somno  
792 exiit ; illi autem litus petiere, brevisque  
793 transmissi angustas fauces atque ostia Ponti,  
794 Bithyni incolumes tenuerunt litoris oram.  
795 Tum pius Eustachides (proceres namque ante vocari  
796 jusserat ad sese) : "Postquam pervenimus, inquit,  
797 terrarum in partem, quibus hostes proxima Turcae  
798 regna tenent, vallesque imas, silvasque putandum est  
799 insedissee altas, agmen procedere sensim  
800 jam decet ad subitos casus, pugnamque paratum.  
801 Quo circa Auroram cum primum nonus aperto  
802 rettulerit caelo Titan, sese instruat armis  
803 quisque suis, instetque viam sua signa secutus.  
804 Interea cuncti Superumque, hominumque parenti  
805 Christicolum de more animum lustrentque, probentque  
806 rite sacerdoti culpas et crimina fassi."  
807 Haec ubi dicta dedit, passim per castra vagatur  
808 fama volans, certisque refert jejunia jussi  
809 indixisse patres venturae proxima lucis.  
810 Quae postquam Addemarus perfecta ex ordine vidit  
811 omnia et Eoo surgens octavus ab orbe  
812 illuxit Phoebus, sublimem operatus ad aram  
813 solemnesque preces, consuetaque sacra peregit.  
814 Idem etiam populum pura circumtulit unda,  
815 spargens rore levi ; mox et felicibus omnes  
816 prosequitur verbis et prospera cuique precatur.

## LIBER SEPTIMUS

S\_7 v.1 Exspectata dies aderat, cum buccina cantu  
 2 clara dedit signum : primumque incedere coepit  
 3 agmen et armorum rutilo fulgore micantum  
 4 replevit montes veluti cum vertice summo  
 5 aut Apennini, aut nubiferaeque Pyrenes  
 6 silva ingens fagi, annosa et consita pinu,  
 7 abietibusque frequens, ramis arentibus ignem  
 8 comprehendit flammae radiantia sidera lambunt,  
 9 aériasque inter nubes splendore coruscant.  
 10 Ibant et gressum peditesque, equitesque movebant  
 11 compositi, et toto spirantes pectore Martem.  
 12 Et satus Eustachio thoracem indutus aenum,  
 13 dextra autem ingentem praefixa cuspide contum  
 14 praeportans, clipei pondus, molemque sinistra,  
 15 et galea insigni tectus frontemque, caputque,  
 16 ante alios omnes heros se primus agebat.  
 17 Sic etiam armento longinqua ad pascua eunti  
 18 incommitata ferox praefert vestigia taurus,  
 19 viribus, atque animis in pugnam, inque arma paratis.  
 20 Hic tu, quae vatem caeli super ardua tollis  
 21 sidera et aetheriis Divum regionibus infers :  
 22 unde mare et terras, unde aera cernat apertum,  
 23 aura amor aeterni pariter Natique, Patrisque  
 24 sancta veni, et vastum si te spirante profundum  
 25 ingressus, potui dubios evadere fluctus  
 26 incolumis, qui restat adhuc, age, dirige cursum  
 27 ipsa per obscuras ignoti marmoris undas :  
 28 inque animi illabens penitus, precor, influe mentem.  
 29 Ac veterum extinctae procerum si tantus haberi  
 30 debet honos famae, si gratia tanta referri,  
 31 discute praeteriti confusa obliviae saeculi.  
 32 Quaeque acies ferro accinctae regesque, ducesque  
 33 excitos patria fuerint ad bella sequenda,  
 34 intulerintque Arabum populis regnantibus arma,  
 35 enumerare velis etenim potes, omnia quando  
 36 ante oculos exposita tuos versantur et ora.  
 37 Nos rerum tenebris et nocte involvimur atra.  
 38 Daunius ingreditur primus, qui sanguine cretus  
 39 Cimbrorum regum, dominatur Iapygis orae,  
 40 numinis aeterni quo nec reverentior alter,  
 41 nec virtute animi, sumptis nec fortior armis.  
 42 Secum agit Ausoniae lectissima robora pubis.  
 43 Filius huic fratris Siculae telluris alumnus  
 44 it comes et patruo paribus se suscitatur ausis  
 45 Tancredus : forma insignis, primoque juventae  
 46 flore nitens, saevos assuetus comminus apros  
 47 sternere et hibernas glacies calcare, nivesque,  
 48 atque aestus perferre graves dum Sirius ardet.  
 49 Millia Trinacriis peditum tria ducit ab oris :

50 quingentosque equites ; dignus quem gloria tanti  
 51 exciret coepti, tacitisque hortatibus ultro  
 52 ad decora et laudes traheret Boemundus avitas.  
 53 Illius imperio parent quicumque Pelori  
 54 claustra colunt, rupesque altas, atque arva Pachyni :  
 55 qui fontes Arethusa tuos, qui flava Symethi  
 56 flumina praecipitis necnon Alabumque Gelamque  
 57 ambiguosque amnes ; medio quorum Himera cursu  
 58 Trinacriam dirimit, quique aspera saxa rotantem  
 59 Pantagiam potant ; Aetnaeque e rupe fluentem  
 60 Acin, adhuc diri memorem Cyclopi amorum.  
 61 Quos una in medium ductor conjecerat agmen.  
 62 Namque aciem primam primi tenuere Quirites  
 63 bismille, Urbani qui tum pia jussa secuti  
 64 Pontificis, sacrae dederant ex ordine nomen  
 65 militiae, magnosque animos in bella gerebant ;  
 66 digna loci splendore sui, patribusque juvenus  
 67 Romulidis : quibus insignis pietate Sabellus  
 68 imperat, in Turcas animis accensus amaris :  
 69 Quintilius sanguis, veteris deductus ab alto  
 70 sanguine Aventini ; qui quondam in bella Sabellos  
 71 armavit ; Latiis Troas quo pelleret oris.  
 72 Aequae suo moriens colli nomenque, decusque  
 73 addidit, unde orti generosa a stirpe nepotes  
 74 terrarum implerunt factis ingentibus orbem.  
 75 Ille igitur tantae spectandus origine gentis  
 76 it gravis incessu ; vultuque, oculisque severus  
 77 omnibus ingentem pugnandi inspirat amorem.  
 78 Post hos Etruscis pubes e montibus orta,  
 79 Vulsinum quaecumque lacum, lucumque virentem  
 80 illicibus, farnisque colit, terramque Faliscam  
 81 laeta habet et collis summa de rupe fluentes  
 82 haurit aquas aquulae ; linoque et cannabe pingues  
 83 vestit agros ; spectatque procul vicina sonoro  
 84 arva Glani : quique et Cimini de nomine dicti :  
 85 gens dura in primis, belloque assueta gerendo.  
 86 Cui se ductorem Tyrrhenae stirpis Halaesus  
 87 addiderat, forma et juvenili aetate superbus.  
 88 Progenies regum, magnorum et germen avorum :  
 89 legiferos qui quondam inter rexere Faliscos  
 90 imperium, populos omni ditione tenentes.  
 91 Ergo avidus factis illustrem extendere famam,  
 92 ut primum tanti rumor percrebuit ingens  
 93 incoepti, passimque Italis vulgatus in oris,  
 94 contulit extemplo Dauni se in castra, volentem  
 95 scilicet ex tanto pacis, bellique magistro  
 96 discere virtutem jam tum, verumque laborem.  
 97 A quo mox certo generis ceu principe seri  
 98 partim aucta partim mutata voce nepotes  
 99 indigenae factum gentis de more sequuti  
 100 deduxere tuum domus o Farnesia nomen,  
 101 et natos peperere tibi vel pace, vel armis  
 102 insignes, triplici qui tempora sacra corona  
 103 cinxerunt, populosque manu domuere rebelles.  
 104 Quattuor antiquis excita e sedibus illum  
 105 millia sectantur peditum ; qui pectora parma

106 tuta tegunt : galeaque comas et tempora cingunt.  
107 Pila manus, rutilum sustentat balteus ense.  
108 At tercentum equites, antiquae robur Agyllae,  
109 quos ad bellorum dubios sibi legerat usus,  
110 ostentant clarae spectata insignia gentis.  
111 Intextos sagulis ferrugineos Hyacinthos.  
112 Tum genitus veteri priscorum a stirpe parentum,  
113 incedens, humeris longe supereminet omnes  
114 Cilnius, Aoniis proles gratissima Nymphis,  
115 Areti decus, et vatium spes fida bonorum.  
116 Fert niveum clypeo Cycnum, leve corpus ad aethram  
117 tollentem et cantu caeli convexa replentem :  
118 stemma domus notum, et majorum insigne suorum  
119 protinus illum omnis legio comitatur euntem.  
120 Quique pigri Glanis arva colunt ; quique ardua Clusi  
121 moenia habent ; et qui summo te vertice montis  
122 nascentem, vallesque imas et saxa secantem  
123 Arne bibunt : gemini mox claro a sanguine fratres,  
124 Griccia progenies, hilari cum corde sequuntur.  
125 Ac bismille viros, belli insuperabile robur,  
126 prorsus agunt : quos Sena agri ditissima pascit.  
127 Sena Camenarum cultrix et Martis alumna.  
128 At, quae nascenti vicina Biturgia Tibri est,  
129 agmen in arma vocat cinctum fulgentibus armis.  
130 Inde Typhernates, cultu gens aspera, cujus  
131 ipsa suis fecunda bonis, sed inhospita tellus,  
132 educat audaces lacrimosa in proelia dextras.  
133 Una ingens Perusina cohors, Umbrique feroces :  
134 HisPELLI manus omnis : agri Mevania dives.  
135 Qui montes, Trasumene, tuos ; qui litora circum  
136 curva colunt, laeti jussis parere Vitelli.  
137 Ipse minax oculis, et toto corpore firmus  
138 ingreditur : vultuque animus testatus acerbus  
139 spirat atrox Martem ; et sociorum mentibus addit  
140 ardorem pugnae ; et partae per vulnera laudis.  
141 Dumque adeo incedit ferro contectus, iniquum  
142 armorum haud aliter valido fert corpore pondus,  
143 quam juvenis primae florenti aetate juventae  
144 ferre solet Serum contextam e stamine vestem.  
145 Hinc montes quicumque colunt, camposque jacentes,  
146 vortice quos humili Sapis, quos flumine Isaurus  
147 humectat, sociata ferunt arma hinc Camerinum  
148 insequitur pubes ; junctisque exsultat in armis.  
149 Praesentesque animis adsunt Ufente relicto.  
150 Adsunt desertis ripisque, undisque Metauri :  
151 atque oblita Aesim se tanta ad coepta juvenus  
152 laeta parat, mittitque suos ad nobile bellum  
153 ingenitum mediis e montibus Appennini.  
154 Quos omnes idem ardor agit ; quibus omnibus unus  
155 Umbrorum Ubaldis proles clarissima regum  
156 imperat illi autem parent felicibus acti  
157 auspiciis, quando nemo prudentius est, qui  
158 rem gerat, aut armis fundat qui certius hostem.  
159 Ille quidem ante alios claris majoribus ortus,  
160 sed prolem insignem multa virtute daturus :  
161 olim, quae Senae late dominetur in oris :

162 barbaricisque Italos vindex defendat ab armis,  
163 et Venetum in tuto statuatur res illicet olli  
164 pone subit propior Persaei nominis hostis  
165 Ventidius, cujus discissum bellica montem  
166 ostentat parma, atque hosti fatale minatur  
167 exitium, credas Susas, Gangemque, Tigrimque  
168 et victum Euphratem Latias horrere secures.  
169 Imperiis regit ipse suis, quoscumque Truenti  
170 alluit unda rapax, bello genus acre virorum.  
171 Quos et Matrinus, quos et celer amne Vomanus  
172 ipse suo humectans steriles defertur in agros.  
173 Hos non invitis animisque, armisque sequuntur,  
174 quicumque arva colunt semper frigentis Aterni,  
175 in mare quo nullus violentior influit amnis.  
176 Nec te Corfinii pugnax Cantelme juvenus  
177 digressum irriguis patriae regionis ab oris,  
178 inque externa pii certamina Martis euntem  
179 deseruit, tecumque tuos generosa labores  
180 sponte sua magni est pubes partita Teatis,  
181 eversique ingens Amiterni et nominis una  
182 Normanni studiosa cohors, tum suetus aprorum  
183 lustra sequi, saevosque lupos prosternere et ursos  
184 accola Nicatae : cujus nimbosus et asper  
185 perpetuis horret nivibus, caeloque minatur,  
186 attollens sese summum super aethera vertex :  
187 fluminaque Ionium labentia fundit in aequor.  
188 Post hos exoriens Hyrpina e rupe Phiternus  
189 ostentatque suos et laetus jactat alumnos,  
190 quorum lambit agros, non hic Garganus Iapyx,  
191 non et Gerione Poenorum diruta ab armis,  
192 Larinumque audax, positumque in monte Teanum :  
193 Luceriaque, olim magnae tutela Minervae,  
194 atque urbs Argyripa et quondam celeberrima Sipus,  
195 nunc aequata solo, atque opibus viduata, virisque  
196 invidit juvenum lectas ad bella cohortes.  
197 Credula quos junctis animis, et viribus aequis  
198 Gnatia consequitur : nec non septempace portu  
199 nobile Brundisium : Calabrumque ex ordine turmae  
200 Hydrunti pubes pietate insignis, et olim  
201 quam seri referant simili virtute nepotes.  
202 Octingenti ibant una natique, patresque  
203 in bellum : nec mortem illi, nec saeva timentes  
204 vulnera, dum sese Christi pro nomine leto  
205 offerrent, hiemesque atras paterentur et aestus.  
206 His sese adjiciunt, mollis quicumque Tarenti  
207 litus et arva colunt : quamvis ad bella juvenus  
208 lenta olim, et Martis duros exosa labores,  
209 nunc autem patrii luxus oblita : memorque  
210 ipsa sui et magnae succensa cupidine laudis  
211 induerat properans pectus fulgentibus armis.  
212 Una ibant, Baccho, et lanis quo nobilis Aulon  
213 legerat aequales numero ; nec longius olli  
214 inde aberant, inter scopulos qui murmura ponti,  
215 horrentesque maris strepitus, iramque refracti  
216 securi auscultant : ubi navifragum Scylaceum  
217 deterret dubio miseros a litore nautas.

218 Dumque erecta animis, armisque instructa juvenus  
 219 ingreditur, subiens campo sua terga prementes  
 220 pone videt veteri Graiorum ab origine Locros,  
 221 ultores scelerum Locros, atque agmine denso  
 222 incedentem aciem, muro quos maxima quondam,  
 223 nunc angusta Croton : verum cui conscia virtus  
 224 excitat hortatrix ad facta ingentia mentem,  
 225 proxima militiae lectos dare nomina jussit.  
 226 Ergo urbem certatim omnes liquere volentes :  
 227 liquere et tractus, Aesar quos irrigat et quos  
 228 ipse suo fecundat agros celer amne Neaethus.  
 229 Nec procul inde suos sistens Consentia cives,  
 230 dives opum, dives Consentia munere Bacchi,  
 231 et quae terrarum dominae velut aemula Romae,  
 232 ipsa sibi septem muro circumdedit arces,  
 233 instruit in bellum, rebusque, animisque paratos,  
 234 infensosque Arabis, patriam qui fraudibus urbem  
 235 aggressi miseram radicibus evertissent.  
 236 Invasuri igitur dextris ultricibus hostem  
 237 unanimes, doctique acres densare catervas,  
 238 insignem factis, et nobilitate potentem,  
 239 in quascumque velit partes et bella, sequuntur  
 240 antiqua genitum Gallorum a stirpe Severum,  
 241 a quo nomen habet fastos deducta per omnes  
 242 una animis spectata, et magnis incluta factis  
 243 Sanseurina domus : cujus fecunda metallis  
 244 imperio paret Temese, Sybarisque, Syrisque,  
 245 Acrisque, atque ingens Sylarus, Sagraeque Crotoni  
 246 illatam ob cladem semper memorabile flumen.  
 247 Paret et ipse volens lapidoso Cratis ab alveo,  
 248 Appenninigenis ex quo de fontibus ortus  
 249 inter saxa ruit, montesque celerrimus altos,  
 250 et celebris tandem nactus lata aequora campi,  
 251 vix sese ipse capit, Siculumque irrumpit in aequor.  
 252 At qui florentes saltus Hipponis amoeni,  
 253 prataque nonnumquam spoliata virentibus herbis,  
 254 falcibus attondent, ternos in bella sequuntur  
 255 ductores, magni gens alta a stirpe Quirini.  
 256 Hi populo in plures acies, et plura dirempto  
 257 agmina, non ullis humeros in proelia telis  
 258 munierant pectus thorace, et casside fronte  
 259 armarant ; ceu nusquam essent ferienda daturi  
 260 terga sed adversis casuri in vulnera dextris.  
 261 Sic illos monitis instruxerat Haevius acer.  
 262 Sic Minuci virtus proles sic certa Camilli  
 263 Furius, antiquas dum versat pectore laudes,  
 264 tum vero incedunt asperrima saxa colentes  
 265 Lucani, hinc atque hinc gelido quos flumine Laus,  
 266 et Silaris cursu praeceps concludere pergunt  
 267 Dorica progenies, et quae ductoribus Afris  
 268 haesit, Romulidum quondam populantibus urbes,  
 269 nunc aedem Lybiae populos exosa rebelles.  
 270 Proxima dehinc validas bello Campania vires  
 271 laeta dat, et populos notis insignibus ornat  
 272 Parthenope generosa suos : quos deinde sequuntur  
 273 assuetae nimium bellis civilibus urbes.

274 In primis Capua invictae vetus aemula Romae :  
 275 luxus ubi, et stabilem damnosa superbia sedem  
 276 fixerat olim, animos sed tunc submissa feroces,  
 277 in bellum praeceps Turcarum, Arabumque ruebat.  
 278 Cui sese comitem addiderat vicina Vesevo  
 279 Nola jugo ; quondam populo spectanda frequenti,  
 280 atque amplo spatiosa loco : nunc undique fines  
 281 moenibus angustos circum complexa, vetustas  
 282 jactat opes : acri Poeno quae sola tyranno  
 283 opposuit muros, portasque impervia clausit.  
 284 Nec non et Clanii rapido quae flumine Acerrae  
 285 vastantur, Libyae jampridem inimica juvenus  
 286 et quicumque amnis ripas habet incola Sarni.  
 287 Sarastes populi, atque Arabis possessa colonis  
 288 Nuceria et dubiis quondam Calatia rebus  
 289 fida parum Latio : tum quae lasciva pudicam  
 290 intulit in scaenam lusus Atella procaces,  
 291 quique rudes, quique arva tenent bene culta Celemnae ;  
 292 et fecunda nucum, sed non flaventis Abella  
 293 frumenti et Cumae sedes arcana Sybillae ;  
 294 dum potuit caecas passim deludere gentes,  
 295 obscuris vana involvens regnator Averni  
 296 Lucifer, et rigidis Orci damnare tenebris.  
 297 Protinus his acres pubem conjungit Aquinum ;  
 298 quaeque adeo Liris fontes discriminat ambos  
 299 Sora ; et oliviferis campis insigne Venafrum  
 300 ac de Barbariae positis illustre tropaeis  
 301 Arpinum decus invictae memorabile Romae.  
 302 Denique se totum in Turcas effuderat ingens  
 303 Samnium, et abruptis quicumque in montibus orti  
 304 Hernica saxa colunt : quos qui numerare pararit,  
 305 idem etiam numerare paret, quod florida fingat  
 306 Hybla favos, Sicyonque ferat quot Achaica baccas.  
 307 Nec tamen involvant tenebris et nocte profunda  
 308 carmina nostra tuum, felix Florentia, nomen.  
 309 Quae laudem atque animos ut testarere, fidemque  
 310 ipsa tua in patrem, Latiis qui praesidet oris,  
 311 aemula victricis, et magnae filia Romae,  
 312 misisti invictas Boemundi in castra cohortes.  
 313 Misit et urbs antiqua suas, cui filia Atlantis  
 314 indidit aeternum ventura in saecula nomen  
 315 Faesula : quae Tuscas inter caput extulit urbes  
 316 bissenas ; lateque Orbi dominata parenti est,  
 317 cum nullos habuit Tyrrhena potentia quorum  
 318 ipsa sibi fidens vires atque arma timeret.  
 319 Quin etiam Alpea deductae ab origine Pisae,  
 320 unanimes Pisae celebrem jussere virorum  
 321 ire aciem, et vires sanctis adjungere coeptis ;  
 322 Tuscorum decus, et nomen memorabile Pisae :  
 323 urbs terraque, marique potens, opibusque superba.  
 324 Felix si stabili concors in amore, fideque  
 325 mansisset ; nec post mens laeva averteret, ut se  
 326 finitimis vellet praeferrere ; atque omnibus unam  
 327 urbibus imponi ; legesque indicere Etruscis.  
 328 Proxima succedit Ligurum manus : Apua quorum  
 329 et Luna imposito populos e nomine dicunt.



330 Quaeque suo, tamen una omnes vetus Apua de se  
 331 comprehensos, Arnumque inter, Macramque sonantem  
 332 nominat, assuetos perferre et frigora et aestus  
 333 et tolerare famem et sine somno degere noctes,  
 334 in silvisque agitare feras et vivere raptō.  
 335 His pedites permisti, Aesar quos amnis utrimque  
 336 alluit et mediam discriminat agmine vallem,  
 337 perpetuam vallem, cui dat Feronia nomen :  
 338 dicta Jovis quondam conjux Feronia, namque  
 339 marmore substructum nitido et fulgente metallo  
 340 illius in Tusco celebrabant litore Fanum,  
 341 religione ingens Ligures. Hos Luca vocarat  
 342 libertatis amans, ducibusque ornarat et armis.  
 343 Post hos antiqua Tuscorum ab origine regum  
 344 Felsina, condensum patriis ciet agmen ab oris.  
 345 Ostentatque equitum turmas, peditumque cohortes.  
 346 Quas in bella vocat Piceni limen Isaurus :  
 347 Crustumiumque rapax : et dives ab ubere glebae  
 348 ac riguo, tenuique vado contentus Aprusa :  
 349 et Rubico Italiae finis vetus : obvius olim,  
 350 qui bellum, aut pacem venienti indiceret unus.  
 351 Nec vos non vestras acies sociastis et arma,  
 352 quos gelidae recreant valles frigentis Isapis ;  
 353 quique adeo celerem Bedesim, Vitimque bibentes  
 354 hinc Appennini montes spectatis et illinc  
 355 Adria Dalmatiae longe quas alluit oras.  
 356 Affuit et vallem quicumque Anemonis, et agros  
 357 cultor habet : quique undosae colit arva Padusae,  
 358 Vatrenumque videt fluvio sata culta secantem.  
 359 Quique ex eversa populi crevere Claterna.  
 360 Hos super adveniunt eadem de gente manus, quas  
 361 e vitreo Scultenna lacu, atque e vertice summo,  
 362 unde mare et Ligurum saltum, lateque patentem  
 363 Gallorum campos pater aspicit Appenninus,  
 364 aspera saxa fluens inter, pinguesque novalis,  
 365 misit, et unanimes ocreis armavit, et hastis.  
 366 Post quos cernere erat Mutinae generosa renatae  
 367 agmina, et antiquae pedites incedere Parmae ;  
 368 et quoscumque rapax gelido rigat amne Gabellus.  
 369 Nec non et densis equites se effundere turmis ;  
 370 Mantua quos dives fecundis misit ab oris,  
 371 profecitque alta Gonsagae a stirpe profectum  
 372 Oromedonta ducem : non quem sub vertice montis  
 373 Arganti caelo vidit jam Phlegra minantem  
 374 excidium : sed quem justique aequique tenacem  
 375 terra tulit, verae columen pietatis et illum  
 376 cui se ferre parem Gallorum haud audeat ullus ;  
 377 seu lucta certare velit, seu cominus armis :  
 378 sive eques infensus lato concurrere campo.  
 379 Cunctorum extremus sese ostentabat euntum,  
 380 quem sua Cenomanum, Ligurumque exercitus ingens  
 381 Brixia, Verbannusque lacus, rapideque fluentis  
 382 accola Ticini patriis dimisit ab oris.  
 383 Jussit et imperiis sese submittere Othonis :  
 384 regius unde tuus, domus o Viscontia, sanguis :  
 385 ditibus Insubrum late regnavit in oris.

386 Una etiam, quicumque alpes habet, ibat opertus  
 387 aere caput, clypeum laeva, dextraque bipennem  
 388 intentas validam, lorica utrimque trilici  
 389 setosos humeros, atque hispida pectora cingit.  
 390 Claudebant extrema aciem, quos Attius acer  
 391 exciit Euganeis e montibus unus Ateste  
 392 cui tunc, et Veneti pars maxima paruit agri.  
 393 Attius ex atavis proles deducta Sabinis :  
 394 gens vetus, et multos Romae dominata per annos,  
 395 clarorum fecunda ducum : Ferraria cui se  
 396 regnandam, populosque dedit virtute regendos  
 397 litore ab Adriaco Tyrrheni ad marmoris oram.  
 398 Hanc tunc armipotens tellus tulit Itala pubem  
 399 bellantum, tanti robur memorabile coepti ;  
 400 millia complebant quam ter vicena virorum,  
 401 insignem ferro, atque animis praestantibus acrem.  
 402 Illius mox terga loco propiore secuti  
 403 Bellovaci, primam numero, et virtute potentem  
 404 instruxere aciem, sumptis quo saevus in armis  
 405 Nervius insequitur, natusque ad proelia Trevir :  
 406 quique adeo vitreum tenui bibit amne Mosellam  
 407 Leucus : et indomitis Morinus vicina Britannis  
 408 litora habens, portuque ipsi propiore Caletes ;  
 409 Remique, Aulercique acres : quos Axona, quosque  
 410 Sequana frigenti medios complectitur amni.  
 411 Protinus infestas his adjunxere cohortes  
 412 Armorici horrentis contemnere murmura sueti  
 413 Oceani et jaculis hostem configere acutis  
 414 eminus, et valido calamos imponere nervo.  
 415 Nec vos Carnutes vestrum liquistis euntem  
 416 tanta in bella ducem : nec tu juvenemque, ducemque  
 417 egregium Biturix non es comitatus et una  
 418 conatus medio versantem turbine belli  
 419 tutari et frustra Turcarum avertere castris.  
 420 Ibant Arverni Trojano a sanguine creti  
 421 Vangionumque acies, Batavorumque agmen ad omnia  
 422 jussa ducum, quaecumque instant, nutusque paratum.  
 423 Quin etiam Ligeris fecundis misit ab agris  
 424 Pictones et salsis propiores Santones undis.  
 425 Misit Aquitana fortes de gente Cadurcos ;  
 426 in mare qui tumidus lato fluit amne Garumna.  
 427 Deseruitque Ararim, Rhodanumque, Isaramque, Dubimque  
 428 Sequanus et Latiae frater fidissimus urbis  
 429 Haedus ac nondum ritus exosa, piasque  
 430 Romanorum aras, quae gens salebrosa Lemani  
 431 saxa lacus, ripamque colit, brumalibus Alpes  
 432 quam nivibus tectae toleranda ad frigora durant.  
 433 Pone Britannorum subit alto a sanguine Regum  
 434 insignes virtute Conon Montautius, a quo  
 435 clara per Etruscos se gens Montautia fudit.  
 436 Filius haerebat lateri Goscellus, et ipse  
 437 confertas solitus perfringere Marte phalanges.  
 438 His etiam Chatti vires, acresque Suevi  
 439 adjecere suas, nec se subducere coeptis  
 440 crinibus intorti flavi volvere Sicambri.  
 441 Non Agilolfinga natum de gente Cacannum

442 deseruere ducem populi, qui finibus Aenum,  
443 atque Istrum attingunt, tepido quos Solis ab ortu  
444 Cecius exurgens Euris mons afflat odoris,  
445 Curvancaeque jugum pluvialibus irrigat Austris.  
446 Sic saltus acies instructa evasit iniquos,  
447 convallesque cavas, latebrosaque saxa locandis  
448 bellorum insidiis, donec se inferre patenti  
449 quivit et unanimis spatioso incedere campo.  
450 Suspicit unde altos a laeva insurgere montes :  
451 Ascaniique lacus a dextra includitur unda  
452 perlucenti unda, passim quae pervia nautis  
453 moenia Nicaeae propior pertingit ; et urbem  
454 mercibus investis ditem beat. Illa quaternis  
455 exhibet ingressum portis, spatiosaque muros  
456 dirigit in quadrum, turresque infensa minaces  
457 ostentat procul et venientes territat hostes.  
458 Hanc unam sibi praecipue delegerat arcem :  
459 ex qua Graiorum cervicibus impenderet,  
460 Bithynis dum Persa ferox dominatur in oris,  
461 artibus egregius belli Solymanus et ausis,  
462 Belferci proles, qui quondam in Perside regnum  
463 cum gereret, certaue Asiae totius habenas  
464 laxaret, premeretque manu, virtute repertum  
465 imperium natis aequata sorte reliquit.  
466 Indole quos inter praestanti, animoque virili  
467 Dothacus Assyriam tenuit ditione Damascum,  
468 assidue bellum Phario cum rege gerentem,  
469 Hassanusque oram regnandam accepit et urbem,  
470 addideratque ipsos fida cum conjuge natos.  
471 Ergo ut confertas acies videre piorum  
472 adventare, locoque omnes considerare cero,  
473 hinc atque hinc densa muros cinxere corona,  
474 et trepidi firmo clauserunt obice portas.  
475 Quarum unam, Libyci partes quae vergit ad Austri  
476 prona, Tolosatam pubes obsedit et audax,  
477 cum primum positis turrita ad moenia castris,  
478 ac nondum indicto justae certamine pugnae,  
479 nunc aperire aditum, summas nunc sternere turres  
480 quaerit et ex altis hostem depellere muris.  
481 Haec eadem parte ex alia Boemundus, et acer  
482 Tancredus, Gallique simul, Belgaeque, Britannique,  
483 arietibus muro admotis conantur et instant.  
484 At Tomyris, bello a teneris assueta gerendo,  
485 inter Sarmaticas virgo versata secures,  
486 finitimis olim populis metus acer et una  
487 quae pediti sese pedes obvia ferret, equesque  
488 confertis equitum posset concurrere turmis :  
489 saeva manu mulier, studium curamque tuendae  
490 Bithynae fidens animo susceperat urbis.  
491 Illa igitur dum se circum sua moenia versat :  
492 "Eia agite, o Cives, illorum opponite telis  
493 tela, ait, aequae alto devolvite saxa, trabesque  
494 in caput, et scalas ; nec vos nova terreat hostis  
495 externi facies ; longe (mihi credite) cedet  
496 finibus a nostris, si se semel ipse repelli  
497 senserit et validis defendi viribus urbem."

498 Dixerat, et manibus lapidem deturbat utrisque  
499 ipsa suis. Cadit ille ruens et pondere vasto  
500 opprimit audacter subeuntes moenia Gallos ;  
501 cogit et ad fossae sese convertere ripam :  
502 quam ducis imperio virgisque, et falcibus ante  
503 implerat miles, summaeque aequarat arenae.  
504 Ergo illum dictis acer Rhamundus amaris  
505 increpat et rursus scalas in moenia poscit.  
506 "Non pudet, o Galli, vos hinc terrore ruinae  
507 unius properare fugam, atque abscedere victos ?  
508 En has, ut tergo victorum infligeret hostis  
509 vulnera, et irrisos ageret, venistis ad oras ?  
510 Ite, agite et manibus lacerum divellite murum,  
511 praesidiisque illinc pulsus hostilibus, ipsos  
512 ac Solyms aperite aditum ; victoria coepti  
513 totius hic posita est ; etenim si capta patebit  
514 urbs prima haec, aliae clausas opponere portas,  
515 objicere aut sese nusquam venientibus ausint."  
516 Haec dux increpitans Gallos sic ore monebat.  
517 Ergo illuc animis cuncti rediere receptis,  
518 rettulerant prius unde pedem, majoreque nisu  
519 invasere iterum facta testudine muros.  
520 Cepissentque urbem, ni Rex Solymanus ab altis  
521 silvarum, nemorumque jugis digressus, equestrem  
522 jussisset propere in campum se effundere nimbium.  
523 Namque ante adventum Gallorum, in Perside turmas  
524 ingentes equitum, peditumque coegerat, et se  
525 montibus in summis tacitus, nemorumque latebris  
526 abdiderat, laturus opem cum posceret usus  
527 pugnandi et mediis nostros fusurus in agris.  
528 Quos ubi conantes urbis rescindere turres  
529 audiit et portis inferre obstantibus ignem,  
530 erectusque, alacerque suos affatus : "Habetis  
531 quod cupiistis, ait, castris ex omnibus hostem  
532 effusum et temere ad muros, turresque ruentem.  
533 Ite viri mecum et praedam sperate futuram,  
534 quantam nonnumquam nostri optavere parentes  
535 eversum post imperium, viresque Quiritum.  
536 Hic proceres Gallorum omnes, hic lecta juvenus  
537 Italiae, sed turba fugax, aestusque viaeque,  
538 et sitis impatiens ; uno hoc certamine tantum  
539 aut misere caesos, canibusque, avibusque vorandos  
540 linquimus, aut cunctos in vincula ducimus actos.  
541 Nec quisquam vestrum est, qui non infecerit horum  
542 sanguine jampridem camposque, ensesque, manusque  
543 et patrem ingentem, fines quae prima feracis  
544 Mygdoniae properans ausa est invadere, tamquam  
545 molle pecus, mutumque metu demiserit Orco,  
546 este precor vestri memores, unaque putate  
547 esse in conspectu cara cum conjuge natos ;  
548 qui, nisi vincamus, jam jam vincentur inermes,  
549 atque in servitium rapti abducentur, herosque  
550 cogentur posthac miseri observare superbos."  
551 Talibus hortanti socios haec subjicit audax  
552 Hernachus, Hunnorum qui claro a sanguine regum  
553 ibat ovans, seriemque inter numerabat avorum

554 spectata virtute duces, Belamque, Chevamque,  
555 ingentemque ausis Geusan et Taxin et orbis  
556 vastatorem Atilam : "Tibi nil Solymane verendum est,  
557 quin habeat nos ad bellum, pugnamque paratos.  
558 Namque omnes quotcumque sumus, te maxime ductor  
559 unanimes semper, quo jusseris ire, sequemur  
560 et primos hosti caput objecisse juvabit.  
561 Non ignes, non tela viam, non ipsa morentur  
562 tormenta et muros quae machina disjicit altos.  
563 Te duce per medias Libyae sitientis arenas  
564 perque alpes Scythicas glacie nivibusque rigentes  
565 intrepidi gressus acrem tendemus in hostem,  
566 extremoque tibi statuemus in orbe tropaeum ;  
567 vel si se nostris opponat viribus audax  
568 Europa, atque Asiae se totam effundat in oras."  
569 His dictis accensi animi, cunctique repente  
570 e silvis, latebrisque cavis et vallibus imis  
571 prorupere, simulque agros petiere patentes  
572 praecipites. Veluti cum grandis e nubibus atris  
573 improvisa ruens in terram fertur et altis  
574 in tectis crepitans passim salit, intonat aether  
575 arduus ; illa autem teneros glomerata racemos  
576 verberat, ac laeto venientem in palmitibus Bacchum  
577 inficit et glandem et viridem contundit olivam.  
578 Non gregibus, non armentis, non illa subulcis  
579 parcat, et infandam pestem simul omnibus infert.  
580 Ut campos tenere jugis, silvisque relictis,  
581 sub pedibus movere suis vim pulveris atram.  
582 Ceu cum dumosis convallibus Appennini  
583 offudit nebulam gratam raptoribus Auster,  
584 infensam tamen et pecori, pecorisque magistris.  
585 Tum vero una omnes ingentem ex ore profundunt  
586 clamorem et diris ululatibus aera complent.  
587 Quos postquam infesto venientes agmine vidit  
588 Tectofagum ductor, revocato milite, in armis  
589 constitit, atque aciem laetus direxit in hostem  
590 et latera hastatis equitum communiit alis.  
591 Ipse autem galea et thorace armatus aeno  
592 eminent, et cunctos inter proceresque, ducesque  
593 primus abit ; devectus equo, quem mater Iapyx  
594 montibus in summis eductum ad frigora et aestum  
595 duravit, docuitque leves praevertere ventos  
596 cursibus, et stabilem media se sistere in acta.  
597 Non secus ac tumidis in fluctibus horrida cautes,  
598 quam neque sublimi flantes a vertice Cauri,  
599 nec caelo abruptae stabili de sede procellae,  
600 dum pelago super incumbunt, convellere possunt.  
601 Et Solyimum in Gallos magno clamore ruentem  
602 obvis infesta medium transverberat hasta,  
603 fundentemque animam misto cum sanguine, ab alto  
604 deturbavit equo, nec quicquam profuit illi  
605 intectus chalybe clypeus, loricaque triplex,  
606 atque ex aere rigens et vix penetrabile tegmen  
607 pectoris, extremos inter fabricatus Iberos,  
608 et Stygio in primis duratus flumine thorax.  
609 Eductumque atro ferventi e vulnere telum

610 dirigit in frontem contra venientis, et ora  
611 Gizidae, fratremque suum, sociumque volentis  
612 ulcisci et precibus concepta in vota vocantis  
613 unum Halyn, assuevit primis cui sidere ab annis.  
614 "Si te (inquit) semper colui sancteque, pieque  
615 caeli numen Halyn, Persis Deus unus et idem  
616 cunctorum hostis atrox, tua qui praecepta refutant,  
617 da Pater omnipotens inimicum sternere Gallum.  
618 Illius interitus belli totius ut omen  
619 impleat hostiles multo terrore phalanges :  
620 augeat et nostris animorum proelia vires."  
621 Haec secum tacito dum talia murmurat ore,  
622 praecipitique adeo cursu defertur, acutae  
623 sensit se subito transfigi cuspidis ictu,  
624 parte superciliis qua se frons jungit, Halynque  
625 acriter incusans manibus dimisit habenas,  
626 aequae feri dorso cecidit revolutus et ingens,  
627 dum cadit, ingentem sonitum super arma dederunt.  
628 Mox Pharon aggressus rigida ferit arduus hasta  
629 sub mentum, unde leves vox edita prodit in auras.  
630 Atque illis Stygias fugiens infesta sub umbras  
631 vita, feris corpus laniandum, avibusque reliquit.  
632 Inde Aarumque, Omarumque subit, Gazumque, Cotymque  
633 ense omnes : namque in Balaco perfregerat hastam.  
634 Nec tamen incassum : latebris sed pectoris haustis  
635 uno eodemque ictu veteris radicibus Orni  
636 fixerat exanimum, fractumque in vulnere robur  
637 liquerat et Seuthem sese mucrone petentem  
638 fragmine perculsum Phlegethonti addixerat amni.  
639 Post quos Habdallae caput a cervice revellit.  
640 Habdallae, qui se prognatum a stirpe ferebat  
641 Abdaridae et latis Arabum regnabat in oris.  
642 Nec mora. Corcutum, cui, summa in casside plumae  
643 centenae assurgunt, centum quod comminus hostes  
644 fuderat et cunctos vita spoliarat et armis  
645 protinus invadit, clypeumque ex aere rigentem  
646 discidit in geminas geminato vulnere partes.  
647 Nec tamen hic sese compescuit impetus ensis :  
648 verum humeros, armosque feri descendit ad imos  
649 atque viri summa strinxit de pube, Cilixque  
650 ingemuit sonipes, dumque ipsis calcibus aethram  
651 verberat assiliens, sessorem exturbat. At ille  
652 fusus humi magno terrae sola dura fragore  
653 vix premit et subito pedes emicat, inque frementem  
654 versus equum. "Non me tecum fortissime, dixit,  
655 inter mille neces et saeva pericula Martis,  
656 quam mihi servasti vitam, dispergere in auras,  
657 atque imas tecum delabi Acherontis ad undas  
658 taedeat, amborum caedem modo vindicet ensis  
659 ante meus, cui tot se animae vovere cadentes."  
660 Haec effatus, agri medio de tramite saxum,  
661 saxum ingens, immane, jugo quod montis ab alto  
662 corruerat ventis et tempestatibus atris,  
663 ac secum teneras passim prostraverat ornos,  
664 corripit, eque manu jecit violentus in hostem.  
665 Ac nisi laxatas ductor Narbonis habenas

666 defluxisset equi saltu, laevamque petisset,  
667 ilicet illius vidisset limina Solis  
668 ultima, nec Turcis alta Davidis ab arce  
669 ejectis, patriae sospes rediisset ad oras.  
670 Phaereclum tamen armigerum, qui certa secutus  
671 jussa ducis, custos inter fidissimus omnes  
672 terga tuebatur, medios pugnantis in hostes  
673 perculit et summa moribundum extendit arena.  
674 Non impune tamen ; justa nam percitus ira  
675 Rhamundus, clavam ingentem, qua sternere suerat  
676 agmina et aeratas passim contundere turmas,  
677 sustulit, inque caput, galeamque impegit et omne  
678 ossibus infractis dispersit in arma cerebrum.  
679 Quod propior campi speculatus ab aggere Battus,  
680 laserpiciferae Battus regnator arenae,  
681 "Concidit invictum robur nostri agminis (inquit)  
682 ac, nisi missilibus Gallum compescere telis  
683 tendimus unanimes, nostris de viribus actum est."  
684 Haec ait, et curvo nitens intorsit ab arcu,  
685 cui fuerat cuspis duro ex adamante, sagittam.  
686 Illa volans dextrae raptim sese intulit alae :  
687 inque humero nervis disclusa rigentibus haesit,  
688 forte gravem magno dum libret pondere clavam  
689 in Phalarim et capitis tegmen contundit aenum ;  
690 non secus ac glaciem concretam in vallibus imis  
691 aut Appennini, aut nubiferae Pyrenes,  
692 comminuit scopulus summo de vertice lapsus.  
693 Ergo ille accepto postquam de vulnere sensit,  
694 invalido duras cessisse e corpore vires :  
695 Vertiscum in Rhemis regnantem, inque arma cientem  
696 haud procul inde aciem vocat et sic fatur ad aurem.  
697 "Vertisce armipotens, cujus virtute repulsi  
698 saepe hostes liquere locum, turpique salutem  
699 quaesivere fuga ; si te tua facta, tuaeque  
700 delectant laudes et gloria parta laborum ;  
701 ipse meam tutare vicem, dum castra reviso,  
702 ut passim injectae medicari cuspidis ictum,  
703 quique omnes frangit vires, auferre dolorem."  
704 Haec ubi fatus abit : abeuntem ex agmine Bostar,  
705 Afrorum Bostar longe fortissimus. "Eia,  
706 eia agite, o socii, jam vicimus, ite frequentes :  
707 ite viri mecum et turbam ductore carentem  
708 disjicite, adverso caedentes agmina ferro ;  
709 excitet hic animos, vindex certissima, vestros  
710 virtus ; una omnes Libycis quae patribus aequet.  
711 Quando illi populos olim domuere superbos,  
712 perque ipsos Gallorum agros ad moenia Romae,  
713 vastata passim Italia, sua castra locarunt.  
714 Et nunc degeneres gentem patiemur inultam,  
715 proh dolor, in Libya praeclarum, Asiaque tropaeum  
716 ponere ? Et hac tantos moliri in parte triumphos ?  
717 Non ita ; magnanimi si me genuere parentes :  
718 inque hoc virtutem fuderunt pectus avitam."  
719 Dixerat, utque leo mediis in saltibus ingens  
720 prospicit armentum specula sublimis ab alta,  
721 spirat hians, caudaque sibi diverberat armos

722 et sese in praedam collecta suscitatur ira.  
723 Mox ruit et nitidum, spreto pastore, juvencum  
724 corripit immanis, totumque eviscerat uncis  
725 unguibus : humectans undanti sanguine fauces.  
726 Sternit humi Strophium, quem serva Tolumnia furtim  
727 eductum in silvis cervae mandaratur alendum.  
728 Isque, ubi firmatis crevit robustior aetas  
729 viribus et duro venatu assuetus aprorum,  
730 cunctorum coetus hominum vitabat et urbes  
731 et montes, vallesque imas et vasta colebat  
732 Hercyniae deserta, ferasque infestus agebat  
733 et cursu et canibus, nec non jaculisque, plagisque.  
734 Felix si vita coeptum constanter in illa  
735 servasset studium, latebrisque occultus opacis  
736 aurea magnorum vitasset limina regum.  
737 Non illum exciperet tellus Bithyna cadentem :  
738 non efflantem animam properans ulciscier Aruns,  
739 ipse quoque ejusdem cecidisset cupidus ictu  
740 et secum in casum fratres traxisset eundem  
741 Rhesumque, Eurypilumque, Evaemonidemque, Melemque  
742 Rheso oculus, femur Eurypilo trajecit ; at illos  
743 ense ambos rapuit praecordia ad intima adacto.  
744 Caedit Hylum, caedit Varium, Cloniumque, Pharimque.  
745 Corruit una ingens Dorylas acerque Coryscus ;  
746 et cum patre Dares, Titiusque Machaone natus.  
747 Herbarum vires unus qui noverat omnes ;  
748 posset ut aegrotis veniens afferre salutem :  
749 et jam jam exsanguis revocare ad lumina vitae.  
750 Ergo hic perfossum letali vulnere dum se  
751 aspicit emoriens, patrias reminiscitur artes  
752 incassum et demens queritur pia bella secutum.  
753 Has ferus atque alias caedes et tristia victor  
754 funera miscebat Bostar, Gallosque manipulos  
755 impulerat nudare fugae jam terga ruentes  
756 cum subito accurrens praestantibus optimis armis  
757 Commius ipse Atrebas, peditum sed ductor agebat  
758 Germanorum aciem, longis quae freta sarissis  
759 pugnam obit, ingentique locum virtute tuetur.  
760 "Non pudet, o miseri, toto discedere campo  
761 unius Abdaridae tantum formidine pulsos ?  
762 Quo fugitis trepidi ? Gressus quo tenditis (inquit)  
763 non hic ullae arces, non moenia fida, nec usquam  
764 castra dabunt vobis tutum munita receptum.  
765 Aut hic vincendum, claraque hic morte cadendum est  
766 aut pecudum in morem subeundum vincla, necemque."  
767 Commius his dictis fertur violentus in Afrum  
768 exsultantem animis et multa caede madentem,  
769 aggrediturque virum demisso in tempora ferro.  
770 Ille ictum parma venientem excepit, equumque  
771 impulit inde suum, Gallumque amplexus et haerens  
772 nititur e summa dejectum avellere sella.  
773 Ac dum se raptant manibus per mutua nexis,  
774 inque vicem contra summa nituntur opum vi ;  
775 in terram pariter ambo cecidere ruentes,  
776 atque arma ingentem strepitum collisa dederunt.  
777 Subsedit Bostar, rigido quem Commius ense



778 confodit, atque una vitam cum sanguine ademit.  
779 Verum a caede illum surgentem aggressus Amilcar,  
780 in tergum veniens impacta trajicit hasta.  
781 "Sic te Poenorum decus exstinxisse putasti  
782 Galle, ait, et nostris victorem excedere ab oris ?  
783 Accipe, et has demum partas nunc infer olympto  
784 exuvias, Christoque tuo gratare, quod ipsos  
785 Abdaridas victos, Asiaque e divite pulsos,  
786 infractumque jugum, libertatique reclusum  
787 esse aditum Solymae te bellatore, videbit."  
788 Impius has imo fundebat pectore voces  
789 in Sagarim, Dorylumque ruens : hastaque reducta  
790 illi dextrum inguen ; costas huic perforat imas.  
791 Inde Idam, Ligerimque subit, Pardumque, Lycumque.  
792 Et cum Priverno jungentem Hypsenora vires ;  
793 mox Bardum et Gaddum pugnae nodumque, moramque  
794 turbat agens, utrumque tuum Florentia civem.  
795 Ast animam Cynirae letalibus oblita succis  
796 fraxinus exhaustit validis contorta lacertis :  
797 Allobrogi Cynirae, dederat cui maximus heros  
798 Eustachides Morinos tranquilla in pace regendos.  
799 Ille potestatem dicendi juris adeptus  
800 ingentes cumularat opes, quibus auctus honores  
801 ipse sibi primos capta promiserat urbe.  
802 Nec mirum quando Vatum responsa petenti  
803 addiderant animos et spe, fastuque replerant  
804 usque adeo, ut tenues jam fastidiret amicos,  
805 solaque monstratae spectaret commoda sortis.  
806 Visum aliter Superum Regi, cui sidera parent.  
807 Tum vero tremefacta retro coepere piorum  
808 agmina versa fuga Persae dare terga sequaci.  
809 Quando etiam Tomyris portis eruperat urbis :  
810 et parte ex alia turmam Solymanus equestrem  
811 intulerat campo, Gallosque aggressus agebat  
812 palantes, turmasque equitum, peditumque, catervas,  
813 sicubi constiterant densae, fundebat, et una  
814 cum ducibus turbam morti dabat ; illius ergo  
815 obvius infestis manibus non se obtulit ullus,  
816 adsumptus leto poenas quin solverit acres.  
817 Et primum Amphio natus genitore Perutus  
818 occubuit, ferro penitus per viscera adacto.  
819 Mox Migdon praestans forma et juvenilibus annis,  
820 levia cui nondum lanugo infecerat ora,  
821 et galea insignis crinem, frontemque tegebat,  
822 concidit in renes, acta per terga securi,  
823 et matri miserae, quae natum in bella secuta est,  
824 ut pia longinquas Solymanum inviseret oras ;  
825 solveret et sancto solemnibus vota sepulcro ;  
826 exhalans animam lacrimas, luctumque reliquit.  
827 Nec stragem Tomyris diversa in parte minorem  
828 edebat, jaculis et parma insignis Amazon.  
829 Illa simul geminos Halium, Crotonaque fratres  
830 fudit humi, mortique Hebesum, Lamyrumque, Phalumque,  
831 ausa dedit, pressitque artus atque arma Dioclis :  
832 forte ut erat prolapsus equo, telumque trementi  
833 infixit jugulo, manibus dum prendit utrisque

834 bellatoris equi, gladioque attentat habenas  
 835 undantes, parat et femori dare vulnus aperto.  
 836 Ergo illum sese quaerentem attollere, ferro  
 837 caedit : et in media morientem linquit arena.  
 838 "Quamque optasti, inquit, sedem cape ; nec tibi fortes  
 839 Abdaridae invideant : tantum quod Galle sepulchrum  
 840 nactus, ad Ascaniam cecidisti invicte paludem.  
 841 Atque ubi subjectos populos in jura vocares,  
 842 effuso tandem peperisti sanguine regnum."  
 843 Sic effata palam victrix exsultat Amazon  
 844 atque illuc, ubi conferto videt agmine pugnam  
 845 urget equum, saevitque gravi nunc illa securi  
 846 comminus : infestis nunc eminus usa sagittis.  
 847 Ac, velut Hyrcanis in saltibus aspera tigris  
 848 quam juvenes densa circumvenere corona  
 849 insilit in medios : illumque eviscerat uncis  
 850 unguibus : huic rigidis infrangit dentibus artus.  
 851 Sic furit in pedites equitesque animosa virago.  
 852 Ergo omnes turmae, fulgentesque aere catervae  
 853 turbatae, hinc illinc in morem pulveris atri,  
 854 quem Notus, aut veniens sublimi a vertice Caurus  
 855 prae se agit et nigra late premit aera nube  
 856 praecipites, quocumque ingens metus ingruit : ibant  
 857 atque omnes decorisque sui, patriaeque salutis  
 858 obliti, jam terga dabant palantia Medis.  
 859 Nec pudor instructo retinebat in agmine quemquem.  
 860 Sed mixtus clamorque virum, clangorque tubarum  
 861 implebat summos sublatus ad aethera montes.  
 862 Tempore quo primum victor Solymanus in urbem  
 863 Nicaeam ingressus, vixisset moenia firmi  
 864 omnia praesidiis et opes stabilisset avitas  
 865 ni spes et praeceps alio sententia mentem  
 866 flecteret, ac victos illo certamine Gallos  
 867 sese avibus praedam cunctos canibusque daturum  
 868 pulsurumque omni Syriaque, Asiaque putasset.  
 869 Atque haec ipsa animo demens dum volvit et acres  
 870 gloria bellandi stimulos sub pectore vertit,  
 871 nuntius acceptae cladis pervenit ad aures  
 872 heroum, atque omnes castris excivit apertis.

## LIBER OCTAVUS

S\_8 v.1 Convenere simul Boemundus et inclytus armis  
 2 Tancredus, cunctosque inter qui maximus ibat  
 3 imperio dux Leucorum Goffredus et ambo  
 4 Roberti : Rholone unus patre natus, et alter  
 5 filius Iceni proles generosa Britanni :  
 6 Valteriusque Senon Regi fidissimus ipsi  
 7 armiger, et Vidus Morinis in finibus ortus :

8 Arpinusque etiam Biturix et casside Medix  
9 tectus et impubis comitem sese addidit ollis  
10 egregius forma atque aetate Ursanius ; idem  
11 quos famae generosus amor, laudumque cupido  
12 horrentem in pugnam et certamina Martis agebat.  
13 "Nunc, o castorum fautrix sanctissima vatium,  
14 urbis honos Phariae, quae labe carentibus omni  
15 addita Virginibus, montis sublime Sinaei  
16 culmen habes : propiorque Deo testaris amorem  
17 ipsa tuum et precibus praesens, votisque piorum  
18 semper ades : siquando alias facilisque, volensque  
19 favisti, atque tuo complesti numine mentem  
20 diva meam : nunc caelestes mihi suffice vires  
21 et toto insuetum depelle e pectore frigus.  
22 Non ego quot ferro strages, quot funera campis  
23 ediderat, quem quisque manu sub Tartara Persam  
24 miserit et caesum Stygio damnarit Averno,  
25 enumerare queam, non, si mihi pectore ab imo  
26 erumpant centum, ceu vasta tonitrua, voces."  
27 Ibat in adversos animis praestantibus hostes  
28 heroum stipata cohors : grex sicut aprorum  
29 una omnis ruit in saevos ursosque, luposque  
30 undique : cum medio conclusos agmine natos  
31 tutatur, plagasque hosti, letumque minatur.  
32 Ilicet exorsus stridor defertur ad auras  
33 et strepitu valles, strepitu nemora alta resultant.  
34 Illi abeunt : trepidoque petunt loca devia cursu.  
35 Sic Itali, Gallique duces, acresque Britanni  
36 invasere simul sparsos toto aequore Turcas.  
37 Atque hinc, atque illinc magno clamore ruentem  
38 compressere fugam. "Quo vos ? Quo pergitis, aiunt,  
39 state viri, pugnate viri, defendite vestrum  
40 et retinete locum ; et manibus considite, quarum  
41 in sola virtute sita est victoria, et ingens  
42 gloria, quae vestrum sustollat ad aethera nomen :  
43 cunctorumque animos lucentibus inferat astris.  
44 Turpis enim quaesita salus pedibusque, fugaque."  
45 His dictis commotae acies : abjectus et omnis  
46 corde timor : rursus vertere minacia Persis  
47 tela, vel antiqua letum pro laude pacisci,  
48 atque una decus amissum reparare volentes.  
49 Ergo omnes uno ore fremunt : vox omnibus una est.  
50 Vult Deus hoc fieri bellum ; jubet arma moveri  
51 hac Deus et nobis vires ipse addit in hostem.  
52 Talibus inter se Gallorum, Italumque manipuli  
53 hortati, clarae renovant certamina pugnae.  
54 Concurrunt acies, peditem pedes obvius urget  
55 atque equitem congressus eques, clypeiue resultant  
56 impacti clypeis, hastaque hastilibus, ensesque  
57 ensibus, et sparsa collucent fragmina arena.  
58 Quin et vincentum clamor, gemitusque cadentum,  
59 armaque, corporaque et miseranda in caede virorum  
60 semianimes volvuntur equi ; tremit obruta tellus,  
61 sanguineque effuso passim fluit. Hos metus atque hos  
62 terror atrox, rabiesque feri soror impia belli  
63 instigat, penitusque animis discordibus effert.

64 Gisgonem ante alios resupinum in pulvere Medix  
65 dejicit et clava galeam perfringit aenam.  
66 At Brocchum Imbrasiden Ursanius, utraque postquam  
67 per cava mucronem veniens transmisit acutum  
68 tempora. Pirum autem Biturix cum saevus adisset,  
69 pectore perfosso Lethen detrusit ad amnem.  
70 Ille Atlantiacas urbes, populosque regebat  
71 imperio, et Mauros suerat frenare rebelles :  
72 hic autem claro Graiorum a sanguine natus  
73 exuerat Christi cultum, seque ipse ferebat  
74 ritibus addictum, docuit quos impius olim  
75 Abdarides, populis cum lege suasit iniquas.  
76 Ergo inter Persas uxorem nactus, opesque  
77 ingentes, Tigrim dives regnabat ad amnem.  
78 At Pirus, cujus molles regalia Medi  
79 jussa sequebantur, magno inflammatus amore  
80 virginis Hermillae, turmas in bella trahebat  
81 bellatorum equitum et campo exsultabat aperto :  
82 virginis Hermillae, quae formae anteibat honore  
83 quascumque Ecbatanis peperit generosa Charambis :  
84 fecerat et pulchra Solymanum prole parentem.  
85 Ille autem tantas spirans e pectore flammam  
86 dum moritur, rigidumque imis miser accipit ensem  
87 visceribus fugientem animam cum voce profundit :  
88 "Et questum ingeminans, Hermillae et amabile nomen,  
89 te quoque, dilectae qui me nunc eripis, inquit,  
90 Hermillae, juvenem fatum exitiale moratur,  
91 dum conaris opem pereunti ferre sodali."  
92 At parte ex alia Boemundus Amilcaris agmen  
93 disjicit et totum invadens funditque, fugatque ;  
94 non secus atque gregem cervorum aggressus inermem  
95 Martius in silvis agitatur lupus, improba noctu  
96 quem latebris exire fames in aperta coegit.  
97 Atque acie in prima versantem obtruncat in Iarbam,  
98 Bardanemque illi comitem simul addit et ensi  
99 devovet Androclidem, Syriis qui natus in oris  
100 incoluit ripam per saxa fluentis Orontis.  
101 Felix qui patriae misere pereuntibus urbis  
102 moenibus abfuerit : neque tanta caede suorum  
103 nare pavimenta et cunctorum strata viarum  
104 viderit et passim saevire incendia tectis.  
105 Hinc caput Ascalapho gladio metit, inque Theonem  
106 fertur et a medio dorso quae pergat ad ipsas  
107 cervices, vena abscissa, detruncat, humique  
108 dejicit : ille cadens terram petit ore cruento.  
109 Nec minus interea turmas Goffredus equestres  
110 reppulerat, perque obstantes patefecerat hostes  
111 ense viam et campum late contexerat omnem  
112 corporibus caesis, qua se cumque ille tulisset.  
113 Dumque adeo passim strages et funera miscet  
114 turbidus, inque duces saevit violentus et unum  
115 quemque rapit rem praeclara virtute gerentem  
116 cernit Amuratem : pater hunc Solymanus amabat  
117 praecipue, reliquis quamvis aetate minorem,  
118 Thracia quos illi conjunx eduxerat Euno.  
119 Cernit et insignem clypeum, galeamque comantem,

120 et cocco ardenti juvenem radiare, simulque  
121 undique primorum circum stipante corona  
122 exsultare inter Gallorum, Italumque maniplos,  
123 sternereque instructas ingenti caede cohortes :  
124 nec mora. In adversum, quantum pote, percitus ira  
125 urget equum saevisque fodit calcaribus armos.  
126 Et dubitabat enim, juvenem si tardus adisset,  
127 ne qui praeriperent casus et inultus abiret.  
128 Utque leo, cum forte cavo digressus ab alto  
129 prospexit nitidum juvenili aetate juvencum,  
130 pascentem nemore in medio et viridantibus herbis,  
131 duraque lunato ferientem robora cornu,  
132 advolat et dorso insiliens trahit unguibus uncis  
133 viscera ; nec voces pastorum, aut tela per auras  
134 jacta timet, cessere canes, timidique magistri  
135 illicet impasto praedam liquere vorandam.  
136 Sic illum mortemque piis et saeva minantem  
137 vulnera, Gallorum Princeps invasit et alte  
138 extulit insurgens dextram, mediasque per oras  
139 ingentis clypei ferrum Goffredus adegit :  
140 abscidit ac subito totam quo vulnere laevam,  
141 semianimesque simul digitos, illi usque micantes  
142 retractam parmam et ferrati roboris ansas.  
143 Ast ictum ingeminans, Persae subeuntis ab alto  
144 dextram humero penitus ferro decidit acuto.  
145 Aufugiunt tunc una omnes, quibus una tegendi  
146 cura fuit lateris frustra commissa labantem,  
147 dum refertur equo et versantem in morte relinquunt.  
148 Ceu cum forte leo teneros deprendit alumnos  
149 ubera sugentes cervae, tectumque cubile  
150 servantes, miseros infregit dentibus artus :  
151 exhaustitque animum calido cum sanguine, quamquam  
152 mater abest propius : taetro tamen acta timore  
153 nullum illa auxilium coram pereuntibus affert.  
154 Verum inter quercus fugiens, fagosque comantes,  
155 abdit se in nemorum densas tremefacta latebras.  
156 Nec tamen incolumes tanto e certamine turpem  
157 corripuere fugam comites : sed pone secutus  
158 huic ense per dorsum adigit, stomachumque, jecurque  
159 perfodit : averso patet ingens pectore hiatus,  
160 vulnificusque calybs per costas exit in auras,  
161 dividit illi humeros : alii caput amputat et se  
162 conjicit huc illuc atque, ut vis atra corusci  
163 fulminis et saeva rapiantis cuncta procellae,  
164 quae nemus umbriferum saepe ab radicibus imis  
165 sternit humi, secumque rapit tecta alta, domosque  
166 non aliter, quacumque viam secat inclytus heros,  
167 injecto fuga hostiles terrore phalanges,  
168 et cunctis infert nullo discrimine letum.  
169 Caede tamen tanta nusquam deterritus hostis,  
170 instauratque aciem, turmasque opponit et urget :  
171 hortaturque suos, verbisque instigat acerbis  
172 Turcarum princeps et dux Solymanus. "Equestres  
173 huc properate viri, vestrisque repellite victos  
174 viribus, excelsus quibus est objectus Olympus,  
175 hic lacus Ascanius, vastumque Propontidis aequor ;

176 intentusque oculis Thracum regnator in omnem  
177 fortunae adversae casum, fuga nequa patescat.  
178 Audete. Hanc vobis praedam Deus ipse paravit,  
179 si modo vos illos animis praestare potestis,  
180 quos ausi paulo ante mihi promittere, pugnae  
181 unanimes duce me primum certamen inistis."  
182 Sic fatus multis madefactam caedibus harpem  
183 stringit et instructo subeuntes ordine Belgas,  
184 quos Cimbri in pugnam soboles Rolonis agebat.  
185 Cujus ab incursu magna virtute repulsus,  
186 vulnereque accepto, qua cassis aenea collum  
187 ima tegit, pugna sese subtraxit ab acri ;  
188 inque extremum agmen, collesque recessit in altos.  
189 Tum vero campum Persae liquere patentem  
190 praecipites, certamque fuga reperere salutem.  
191 Multi etiam tergo Gallis instantibus ultro  
192 dedebant, turpique jugo, tristisque premendos  
193 servitio sese ; sed nemo ex agmine tanto,  
194 quamquam humilis, quamquam supplex, servatus ab ullo est.  
195 Postquam igitur disjecti equites, fusique manipuli  
196 Persarum, campo penitus cessere patenti,  
197 heroumque adeo voces, sonitusque tubarum  
198 imposuere modum pugnaeque et caedibus atris,  
199 victores redeunt munita in castra Latini  
200 sub noctem et vires recreant, vinoque, ciboque  
201 et sese laeti excipiunt ac vulnera curant.  
202 Ast alii perfundunt (alto) corpora somno  
203 et partim observant vigiles aditusque, viasque  
204 excubiae, fidisque datur sua tessera castris.  
205 Interea toto depellit sidera caelo  
206 Aurora, in roseis fulgens exorta quadrigis :  
207 cum dux, imposita est uni cui cura piorum,  
208 mollibus e stratis opera ad Mavortia surgit  
209 impiger et magnas hominum, divumque parenti  
210 laetus agit grates : tacita mox voce precatur.  
211 "Summe pater coeptis oculos advertite benignos  
212 et laudem, nomenque tuum tuearis et unum  
213 illud agas, quod semper agi, fierique necesse est ;  
214 quo tua per cunctas vulgetur gloria gentes.  
215 Et mihi post duros, superant, quicumque, labores  
216 decurrendi etiam, pro libertate tuorum,  
217 da pacem aeternam, da caeli invisere sedes  
218 et quamquam indignum penitus, qui praemia vitae  
219 tanta feram, tantos exspectem abjectus honores,  
220 quae tamen est in nos placidae clementia mentis,  
221 respice me miserans et mentibus adde beatis."  
222 Haec humili dux Leucorum cum corde volutans  
223 lorica induitur, laterique accommodat ensem.  
224 Quem quondam secum in pugnas et proelia magnus  
225 imperii assertor Carolus, gestare solebat :  
226 ingentem, cui ferri acies non ulla resistat.  
227 Mox prae se vultusque ferens animoque recentem  
228 laetitiam, egreditur, Gallosque, Italosque salutatur  
229 vertice nudato, qui limina ad ipsa frequentes  
230 constiterant tecti angusti, paulumque moratus  
231 exit ad Addemarum (summi jus ille, vicemque

232 Pontificis cunctos inter de more gerebat)  
233 exit et ad sese gratatum occurrit eunti.  
234 Ergo ubi convenere simul faustumque precati  
235 ire diem : prior Addemarus sic ore locutus.  
236 "Goffrede, hesterna, cui tot contundere pugna  
237 et belli Deus et pacis dedit arbiter hostes ;  
238 nos illi in primis fas est persolvere grates,  
239 eventumque humiles coeptis orare secundum :  
240 hac siquidem paritura sibi videt omnia laudem.  
241 Mox sociis, dextra, quicumque armisque perempti  
242 Turcarum, exanimes summo sua vulnera caelo  
243 testati ostendunt, quamprimum incumbere humanis :  
244 et cunctis prece perpetuam deposcere pacem.  
245 Corpora quo terrae glebis cooperta tegantur :  
246 aethereas donec rursus revocentur ad auras :  
247 aeternum inter se vitam ductura beatam.  
248 Intereaue animae stellanti in sede quiescant."  
249 His dictis jussere pios in aperta vocari  
250 templa sacerdotes. Omnique ex ordine primos.  
251 Atque illi aeterno postquam cecinere Tonanti  
252 consuetas laudes, gratesque egere, diei  
253 postera lux, cunctos luctu, lacrimisque madentes  
254 caesorum vidit passim pia corpora terra  
255 condere et infessis tumulos increscere campis  
256 et maestas ferri exsequias : queis rite solutis  
257 Goffredus (namque illum omnis stipata tegebat  
258 turba ducum) maestos sic est affatus amicos :  
259 "Si mihi vestra foret socii male cognita virtus,  
260 et pietas spectata parum, quae sola coegit  
261 relinquere vos patriae fines, natosque, patresque,  
262 sedibus aethereis terram ut mutare liceret :  
263 conarer solari animos maerore labantes.  
264 Quando igitur nihil est, mentes ut ad ardua vestras  
265 hortet et accensis quorumque in pectore flammis,  
266 ad laudem stimulos per se currentibus addam :  
267 a nobis hic stare Deum, qui vindice dextra  
268 induxit sacri tam laeta exordia belli,  
269 credite : victores cum prima excedere pugna  
270 contigit et magnas Turcarum infringere turmas,  
271 felices peperere suo qui sanguine nobis  
272 spem tantam atque aditum ad Solyms stravere patentem :  
273 quod reliquum est, vos, o socii, vos protinus unum  
274 admoneo, curare pii ne pectore labes  
275 insideant vestro et deturpent crimina mentes.  
276 Unde hominum divumque pater compulsus in iram  
277 avertatque oculos et poenas irroget aequas.  
278 Nam quo res nobis primum feliciter acta est :  
279 illius hoc magis insidiae, fraudesque cavendae :  
280 qui nobis nigras diri Phlegethontis ad undas  
281 deceptos misere secum devolvere quaerit.  
282 Quamquam etenim dextris fidendum et fortibus ausis,  
283 adscribenda Deo tamen est victoria, cujus  
284 freti ope barbaricum Turcarum evertere regnum  
285 conamur, Solymaeque urbis juga solve genti."  
286 His dictis, jussique omnes assidere muris  
287 urbis et ad pugnam corpusque animumque parare,

288 crastinus aetherios cum sol recluserit ortus.  
289 At Rex Persarum postquam virtute repulsus  
290 Christicolum, sese in montes, latebrasque recepit  
291 saucius, atque animo nimium jam fractus et aeger  
292 constitit ; innumeris ceu cum pater ignibus aether  
293 fulgurat et magnum miseris mortalibus imbrem,  
294 obruere et nivibus terram, aut contundere vites  
295 grandine, vel belli tristes recludere portas  
296 apparat et caeli saevas denuntiat iras.  
297 Sic ille ingeminans suspiria ducit ab imo  
298 pectore nec requiem tristi dat cura dolori.  
299 Quem, quotiens oculos amissae obverterat urbi,  
300 tristis in immensum totiens augebat et auras  
301 se miserum inclamans, questu rumpebat inani.  
302 At quotiens nostrorum acies insidere campo  
303 nec temere huc illuc discedere ab ordine quemquam,  
304 ipsaque per noctem nullis splendescere castra  
305 ignibus et nullo strepitu commota cieri  
306 spectarat : molem belli miratus et usum  
307 armorum insuetum, genibusque et corde tremebat.  
308 Ergo animum in partes varias dum dividit et se  
309 versat, ut obsessae succurrat providus urbi.  
310 Alloquitur comites (comitum quae turba Tyranni  
311 adstiterat lateri) : "Qua spe nunc fugimus, inquit,  
312 hostibus et nostris populanda reliquimus urbis  
313 moenia ? Quid superest, regno quin exuar omni ?  
314 Haec prostrata solo si (forsan) claustra refringent  
315 imperii et Syriae fines, aditusque recludent ?  
316 Quod si quem virtus Persarum exciret et urbem  
317 ingressus Gallos compesceret exsultantes,  
318 Bithynaque procul prohiberet ab arce repulsos,  
319 sperarem lectis iterum, quae multa supersunt,  
320 auxiliis, opibusque meis ferroque, fameque  
321 absumpturum omnes et funera saeva daturum."  
322 Obtulit hic nemo sese tam magna petenti.  
323 Sed victi tacuere metu, spes irrita namque  
324 defendendae urbis de pectore cesserat ollis.  
325 Sola inter Persas Tomyris stetit ausa, suam quae  
326 praecipiti a cursu generosa represserat alam.  
327 "Ipsa ego me, quaecumque (inquit) fortuna sequatur,  
328 temptaturam aditum numquam, Rex magne, negabo  
329 ocllusum excubiis circum, vigilumque corona.  
330 Tu vero, quae mox instant facienda, videto."  
331 Tum Rex Persarum lacrimis, sic fatur, obortis.  
332 "O nostri Tomyris columenque et gloria regni,  
333 heroinarum soboles certissima matrum,  
334 quas ego, pro virtute ista, pro talibus ausis,  
335 gratus agam grates ? Non, si me maximus orbis  
336 terrarum accipiat dominum, regemque salutet  
337 ipse suum, sperem donis aequare laborem  
338 posse tuum, sed quod superest gratissimus illud  
339 praestabo, ut tantae memorem me praedicet aetas  
340 virtutis, quaecumque instat, quaecumque futura est."  
341 Haec ille et jam se Hesperii sol merserat undis :  
342 et tenebris terras nox prima involverat atris,  
343 Gallique, Ausonisque omnes a caede reversi



344 servabant aditus, ne quis speculator in urbem  
345 ingressus, Turcas exhortaretur, ut arma  
346 unanimes caperent, spemque in virtute locarent.  
347 Ergo illa, ut facimus cunctis memorabile saeculis  
348 ederet : ac famam, nomenque attoleret astris,  
349 ipsa suas comites ad se vocat. Harpalycemque,  
350 Nanidaque et Raeo et celerem praestantibus ausis  
351 Pisidicem et cursu solitas praevertere ventos,  
352 Anthippemque, et Larissam, pulchramque Epicastem,  
353 atque alias, quas illa omnes experta fideles  
354 noverat in primis bellorum ad furta paratas  
355 atque ubi convenisse videt : sic ore locuta est.  
356 "Cernitis o sociae, qua res perculsa ruina  
357 nostra labet : quantis hostes legionibus urbem  
358 Nicaeam obsideant : latis quot funera campis  
359 nostrorum ediderint. Superest vix unus et alter  
360 e ducibus, quorum dubiis spectata periculis  
361 consuerat virtus, ceu frondes concita venti  
362 vis prosternit humi, densas aperire phalanges,  
363 aereque fulgentes equitum diffringere turmas.  
364 Sic placitum fati et nusquam nostra tuenti  
365 Abdaridae : dum saxa colit scopulosa Mochurae  
366 et sese Arabiis felix oblectat arenis.  
367 Stat tamen adversae fortunae opponere pectus :  
368 et niti quacumque via, ne funditus omnes  
369 has evertat opes, Solymanumque improba regno  
370 exuat et patriis Turcas, quicumque supersunt,  
371 finibus extorres alieno jactet in orbe.  
372 Quando igitur turmisque suis et viribus hostem  
373 acriter instantem nobis, letumque ferentem  
374 sustentare minus valuit via certa salutis  
375 una haec se nobis nunc tantum ostendit et offert  
376 Nicaeam si nostram animis et fortibus ausis,  
377 quam circum oppugnant, tutari audebimus urbem,  
378 inque fide retinere, moramque afferre Latinis ;  
379 quo minus ulterius tendant, Solymaque potiti  
380 arcibus in summis victricibus signa reponant.  
381 Atque hoc qua fieri possit ratione, docebo.  
382 Est via per medios calles occulta, maligno  
383 anfractu, Ascaniam quae ducit adusque paludem :  
384 nulli nota nimis peditum, equitum : sed inter  
385 horrentes dumos quamvis salebrosa, latensque  
386 et mihi venandi longa assuetudine et usu,  
387 cum saepe in silvas ibam incommitata nigrantes,  
388 trita satis, seu clara dies detexerat orbem,  
389 seu nox ingenti terras obduxerat umbra.  
390 Hac ego, si Gallis incustodita patebit  
391 pars ea, qua tacitis tectus datur exitus, urbem  
392 protinus ingrediar : sin autem obsessa negabit  
393 introitum : Ascaniam demittere corpus in undam  
394 haud pigeat, nandoque urbis prope moenia ferri.  
395 Quo se nostrorum suerunt inferre carinae  
396 incurvae et populo dites exponere merces.  
397 Hic si me incolumen rerum sors prospera sistat,  
398 nil vereor, quin acceptae pars maxima cladis  
399 Christicolum genti penitus cadat irrita et omnem

400 vincendi spem praecidat : Syriaque relicta  
401 Europam cogat, patriosque revisere fines.  
402 Namque urbe ex ipsa pulsus, quibus unus Iesus  
403 est Deus et nostri per vim dominantur iniquis,  
404 nullae usquam insidiae nobis, vis nulla timenda est  
405 praeterea, exitium rebus quae triste minatur."  
406 His dictis. Visa est oculis effundere flammam  
407 et simul instantis tenebras depellere noctis.  
408 Obstupuere animis comites atque aequoris instar,  
409 cum fremit, exigua si summum impellitur aura,  
410 horruit ipsa cohors, reliquisque silentibus una  
411 Erippe, ante alias Tomyri fidissima : "Tantum  
412 quae facinus non laudet ? ait ; quae nam tibi sese  
413 deneget egregii sociam male grata laboris ?  
414 Ipsa ego per latebras nemorum, per aperta viarum  
415 strata sequar : non me tecum remoretur euntem  
416 ipsa palus ; quamvis pelagi se fluctibus aequet  
417 et penitus Zephris, Eurisque agitata dehiscat."  
418 Vix has ediderat fidenti ex ore loquelas  
419 Erippe et reliquae simul assensere sorores,  
420 parendi studiosa cohors, devotaque morti  
421 pectora, cui comitem se gloria protinus addit ;  
422 gloria magnanimis ingens hortamen et acer  
423 fortiter audendi stimulus ; concordibus inde  
424 carpere iter coepere animis, tectaeque per umbram  
425 obscurae noctis, perque avia collis iniqui  
426 ad ripam venere lacus prope moenia, quantum  
427 cressa levis jactu metiri suevit arundo.  
428 "Hac (inquit Tomyris) quoniam praeclusus ab omni  
429 parte alia est aditus, nobis fallantur oportet  
430 perpetuae vigilum excubiae, quae moenia circum  
431 obsedere urbem et densa cinxere corona.  
432 Audendum est res eversas audacia saepe  
433 sublevat, ignavos odit fortuna, Deusque.  
434 Nec, nisi qui patitur vinci se, vincitur ullus.  
435 Vos mecum, o sociae, Tanaimque, Istrumque tumentem,  
436 atque Borysthenias undas, amnemque Diaspem,  
437 et vada Maeotis nando tranastis et hosti  
438 ante exspectatum castra opposuistis, agrosque,  
439 et sata victrices vastatis et oppida ferro.  
440 Non alias animis, quam nunc, magis usus avitis  
441 non manibus rapidis nandi non arte magistra :  
442 in Scythia primis cui jam assuevistis ab annis  
443 horrida cum glacies ventis astricta, nivesque  
444 Riphaeae et gelidis loca circumfusa pruinis,  
445 quae reliquis afferre moram sivevere, metumque,  
446 vos unas ad Martis opus, bellique labores  
447 discendos jam tum velut opportuna vocabant.  
448 Eia agite et vosmet mecum demittite in undas."  
449 His dictis praeceps ab equo defluxit Amazon,  
450 Armeniamque humeris tigrim dejecit ab altis  
451 et pulchros membrorum artus, pulchrosque lacertos  
452 exuit et nudo consistit corpore in acta.  
453 Tum pharetram tergo, peltamque accomodat, inque  
454 uno eodemque simul conjungit fasce securim  
455 ancipitem et laeva sinuosum corripit arcum

456 ingrediensque omnem projecti litoris oram  
457 exsuperat pedibus ; donec se se aequore mersam  
458 nutricum tenus esse videt, tum namque profundus  
459 incipit hinc atque hinc plantis impellere fluctus,  
460 exstet ut totius ingentis pectoris auctus  
461 cetera pellucens summa lacus integat unda.  
462 Illicet illam etiam certatim imitata sororum  
463 tota cohors, claram nando secat acta paludem.  
464 Atque haec nunc sequitur, totum nunc praeterit agmen  
465 et dominae gaudet sese ostentare natanti.  
466 Ut cum semifera verrentes aequora cauda  
467 pistrices, vada salsa secant, epulasque requirunt.  
468 Utque etiam tranare ferunt maris alta reposti  
469 cannibales, pedibusque atros evincere fluctus  
470 et nantes calamis miseros configere nautas.  
471 Ac jam jam chorus omnis eo pervenerat ; unde  
472 excubiis Gallos positos obsidere jussit  
473 moenia Goffredus, quos tunc innubilus aether  
474 dispergens terras sublustri nocte patentes  
475 prodidit et media tacitas detexit arena  
476 bellatricum oculis ; ergo stetit agmen et arcu  
477 ante alias omnes Tomyris conversa sagittam  
478 imposuit, jecitque simul : fugit illa per umbram  
479 noctis et in jugulum vigilis delata, reclusit  
480 faucium iter ; qua tristem animam cum sanguine fudit ;  
481 labitur infelix, dum vocem mittere tentat,  
482 mutus humi atque atram trepidis contundit arenam  
483 calcibus et litus moriens petit ore cruento  
484 sors eadem alterius, cujus procul inde tuentis  
485 forte locum, subito medium per pectus adacta  
486 transfixit cordis latebras letalis arundo.  
487 Mox alium Lampedo, alium Marthesia virgo  
488 dejecit et ripam viduant custodibus omnem.  
489 Ut videre igitur nullum superesse, profundo  
490 qui somno exciret reliquos et ad arma vocaret,  
491 quo fors laeta vocat : "Polymela quid impedit, inquit,  
492 quo minus egressae desertam in litoris oram,  
493 illicet ad caedem cunctae properemus inultam ?  
494 Et nostras multo saturemus sanguine dextras  
495 securi dum quique jacent in gramine, dumque  
496 corpora ab externo recreant defessa labore."  
497 His dictis ; alacres ripae adnavere relicto  
498 gurgite et ut rabidae suerunt ad ovilia tigres  
499 pergere, siquando rabies agit improba edendi,  
500 protinus invadunt lati tentoria campi,  
501 et primum impacta fronti Regina securi  
502 Axylum perimit, Druidum qui sanguine cretus  
503 in Remis, inter cives se primus agebat  
504 dives inexhaustis argenti, auri que metallis.  
505 Quique opibus multos aleret, bellique, domique  
506 splendidus et numquam non hospes amabilis ulli ;  
507 sive is ab externis ad se diverteret oris,  
508 sive ille e media conviva accederet urbe  
509 ignotus, nutusque : omnes nam laetus eodem  
510 et vultu accipere et dignari suerat honore.  
511 Quorum non ulli prostantem e pectore somnum

512 femineae miserum tum subtraxere bipenni,  
513 nec fratres non longe illinc juvere cubantes.  
514 Huic etenim laevam ferrum libravit in aurem,  
515 fundentemque animam media inter strata reliquit ;  
516 illi autem assurgens resupinum in guttur adegit  
517 immitem chalybem, atque humeris exemit utrisque  
518 uno eodemque ictu caesum caput, inde Lycarbam,  
519 atque Hypanim, atque Lycum mensae, thalamique ministros  
520 et fidum in primis custodem ad limina Obellum  
521 interimit : neque parcit Hylae, quem pulchra Telimno  
522 Hercyniis furto conceptum in vallibus imis  
523 progenuit, formae notum praestantis honore  
524 et patri in bellum Coto commisit eunti.  
525 Coto Tectofagum regi, quo justior alter  
526 nusquam erat in Gallis, nec qui, si forte pedestres  
527 instarent pugnae violentior iret in hostem.  
528 Verum huic non virtus belli testata, domique  
529 profuit, aut illi pulchrum decus oris honesti.  
530 Quando ambos, eademque manus, visque aspera ferri  
531 perculit atque eadem somno nox una perenni  
532 obruit et caedem miscens natique, patrisque  
533 hostilem amborum tepefecit sanguine terram,  
534 addidit his alium, atque alium metuenda virago ;  
535 Draesumque, Astyalumque, Antebrogiumque novarum  
536 rixarum auctorem, coeptumque ad nobile fama  
537 accitum Androgeum, (ac) Rheni sceptrum bicornis  
538 detulerant Batavi et certa se lege regendos  
539 Vangiones dederant, dextrisque, animisque feroces.  
540 Ac tunc unanimi Gallos in bella secuti  
541 assensu, communem hostem depellere Turcam  
542 finibus (e) Syriae, Solymaque ex urbe volebant.  
543 Fecissentque alacres : illa nisi Rege perempto  
544 nocte ducem sibi praeficerent, cui turbida fandi  
545 copia, cui male sana fides, ancepsque voluntas  
546 suasit ut in patriam sprete pietate redirent ;  
547 nec rediere tamen ; quando discordibus inter  
548 sese animis acti, partim morboque fameque.  
549 Et partim absumpti periere hostilibus armis.  
550 Nec minus in reliquos somno, vinoque sepultos  
551 femineae saevire manus Larissa Pharacem ;  
552 Antippe Lyrcum ; Rhobium Polymela, Lamumque  
553 Pisidice ; Lamyrum Celtine ; at Nanis Asylum  
554 sustulit ; Arcentem Rhaeo, Caeneumque Epicaste ;  
555 Harpalyce Piasum ; pectus Menaippa Phayllo  
556 recludit misero, justas qui conjugis iras  
557 ut fugeret, procul a patriis discesserat oris,  
558 abducens secum turpis mala gaudia lecti,  
559 oblitusque sui, caelestis et immemor aulae  
560 in gremio pulchrae laetus recubabat amicae.  
561 Infelix, tantam qui numquam e corpore labem  
562 eluere, atque animum stellis inferre parasset.  
563 Ergo ille, exanimis dum multo sanguine lectum  
564 commaculat, mollem manibus perquirat amicam.  
565 Illam autem somno excitam et clamare volentem  
566 occupat Erippe, faucesque edidit et : "Haud tu  
567 digna, ait, es nostrae caedant cui colla secures.

568 Sic morere, atque una bellis, castrisque relictis  
569 i comiti comes usque tuo ; quemque ipsa secuta es  
570 perque nives glaciesque atras, ne desere amantem."  
571 Vix haec ediderat secum, caedemque parabat  
572 inde aliam atque aliam, tacito cum murmure Nanis  
573 conversa in Tomyrim, "Satis est Regina, superque  
574 poenarum exhaustum : jam jam pars ultima noctis  
575 instat, ait, vigilesque alios vocat hora, locusque."  
576 His dictis avidas revocant a caede sorores.  
577 Et ripam repetunt, unde excessere, lacumque.  
578 Protinus ingressas portu Nicaea recepit,  
579 laetaque sublimis reclusit limina portae.  
580 Illae, ubi victrices urbem intravere patentem  
581 caesorum contis capita affixere virorum,  
582 quae post sublimi protenta e vertice muri  
583 inspiceret longe Gallorum exercitus omnis.  
584 Interea nox atra nigris invecta quadrigis  
585 Hesperium pelagi properans descendit in aequor.  
586 Et sol exorto vestivit lumine terras.  
587 Jamque duces Gallique omnes, fortesque Britanni,  
588 atque Itali excierant stratis e mollibus artus  
589 visuri stragem vicino in litore factam.  
590 Ascanias igitur tum ingens concursus ad undas  
591 et singultantes etiam tum sanguine truncos.  
592 Ingentem caedem, atque immania vulnera et ipsa  
593 mirantur Scythicis infracta securibus ossa.  
594 Mox etiam turrata oculis ad moenia versis  
595 una omnes capita arrectis miserantur in hastis,  
596 absumptosque dolent socios furtoque, doloque.  
597 Quorum aliquis : "Non tempus, ait, lugere, sed acres  
598 sumere de victis poenas et vertere ab imo  
599 moenia barbariae dirum testantia morem ;  
600 et scelus infandum proclivis ad impia gentis.  
601 Haec dum illi inter se, summis e moenibus hostis  
602 maerentes animos dictis irritat amaris,  
603 turpiaque in cunctos jactat convicia Gallos.  
604 Eia agite, o viles animae, quae nostra relictis  
605 finibus Europae regna appetiistis, opesque.  
606 Quis vos torpor habet ? Quid statis inertia terrae  
607 pondera ? Cur muris jam non succeditis ? Atque haec,  
608 haec si delectant oculos spectacula vestros  
609 aspiciate et posthac miseri sperate futurum,  
610 moenia ut exornent tales vallata coronae."  
611 Haec ubi sacrilega fudere opprobria lingua,  
612 tormento capita imponunt abscissa piorum,  
613 inque acies circumfusas (miserabile visu)  
614 ejaculantur, adhuc taetro manantia tabo.  
615 Tum vero ignescunt irae et dolor ossibus ardet  
616 Christicolum ; scalasque petunt, pugnamque lacesunt  
617 eminus, in muros jactantes tela, facesque.  
618 Atque utrimque cadunt multi ; cadit optimus inter  
619 Insubres clari soboles generosa Triulci  
620 Ixander, jaculum in turrim dum librat, et Ilum.  
621 Dejicit exanimem, nec toto umbone tuetur  
622 ipse sibi cautus laevum femur ; unde furenti  
623 trajectus cornu, letali concidit ictu.

624 Quin etiam Phrearus claro de sanguine natus  
625 hic, ubi Taurinus inter depressior unda  
626 Eridanus se caelo effert gratissimus amnis,  
627 concidit immiti percussus tempora glande,  
628 dum nostros revocat gladiisque, animisque furentes,  
629 conantesque manu frustra divellere murum.  
630 Ast alia de parte Darin, dum vulnera ab alta  
631 turris inaccessae parti subeuntibus infert,  
632 pondere saxorum ingenti, levibusque sagittis,  
633 scorpio in adversum veniens trajecit ; et arce  
634 praecipitem a summa dejecit ad ima, caputque  
635 ille cadens affixit humi, saxumque cerebro  
636 dispergens multo tepefecit sanguine terram.  
637 Quin etiam Alcimedon, cujus virtute, manumque  
638 stabat adhuc res Turcarum, Nicaeaeque sese  
639 clausa tuebatur, multis dum pectora verbis  
640 excitat Abdaridum et nostros procul usque repellit,  
641 transfixus jaculo vitamque, urbemque reliquit.  
642 Ac, nisi nox densis pugnas exorta tenebris  
643 divideret, scalae potuere ad moenia ferri  
644 illa ex parte suis jam defensoribus orba.  
645 Quamquam incredibili populum terrore labantem  
646 firmabat, pugnamque acrem integrare jubebat  
647 accurrens Tomyris. "Nec vos, ne terreat, inquit,  
648 o, totiens dubiis jam cognita pectora rebus,  
649 unius jactura animae ; nec stare putate  
650 regna una hac tantum nobis suffulta columna ;  
651 ut si fracta cadat, secum convulsa ruina  
652 cuncta trahat sic, ut nusquam spes ulla supersit."  
653 Talia vociferans ad propugnacula rursus  
654 murorum et turres populum se ferre coegit,  
655 excubiisque urbem et lecta statione tueri,  
656 dum septem ostentat caelo nox clara triones,  
657 et densae invitant bellorum ad furta tenebrae.  
658 At Graium dux Thatinnus, cui prospera rerum  
659 tantarum attulerant ingentem eventa dolorem,  
660 postera cum primum primis orientis ab oris  
661 orta dies animos generosa accenderet ira,  
662 et consueta Deo solvisset vota sacerdos,  
663 heroum coetu in medio sic farier inquit.  
664 "Dum circumsessam variis assultibus urbem  
665 urgemus, frustra aditus tentamus iniquos,  
666 o fratrum generosa cohors, cecidere perempti  
667 bellantum innumeri ; nec non procerumque, ducumque  
668 pectora multorum fortissima ; nec tamen ulla  
669 spes est sublimes nos posse ascendere muros  
670 audendo et clausis robusta repagula portis  
671 vellere et effractis evertere moenia claustris.  
672 Ergo ego, si veri quidquam mens augurat et me  
673 debellandi artem certi docuere parentes,  
674 invictique duces, hostem obsidione premendum  
675 censeo et a pugnae dubio certamine nostros  
676 arcendos ; dum plebem aliquid penuria cogat  
677 audere, atque urbem trepido miscere tumultu.  
678 Nec longum in medio tempus ; ni me mea fallit  
679 spes oblata animo : jam jam populumque, patresque

680 dira fames armis adiget se dedere vestris.  
681 Quando omnes a terra aditus absedimus ipsi,  
682 occiduaque a parte lacus, qua moenibus unda  
683 affluit et clausam fruges importat in urbem.  
684 Praeterea advenient instructae armisque, virisque,  
685 litora quae circum invadant opulenta, triremes,  
686 ostiaque Ascaniae claudant obsessa paludis,  
687 accitae tales, ceu vos monuistis ad usus."  
688 Haec postquam Graium simulata mente locutum  
689 sensere heroes, quo rex sibi Turca priores  
690 et res, et vires posset reparare morando,  
691 sic dux Goffredus contra est ingressus. "Amicum  
692 consilium, Thatine, tuum, quibus unica vitae  
693 parcendi cura est, stimulos et gloria nullos  
694 praemia ad aeternae subdit quaerenda salutis.  
695 Nos autem, quorum votis optatius ullum  
696 evenisse nequit votum, quam sanguine fuso  
697 ire ad conspectum divumque, hominumque parentis,  
698 jure omnes minus esse pii gratique putemur,  
699 ignavi sociis hic si sedeamus inultis,  
700 qui, promissa suo si tempore classis adesset,  
701 nunc etiam humanae fruerentur lumine vitae.  
702 Verum haec ille, oculis qui nostra haec aspicit aequis,  
703 viderit omnipotens fandi memor, atque nefandi.  
704 Ille unus tum praecipue, cum quis fore poenae  
705 se putat expertem, scelerum certissimus ultor."  
706 His dictis ; jubet armatos astare maniplos  
707 et secum pariter scalas afferre paratas,  
708 quemque suas ; tum missilibus, levibusque sagittis  
709 proturbare hostem et summo depellere muro.  
710 Illi alacres sese expediunt, pugnamque lacessunt  
711 eminus : et jaculis et glandibus aera complent.  
712 Contexta interea circum latera omnia dura  
713 e larice, injectos quae machina respuat ignes,  
714 tutaque contemnat saxorum pondera et ictus,  
715 arietat in muros et firmas objice portas.  
716 Partim etiam mole ingenti et testudine tecti  
717 fundamenta altae properant excindere turris  
718 atque aperire viam, cupidus qua miles in urbem  
719 irruat et summa pellat de sede tyrannos  
720 Abdaridas ; Christoque Deo reddantur honores,  
721 dira superstitione versis quos sustulit aris.  
722 Dumque oculos intenti omnes atque ora tenebant  
723 in turrim et muros, contorta falarica velat.  
724 Ac Tomyrim, celeres jacentem in castra sagittas  
725 multaque letali miscentem funera dextra,  
726 perculit, exhausitque illi cum sanguine vitam.  
727 Ingemuit virgo in subita collapsa ruina.  
728 Et secum unanime simul ingemuere sorores,  
729 Larissa, Harpalice, Nanis, Polymela, Epicaste,  
730 et dominae comes usque suae fidissima Rhaeo,  
731 Erippe ante omnes. Tomyrim namque illa cadentem  
732 cum procul aspiceret. "Tecum, o mihi semper amanda,  
733 quo te cumque ferēs, veniam, Regina necesse est.  
734 Nec mihi si pugnae fortuna pepercerit (inquit)  
735 victrici, aut victae ferrum hoc et dextera parcat.

736 Ast alia ex illis. Ut me sors prospera rerum  
 737 deserat, haud umquam virtus generosa relinquet."  
 738 Dixit, idemque omnes una cum voce probassent.  
 739 Ensibus incubuere suis in pectus adactis.  
 740 Fecerat interea turris collapsa ruinam  
 741 et Gallis, Italisque aditum patefecerat amplum.  
 742 Cum pius Eustachides populum miseratus inermem,  
 743 tendentemque manus ultro, veniamque petentem  
 744 supplicibus verbis, Italos, ii namque volebant  
 745 per medias turris, murorumque ire ruinas  
 746 in Turcas, seseque auro ditare reperto,  
 747 continuit, jussitque omnes in castra reverti,  
 748 pollicitis implens cunctorum ingentibus aures ;  
 749 Dum metuit, ne forte una cum gente rebelli  
 750 Christicolae in caedem misti rapiantur acerbam.  
 751 Ergo omnes abeunt retro, praedamque paratam  
 752 sedatis linquunt animis ; mox inclytus armis  
 753 Leucorum princeps regi, cui Graecia paret,  
 754 urbem compositis rebus concessit habendam.

## LIBER NONUS

S\_9 v.1 At rex Turcarum primo certamine victus,  
 2 quamquam urbem regni sedem totius et arcem  
 3 amisisse dolet, tristesque in pectore curas  
 4 concipit, auxiliis Persarum exutus amicis,  
 5 eversisque Asiae rebus, tamen usque dolorem  
 6 dissimulat vultu, secumque affatus euntes  
 7 hortatur, verbisque animos exsuscitatur acres  
 8 in bellum et rursus vires festinus, opesque  
 9 instaurare parat. "Quid enim casusque, diesque  
 10 non afferre potest sperantibus ? inquit, et ultro  
 11 quicumque adversis potuit succumbere rebus,  
 12 ille jacet merito fortuna oppressus iniqua :  
 13 nec regnare decet, nisi quem non deserit umquam  
 14 imperii virtus semper fidissima custos,  
 15 qua nos praeteritae sarcire incommoda pugnae,  
 16 acceptamque ignominiam depellere fas est.  
 17 Atque, hoc ne quemquam fallat, providimus ipsi,  
 18 nam, quaecumque urbes nostra ditione tenentur,  
 19 millia multa virum nemorosa ad Dyndima cogent,  
 20 quos Lycus et Sagaris, Peniusque, Hispanisque, Cratesque,  
 21 quos Hermus, quos Pactolus, quos amne Caicus  
 22 alluit undoso et viridanti gramine pascit.  
 23 Non deerit, qui saxa Cilix colit aspera, quique  
 24 flumina Corcyrii potat frigentia montis ;  
 25 docti omnes arcu celeres torquere sagittas.  
 26 Atque illos, quoniam tanti praenuntia casus  
 27 sedibus e patriis excivit fama propinquis



28 in Galatis posuisse ferunt jam castra, novemque  
29 vix iter a nobis absunt semota dierum."  
30 Sic ait et fidis circum stipatus amicis  
31 antetulit celeres latebrosam ad Gorgona gressus,  
32 vallem aptam insidiis, latrociniisque frequentem,  
33 quo parte ex omni numerus se contulit ingens  
34 bellatorum equitum, Persae qui jussa Tyranni  
35 unanimes faciant, victumque in sceptris reponant  
36 et tota ex Asia Gallos depellere tendant.  
37 Nec minus Eustachides, postquam sua praemia cuique  
38 detulit et magno laudum decoravit honore,  
39 quos virtute animi, manuumque excellere novit,  
40 edicit cunctis et equos et corpora curent  
41 et sese expediant, ut cum tuba martia signum  
42 prima dabit post exactos bis quinque dierum  
43 anfractus, propere coeptis ingentibus instent,  
44 atque animos aptent armis, ubi postulet usus  
45 et res ipsa loco sese ostendatque, vocetque :  
46 "In primis autem in templis casteque, pieque  
47 omnia sint operata Deo, mox ordine longo  
48 post actas grates hominum, divumque parenti,  
49 castra sacerdotes laudes de more canentes  
50 circumeant et mente pii, votisque precentur  
51 aeternas mentes caelesti in sede receptas,  
52 ut res respiciant Gallorum et coepta secudent.  
53 Nec mora conveniunt lecti juvenesque, senesque  
54 carmine qui grates dicant, divinaque longe  
55 facta ferant, ut mira volens effecerit olim  
56 Aegypto in media, monstrisque agitaverit urbes,  
57 ut populum nube intectum defenderit aestu  
58 noctis et in tenebris claro praeluxerit igni  
59 disciderit pelagus, liquidasque coegerit undas  
60 hinc atque hinc, veluti geminas consistere rupes  
61 atque illac siccis pedibus servarit euntes,  
62 arentemque manu scopulum sitientis eremi  
63 diffiderit, laticesque in morem eduxerit amnis  
64 undantis. Tu diruptis e nubibus escam  
65 caelestem in mediis miserans descendere castris  
66 fecisti ; tu nimborum e partibus Austros  
67 excitos, secum vim tantam afferre volucrum  
68 jussisti omnigenum, numerus vix quantus arena est,  
69 quiverit ut jam quisque famem sedare, sitimque.  
70 Te Phariae timuere acies, gentesque rebelles  
71 finibus e patriis longe fugere relictis.  
72 Te pius Abramidum populos per inane tonantem  
73 suspexit, legemque tuam, tua jussa secutus,  
74 post varios casus, delecta in sede quievit.  
75 Te duce nos etiam saevos prostravimus hostes,  
76 inque metum, turpemque fugam, quicumque supersunt  
77 compulimus captamque tibi patefecimus urbem.  
78 Tu Rex et Deus es noster ; tua dextera nostrum  
79 robur, quo freti Turcas invasimus acres.  
80 Adsis, o, placidusque juves et coepta secundes,  
81 unde tibi aeternum meriti solvantur honores."  
82 Talia carminibus celebrant juvenesque, senesque  
83 alternis resonatque piis clamoribus aer.

84 At bonus Eustachides, perfectis ordine sacris,  
85 Ausonios, Gallosque duces, acresque Britannos  
86 imperat acciri, laetaeque accumbere mensae.  
87 Complerant quam tosta suum, pecudumque, bovimque  
88 tergora et viridi liquentia vina Donysa.  
89 At postquam jejuna fames depulsa, sitisque est  
90 et meritas egit grates pius ore sacerdos  
91 astrorum regi atque hominum, divumque parenti ;  
92 Bencius innexus crinem Parnasside lauro  
93 astitit et citharae percurrens pectine chordas,  
94 aeternas laudes et facta ingentia cantat,  
95 delectosque duces, genus alto a sanguine Abrami,  
96 ante alios omnes Josuem, qui certa secutus  
97 jussa Dei, Isacidas Jordanem primus ad amnem  
98 duxerit, anteferens divini faederis arcam.  
99 Ac tum flumen aquis latum compleverat alveum  
100 et pronum rapidos fluctus volvebat in aequor.  
101 Vixque adeo in primis vestigia fixerat undis  
102 casta manus seniorum oneri delecta ferendo,  
103 cum stetit in faciem montis (mirabile visu)  
104 intumuitque vadis superi pars fluminis et se  
105 sustinuit veniens, parsque infera praepete lapsu  
106 defluxit fugiens, ripasque reliquit inanes  
107 et siccum calcare solum dedit arida fundi  
108 Glarea, qua fluidum cymbis iter esse solebat.  
109 Nec prius omnipotens genitor decurrere pronas  
110 sivit aquas, populi series quam tota per alveum  
111 arentem ingrediens, posuit Jericuntis in agro  
112 castra, sub excelsis munitam moenibus urbem.  
113 Ultima quae tandem sexti post lumina solis  
114 arietibus nullis, nullo testudinis ictu,  
115 nec terrae ex imis vento erumpente cavernis,  
116 dum magno clamore virum, clangore tubarum,  
117 et flictu armorum totus circumsonat aer,  
118 procubuere solo subita collapsa ruina.  
119 Perque illam ingressi dant stragem et funere mersant  
120 omnia, nec cuiquam victrix manus, iraque parcit.  
121 Mox canit, ut saevo vastaverit oppida bello,  
122 inque fidem, verbis, lacrimisque rigantibus ora  
123 inductus, celebrem Gabaona acceperit, utque  
124 inde Palaestinas fidens invaserit arces.  
125 Quo trepidi terrore duces, populique potentes  
126 accierint magnas equitum , peditumque catervas,  
127 funditus Isacidas bello delere parantes.  
128 Sed pater omnipotens, cui nusquam exercitus ullus  
129 obstitit, aut lectas potuere opponere vires  
130 regna suas, imbrem lapidum coniecit ab alto  
131 aere et hostiles infregit grandine turmas,  
132 comminuitque acies, quas ut deleret ad unam  
133 Nuniades, medio se sol remoratus Olympo  
134 constitit, alipedesque repressit Luna jugales  
135 ipsa suos caeli requiem mirantibus astris,  
136 et lucem insueti terra metuente diei.  
137 Ergo iis excisis legionibus, addit, ut omnis  
138 a Casio ad Taurum, magnique Euphratis ad undam,  
139 qua se se late regio pulcherrima pandit,

140 cesserit Abramidum tum primum in jura, fidemque.  
141 Haec dum suavidico complectitur omnia cantu  
142 Bencius, ingeminant laetum convivia plausum  
143 et numeris Galli acclamant, Italique sequuntur.  
144 Inde omnes laeti consurrexere, diemque,  
145 quam longum, unanimes per castra, urbemque vagantes  
146 invisere pii, si quos oppresserit acer  
147 morbus et acceptum primo in certamine vulnus  
148 languentes molli cogat decumbere lecto.  
149 Hosque ope praesenti et verbis solatus amicis  
150 Eustachides, omni cura, studioque salutem  
151 procurare jubet, seseque accingere coeptis,  
152 quae restant, urbem ut Solymam, sanctumque sepulchrum  
153 servitio eripiant, diraeque tyrannide gentis.  
154 His dictis ibat laudum spectator eorum,  
155 institerant dura qui se exercere palaestra  
156 aut campi spatium celeri transmittere cursu.  
157 Flectere equos, vibrare hastas, attingere signum  
158 depulsa ex arcu, nervo stridente, sagitta.  
159 Immo etiam arentes dum sol altissimus agros  
160 ureret et magnos tenuaret fervidus amnes,  
161 intererat laetus, si qui super aethera discum  
162 triginta jacerent aequantem pondere libras,  
163 spectabatque libens, ocreas quos reddere leves,  
164 et galeas tersa rubigine viderat atra.  
165 Addebat se saepe etiam comitemque, ducemque  
166 coetibus instructis juvenum, qui comminus apros  
167 aggressi invadunt, timidosque ad retia cervos,  
168 aut celeres Onagros, canibusque et vocibus urgent.  
169 Interdum accedens, laetis hortatibus illos,  
170 qui contecti armis fluvios innare rapaces  
171 certarent, ausique essent transmittere fluctus,  
172 qua patet Ascanius spatiosi gurgitis alveus,  
173 implebat, partumque datis cumulabat honorem  
174 muneribus, pulchrae quae cuique cupidine laudis  
175 inflammare animos et in hostem impellere possint.  
176 Hos inter ludos, eventaque prospera rerum  
177 orta dies aderat, qua castris vellere signa,  
178 incoeptamque viam miles procedere jussus.  
179 Cum pius Eustachides primos in tecta vocari  
180 Gallosque, Ausoniosque duces, fortesque Britannos  
181 edicit, cunctosque inter mox talia fatur.  
182 "Jamdudum, o fortes, concordia pectora, fratres,  
183 sumpsimus optatae quantum quietis et otii  
184 sit sumpsisse satis ; nunc nos insistere oportet  
185 coeptum iter et sanctam Solymorum tendere ad urbem.  
186 Sed quoniam superanda manu multa oppida, multi  
187 prosternendi hostes, adeundique ante labores,  
188 nosque Palaestinis via longa excludit ab oris,  
189 consulite in medium, qua nunc ratione moveri  
190 castra per insidias gentes, populosque feroces  
191 expediat, quoque ipsa modo largissima victum  
192 pabula suppeditent, festivaque copia frugum,  
193 qua sine militiae nusquam non irritus usus :  
194 non vires animi solitas, non membra tuentur."  
195 Haec pius Eustachides placido sic ore locutus

196 consedit tacitus, reliquisque silentibus unus  
197 Attius heroum proles generosa potentum,  
198 Euganeosque inter clarae regnator Atestis,  
199 surrexit, vocemque audax atque ora resolvit.  
200 "Maxime Gallorum, soli cui detulit in nos  
201 imperium virtus belli spectata, domique  
202 te duce, siqua instant tantis incommoda coeptis,  
203 aeternum nobis parient in saecula nomen,  
204 famaue, depulsis Solyma de sede tyrannis,  
205 exciet ad laudes numquam moritura nepotes  
206 pergamus, nostris nil non superabile dextris.  
207 Quamquam etenim longamque viam, durosque labores  
208 et morbos, diramque famem impendere, sitimque,  
209 ac varios caeli casus, aestuque, geluque  
210 scimus, iterque hostes nostrum observare rebelles ;  
211 attamen haec, quaecumque animis praestantibus usi  
212 pertulimusque alias et nunc ventura feremus.  
213 Forsan et evenient multo leviora, metumque,  
214 qui nunc nostra acri pertentat pectora cura,  
215 successus rerum felix ostendet inanem.  
216 Pergamus, Deus ipse suos non deserit (umquam)."  
217 Attius haec animis longe praestantibus heros.  
218 Quem post principibus comes additus Europaeis  
219 Thatinus, cui Threicii mens nota tyranni,  
220 cogitat assidue fraudem. "Non fallitur (inquit)  
221 qui se cumque Deo fidens committit et unum  
222 esse putat, cujus tutos nos dextera reddat.  
223 Nec tamen est hominum generi prudentia frustra  
224 insita, qua freti tristes evadere casus  
225 et lapsas res in melius reflectere suerunt.  
226 Quando igitur jam victi hostes Bithynide terra  
227 cessere et campos nobis liquere patentes,  
228 ne bellatorum tot millia tentet egestas,  
229 ingeminans hinc jam partes exercitus omnis  
230 dissociatus eat ; Lydos petat illa, Phrygesque,  
231 auriferumque Hermum, pulchrasque accedat Hypaepas.  
232 Mox Lycia egrediens Selgae considat in arvis.  
233 Haec autem interius, magnae qua Dindyma quondam,  
234 et cantu et buxo celebrabant orgia matris  
235 atque inter viridem Cybelon Phrygiasque Celaenas  
236 tendat iter recta, perque arva feracia fines  
237 Mopsopios, tractusque adiens populetur Isauros,  
238 inque Lycaoniae cultos se transferat agros.  
239 Hinc autem conjuncti omnes juga montis Amani  
240 Conscendemus et Antiochi de nomine dictam  
241 incolumes, praeunte Deo, veniemus ad urbem.  
242 Urbem auro ditem, fecundamque ubere glebae."  
243 Dixerat haec Graius simulato pectore ductor,  
244 quo bellatorum disjuncta potentia sese  
245 frangeret, ac tandem penitus deleta tyrannum,  
246 quem metus angebat regni per turpe parati  
247 et scelus et fraudem, formidine solveret atra.  
248 Sed pater omnipotens, quo gloria tanta triumphum  
249 Eustachidae pareret, clarumque in secula nomen,  
250 servatis una Gallorum, Italumque manipulis,  
251 heroum avertit mentem, nec callida quisquam

252 consilia in praesens animo dispexit acuto.  
253 Ausonios igitur sese Boemundus et acer  
254 Tancredus jussere sequi, qua parte sinistri  
255 deflectunt montes Euxini ad litora ponti,  
256 eamdem etiam secuere viam sua signa sequentes  
257 Aulercique et Lexobii, nec inertia Celtae  
258 pectora, frigenti quos flumine Sequana lambit,  
259 at pius Eustachides, nec non Rhamundus et Hugon  
260 in terras flexere agmen, quas longa Propontis  
261 alluit, eque alto celsus despectat Olympus  
262 vertice et hinc atque hinc frigentibus irrigat undis.  
263 Jamque adeo Sagarim properans Boemundus ad amnem  
264 venerat et jacto muniverat aggere castra.  
265 Et noctem somnos ducens exercitus omnem  
266 egerat atque oriens nondum fulgebat Eous  
267 effuso spargens sitientia gramina rore.  
268 Cum vigiles sensere hostes descendere ab altis  
269 montibus et turmas campis effundere apertis.  
270 Raptim igitur ductorem adeunt, castrisque propinquos  
271 esse monent Persas equites, qui scindere vallum,  
272 qui ferro delere pios conentur et ipsas  
273 aggere disjecto fossas implere capaces  
274 innumeri, quos et valles, circumque jacentes  
275 confertos capiant denso vix agmine campi.  
276 Haec vigiles uno ore duci, qui pectore somnum  
277 jamdudum expulerat, rebusque instabat agendis.  
278 Ille igitur Tancredum ad se, Cimbrumque ferocem  
279 accitos, mandat totis educere castris  
280 armatas equitum turmas, peditumque cohortes.  
281 "Ite, ait, instructas acies ita sistite, ut amnem  
282 pone habeant, ne terga hostes circumdare possint  
283 impune et dubia nostros concidere pugna.  
284 A laeva, dextraque equitum disponite turmas,  
285 cunctaque delectis, aliique in parte laborent,  
286 subsidiis firmate suis." Haec pauca locutus  
287 indomiti lorica aeris, squamisque rigentem  
288 induitur, surasque ocreis includit aenis.  
289 Ac laevo lateri fulgentem accommodat ense.  
290 Ensem, quo Rholo Normanni nominis auctor  
291 regnantem in Belgis Catiulcum aggressus, avito  
292 et regno et dulci spoliavit lumine vitae,  
293 disjecitque acies et sanguine miscuit atro  
294 Argennimque, Olinamque amnes, Eriumque, Titumque  
295 exin armigero clypeumque, hastamque ferendam  
296 fraxineam, galeamque dedit, cui vertice in alto  
297 Amphytrioniades ferro et face conficit Hydram.  
298 Atque haec dum properans ductor festinat Iapyx,  
299 Goffredo in somnis, primae sub tempora lucis,  
300 astitit Ida parens, qualis cum vita manebat,  
301 errantem et puerum claras excibat ad artes.  
302 "Quae te tanta (inquit) dementia, nate, coegit,  
303 ut verbis adhibere fidem fallacibus ausus  
304 quiveris Ausonias abs te disjungere vires,  
305 disjectasque equitum turmas, peditumque catervas  
306 objicere infidis ad caedem et funera Persis ?  
307 Non ducis haec virtus, non disciplina, nec usus

308 militiae, quam magnus avus Carlusque, paterque  
309 Eustachius docuit, Morinum cum victor ab urbe  
310 tecum una longe saevos averteret hostes,  
311 cumque hasta Cattorum acies, regemque rebellem  
312 fudisti et spoliis rediisti dives opimis.  
313 Surge age et Ausoniis certam legionibus affer  
314 certus opem, quas Abdaridum gens dira latronum  
315 insidiis positis jam funere mergit acerbo,  
316 ni quamprimum ausis immanibus ipse resistas."  
317 Dixit et in tenues abiens evanuit umbras.  
318 At pius Eustachides, monitis commotus amaris,  
319 excutitur somno subitus, stratisque relictis  
320 exsurgens, animo, quae sint ea visa, volutat ;  
321 incertusque an pergat iter, quo tendere coepit,  
322 an vero expectet, fidus dum nuntius illinc  
323 adveniat, dubiaque animum formidine solvat,  
324 ingreditur supplex humili cum corde sacellum.  
325 Hic precibus fuis, sacrisque ex more litatis,  
326 edocet Addemarum, genitricem ut viderit Idam  
327 in somnis, abeunt toto cum sidera caelo,  
328 hortantem quamprimum Italiam succurrere victis,  
329 divisaque acies suum iter conjungere in unum.  
330 Ille autem admirans. "Non haec insomnia, dixit,  
331 irrita, nec falsis alti regnator Olympi  
332 ludit imaginibus mentes animosque potentum.  
333 Ergo omnes armari equites, peditumque manipulos  
334 ipse jube, et cunctos pugnam expectare paratos,  
335 ne nostras improvisus mox verberet aures  
336 nuntius et frustra auxilium properemus opemque."  
337 Haec illi inter se peragunt, ducibusque vocatis  
338 aere jubent fulgentem aciem considerare campo.  
339 Interea caelo stellis Aurora fugatis  
340 exsurgens laeto fulgore retexerat orbem,  
341 atque Itali, Gallique simul testudine facta  
342 conferti ordinibus stabant, hostemque propinquum  
343 et clypeo, gladioque, Macedoniae sarissa  
344 exceptura acies, densum porrexerat agmen  
345 in laevum, dextrumque latus, cui junctus utrimque  
346 ibat eques, Turcas saeva qui mente furentes  
347 frangeret et longe solidis averteret hastis.  
348 Ergo in conspectum postquam venere piorum,  
349 implentes vallem diris ululatibus, acres  
350 adduxere arcus manibus, solemque repente  
351 eminus expulsis obscuravere sagittis.  
352 Non secus ac nubes, media cum aestate volantes  
353 eripiunt oculis subito caelumque, diemque  
354 effusurae atrum terris arentibus imbrem.  
355 Ergo aliae in clypeis, atque in fulgentibus armis  
356 haeserunt, aliae nudato in corpore fixae  
357 bellatorum equitum, peditumque hausere cruorem.  
358 Tum vero Ausonii laxis incurrere habenis  
359 praecipites, hastasque adversa in pectora acutas  
360 dirigere unanimes : ceu cum furialis ab Euro  
361 impetus arentes veniens inclinat aristas  
362 in Zephyrum, fugit ille abiens contraria donec  
363 aura cadit, mox exsurgens lata arva procella

364 verrit et infesto secum trahit omnia nimbo.  
365 Sic patrium decus Ausonios et vivida virtus  
366 concitat et recto saevos petit impete Turcas ;  
367 sic Turcae sua terga fugae conversa dedere,  
368 atque hinc atque illinc campo cessere patienti,  
369 disjecti in geminas, turmis bipatientibus, alas,  
370 irritus in vacuas ut cesserit impetus auras.  
371 Ausonidae frustra cursus aliosque recursus  
372 dum conferti ineunt, lato nec in aequore cuiquam  
373 occurrunt, vallem misere pereuntibus omnem  
374 implerint rigidis transfixi membra sagittis.  
375 Tum Robertiades pugna commotus iniqua :  
376 "Sistite vos socii, nec inultae dedite morti  
377 pectora, ait, medii dum, ceu generosa leonum  
378 Massylum in silvis virtus armisque, dolisque  
379 obruta saepe cadit, fugitivo eludimur aestu,  
380 nec datur in Turcas dextrarum viribus uti,  
381 dum se proripiunt celeres, neque pectora nostris  
382 pectoribus pugnando audent opponere et unum  
383 illud agunt, ut nos cursuque aestuque fatigent.  
384 Ergo alia ratione aditus tentandus et arte  
385 pugnandum, quando nusquam locus ullus apertae  
386 virtuti, dextrasque labor frustratur inanis.  
387 Conversis in castra fugam simulemus habenis  
388 nos quoque et hinc atque hinc turmas sistamus equorum,  
389 in latera ut liceat venientum invadere, dum se  
390 effundit globus ille iterum, nostrosque sagittis  
391 eminus obruere atque aciem perrumpere tentat."  
392 Daunius haec ductor. Contra quem talia fatur  
393 Robertus, Cymbri soboles Rholonis. "An ergo  
394 venimus, ut Persas astu superasse fugaces  
395 dicamur ? Nostroque olim de sanguine natos  
396 hoc decus, haec tanti maneat nova gloria facti ?  
397 Tum mihi vel tellus optem prius ima dehiscat,  
398 Oceanusque ingens fuis pater obruat undis.  
399 Quin potius, siquid superest virtutis avitae,  
400 irruimus densi, tergoque instamus inertii  
401 et sequimur quacumque abeunt, seu dextera, sive  
402 laeva petant, etenim numquam moriemur inulti,  
403 ni vitae potius simus, quam laudis amantes.  
404 Vos cornu a dextro densi committite pugnam :  
405 nos autem a laevo Persasque Arabasque prememus  
406 et primis misti ordinibus miscebimus omnem  
407 caede aciem, aut victi morte occumbemus honesta."  
408 His dictis accensa arsit dux Appulus ira.  
409 "Nec mihi vita (inquit) tanti est mea gloria quanti,  
410 quanti et honor claram per caedem et vulnera partus.  
411 Immo haec ipsa dies tergo ne, an pectore notae  
412 hostibus in pugnam gentes descendere suerint  
413 Ausoniae, Tancredus ait, testabitur et me  
414 patribus indecorem non umquam haec vita relinquet."  
415 Haec illi inter se dum dant responsa vicissim,  
416 aspiciunt facto venientes agmine Turcas  
417 rursus et effusum contra contendere cursum.  
418 Non aliter, quam cum Boreas a cardine fluctus  
419 impulit et motas in caelum sustulit undas.

420 Illae autem in Libycos scopulos et litora vires  
421 effundunt, versaeque retro franguntur et omnem  
422 aspergunt circum spumis albentibus oram.  
423 Ergo omnes quamprimum Itali, Boemundus et acer  
424 Tancredus, fraterque bonae virtutis Hylelmus,  
425 ante aciem primi opponunt venientibus hastas.  
426 Verum illi, patrio de more, Cydonia cornu  
427 eminus in mediam torserunt spicola turmam.  
428 Dumque pedem referunt, ceu consuevere, fugaque  
429 pulverulenta Italo Turcae dant terga sequaci,  
430 excussus Solymanus equo, cui stridula cornus  
431 acta procul medios penitus transfixerat armos,  
432 tardavitque fugam, celeremque in tuta receptum,  
433 dum cuncti simul assistant, aciesque jacentem  
434 erigit, inque fero trepidantem affusa reponit.  
435 Postquam igitur solitis nullus locus artibus usquam  
436 linquitur et Turcis Itali miscentur et armis  
437 arma inferre opus est, vulgo caeduntur utrimque  
438 innumeri cadit, hic jaculo, cadit ille sagitta :  
439 confodit hasta alios, alios Balearica fundae  
440 verbera et excussae bellantum in tempora glandes  
441 prosternunt passim, passim furitensis, equumque  
442 urget equus, peditemque pedes, gemit obruta tellus  
443 corporibus vitae jucundo lumine cassis.  
444 Hernachus Andronem gladio per pectus adacto  
445 praecipitem deturbat equo ; mox insilit audax  
446 in Thermum et clava galeam contundit aenam.  
447 Exanimes Tancredus humi Biciamque, Tamumque  
448 dejecit, utque leo crudeli concitus ira  
449 horrendum saevit, mediumque per agmen equorum  
450 infertur, lateque omnes sternitque, fugatque.  
451 Nec minus interea virtute insignis Hylelmus  
452 caede madere manus, gladiumque tepere cruore  
453 gaudet et in bello fratri se vividus aequat.  
454 Ille Lycaonium leto dedit Aegocerontem,  
455 exsultantem animis, revocantem in proelia Turcas.  
456 Ille Thoam et clavae percussum interficit ictu  
457 Phradmonidem, Cilicum cui gens assueta rapinis  
458 paruit, atque ultro ducentem in bella secuta est.  
459 Addidit huic geminos Bithynae gentis alumnos :  
460 delicia matris, Chromiumque et Daetora, quorum  
461 non formae variatus honos, non ipsa loquentum  
462 vox diversa sono patrias veniebat ad aures,  
463 tum quoque mors eadem nullo discrimine facti  
464 vulneris ad Stygiam demisit utrumque paludem.  
465 Concidit inde manu moriens Celtiscus eadem.  
466 Celtiscus, cui non poterant flaventibus undis  
467 diram auri sedare sitim Pactolus et Hermus,  
468 dum populos opibus spoliat, dum vertit in usus  
469 ipse suos quicquid rerum fecunda creatrix  
470 Lydia progignit, quicquid ditissima quondam  
471 complexa est ferro sapientis regia Croesi.  
472 Ergo illum socii non protexere cadentem,  
473 non urbes extinctum ullae, non oppida flerunt,  
474 at parte ex alia, Sagaris qua spumeus unda  
475 inter saxa fluit, laxum curvatus in arcum,



476 intulerat turmas Nannetum ductor equestres  
477 et caedem ingentem ediderat, qua territus ultro  
478 fugit Arabs, vertit trepidantia terga Sabaeus.  
479 Ipse quoque in medios hostes se Daunius heros  
480 dum jacit atque manus Persarum caede cruentat,  
481 Orsilochum perimit fixo in praecordia ferro.  
482 Ast inter medios humeros fugientis Opheltae  
483 immitem totis direxit viribus hastam.  
484 Exiit illa furens latum per pectus adacta,  
485 unde animam moriens calido cum sanguine fudit.  
486 Et jam prima acies Turcarum exterrita fundi  
487 coepta erat, inque fugam praeceps conversa ruebat,  
488 cum pugna ingenti fessis aestuque sitique  
489 instaurata acies equitum superadvenit et se,  
490 qua globus instabat bellantum acerrimus infert.  
491 Hic Itali, primo stabant ut in agmine primi  
492 pugnantes, verso cecidere in proelia vultu,  
493 Sanseurinus et Ucoleon et Malvetus a quo  
494 ordine perpetuo gentis defluxit origo  
495 Malvetiae et clarum claro de nomine nomen.  
496 Quin etiam regum Medorum a sanguine cretus  
497 Cambyses gladio praestans, praestantior arcu,  
498 post quercum latitans Italos Gallosque sagittis  
499 innumeros prostravit humi ; trajecit Hylelmo  
500 pectora, Lutetio guttur, quem Sequana mater  
501 miserat in bellum, comitemque adjunxerat uni  
502 Hugonti. Ille autem fidus comes haesit Hylelmo,  
503 nec virtute animi, nec robore corporis impar.  
504 Tum vero patefacta acies : turbatus et ordo  
505 Ausonidum, campoque fugax equitatus aperto  
506 terga dedit Turcis : ac, ni dux acer Iapyx  
507 opponat sese fugientibus, ilicet hostis  
508 irruat Abdarides et victor castra revellat.  
509 Namque aderant primos inter Solymanus et acer  
510 Hermachus et vastum pugnae certamen obibant,  
511 urgentes humeros fugientum et terga prementes.  
512 Non secus atque canes gemini cum forte leonem  
513 videre, aut saevis frendentem dentibus aprum,  
514 accelerant gressum et vestigia pressa sequuntur  
515 et pedibus freti morsu clunemve, femurve  
516 attingunt, dubiique timent, ne forte reflectant  
517 ora atque accepto capiant pro vulnere poenas.  
518 Sic illi a tergo turmas, aciemque prementes  
519 extremum dant quemque neci, metus ingruit ingens  
520 omnibus atque atro nigrescit pulvere caelum.  
521 At Robertiades regnator Iapygis orae  
522 corde dolens, iraque animum inflammatus amara.  
523 "Proh pudor, Ausonii, nostraeque infamia gentis  
524 dedecora, haud ullis, inquit, delenda diebus,  
525 quo vobis animi ? Quo verba audacia tandem  
526 irrita cesserunt ? En haec ad pocula vino  
527 plena ferebatis vestrum se quemque trecentos  
528 atque etiam plures ausurum invadere Turcas ?  
529 Nunc, o, nunc vobis tempus sese omnibus offert  
530 audendi et laudem per splendida facta parandi."  
531 Haec illum frustra jactantem et funera passim

532 edentem et fractos revocantem in castra maniplos,  
533 quando aliud, quo confugeret, nihil esse videbat,  
534 armatorum equitum circumstetit ala, nec ullus  
535 ausus adire virum, jactis petit undique telis  
536 pugnans, summaque locum virtute tuentem.  
537 Non secus atque leo, longis quem comminus hastis  
538 invasere acres Libycis in saltibus Afri,  
539 atque hinc atque illinc densa cinxere corona,  
540 illicet impatiens conceptam exardet in iram,  
541 in mediosque ruens certum petit unguibus hostem  
542 et stragem infandam canibus (miserabile visu)  
543 dat turbans, discerpit equos, tela obvia frangit  
544 et sensim in tutae se subtrahit abdita silvae.  
545 Sic Robertiades, irae quo concitat ardor  
546 irruit et Lycii stricto caput abscidit ense  
547 Euryali, Gyndemque simul, patremque Dolonem  
548 fundit humi, Tamyrimque, Pharetaque, Demodocumque  
549 et se tutantem clypei munimine Rhetum.  
550 Dumque adeo praesens animis et viribus omnes  
551 sustinet, ac pectus ferus huc obvertit et illuc,  
552 transfixum jaculo femur et genua aegra trahentem  
553 sensit eum, quo fretum, equum certamen obibat,  
554 inque acies densas, inimicaque tela ruebat.  
555 Ergo ille e media paulatim excedere pugna  
556 et terrere hostem et vestigia lenta referre  
557 reliquiasque Italum in tutos revocare receptus.  
558 Interea pius Eustachides, quem fama morantem  
559 nuntia commorat tantae saevissima cladis,  
560 agmen agens equitum, Sagarim pervenit ad amnem,  
561 cum jam fusae acies Italum palantia Turcis  
562 terga darent, clamorque feriret dissonus aethram  
563 vincentum et passim crudeli morte cadentum.  
564 Hic Italos numero turmisque recentibus auctos  
565 admonuit nigrum pulvis glomeratus in orbem,  
566 Gallos adventare, sagittiferosque Britannos  
567 atque insperatam victis latura salutem  
568 agmina, nec campo Persis cessura superbis.  
569 Ac subito. Venit, ecce venit Goffredus et affert  
570 exspectatus opem ; tales toto aequore voces  
571 auditae Ausoniis animos auxere, metumque  
572 incussere hosti, nec longum tempus et acer  
573 advenit Eustachides, unaque interrita pubes  
574 Leucorum atque acres arcu jaculisque Britanni.  
575 Et primi excussis caelum implevere sagittis,  
576 innumerosque dedere neci, namque irrita nusquam  
577 missa in confertas ceciderunt spicula turmas.  
578 Mox bonus Eustachides, Italis quo densius agmen  
579 instabat, metuendus equum calcaribus urget  
580 et Chlorei pectus funesta perforat hasta.  
581 Volvitur ille cadens madida moribundus arena  
582 atque Arabum accusat secum praesagia vatum.  
583 E quibus ipse sibi longos promiserat annos  
584 et sobolem innumeram, sceptrumque immobile regni.  
585 Nunc autem primae succiso flore juventae  
586 occidit et nullis formosa e conjuge natis.  
587 Corripit inde manu gladium, ceditque, feritque

588 a dextra laevaue omnes : fit vi via Turcas  
 589 per medios, limesque agitur latissimus et cum  
 590 fertur in arva ruens nivibus liquentibus amnis  
 591 et prosternit humi sata culta, boumque labores  
 592 aut cum sublimi demissum ex aethere fulmen  
 593 ingentes imis ruit ab radicibus ornos.  
 594 Jamque omnes equites Parthorum, Arabumque repulsi  
 595 vertebant trepidi vestigia concita retro ;  
 596 cum se Turcarum ductor fugientibus unum  
 597 opposuit, reprimensque fugam. "Quo tenditis (inquit)  
 598 quae latebrae jam vos tutae, qui deinde receptus  
 599 accipient ? Tantum ne aliquis se praestat in armis,  
 600 ipse suo qui vos vel nomine terreat omnes ?  
 601 Ite, agite, o proles veterum rediviva parentum  
 602 et mecum unanimes armate in proelia dextras.  
 603 Ipse ego Goffredum collecto robore quamvis,  
 604 quamvis et triplici pectus sibi muniat aere,  
 605 aggrediar, poenasque mihi persolvere cogam,  
 606 quas meruit, dum regna armis attentat iniquis  
 607 nostra, fidem pariter fallens hominumque, deumque."  
 608 Haec ait, ast illi tantis hortatibus acti  
 609 in dubium pugnae redeunt, et (vociferantes)  
 610 immisti Ausonii caelum clamoribus implent.  
 611 At bonus Eustachides ingenti concitus ira  
 612 ense ferit Staphylum, cui Susis sceptrata tenenti  
 613 e galeae medio surgebant vertice flores :  
 614 tum manibus caelum Typhon immanis et asper,  
 615 summus ubi clypeum fulgentem conglobat umbo,  
 616 invadens, pictasque vomens e pectore flammam,  
 617 deturbare Deos sublimi e sede parabat.  
 618 Dejicit illum igitur gladio per pectus adacto,  
 619 labentemque ab equo verbis objurgat amaris.  
 620 "I, nunc, et caelum manibus discinde superbis  
 621 improbe et haec Stygias tua fer memoranda sub umbras  
 622 facta, quibus magni regnum sublime Tonantis  
 623 reclusum penitus voluisti evertere, cui ausis  
 624 persolvens meritas poenas pro talibus ausis  
 625 aeternum miser aeternis cruciaberis flammis."  
 626 Dixerat haec, Dryopemque petens, ubi fibula balteum  
 627 aurea subnectit imas thoracis ad oras,  
 628 transadigit ferrum, totumque in viscera condit,  
 629 damnatamque animam tenebris e corpore solvit.  
 630 Inde it Laogonum, Sipyli cui pascua parent  
 631 atque auro similes Tmolus premit arduus uvas,  
 632 concitat acer equum ; fugit ille exterritus et se  
 633 contegit in tergum rejecto umbone, ferumque  
 634 protinus immissum duris calcaribus urget.  
 635 At bonus Eustachides rapidis velocior Euris  
 636 advolat et gladio per tergum in viscera adacto  
 637 perforat ingentem clypeum, lumbosque per ambos  
 638 umbilico propior recludit vulnere ventrem,  
 639 ugulaque excussum misere proculcat equorum.  
 640 "Nec te humiles, Demuche, preces, nec forma, nec aetas,  
 641 quamvis excellens primo sub flore juventae,  
 642 servavere tuis ; nam dum genus utraque supplex  
 643 flectis humi, veniamque oras et brachia tendis,

644 trajectus jaculo guttur cadis et sola terrae  
645 purpureo moriens spargis madefacta colore.  
646 Tecum etiam dextram percussus Amulius aurem  
647 ense ruit, dum tentat opem tibi ferre, ruensque  
648 illicet a laeva fusum vomit aure cerebrum.  
649 Acta etenim ferri cuspidis per tempus utrumque  
650 letali summos incidit vulnere servos."  
651 Haec tanta Eustachides dum funera fervidus edit,  
652 Ausoniosque iterum fugientem cogit in hostem  
653 regnatorem in Asiae Solymanum aggressus Opheltes,  
654 consiliis bonus atque aevi maturus et uni  
655 credere cui suerat curas et pondera rerum  
656 cunctarum, seu bella forent, sive otia passim  
657 laetae agerent urbes et amicae commoda pacis.  
658 "Haud ego nunc auctor tibi sim, fortissime Regum,  
659 adversae ut pectus fortunae opponere tendas.  
660 Mutatos videt esse Deos ? Videt omnia retro  
661 versa ? Nec e nostris consistere in agmine quemquam  
662 et Gallorum acies, animisque et viribus auctas  
663 irruere ? Et telis complere recentibus arva ?  
664 Caedamus victi, montesque abeamus in altos,  
665 reliquiasque illic, superant quaecumque, legamus.  
666 Forsitan insidiis regio magis apta, locusque  
667 commodior nobis sese offeret : unde repente  
668 vindictae dabitur non insperata facultas."  
669 Dixerat haec senior, cupiens avertere Regem  
670 ipse tuum, sibi ne fidens se ferret in hostem  
671 cominus et forti Eustachidae congressus iniquam  
672 consereret pugnam, nec Diis, nec viribus aequis.  
673 Ille autem dubitans dictis ne auscultet Opheltae,  
674 fortunam an rursus belli experiatur et audax  
675 instaurare iterum turmas conetur equestres,  
676 praecipiti Laedam ad se contendere cursu  
677 aspicit, isque adeo, postquam data copia fandi.  
678 "Eia age rumpe moras (inquit) Solymane, tuoque  
679 si cupis incolumem servare et reddere matri,  
680 affer opem nato, telis quem plurima circum  
681 turba premit, semperque recentior obruit hostis.  
682 Nec potis est acri sese subducere pugnae :  
683 quamquam multa virum leto dat corpora et ultro  
684 provocat egregia Gallos virtute feroces.  
685 Ast unum quis ferre parem se pluribus ausit ?"  
686 Vix has illacrimans voces e pectore Ladas  
687 fuderat, oppressum cum nuntius alter et alter  
688 retulit Eustachidae saevis cecidisset in armis  
689 Hyldrinum : signi dandi commissa potestas  
690 cui fuerat, gnatique sui concredita cura.  
691 Hyldrinum, genus Odrysium, quo fortior alter  
692 non fuit, et pugnam qui tanta ex parte pedestrem  
693 ederet atque acres violentius iret in hostes.  
694 "Auditis his e medio sese agmine Persa  
695 proripit antevolans et me ne deserat (inquit)  
696 quisquis amat, salvumque cupit natumque, patremque."  
697 Dixerat atque illum rapida velocius aura  
698 currentem, natiqque metu, tristiqque furentem  
699 ira, equitum turmae actutum primiqque sequuntur

700 Persarum quocumque vocat fors ipsa parati  
701 et conferre manum victori et, quicquid acerbi est,  
702 morte, pati, juvenem possint ut reddere patri  
703 incolumem, spemque imperii servare ruentis.  
704 Non aliter, quam cum sublimi e turre columbae  
705 conspexere procul passis Haliaeeton alis  
706 irruere infestum et praedam captare volentem,  
707 densentur coeuntque omnes, rapidoque volatu  
708 praecipites, quacumque viam secat ille, feruntur.  
709 Sic globus Abdaridum furialibus ocior auris  
710 infertur, qua visa magis crudescere parte  
711 pugna atrox, hic Etruscum Solymanus Acestam  
712 dejecit instantem Persis : ferit Hermachus Umbrum,  
713 Umber Hylam, Idaeus Athyn, dat Helenora leto  
714 Cicius, obtruncat dextram Corcutus Ibero.  
715 Dumque adeo inter se gladiis pugnacibus acres  
716 exercent, volvuntque vices, nec jam pote quisquam  
717 undique nitendo sese divellere ferro,  
718 hortatur vox una omnes Arabasque, Syrosque.  
719 "Este viri, Solymanus hic est, turmaeque recentes  
720 Persarum, quae vos inimica a morte reducant."  
721 Audiit Eustachides, laudisque accensus amore  
722 accurrit, Persamque gravi videt ense metentem  
723 Gallorumque, Italumque acies et fervidus. "Hinc vos,  
724 vos hinc cedentes, uni mihi linquite tantum  
725 hoc certamen, ait, vindex Deus adsit et olli  
726 debitus hic mactetur honos et gloria facti  
727 si sua, terrarum quae divulgata per orbem  
728 terreat infidas merita formidine gentes."  
729 Haec ait et late patefacto limine, regem  
730 in Persam fertur praeceps. Exterritus ille  
731 constitit, ac secum dubio cum pectore versat,  
732 pareat an dictis, caroque ante omnes nato  
733 consulat, instantum modo quem subtraxerat irae  
734 Ausonidum, an rapta Eustachidae ruat obvius hasta.  
735 Hoc animus jubet excelsus, generosaque virtus,  
736 atque accepta recens eversi injuria regni,  
737 illud amor patrius, sed qui stellantis Olympi  
738 nutu sceptrata regit, mentem consistere in uno  
739 haud passus, manibus Goffredi addixit utrumque  
740 et patrem et natum namque hunc pietasque, pudorque  
741 impulit, ut durum pugnae certamen iniret  
742 et cursu patrem praeverteret ipse morantem.  
743 "Tum vero furiis actus Solymanus amoris,  
744 quo generose ruis ? Cui nunc te te objicis hosti ?"  
745 Nate ait ? Et fodiens saevis calcaribus armos  
746 ursit equum, comitemque illis sese Hermacus addit.  
747 Tresque simul petiere unum, mediumque reducta  
748 Eustachidae clypeum Solymanus percutit hasta.  
749 Contundit clava galeam Ninus, Hermacus ense.  
750 Ille velut summis in montibus aspera cautes,  
751 cui faciem Boreas, humeros diverberat Auster,  
752 constitit immotus, ferrumque exegit acutum  
753 per fauces, gutturque Nino, quo vulnere primus  
754 interceptam animam tenues efflavit in auras,  
755 inflexitque caput, ceu flos, cui durus arator.

756 Vomere praeteriens caulem perstrinxit adunco.  
 757 Nec mora. Fulmineum convertit in Hermacon ense,  
 758 quaque patens oculis admittit cassida lucem,  
 759 egit et a malis disclusit vulnere frontem.  
 760 At pater horrendum stridens, "Saeuissime praedo,  
 761 qui regno, qui me natis florentibus orbas."  
 762 "Perge, ait, atque animam ferro tecum aufer eodem  
 763 hanc quoque, sed justus quantum dolor, iraque possit,  
 764 experiare prius." Gladio sic fatus acuto  
 765 irruit et totum clypei septemplicis orbem  
 766 dejecit, rigidique oris thoracis apertis,  
 767 Eustachidae strinxit summo de pectore. At ille,  
 768 alte sublatum subito dum surgit in ense  
 769 et conum insignem galeae ferit atque comantes  
 770 spargit humi cristas, iteratque ferocior ictus,  
 771 complexusque virum capulo cava tempora pulsat  
 772 et consopitum geminatis ictibus alto  
 773 deturbavit equo, terraeque afflixit et una  
 774 exhalantem anima, fluctusque ex ore vomentem  
 775 sanguineos, armis nudari jussit, humique  
 776 stratum vulturiis praedam, canibusque reliquit.

## LIBER DECIMUS

S\_10 v.1 Attigerat cursu medium sol altus Olympum :  
 2 cum trepidi Abdaridae regem cum prole peremptum  
 3 deserve omnes, nec sese credere castris,  
 4 aggeribusque suis ausi, liquere Latinis  
 5 praedandum, quicquid rerum praedives, opumque  
 6 attulerat secum Persarum exercitus ingens.  
 7 At pius Eustachides, postquam toto aequore fusi  
 8 discessere hostes terraeve exstincta dederunt  
 9 corpora nec superest quisquam, qui fortibus ausis  
 10 infestum remoretur iter de more piorum  
 11 Ausoniis, Gallisque suis crudelia passis  
 12 vulneraque et mortem socii dat tempus humandis.  
 13 Nuntius interea magno per Averno tumultu  
 14 ima ruit : saevisque implent terroribus Orcum.  
 15 Turcarum regem pugna cecidisse cruenta ;  
 16 deletas equitum turmas, exstinctaque secum  
 17 aequoreas Sagarim devolvere corpora in undas ;  
 18 coeptum tendere iter Gallosque Italosque ; nec ullum  
 19 esse super, qui communem defendere causam  
 20 possit et a Solymis certam depellere cladem.  
 21 Ille furens, faciensque alto convicia caelo.  
 22 "Ite, ait, o maculae, regnique opprobria nostri,  
 23 aligeri, tenebras terrae noctemque colentes ;  
 24 ite infelices et, quos non abstulit ensis

25 hosticus atque atro suffusae felle sagittae,  
26 conficiat, quacumque ibunt, aestusque sitisque."  
27 Haec ille at dira confestim ab sede ministri  
28 egressi insolitos ima ex tellure vapores  
29 efflant et flammam radiis ardentibus addunt.  
30 Praecipue qua se Maeandrum extendit ad amnem  
31 Lydia et infesti fines attingit Isauri.  
32 Post, ubi quarta diem caelo patefecit Eo  
33 aurora atque omnes armis animisque refecti,  
34 Gallique, Ausoniisque, sagittiferique Britanni,  
35 evasere tuos laeti Bithynia fines,  
36 Maeoniaeque oras inimico sole perustas  
37 et nusquam arboribus dulces praebentibus umbras  
38 ingressi, non fontis aquas, non ullius amnis,  
39 aut rivi scatebras, quibus illi aestumque sitimque  
40 sedarent, undamve pigrae reperere lacunae  
41 stagnantem : cinis ater agros atque arva tegebat :  
42 exusti in faciem campi, salebresque nigrantes  
43 montis, ab obscura piceae caligine fumi,  
44 laedebant misere peditum vestigia, equumque.  
45 Hic Vatum inventis olim delusa vetustas  
46 credidit, in magnum magnae telluris alumnum  
47 fulmina de caelo cecidisse irata Typhoeum  
48 atque illum ingenti depressum pondere terrae  
49 eque imo rapidas spirantem pectore flammam  
50 in cinerem vertisse solum, montesque feraces  
51 Maeoniae exesis lapidum evertisse ruinis.  
52 Ipsa enecta siti, solisque ardore maligni  
53 et duris attrita viis jumenta cadebant  
54 exanima et nimio linguis arentibus aestu  
55 defecere canes passim, rabieque furentes  
56 errarunt temere huc illuc, atrumque venenum  
57 morsibus obscaeni letalibus inspirarunt.  
58 At gravidae matres, famae, sanctique pudoris  
59 immemores, passim lapidoso in tramite fetus  
60 abjecere suos, resoluti e ventre cadentes  
61 ante diem et tristem turba spectante laborem,  
62 nec miserante tamen. Quando metus acer in omnes  
63 effusus, sibi adesse uni se quemque monebat.  
64 Jamque adeo campique omnes et collis iniqui  
65 saxa, cadaveribus passim contacta jacebant :  
66 inque dies illis gravior regionibus aer  
67 excibat taetros ima e tellure vapores,  
68 torreatque ardens sitientes Sirius agros :  
69 nec longe spes ulla viae, finisque laborum  
70 proximus, infirmas vires recreasset euntem,  
71 ni pius Eustachides ambas ad sidera palmas  
72 sustollens, tales fudisset pectore voces.  
73 "Summe pater cujus dextra, nutuque patentum  
74 terrarum ingentes tractus, caelique cavernis  
75 astra affixa suis, pelagique infensa reguntur  
76 murmura et obductae coguntur in aere nubes,  
77 si sincerus amor, si spes fidissima, si nos  
78 inter rata fides hoc votum rite coegit  
79 suspicere atque alacres precibus parere jubentis  
80 Pontificis, cui sola abest permissa potestas,

81 obstructum caeli reserare et claudere limen,  
82 affer opem, pater omnipotens, pereuntibus aestu  
83 atque siti et diras da tandem evadere terras.  
84 Exustas terras, omnique humore carentes.  
85 Nec te nostra minus moveant nunc vota, precesque,  
86 quam movere olim Mosae pia verba, petentis  
87 Abramidum populis misere sitientibus undam,  
88 quam movit tuus ille tibi dilectus alumnus :  
89 cum rapidum medio in caelo mirantibus horis  
90 et terra trepidante metu, consistere solem  
91 jussisti et longae fines producere lucis."  
92 Sic fatus, lacrimis pectus madefecit obortis,  
93 eque imo tacitus duxit suspiria corde.  
94 Audiit orantem terrae, caelique creator  
95 omnipotens, placidusque oculos deflexit ad oras  
96 Maeonias, quas Tartarei regnator Averni  
97 Uragus insolito succenderat impius aestu :  
98 astantemque sibi vicina in sede ministrum  
99 alloquitur. "Nostri, o solii fidissime custos,  
100 i celer atque illinc, Lydos ubi sulphur et ignis  
101 urit agros et sole tepens exaestuatur aer,  
102 monstra redire jube vastum Phlegetontis ad amnem,  
103 quae nunc ex Erebi Stygiis emissa cavernis  
104 insedere viam, totoque ex aethere flammam  
105 ardentes jaciunt certatim in castra piorum.  
106 Vade age fide vigil, populisque petentibus imbrem  
107 desuper infundens, citus ipso in tempore nostram  
108 affer opem et miseros praesenti subtrahe leto."  
109 Haec ait et nutu totum tremefecit Olympum.  
110 Ille abit atque Notis secum per inane vocatis,  
111 praepete Maeonias lapsu defertur ad oras :  
112 impatiensque morae. "Fugite hinc, ait, impia caecae  
113 monstra domus, vestrasque ultro tellure sub ima  
114 exercete iras, animasque ad flagra nocentes  
115 ducite, vexatas rapidi fervoribus ignis.  
116 Hoc jubet immensae moderator maximus aethrae."  
117 Dixit et ejectis flagranti ex aere monstris,  
118 nubibus abduxit caelum, fuisque repente  
119 imbribus, ardentem relevare exercitus aestum  
120 et sedare sitim, coeptumque insistere quivit  
121 sospes iter, terrae peragrat dum saxa perustae,  
122 seque ad Maeandrum confert laetissimus amnem :  
123 innumeris amnem pagis, vicisque frequentem.  
124 Quem penes incedunt virides armenta per herbas  
125 plurima et undantes ripas mugitibus implent.  
126 Huc ubi perventum festo clamore salutant  
127 flumen et irriguos undis refluentibus agros,  
128 inque epulas, laetasque dapes armenta, gregesque  
129 errantes caedunt, densaeque sub arboris umbra  
130 expediunt Cererem, campis quae plurima in illis,  
131 tergaque diripiunt, veribus quae fixa salignis  
132 torruerant et vina cadis liquentia fundunt.  
133 Partim etiam gelidas demittunt corpora in undas  
134 et meminisse juvat, quas cuique evadere iniqui  
135 contigerit Solis flammam, quamque inter eundem  
136 ferre sitim et terrae cineres superare calentes.



137 At pius Eustachides, postquam lux proxima caelo  
138 exegit stellas, orbemque Aurora retexit,  
139 perfectis de more sacris, laetissimus olli,  
140 cujus ad arbitrium summus se accommodat aether,  
141 ingentes egit grates, supplexque petivit  
142 erratis veniam et propensum in vota favorem.  
143 Mox ad se vocat Heroes ac talia fatur.  
144 "Venimus, o proceres, Divum quae maxima patri  
145 gratia, liquentes Maeandri ad fluminis undas  
146 atque in Pisidiae laetis consedimus arvis  
147 hic nullae munitae urbes, nulla oppida, nullis  
148 castella in tumulis, nulla arx impervia, nostrum  
149 quae remoretur iter, passim loca consita densis  
150 arboribus, virides campi, frugumque feraces  
151 nec non et croceis halantes floribus horti,  
152 susceptos secum invitant relevare labores.  
153 Hic igitur, nisi vestra aliud sententia vobis  
154 suadet et excelsi quamprimum ascendere Amani  
155 praeruptas cautes, Cydrique ad flumina ferri,  
156 censeo, dum sese frangat calor, usque manendum.  
157 Interea, nequid post terga hostile residat,  
158 Tancredus Rogeriades atque Itala pubes  
159 ad praedatores Cilices et moenia Tarsi  
160 hinc eat atque una saevos invadat Isauros  
161 vastet agros, gentesque omni regione rebelles  
162 ejiciat, sanctosque aris instauret honores.  
163 Et Morini, duce Balduno, Belgaeque propinquos  
164 aggressi Armenios, redigant in jura fidemque  
165 Callirhoem et madidas Romano sanguine Cartas.  
166 Tum quoscumque Melas et proximus alluit amnis  
167 Euphrates, armis cogat parere piorum.  
168 Nec vereor, quin spem victoria certa sequatur.  
169 Abdaridum namque, extinctis tot millibus, urbes  
170 exturbare parant summa de sede tyrannos.  
171 Et tristi depressa jugo subducere colla  
172 jamdudum, ceu fama refert praenuntia veri  
173 haec pius Eustachides, longo quo lassa labore  
174 miles et infestis obnoxia corpora morbis  
175 curaret, laetisque animis atque ubere victu  
176 redderet invictas ventura in proelia vires."  
177 Assensere omnes dictis, agrosque feraces  
178 Pisidiae legere, alerent qui castra piorum.  
179 Ac, ne languerent oblata per otia : silvas  
180 et nemora ilicibus passim frondentia densis,  
181 hic, ubi se crebris venantibus exercerent,  
182 donec iter coeptum praeceps intenderet aestas.  
183 At Siculi, Belgaeque acres, sua quique secuti  
184 signa ducum atque una jussae regionis ad oras  
185 digressi, petiere illi te Coryce, cujus  
186 secessus quondam Graiae coluere Camenae ;  
187 at te, Cydne, tuo qui serpis in aequora fluxu  
188 leniter et tacitis campos praeterfluis undis.  
189 Hi vero Arabios, ripaque Euphratis in alta,  
190 quae posita est, populisque potens dominatur Edessam ;  
191 at reliqui proceres, Italique, acresque Britanni  
192 et Gallorum omnis exercitus, otia nactus

193 libera, vicinas implet terroribus urbes  
194 et populator agros et concutit oppida bello,  
195 si qua manent immota suis custodibus et se  
196 sponte Latinorum jussis parere recusant.  
197 Atque haec dum fiunt rumor celeberrimus oras  
198 Assyrias pervadit et auribus insonat ingens  
199 invicti Eustachidae virtus, nomenque, decusque.  
200 Qua fama impulsus geminae regnator Hydaspes  
201 Armeniae et Xersis praeclaro a sanguine cretus.  
202 Jungere amicitiam cum tanto heroe perennem  
203 constituit, misitque, illi qui munera ferrent :  
204 argenti solidi massas, aurique talenta  
205 plurima et intextas pretioso vellere vestes.  
206 Quas inter fulgebat, uti jam lumine plena  
207 ipsa ignes inter resplendet Luna minores,  
208 purpureumque, ingensque et nobile conopeum :  
209 vatis opus priscae, quae quondam oracula Persis  
210 reddere consuerat, de nomine dicta Sibyllae.  
211 Illa igitur tantam saeculi praesaga futuri  
212 pinxit acu vestem et mira contexuit arte.  
213 Extremas nam limbus obit circumdatus oras  
214 aureus et longo variantes ordine gemmae,  
215 beryllus, pelagi faciem mentita virentem,  
216 chrysolitusque, acerque adamas, noctisque nigrantis  
217 discutiens tenebras claro splendore pyropus :  
218 dum flammam vomit et rutilanti fulgurat igne :  
219 fecerat in summo texti admirabilis orbe  
220 omnipatens caelum stellis ardentibus aptum :  
221 complexu quod cuncta suo tegit undique et aethram,  
222 aeraque, Oceanumque et terras circuit imas.  
223 Fecerat et Phoeben, Solemque, ignesque vagantes,  
224 per duodena suos contendere sidera cursus :  
225 alternant rerum unde vices et tempore certo  
226 intereunt, iterumque suum referuntur ad ortum.  
227 Sic Ver purpureum summos frondentibus umbris  
228 vestierat montes : pratis induxerat herbas  
229 gemmantes, variis ornarat floribus arva :  
230 et dulci volucres implebant avia cantu.  
231 Quin et per silvas errare licentius altas  
232 horrentes apros, stimulisque potentibus actos  
233 ire lupos, animisque ursos saevire videres,  
234 inque mari, lacubusque imis genus omne natantum  
235 ludere, flumineisque choros agitare (venustos).  
236 Nec minus undantes segetes aestate recurvis  
237 falcibus agricolae rapido sub sole metebant.  
238 Ipsum etiam Autumnum dulces e vitibus uvas,  
239 arboribusque suis jam mitia poma legentem,  
240 quae venturae hiemi, mensisque reposta secundis  
241 condirent grato Baccheia dona sapore,  
242 pinxerat et tenui telas discreverat auro.  
243 Hic alii volucres in retia cogere et ad se  
244 allicere, ac miseris viscatis fallere virgis.  
245 Ast alii in vacuas laxare Halyaeeton auras ;  
246 pendentem rostro laceret qui Cirin adunco  
247 et veteris poenas sceleris memor exigat acres.  
248 Namque ubi sublimes supra volat ardua nubes,

249 hic etiam in summas se fert Halyaeetus auras,  
250 insequiturque atrox, ubi Ciris ab aethere praeceps  
251 effugit et levibus descendit in aequora pennis,  
252 hic quoque praecipiti delatus in ima ruina  
253 unguibus a tergo discerptam eviscerat uncis.  
254 At genialis hiems montes nive contegit altos,  
255 fluminaque et fontes glacie constringit acuta ;  
256 immites venatur apros, ad retia cogit  
257 fecundos lepores, capreas e rupibus alis  
258 dejecit et cervos cursu properante fatigat.  
259 At variis nemus omne canum latratibus horret,  
260 rauca sonisque inflant venantes cornua bombis.  
261 Inde agitant alacres juvenum convivia coetus :  
262 invigilant epulis et vina liquentia potant.  
263 Nec non et patrio choreas ex ordine ducunt  
264 immistae pueris florenti aetate puellae,  
265 quae mox jucundum constanti foedere amorem  
266 conjungunt, prolemque edunt in luminis oras  
267 innumeram et faustis celebrant conventibus urbes  
268 quatuor in partes terrae diviserat orbem,  
269 quas inter Tanais, Nilique fluentis imago  
270 ibat et aequoreas Nereus immiserat undas :  
271 Ammericemque omnem, quae tunc ignota latebat,  
272 Oceano Ligur emenso fortissimus heros  
273 recludit, venasque aperit praedivitis auri.  
274 Inde Asia in media turrim Nembrotus ad aethram  
275 extulerat, caelo ut tandem lacrimabile bellum  
276 inferret, Divumque patrem devolveret astris  
277 et se suprema caelestum in sede locaret.  
278 Demens, qui tanto dignum se ferret honore.  
279 Ergo operas omnes alti regnator Olympi  
280 implicuit foedis linguarum erroribus unde  
281 subsedit turris moles infecta minacis.  
282 Ipse autem Stygios misere detrusus ad amnes  
283 persolvit meritas tenebroso in carcere poenas.  
284 Parte alia multis bellantum millibus urbem  
285 ductor atrox, ditemque inhians avidissima praedam  
286 turba, minabatur se funditus eversurum.  
287 Et jam jam pressi longa obsidione, metuque  
288 horribili, cives jussis parere parabant,  
289 inque potestatem saevo se dedere regi :  
290 cum mulier forma insigni et juvenilibus annis,  
291 orba viro, sed quae thalamum servare pudicum  
292 sueta Deo vitae reliquos sacraverat annos,  
293 progreditur porta, cum sera crepuscula terris  
294 noctis inhorrentes secum adduxere tenebras,  
295 per mediosque hostes et castra inimica superbum  
296 regem adit ; ac vino tandem, somnoque sepultum  
297 aggreditur, strictoque audax caput ense recidit  
298 et secum asportat niveo velamine tectum.  
299 Illum autem e mediis cervicibus exhalantem  
300 sanguineos amnes lacerum, truncumque reliquit  
301 et sese ad cives recipit generosa virago  
302 victricem et spoliis caesi ductoris onustam.  
303 Ast olli e portis erumpunt undique apertis,  
304 inque fugam vertunt dextris ultricibus hostes.

305 Parte alia Oceani, Rhenique, altaeque Pyrenes  
306 finibus, intexto populos incluserat auro ;  
307 invictos bello populos, regesque, ducesque  
308 innumeros ; quorum virtute et fortibus ausis  
309 ipsa videbatur tellus Oenotria longe  
310 pellere barbariem, duroque exsolvere sese  
311 servitio atque urbes positis ornare tropaeis.  
312 Corpore quos inter procero atque ore verendus  
313 exstabat Carolus humeris ter maximus altis ;  
314 Pepini proles pietate ingentis et armis,  
315 ipse armis tamen et pietate ingentior ibat  
316 supra omnes, gentesque feras ditione premebat,  
317 Illyricosque et Vindelicos, Unnosque feroces,  
318 extremoque sitos Europae in litore Danos.  
319 Olli se Cattus, nec non et Cantaber atrox  
320 dedebat victum, Ligerimque infractus ad amnem  
321 acer Aquitanus, Libyaeque exterrita fasces  
322 submittens humilis jus, imperiumque subibat.  
323 Italiam mox intranti reclusa patere  
324 moenia Ticini, ducique in vincula regem  
325 fecerat aetatis venturae haud inscia Vates.  
326 Ipse etiam solitos reddi mandabat honores  
327 Pontifici, sedemque pius sternebat avitam.  
328 Quo merito passim populo acclamante Quiritum  
329 audiit Augusti se nomine compellari.  
330 Te quoque in arentem, Florentia dia, favillam  
331 conversam, Etruscos rabie populante Getarum,  
332 addiderat, quam mox animo miseratus amico  
333 idem heros, cives in patria tecta vocabat ;  
334 tecta opibus substructa suis linquebat et idem  
335 regnandum Lodoico orbem, cui dura tuendi  
336 Pontificis, facilisque dedit clementia nomen  
337 ferre pii ; quamquam juveni non ille nepoti  
338 turbanti Italiae res et stata regna, pepercit.  
339 Mox iter emensus Scaldim referebat ad amnem  
340 compositis laetus rebus, maturus et aevi.  
341 Hic, ubi natorum generoso a sanguine nati  
342 invicti heroes Morinos ditione tenebant  
343 et quascumque oras placido rigat amne Mosella.  
344 Nec procul hinc virgo stabat, cui sanguis avitus  
345 addiderat cunctos formae immortalis honores  
346 progenies regum et reges paritura potentes.  
347 Imperio quorum felix Etruria sese  
348 attollens parta florebat laeta quiete.  
349 Nec tu conjugio ram clarae Heroidos aucte  
350 Ferdinande aberas, Tuscae dux inclyte gentis :  
351 aliorum soboles deducta ab origine patrum,  
352 inque sacro virtus Romae spectata senatu  
353 saepius ; insigni summam diademate frontem  
354 evinctus, dextra sceptrum regale gerebas.  
355 At Gessoriacum medio ostentabat arena  
356 heroem, fracti capulo qui comminus ensis  
357 terque, quaterque caput percusserat hostis, humique  
358 straverat indutum galea et fulgentibus armis  
359 aequatamque ausum secum committere pugnam.  
360 Idem etiam claras Syriis in finibus urbes

361 hostibus eversis et magna caede fugatis  
362 in libertatem victor revocabat et ultro  
363 Christicolis Solymae portas praebebat apertas.  
364 Hac pius Eustachides laetatus imagine rerum.  
365 "Armenio grates ingentes (inquit) Hydaspi  
366 vos agite et dextrae dextram jungite nostram,  
367 qua pote et haud umquam tanti fore dicite amici  
368 Goffredum immemorem et secum memorabile munus,  
369 quo se cumque feret, ceu magni pignus amoris  
370 laturum, gratique animi rata signa daturum."  
371 Haec ait et donis auctos discedere jussit.  
372 At Galli, quos cunctarum penuria rerum  
373 vexarat, misereque ingens afflixerat aestus,  
374 exercere dapes festas, pedibusque choreas  
375 plaudere, virginibus mixti per compita, votique  
376 immemores suscepti animum oblectare sedendo.  
377 Quin etiam proceres ipsi, firmissima belli  
378 fundamenta pii, vitae dulcedine moti  
379 illius, aestivos luxu fregere calores.  
380 Forsan et obliti pariter decorisque, sui que  
381 haerent, traherentque datum per talia tempus  
382 otia ; ni caeli magnis delapsa cavernis  
383 Ida parens, natum in somnis affata monerent.  
384 "Nate oculis, vitaque mea mihi carior ipsa,  
385 in terris olim, cum vita, oculisque fruebar,  
386 non hic ut sedeas, atque omne inglorius aevum,  
387 delicias inter molles consumere pergas,  
388 progenuit pater Eustachius ; nec gloria gentis  
389 illa tuae, terrae totum diffusa per orbem.  
390 Nec pater, aethereis qui solus regnat in oris,  
391 evocat Hesperias sub te ductore cohortes  
392 ad lucos, ad agros, ad pascua culta Syrorum ;  
393 verum, ut depulsis Solymae de sede tyrannis,  
394 eversas aras, eversa que templa reponas :  
395 quae mox Christicolae, leti formidine dempta  
396 invisant, sanctoque acclinent genua sepulchro.  
397 Surge, age : jam satis est cunctis legionibus oti  
398 nate datum, nihil est quod te remoretur euntem  
399 ad Casium et flumen celebri cognomine Orontem."  
400 Dixit et in tenues abiens evanuit auras.  
401 At vero Eustachides monitis obmutuit amens  
402 auditis, totoque repente e pectore somnum  
403 expulit et stratis ingentia membra relictis,  
404 attollens caelo palmas cum voce tetendit.  
405 "Summe pater, qui cuncta vides, qui cuncta gubernas,  
406 quique hominum mentes scrutaris et intima cordis  
407 perspicis et caelum et terras pervadis et undas :  
408 non ego desidia turpi me solvere culpa,  
409 deliciisque animum languentem et mollibus umbris  
410 excusare ausim : nil jam mihi deleat unam  
411 te penes hanc labem, nisi quae tam saepe miserta est,  
412 in te peccantum placidi clementia cordis.  
413 Afflictae quamquam cupientem incommoda gentis  
414 demere et ad coeptos vires recreare labores,  
415 in tantam potuit regio deducere fraudem  
416 fertilis et cunctis longe ditissima rebus."

417 Sic ait et properans fulgenti accingitur ense.  
418 Ac jam caeruleis caput aureus ignivomum Sol  
419 extuleratque undis, totoque illuxerat orbi,  
420 undique cum proceres ad se fortissimus heros  
421 evocat et placidus verbis affatur amicis.  
422 "Effluxere dies tandem, quos Sirius ardor  
423 efficit infestos hominum generi atque ferarum,  
424 tempestasque anni jamdudum et mitior aer  
425 nos monet, o proceres, ut, quo res urget, eamus.  
426 Regnum eversuri Turcarum immane, Deoque  
427 oblaturi animas pro libertate piorum.  
428 Ergo ubi quarta diem miseris mortalibus alium  
429 Eoo exurgens patefecerit aequore Titan,  
430 et dederit sonitum sacris tuba clara peractis,  
431 Signa manu (si sic placitum) sua quisque revellens  
432 pergat iter coeptum et Selgae sata culta relinquat."  
433 Haec pius Eustachides, procerum quibus inclytus ordo  
434 assensit, certamque suis praefixit eundi  
435 quisque diem, quam, cum primum lux quarta reduxit,  
436 incessere omnes, vultuque animoque fatentes  
437 ire iter invitos, dulcesque relinquere terras,  
438 quarum fecundis digressi a finibus, aspras  
439 pervasere tuas tandem, o Pamphylia, valles ;  
440 quosque latrociniis saltus infamat Isaurae  
441 incola et ad praedas solers et furta Lalassis :  
442 atque Lycaoniae felicia rura, vetusque  
443 dives opum, dives cerealis mergite culmi  
444 Iconium, sed tum vacuis ignobile visu  
445 aedibus et nullo penitus custode relictum.  
446 Quando quidem rerum fama perterritus hostis  
447 cesserat aufugiens, seseque in montis Amani  
448 condiderat latebras, totasque exhauserat urbes.  
449 Ergo ubi inaccessas rupes, praeruptaque Tauri  
450 saxa vident instare sibi et contermina caelo,  
451 quae superent, acti per mille pericula rerum,  
452 coeperunt primum taciti miserescere, sortis  
453 quisque suae et tantos animis damnare labores.  
454 Talia cum tenebris erebi digressus ab imis  
455 cerneret atque locum nactus, tempusque nocendi,  
456 militis in faciem sese convertit Alastor  
457 ignoti et multa cum libertate loquentis.  
458 Isque adeo turba in media : "Quo tendimus (inquit)  
459 angustum per iter ? Jam nos hostilibus apta  
460 insidiis nemora excipient, vallesque profundae,  
461 quaeque adeo nos hic, ingens ubi copia frugum  
462 esse solet, victus jamjam penuria vexat,  
463 ingressos steriles saltus atque invia Tauri  
464 tesqua, vel horrentes baccas, lapidosaque corna  
465 coget et evulsis tristes radicibus herbas,  
466 exstimulante fame, pronos depascere : quamquam  
467 haec quoque inaccessae cautes, scopulique negabunt  
468 sufficere immanes, caeloque, ereboque minantes."  
469 Haec ille afflato fundebat pectore et atra  
470 implebat cunctos formidine nam simul illas  
471 excepere alii voces : nec fingere vultum,  
472 nec lacrymas possunt oculis retinere fluentes,

473 et sensim extortus rumor per castra vagatur.  
474 Ut cum Carpathium Zephyri spirantibus auris  
475 leniter aequoreas paulatim exsuscitat undas  
476 mox ubi nimborum dirupto carcere venti  
477 ingeminant, caelo tumefacto attollitur aequor  
478 altius et vastos volvens ad lictora fluctus  
479 miscentur totum, fundoque exaestuatur imo.  
480 Sic sermo in vulgum crebrescere suetus et horror  
481 miscet agens animos, omnesque excita repente  
482 seditio Gallos in mentem impellit eandem.  
483 Pisidiae hic partim, Phrygiae revisere terras  
484 partim autem ad Cilices, Tarsique ad moenia suadent  
485 flectere iter, quo Carpathium dare vela per aequor  
486 possint et terris Europae adnare propinqua.  
487 Jamque erat, ut signis raptim tellure revulsis,  
488 conversus fugeret Gallorum exercitus omnis,  
489 irritaque aeriis mandaret vota procellis.  
490 Sed pius Eustachides, unaque interritus ordo  
491 heroum trepidis superadvenit. "Et, nova quae vos  
492 coepit, ait, pavidos ignavia? Quis furor, aut quae  
493 invasit tam dira animos dementia vestros?  
494 Emensi qui tot montes, tot iniqua viarum  
495 strata, sitim, duramque famem tolerastis et aestus,  
496 frigoraque: atque altis munitas moenibus urbes  
497 coepistis, Turcasque manu fudistis adorti:  
498 nunc juga et abruptos saltus timeatis Amani,  
499 quos toties ausi pedibus superare Quirites  
500 ejecere suis Parthos e sedibus et se  
501 victores victum statuere Euphratis ad amnem?  
502 Non pudet ad patrios fines, terrasque reverti  
503 indecores? En haec summo promissa fides est  
504 Pontifici? Christoque Deo devota voluntas?  
505 Ite, agite, et vestris narrate parentibus, hic vos  
506 deseruisse duces et belli nobile coeptum;  
507 in manibus postquam residens victoria vestris  
508 vertice calcato Tauri transvexit ovantes  
509 et Solymam clausis avulsa repagula portis  
510 regnandam insolita Gallis virtute dederunt."  
511 His dictis compressi animi, tacitumque per agmen  
512 murmur iit, qualem silvarum audire susurrum  
513 suevimus, ut primum tepidi levis aura Favoni  
514 in nemus incumbens frondes movet, aequora qualem  
515 caerulea, cum motae crispantur leniter undae:  
516 et spissae fluctus sensim illuditur arenae  
517 dant sonitum: pluviis vel concitus imbribus amnis.  
518 Haec eadem proceres alii per castra vagantes,  
519 dum turbam increpitant, Italos rex Daunus amicis  
520 affatur verbis, laudumque inflammat amore.  
521 "O socii, quorum virtus testata parentem  
522 saepe meum potuit claris decorare triumphis;  
523 vos mecum sueti duros perferre labores,  
524 Dalmaticas rupes atque Acroceraunia duris  
525 calcastis pedibus, victricia signa sequentes.  
526 Vos animis vestris, vos assuetudine freti  
527 bellorum, semper vobis loca cuncta putastis  
528 pervia et armati nil non penetrabile dextris.

529 Eia age, dum reliqui Tauri juga summa verentur  
530 scandere et in Syriae sese dimittere campos,  
531 festinate viam, primique invadere durum  
532 montis iter, laetique altas conscendere rupes  
533 audete, o socii, vosque hic ostendite dignos  
534 inclyta quos Itali patres ad bella crearint.  
535 Forsan et haec, nobis quae nunc praerupta videntur,  
536 mollibus in pratis fessos accliva fovebant,  
537 accipientque humiles valles atque aequora campi  
538 culta, ubi se caelo vertex altissimus infert."  
539 Vix atque unanimes motis succedere castris  
540 adversam in rupem et montis juga celsa comantis.  
541 Ausonas et laetos superare angusta viarum  
542 ardua non aliter, quam si loca sueta quadrigis  
543 usque teri, calcanda forent, quos agmine ab ipso,  
544 ut primum impavidos Galli videre per altum  
545 tendere iter, vertere aciem, cursuque perenni  
546 pensantes facinus, montis coepere salebras  
547 scandere certatim, nullosque ex inde labores  
548 ferre recusantes, se summo in vertice tandem  
549 inter oliviferos colles et mollibus ulmos  
550 vitibus intextas, vallesque, agrosque feraces,  
551 horrentesque umbras sistunt, laetique laborum  
552 despiciunt celebres vicos, urbesque Syrorum :  
553 optatasque diu terras uno ore salutant,  
554 inde animo, vultuque alacres facto agmine, ad amnem  
555 perveniunt ; aetas dixit quem prisca Typhonem,  
556 occiso serpente illi vi fulminis ; unde  
557 erupit fons excisa tellure perennis.  
558 Posteritas sed enim benefacti haud immemor ejus,  
559 constravit flumen primus qui ponte, superque  
560 fecit iter tutum, dici de nomine Orontis  
561 jussit et artificii grates hac voce rependit.  
562 Stabat adhuc Pario pons marmore fultus et inde  
563 hinc atque hinc geminas venientibus ostentabat  
564 praesidiis vinctas Turcarum ingentibus arces.  
565 Huc praemissi equites delecta e pube Britanni,  
566 Lexobiique simul captas evertere tendunt :  
567 Londini ante omnes proles generosa Cononis  
568 Goscellus ; primo malas cui flore juventa  
569 vix tum etiam signans addebat frontis honores  
570 egregios, roburque ingens spirabat ab ore.  
571 Ille igitur quamquam ruerent a vertice turris  
572 tela, trabes, lapidesque graves, longeque volantum  
573 densa sagittarum nubes involveret umbra  
574 bellatorum aciem, rupto tamen objice portae  
575 occupat ingressum pontis, primosque trucidat  
576 et turrim aggrediens obstantia claustra refringit,  
577 luminaque impacta perrumpit dura bipenni  
578 et valuis piceos bipatientibus injicit ignes.  
579 Ast illi flammaeque metu, caedisque propinquae,  
580 praecipites sese e summis jecere fenestris  
581 in flumen, rapidoque absorpti vortice, praesens  
582 dum vitare putant letum, reperere sub undis.  
583 At Belgae, clypeata phalanx, hortante magistro  
584 jam medii, jamque extremi munimen adorti



585 pontis, in adversam Turcas immane frementes  
586 propulerant ripam et flammata mente furebant.  
587 Interea properans Gallorum exercitus amnem  
588 transmittunt : ripisque ipsos ex omnibus hostes  
589 dejiciunt, coguntque fugae dare terga, nec ante  
590 consistunt, quam pugnantes ad moenia magnae  
591 consedere urbis : quam cum Rex ipse Seleucus  
592 conderet, in patrem signis insignis amoris  
593 Antiochi jussit patris de nomine dici.  
594 Sed luco appositam Daphnes, ubi festa frequentes  
595 finitimi circum pagi celebrare solebant  
596 annua, conventu in magno, dixere Epidaphnem.  
597 Urbem opibus ditem, fecundamque ubere glebae.  
598 Prole virum celebrem et munitam moenibus altis.  
599 Quae circumjectu populos complexa quaternos.  
600 Sustulit in caelum quondam caput et sibi magnum  
601 imperium Syriis felix ascivit in oris.  
602 Tum quoque barbarici sedes firmissima regni,  
603 vinctaque praesidiis Turcarum ingentibus, ultro  
604 objecit sese Gallorum interrita dextris,  
605 namque illic virtute ingens, belloque gerendo  
606 clarus et Arsacidum generoso a sanguine cretus  
607 Hassanus Belferciades regnabat et urbem  
608 parentem imperio magna dicione premebat.  
609 Filius huic fuerat juvenili aetate superbus,  
610 nomine avum referens, Turcas pulcherrimus inter  
611 corpore et Hesperiiis atrox legionibus hostis.  
612 Ante annos animo bellax, ac laudis avitae  
613 aemulus atque virens Syriae flos pubis et idem  
614 Hassani decus egregium et spes sola parentis,  
615 tantique imperii certus successor et haeres :  
616 si populi votis, placidas Deus applicet aures.  
617 Ergo ubi victores flumen transisse Latinos,  
618 Abdaridasque suos pontem, quo magnus Orontes  
619 jungitur et medio ripas disterminat alveo,  
620 deseruisse videt, positisque ex ordine castris  
621 adtentari aditus, scalasque in moenia posci  
622 et numero vinci Turcas putat atque piorum  
623 posse infringi animos, pugnae in certamine si quis  
624 tantorum procerum media succumbat arena  
625 et patrium Abdaridis rediisse in pectora robur,  
626 expressa tandem fateatur voce, nec usquam  
627 esse ullum, quem Persarum non fervida virtus  
628 proterat et victum campo sibi cedere cogat ;  
629 arripit arma igitur, captusque cupidine laudis,  
630 evocat Hipparchum ; quicum consueverat uno  
631 esse dies, partemque etiam consumere noctis  
632 et simul in densos nemorum contendere saltus ;  
633 seu saevos venetur apros ; seu comminus ursos  
634 invadat ; seu vera manu, seu ludicra tractet  
635 arma domi et sese praesentis imagine belli  
636 oblectans, animum pugnarum inflammet amore.  
637 Tum quoque confisus veteris virtute sodalis.  
638 "Ipse vides, Hipparche, quibus legionibus (inquit)  
639 circumdet nostram Gallorum exercitus urbem ;  
640 et late populetur agros, finesque Syrorum ;

641 dum nos e muris dites spectamus agique  
642 et ferri hinc illinc praedas, proh dedecus ingens,  
643 qui, quasi molle pecus, circumvallemur inertes,  
644 atque ignominiam taciti, turpesque feramus,  
645 quam ponte amisso pugnando accepimus haud me  
646 progenitum rear Arsacidum de sanguine regum,  
647 in pugnam ni quem ipse vocem. Stat damna laboris  
648 hesterni et tantae virtute rependere cladis,  
649 ne sibi cum Phrygibus bellandum, Arabumque fugaci  
650 gente putent ; ubi nemo ausus se credere campo est.  
651 Et Marte aequato solus concurrere soli.  
652 Hinc ollis etenim felix audacia crevit :  
653 at nostris depulsa sui fiducia longe  
654 cessit et infringens mentes ac pectora terror,  
655 turpiter exulibus Gallis dare terga coegit.  
656 At me vel magnus submergat gurgite Orontes  
657 ante suo et caecis Casius convulsus ab Euris  
658 obruat, infernisque prius Deus asserat umbris,  
659 quam metus a coeptis animum deterreat altis,  
660 ullaque degeneris cuiquam dem signa timoris.  
661 Ire animis illum contra mens ardet et unum  
662 protinus in pugnam clauso deposcere campo ;  
663 vidimus effracto quem fortiter objice pontis  
664 adversam in ripam ferro depellere nostros."  
665 Haec ille et flammis oculis effundere visus.  
666 Tum vero Hipparchus, tantis perterritus ausis  
667 substitit atque illum placidis avertere dictis  
668 quaerit ab incepto : "Juvenum fortissime, quis te  
669 abneget Arsacidum praeclaro a sanguine cretum ?  
670 Cujus in ingenti virtus se pectore tanta  
671 efferat, ut cunctos facinus memorabile in annos  
672 aggrediare manu jam nunc, tantoque periculo  
673 objicias caput ipse tuum, proque omnibus unus,  
674 pro quo uno fas est omnes succumbere leto,  
675 praecipites tete in vitae discrimen apertum :  
676 quin potius dum per pagos atque arva vagantes  
677 convectant praedas, belli nos furta paremus,  
678 excipimusque locis, fessosque errore viarum  
679 ense trucidamus, trahimusque in vincula captos ?"  
680 His dictis acres audax Belfercus in iras  
681 exardens. "Tu vero (inquit) furtisque, dolisque  
682 utere et insidias castris molire latentes,  
683 si tantum vivisse hostem tibi rere decorum.  
684 Me deceat medio versantem in turbine leti  
685 ostendisse palam, quantum virtute, manuque  
686 Arsacidum praestet proles generosa Latinis."  
687 Dixit et antetulit gressum : portisque reclusis  
688 exiit ; illum autem juvenum comitatur euntem  
689 lecta manus, laterique comes fidissimus haeret  
690 Hipparchus : quamquam verbis male pressus amaris.  
691 Interea praemittit agens in castra piorum,  
692 in pugnam ex illis aliquem qui provocet aequam ;  
693 Goscellum ante omnes : cujus memorabile nomen  
694 sustulit ad caeli fulgentia sidera virtus ;  
695 praesidium postquam Turcarum e ponte fugavit  
696 et multo ingentem tepefecit sanguine Orontem.

697 Quae simul ac proceres animisque atque auribus omnes  
698 acceperere suis, tectumque micantibus armis,  
699 ora nisi et pulchram nudare cassida frontem,  
700 stare hostem et, secum media qui pugnet arena,  
701 exspectare vident et multo pulvere campum  
702 miscere atque aliquem de se promittere tantum  
703 mirantur, primae qui nondum evaserit annos  
704 aetatis, vixque ora gerat modo tonsa juventae.  
705 Consurgit pubes igitur generosa piorum,  
706 exsortemque dari sibi quisque exposcit honorem.  
707 Cecropidum princeps Tyrrheno a sanguine Medix :  
708 et dux appositus duris Ursanius Umbris  
709 et Biturix Arpinus et iisdem aequalis ab annis  
710 Vulsinii, Ciminique lacus regnator Halesus :  
711 his et Aestinus Venetae flos Attius orae,  
712 Oromedonque ferox et contestata Vitelli  
713 magnanimi virtus ; nec non, cui nobile paret  
714 Urbinum, gelidique rapax fluit unda Metauri,  
715 Ubaldus ; sese ultro addunt, pugnamque petentes,  
716 quisque sibi, reliquis praeferri omnibus optant.  
717 Poscit idem clari proles generosa Cononis  
718 Guscellus : centumque alii, quorum invida nomen  
719 occulit et densis involvit fama tenebris.  
720 Guscelli sed enim Leuco justissima visa est  
721 causa duci, quando illum unum selegerat hostis  
722 prae reliquis, quicum media pugnaret arena.  
723 Ergo laetus abit tanto e certamine victor,  
724 delatumque sibi tacitus gratatur honorem  
725 et se principibus tantum debere professus,  
726 quantum vitam longum producat sibi in aevum,  
727 proque illis subeat terraque, marique pericla  
728 omnia, non umquam gratus persolvere possit.  
729 Exsilit et corpus fulgentibus induit armis ;  
730 tum conum insignis galeae, cristasque comantes  
731 aptat nequicquam capiti ; tum caede madentem  
732 hesternam lateri properans accommodat enses.  
733 Mox saltu conscendit equum, clypeumque sinistra,  
734 at dextra ingentis robur grave sustinet hastae.  
735 Interea dimensi agrum Turcaeque, piique  
736 addiderant clauso compacta repagula campo  
737 et quas auderet nemo perrumpere leges  
738 pertulerant, nequis nutu, aut voce, manuque  
739 victori, aut victo faveat : neve audeat alter  
740 alterius dare vulnus equo, fraus omnis abesto :  
741 propositum donec laudis certamen inicitur  
742 et parit alterutri victoria laeta triumphum.  
743 His ita compositis ductorum ex ordine primi  
744 hinc atque hinc placito junxerunt foedere dextras :  
745 inque vicem strinxere fidem, quam frangere nulli  
746 non immane nefas, vetitumque ante omnia Persis.  
747 At pater in pugnam Guscellum affatur euntem.  
748 "Nate, tuae spes summa domus, si gentis avitae  
749 immortalis honos umquam, si vivida virtus  
750 ad decus egregium stimulis ardentibus egit,  
751 optantem heroes factis anteire potentes,  
752 nunc tu, quandoquidem tempus sese obtulit ultro,

753 quo te de nostro testeris sanguine natum,  
754 diffundasque tuum ventura in saecula nomen,  
755 fac referas victor tanto e certamine palmam.  
756 Quod facies, si nate, animum ratione, manusque  
757 arte reges : satis est cunctando vincere, numquam  
758 sinceram peperit virtus temeraria laudem."  
759 Haec ille : et monitis instructum talibus illuc  
760 ire jubet, quo monstrat iter fors laeta, Deusque  
761 nec mora : progreditur procerum comitantibus armis  
762 atque alacer clausi se sistit in aequore campi.  
763 Tum tuba ter signum pugnae dedit aere canoro.  
764 Quod simul auditum est ; diversa e parte ruentes  
765 prosiluerunt ambo, mediique in gramine prati  
766 alter in alterius thoracem intentus aenum  
767 infregit magnis directam viribus hastam  
768 fraxineam, truncumque manu projecit in hostem.  
769 At Belfercus equum freno retinere ruentem  
770 non potuit, namque ille semel calcaribus actus,  
771 correptoque ruens spatio, non constitit ante,  
772 pectore quam toto commissa repagula valli  
773 perculit et fractos inter clatrosque, trabesque  
774 lapsus humi dorso sessorem excussit ab alto.  
775 Qui simul ac terram tetigit : pedes obuius ultro  
776 exsilit et dictis Goscellum appellat amaris.  
777 "Non tua me virtus, sed equi temerarius ardor  
778 stravit humi, quo te incolumen subducere leto  
779 instanti turpis possit fuga." Dixit et una  
780 iligno totum protexit stipite corpus ;  
781 stipite, qui scrobe telluris defixus in alta  
782 stabat et ingenti firmabat robore clatros.  
783 Ergo illinc solidi tectus munimine trunci  
784 nunc crebros adigit clypeo, nunc accipit ictus  
785 et fors omne datum frustra per talia tempus  
786 consumpsent, neuterque e pugna victor abisset,  
787 impatiens ni forte morae Goscellus et irae  
788 desiluisset equo et peditem pedes ipse petisset :  
789 parque pari pugnam inceptam congressus obiret.  
790 Et prior incurrens validis cum viribus ense  
791 in clypeum librat subeuntis cominus hostis  
792 et, quamquam solidi formatum ex aere metalli,  
793 in geminas partes iterato dissipat ictu.  
794 Ut quondam in summo lignator vertice Pindi  
795 impacta findit quercumve, ornumve securi.  
796 Ille autem, levis spoliatus tegmine parmae,  
797 irrumpit insurgens contra : seque inter adorti  
798 corpora robustis simul implicuere lacertis,  
799 luctatique diu, tandem cecidere, solumque  
800 prostratus tergo pressit Belfercus et una  
801 Goscello victum dum se negat, atque revulsa  
802 casside trajicitur duro cava tempora ferro,  
803 ingentemque animam tenues exhalat in auras :  
804 Hipparcus, quem turbanti certaminis unus  
805 jamdudum stimularat amor, praecepsque cupido  
806 impulerat, iusti leges contemnere et aequi,  
807 letifero celerem cornum jaculatus ab arcu  
808 victori penitus fauces, jugulumque Britanno

809 perforat et fulva revolutum extendit arena.  
 810 Educat agricolae studium, rigat humor aquai  
 811 liquidus, e summo decurrens margine clivi :  
 812 circum autem instabiles impellunt flatibus aurae.  
 813 Illa comas effusa suas pulcherrima floret,  
 814 ostentatque novae decus immortale juventae.  
 815 Quod si forte acri stridens Aquilone procella  
 816 desuper incubuit, fossa cadit eruta, humique  
 817 exstirpata jacet : juvenem sic Persa Britannum  
 818 surgentem a caede morti dimittit iniquae.  
 819 Subjicit et facto immani verba aspera. "Nunc tu  
 820 victor cum victo Stygias te confer ad umbras" ;  
 821 nequis praeterea caesum se jactet eadem  
 822 esse manu, qua Turcarum spes concidit omnis,  
 823 et fuso Arsacidum maculata est sanguine tellus.

## LIBER UNDECIMUS

S\_11 v.1 Hic procerum intentas subitus dolor, iraque mentes  
 2 occupat et tanti memoranda injuria facti  
 3 praecipites agit in Turcas, primique Britanni  
 4 corripiunt vastos arcus : celeresque sagittas,  
 5 recludunt enses : patefacto aggere campi  
 6 procurrunt Itali et Gallorum interrिता pubes.  
 7 Nec minus Abdaridae diversa e parte ruentes  
 8 objiciunt sese, vocesque ad sidera jactant.  
 9 It caelo clamorque virum, clangorque tubarum,  
 10 telorumque ingens totum tegit aera nimbus.  
 11 Autumno veluti cum lapsae ex arbore frondes  
 12 arentes, liquere hiemis sub frigora, ramos,  
 13 et terrae texere solum ; si vertice ab alto  
 14 incubuit Boreas in silvam et turbidus Auster  
 15 adverso rursus veniens a cardine flavit.  
 16 Nunc huc, nunc illuc sese per inane volutant :  
 17 miscenturque una et temere agglomerantur in orbem.  
 18 Primus ibi Hipparchus, caedis qui solus iniquae,  
 19 et sceleris, fraudisque audax processerat auctor,  
 20 dum circumfusos comites hortatur et urget  
 21 turbidus in pugnam et stricto ferit obvius ense,  
 22 sopitus cecidit magno sub pondere clavae.  
 23 Hunc Lyncus, fraterque Labrax, Drymonque, Coraxque  
 24 exanimem cecidisse rati, quo corpus inane  
 25 obscaenis lacerandum avibus, canibusque relinquunt,  
 26 et quocumque modo domini ulciscantur adempti  
 27 interitum, pedibus traxere in castra revinctis.  
 28 Nec procul inde avidum pugnam confundere Lydum  
 29 Cambletem Biturix, acto in praecordia ferro,  
 30 sternit humi, mensa suetum discumbere herili,  
 31 Belfercumque una risu oblectare, jocisque

32 et tempestivis horas insumere caenis :  
33 et tamen expertum belli, gnarumque laborum.  
34 Inde inter primos versantem et dura cientem  
35 proelia Tigritem splendenti percutit ense  
36 et galeae in tergum caudam fundentis equinam  
37 perfregit conum et frontem confixit : at olli  
38 offudit caecas oculis nox atra tenebras.  
39 Concidit et magno tellurem pondere pressit :  
40 cui collo ex alto pendentem in pectora torquem,  
41 e solido conflatum auro, rapturus Aturrus  
42 incola Burdigalae, rapto qui vivere suetus  
43 esset, et occultis vitam traducere furtis,  
44 accurrit properans : ac dum se inclinat, ut aurum  
45 auferat et praeda cupidus ditescat opima,  
46 detexit lumbos et, qua conjungitur ossi  
47 spina sacro, Sasalis mucronem in viscera condit,  
48 per mediumque adigens umblicum, e vulnere tristem  
49 extorsit vitam et tenues dispersit in auras.  
50 Et Sasalim florentem annis et corporis auctu  
51 ingentem et Thracum prognatum a sanguine regum  
52 Daunius incurrens medium transverberat hasta,  
53 setosus mammas thorax ubi dividit ambas :  
54 ille cadit, pedibusque leves diverberat auras  
55 non secus atque alnus fluvii, putrisque paludis  
56 nata ad aquam et celsis avecta ad sidera ramis,  
57 cum ruit, agricolae dura succisa securi  
58 et jacet informis, donec currumve, ratemve  
59 Circumiens, hominum notos formatur ad ursus.  
60 Hic etiam auxilio subeuntem et dira frementem  
61 Beliadem aggressus, stricto ferit arduus ense,  
62 egregium forma juvenem ; quem mater Iebba,  
63 descendens summis a verticibus Carmeli  
64 huc, ubi vir flammis tenues mollibat arenas,  
65 fusuras vitreos rivis undantibus amnes,  
66 edidit in lucem limoso in margine Beli.  
67 Qua propter puerum grati dixere parentes  
68 Beliadem, patris memorem, matrisque futurum,  
69 ni vitam Ausonius juvenilem abrumperet ensis :  
70 quo caput in geminas partes bellator Iapyx  
71 disjiciens. "Rapidi fas est, ait, horrida Orontis  
72 ripa tegat, Belus quem jam piger amnis in auras  
73 extulit aetherias, tanto ut morerere sub ictu."  
74 Talia dicentem jacta petit obvius hasta,  
75 Hassani qui se Cypria de pellice natum  
76 crediderat Gemmes, lecto supposito herili  
77 per fraudem et prolem regno exclusurus ab alto  
78 legitimam, si forte dolos et vota secudent  
79 astra et regnorum semper Deus unicus auctor.  
80 Verum aliter superis visum : nam fraxinus acri  
81 illius acta manu, praetervolat irrita regem  
82 Ausonium et stridens pectus transfixit Amastri  
83 armigeri ; Stephano Senoni quo gratior alter  
84 non fuit et tacitae cui crederet intima mentis  
85 arcana et curas animi fidentius omnes.  
86 Quo moriente, Senon tristes exarsit in iras :  
87 "Per mediosque ruens. Nec tu laetaberis (inquit)

88 hoc errore tuo : neque me mea dextera fallat."  
89 Dixerat et Gemmem commissa caede superbum  
90 saevus adit, dextrumque oculum configit acuta  
91 cuspidem : quae penitus fixo stetit hausta cerebro :  
92 reclusitque animi latebras, caecosque recessus.  
93 Ille cadit, regnique omnem spem morte relinquit.  
94 Commixtum interea magnis terroribus affert  
95 clamorem, ac totam pervadit fama per urbem,  
96 cunctorumque aures atra formidine replent  
97 confusae voces atque illaetabile murmur ;  
98 Belfercum egregiae juvenem virtutis et una  
99 invictum bello Gemmem cecidisse peremptos  
100 et ruere ad portas urbis facto agmine Gallos,  
101 victoresque manu saevam committere caedem  
102 et furere et scalas ad moenia ferre paratas.  
103 At rex Hassanus, quamquam tot funera mentem  
104 turbant et subito (saevae) dolor occupat ingens,  
105 accurrit properans tamen et se in tuta ferentes  
106 increpat. "O miseri tantus quis pectora vobis  
107 insinuat pavor ? E projectis turpiter armis  
108 quo fugitis ? Durone illis e marmore corpus ?  
109 Aut ferri ex acie ? Vestrarum respuit ictus  
110 hastarum ? Cur tela manus, cur tempora cassis  
111 armat ? Et obductus vobis ad pectora thorax ?  
112 Eia, agite, et mecum victorem invadite Gallum.  
113 Aut hodie mortem natorum ulciscar acerbam ;  
114 auferet aut idem vitam mihi fatifer ensis."  
115 Dixit et e portis praeceps erumpit apertis :  
116 atque una secum Orchanes : cui vivida bello  
117 dextera et agrestes robusto in corpore vires,  
118 setosum chalybis pectus tegit : aerea frontem  
119 cassida : tum clypeus laevum latus : at manus hastam  
120 dextra gerit solidam : clavae grave robur in armos  
121 pendet equi et femori pugnax accingitur ensis.  
122 Iique ubi se fudere foras, lectique secuti  
123 tota ex urbe duces et bello assueta juvenus,  
124 invasere pios Turcarum eversa fugantes  
125 agmina et immiti strages et funera ferro  
126 edentes, campi spatium quocumque patebat.  
127 Hic Petalus Trevir, fugientem saevus in hostem  
128 dum furit impune et facta jam caede superbit,  
129 fraxinea Hassani medius transfigitur hasta.  
130 Huic comitem Orchanes perfossum cuspidis ictu  
131 ire jubet Pansam, Pansaeque adjecit Agronem :  
132 Illyricos inter rerum cui summa potestas  
133 cum foret et regni regeret moderator habenas  
134 ipse unus, patria Gallis servire relicta  
135 maluit et famam sumptis sibi quaerere ab armis.  
136 Nec mora. Bellovacus cadit Antymus : et cadit Agnon :  
137 Antymus Herculeae contusus tempora clava,  
138 Ambarides Agnon Porsaeidae caesus ab harpe ;  
139 jamque simul Gallique omnes, versique Britanni  
140 terga dabant, victorque hostis per aperta ruebat,  
141 caede tepefaciens, quaqua patet aequore capus :  
142 cum pis Eustachides rapta volat obvius hasta :  
143 inque aciem confertam equitum defertur et ipsi

144 perforat Harpagio ferrata cuspidē pectus :  
145 Harpagio, quem frondiferis Pamphylia silvis  
146 eductum, docuit sese immiscere rapinis,  
147 exercet quascumque Cilix et raptor Isaurus.  
148 Unde altas jam nactus opes, fidosque sodales  
149 oppressit Tarsum per fraudem et Rhoson et Isson.  
150 Bithyna sed enim postquam sunt urbe potiti  
151 Christicolae et Medi pugna cecidere cruenta,  
152 inque dies magis atque magis diffideret armis  
153 ipse suis, populique iras odiumque timeret,  
154 Hassano laturus opem, Cydnumque, Sarumque  
155 liquit et augentem multo sua litora limo  
156 Pyramon, ac portas caelo se aequantis Amani.  
157 Hoc tamen auxilio regem tum juvat amicum,  
158 Eustachidae in sese quod telum avertit et illum  
159 protinus occumbens stygiis submovit ab umbris.  
160 At ferus Orchanes, immani vulnere pectus  
161 confossum aspiciens, non jam perterritus haesit,  
162 sed stricto Eustachidae galeam ferit arduus ense,  
163 ulturus socium : nec fors deceptus abisset,  
164 ni clypeum ingentem plagae supponeret heros,  
165 corporeque exiret telum, vitaret et ictum.  
166 Decidit in summum saevi tamen impetus ensis,  
167 nudavitque genu, fuerat quo tegmine tutum.  
168 Tum vero Eustachides ira inflammatus amara  
169 altior insurgit, gladiumque obliquat acutum  
170 in latus et medium, quamquam fulgentibus armis  
171 contectum et triplici munitum corpus ab aere,  
172 disjicit in geminas uno modo vulnere partes.  
173 Umblico tenus una cadit : sedet altera dorso  
174 fortis equi : latique trahens per gramina campi  
175 viscera, praecipiti cursu defertur in urbem :  
176 informe, horrendum et visu miserabile monstrum.  
177 Hic vero Abdaridis humilis trepidantia rursus  
178 sternit corda pavor, pugnamque relinquere cogit :  
179 tergaque vertentes spatium producere vitae.  
180 Ipse etiam Belferciades Hassanus in urbem  
181 invitus rapitur : tum primo in limine turba  
182 opprimitur fugiens, vitamque exhalat in auras,  
183 dum portae se quisque volens inferre patenti  
184 occupat ingressum et magnis clamoribus intro  
185 primus abit, nisuque animam diffundit anhelō.  
186 Accurrunt igitur trepidi, qui claudere portas  
187 festinent, introque vetent irrumpere Gallos.  
188 Ceu quondam agricolae, pluvia si forte recenti  
189 aequarint summas torrentia flumina ripas ;  
190 quae jam diluviem pratisque, agrisque minantur,  
191 ingentes lapides, umbrosisque eruta silvis  
192 robora et excisas annoso stipite quercus  
193 advolvunt, totoque fugant e pectore somnum :  
194 incustoditus nequa vagus effluat amnis,  
195 et sese in segetes, camposque effundat apertos.  
196 Cardine sic illi converso ad limina valvas  
197 obnixa impellunt humeris, multosque suorum  
198 excludunt, atraque omnes in morte relinquunt.  
199 Quorum alii ferro immiti cecidere perempti :



200 in rapidum jecere alii se flumen et undis  
201 demersi, Stygiae ripas petiere paludis.  
202 Occultae paucos latebrae, notique recessus  
203 montis et obscurae valles horrentibus umbris  
204 servarunt, dum tecta fugam per lustra capessunt,  
205 et sua subducunt instanti corpora leto.  
206 Ast Itali, Gallique duces, acresque Britanno  
207 ulti hostem, quamquam primas nox atra tenebras  
208 excierat, terrasque suis obtexerat alis,  
209 Goscellum maesti strato imposuere pheretro,  
210 susceptumque humeris flentes in castra tulerunt.  
211 Quem super illacrimans genitor procumbit et imo  
212 corde ciet gemitus, tandemque his vocibus hiscit.  
213 "Nate mihi e primo sublatus flore juventae  
214 occidis et rerum versantem in turbine patrem  
215 deseris ipse tuum : plus, heu plus scilicet uno hoc  
216 vixi ego, nate die, vitae quam posceret hujus  
217 usus et emeritae requies postrema senectae.  
218 Debueram caput hoc morti, cum me tua virtus  
219 felicem caelo aequarat ; cum facta triumphis  
220 digna ferebantur passim : nec perfidus hostis  
221 fas omne abrumpens, telo mactaret iniquo  
222 victorem et regis surgente a caede superbi,  
223 aeternumque decus palmae immortalis adeptum.  
224 Nunc, sine te, quicumque dies, Goscelle, supersunt,  
225 exigere atque graves belli tolerare labores  
226 cogar et ingratae posthac accumbere mensae.  
227 Hoc tamen in luctu laetor, quod sanguine fuso,  
228 protinus evectum Solymae caelestis ad arces  
229 et cupio et spero : nostras unde arduus oras  
230 despicias et coetus inter versaris ovantes :  
231 qui verum ob cultum pugnando vulnera passi  
232 aethereas sedes terris petiere relictis."  
233 Aurora interea toto fulgentia caelo  
234 sidera depulerat, montesque afflarat anhelis  
235 Phoebus equis, lati retegens super aequora campi  
236 corpora caesorum atque ingentes stragis acervos :  
237 cum pius Addemarus candentem indutus amictum  
238 selegit procul urbe locum, ac de more piorum  
239 sparsit rore sacro et pura circumtulit unda :  
240 conceptisque Deum verbis in vota vocabit.  
241 Hic, qui praeterita sublatis caede jacebant  
242 effossae mandantur humi, princepsque sacerdos  
243 illorum enumerans laudes, vocat ore beatos,  
244 queis hoste in medio pulchram per vulnera mortem  
245 oppetere et sese stellis inferre cruentos,  
246 contigit ante ipsum divumque, hominumque parentem.  
247 Has inter lacrimas, sacris jam rite peractis,  
248 Goscello ingentem nigro de marmore mandat  
249 Eustachides fieri tumulum : sed opima columnae  
250 Belferci regis justo in certamine victi  
251 adversae figit spolia et rem carmine signat.  
252 Goscellus victor victo hoc de rege tropaeum.  
253 Omnibus his adiicit meritae spectacula poenae.  
254 Namque ipsum Hipparchum, primus qui foedere fracto  
255 Goscelli occultam direxit in ora sagittam,

256 ante urbem adductum, jubet in diversa quadrigis  
257 differri et toto raptari viscera campo.  
258 Interea magnos Nerei sol lapsus in amnes  
259 corrui : et densis obducens cuncta tenebris  
260 stelliferi summum patefecit limen Olympi.  
261 Tempore quo Divum coetus convenerat omnis,  
262 ut patrem, regemque hominum festinus adiret  
263 et ferret sua quisque leves mandata per auras,  
264 in terris quaecumque imis peragenda darentur.  
265 Astitit hos inter tenebrosa a sede nigrantum  
266 Uragus, horrentis custos infandus Averni.  
267 Quem procul aspiciens hominum, rerumque repertor.  
268 "Unde, ait, ipse tuos gressus agis Urage ? " At ille  
269 respondit : " Terras adii, pelagique recessus,  
270 omnia circumiens, praedas ut dives opimas  
271 undique quaesitas in Tartara convectarem."  
272 Tum pater omnipotens. "Nunc quem terrae (inquit) in orbe  
273 Goffredo magis esse uno pietatis amantem  
274 et nati praecepta mei, ritusque tuentem  
275 vidisti ? Quos ille animo, quos ille labores  
276 corpore sustineat, Solyam quo liberet urbem  
277 servitio infando, templisque reponat honores  
278 ipse meis, Turcasque alias depellat in oras ?  
279 Subjicit his Erebo pestis digressa profundo  
280 Uragus. Haud equidem miror, rex maxime, si quem  
281 ipse tua fultum munis ope, cuique secundae  
282 res et vota fluunt, unum modo pectore toto  
283 te colit atque aras multo tibi thure vaporat,  
284 ac caeli proceres precibus sine fine fatigans  
285 perstat in officio et Solymae fidenter ad urbem  
286 pergenti, non usquam animi mens fluxa vacillat.  
287 Sed si forte tuas vires subtraxeris et me  
288 siveris improvisum aliquod legionibus illis,  
289 ipse quibus praeest, jam nunc infligere vulnus,  
290 finibus extemplo Syriae, rebusque relictis  
291 ad Morinos tibi diffisum remeare videbis."  
292 Haec ille. At contra divum pater atque hominum rex.  
293 "Vade age, cunctorum, qui nunc mea castra sequuntur,  
294 experiare animos horrenti alguque, fameque,  
295 adversisque una rerum successibus ipsos  
296 bellatorum animos e tanto avertere coepto  
297 nitere et in populos pestem diffunde, luemque ;  
298 et pereat, retrove abeat, qui nomine nostro  
299 praetexit fraudem et dominandi fertur amore ;  
300 hi fines tibi praefixi statuuntur. At ultra  
301 ire veto." Sic effatus terramque, polumque  
302 aetheraque immensum vultu tremefecit et undam,  
303 ille autem procul abscessit, Daphnemque petivit :  
304 unde olim responsa suis edebat et omnium  
305 implebat fallax dubiis ambagibus aures.  
306 Huc se demissus consueta in sede locavit  
307 observaturum tempusque atque apta nocendo  
308 momenta et lapsis sparsurum incendia rebus.  
309 At proceres, positis portarum ad limina castris,  
310 inclusos Turcas densa obsidione premebant.  
311 Quamquam illi aversae digressi e moenibus urbis

312 palantes Gallos, praedamque in castra ferentes  
313 interdum insidiis obtruncavere locatis.  
314 Has inter clades, durique incommoda belli  
315 mutua, jam mensis processerat unus et alter  
316 et circum horrificis Aquilonibus arva rigebant.  
317 Non ullae arboribus frondes, non gramina campis  
318 ulla superfuerant : glacies astrinxerat amnes :  
319 brumaque durata passim nive texerat arva :  
320 et circum vastatus ager, direptaque late  
321 castella atque hornis exhaustae frugibus urbes,  
322 afflictis alimenta dabant haud ulla Latinis.  
323 Jamque fames totis incesserat improba castris :  
324 nec lacerae vestes pluviam, nec frigora noctu  
325 marcentes poterant pelles arcere ; nec usquam  
326 tectum erat, a gelidis sese ut defenderet Euris  
327 miles et optato recrearet membra sopore.  
328 Quae simul atque hiemis vis ingruit aspera terris,  
329 Uragus aligeros dirorum a sede nigrantum  
330 evocat : "Illi adsunt praesto, morbosque, famemque  
331 augentes, qua quisque potest in pectora sese  
332 inserit atque animos agitans vulgique, ducumque  
333 suadet ab inceptis quamprimum avertere mentem,  
334 et desperatis penitus diffidere rebus.  
335 Ergo alii, dum dira fames et pestis in omnes  
336 grassatur, taciti coetus atque ipsa piorum  
337 castra relinquentes Lydos petiere, Phrygesque,  
338 vicinos alii portus : liberrimus unde  
339 detur in Ionias undas et litora cursus."  
340 Tum pius Eustachides, cui res adversa dolorem  
341 ferret et ex oculis lacrimas exciret amaras,  
342 concilium propere cogit procerumque, ducumque  
343 sciturus, dubiis quid quisque in rebus agendum  
344 censeat ; unde aliquam castris ferat ipse salutem.  
345 Hic igitur Thracum ductor, quem Graius Alexis  
346 miserit, ut tantis per fraudem obsisteret orsis,  
347 consessu e medio surgens, haec ore profatur.  
348 "Non equidem, o proceres, vestris me viribus unquam  
349 indubitare sinet virtus clarissima, qua vos  
350 tam longum superastis iter ; stravistis et hostes  
351 innumeros, summisque sitas in montibus arces  
352 exaequare solo freti potuistis et una  
353 praecipites undis tranare tumentibus amnes.  
354 Nec, siquid vestris adversum contigit ausis,  
355 continuo jubeam tantis diffidere coeptis,  
356 et quasi devictos hosti concedere palmam ;  
357 sed quoniam hibernis cum tempestatibus et cum  
358 imbribus, ac nivibus, glacieque rigentibus oris  
359 pugnandum est, vulgoque ingens pestisque, famesque  
360 absumit miseros, nec spes datur ulla salutis,  
361 dum fessi ad ripam rapidi versamur Orontis,  
362 inque dies hostis regionem, urbemque tuetur  
363 auctior, ingentes animos, cui prospera rerum  
364 eventa addiderint, quorum vi non modo tutam  
365 esse putant urbem, sed aperto invadere marte  
366 castra parant opibus Persarum ingentibus aucti :  
367 cedentes ultro nos in vicina feramus

368 hiberna : et caeli tractum fugiamus iniquum :  
369 dum terris desaevit hiems et frigora Cauri  
370 spirantes, nostris prohibent assultibus hostem.  
371 Namque, ita corporibus, somnoque, epulisque reffectis,  
372 cum primum incipient tepidi spirare Favoni  
373 flamina, et incultis herbescere gramina campis,  
374 forsitan auspiciis longe melioribus urbem,  
375 quae modo nos portis infesta excludit et arcet,  
376 cum se rettulerint alacres in castra manipuli,  
377 continget faciles captam expugnare per artes.  
378 Interea, nequis duos vitare labores  
379 me putet et pro re communi haud velle periculis,  
380 quaecumque est, quae restat adhuc, exponere vitam,  
381 seu vos hic studium coeptae obsidionis ad urbem  
382 detineat, laetos seu vos hiberna receptent,  
383 certum est Threicias jam nunc excurrere ad oras :  
384 ut quascumque equitum turmas, peditumque cohortes  
385 delegit nuper Graium regnator Alexis,  
386 adducam quamprimum ad vos : quibus amnis Orontes  
387 territus auxiliis, fastusque, animosque superbos  
388 exuat atque jugo collum submittat aeno."  
389 Haec dux Odrysius. Contra quem talia fatur  
390 Eustachides. "His me castris incommoda numquam  
391 dimoveant : vel se totam diffundat Orontes  
392 in vallem et Casius terris subsidat apertis.  
393 Tu vero, quascumque libet te confer in oras  
394 providus et nostrae tangat te nulla salutis  
395 cura. Etenim Deus usque suos tutatur et illos  
396 non aestu, non frigus iners, non laedit egestas,  
397 non acies confertae hominum, non alta retardant  
398 moenia, nec summas aequantia flumina ripas,  
399 quominus inceptis instent constanter, amentque  
400 ignibus in mediis potius dispergere vitam  
401 impavidam, quam degeneris dare signa timoris  
402 ulla, vel a magnis desistere turpiter ausis."  
403 Haec bonus Eustachides : sed Thracum ductor et una  
404 dux Senonum : "Simulans morbo tentarier acri,  
405 atque ipse abjectis clam Carpentarius armis,  
406 unus, inexhausto plures qui robore suerat  
407 contra stare hostes, victorque excedere pugna,  
408 regia progenies magnorum et germen avorum,  
409 obliti decorisque sui, laudisque suorum,  
410 arripuere fugam, castrisque abiire relictis  
411 et socios tanto linquere in cardine rerum.  
412 Tum vero procerum tantorum exempla secuti  
413 innumeri, queis militiae labor et meus acer  
414 fregerat hostilis, solidosque inciderat omnes  
415 virtutis verae nervos, liquere sodales,  
416 quisque suos, facti immemores, votique, fideque.  
417 Usque adeo capiunt animos obliviam nostros,  
418 et penitus nulla est alienae cura salutis,  
419 si quando impendet capiti commune periculum."  
420 Ut, fumo cum pastor apes exegit amaro.  
421 Dulcia lecturus mella ex alvearibus illae  
422 destituunt trepidae cellas et, rege relicto,  
423 in diversa abeunt, fusaeque per arva vagantur.

424 Hic igitur reliqui proceres precibusque, minisque,  
425 quisque suos retinent, poenasque et praemia cuique  
426 proponunt et, quae possunt, alimenta ministrant.  
427 At Robertiades congesto e caespite primos  
428 Ausonidum alloquitur, verbisque hortatur amicis.  
429 "Ferte viri et duros animo tolerate labores,  
430 et mecum adversis opponite pectora rebus.  
431 Ille Deus, cujus causam suscepimus ille  
432 praesto aderit laturus opem, si fortiter ausis  
433 instare et duri perferre incommoda belli  
434 viderit unanimes, quae nunc his maxima terris  
435 perpetimur ; neque enim tantis insistere coeptis  
436 invisos hominumque patri, divumque putandum est.  
437 Nos ille incolumes per tot discrimina rerum  
438 duxit adhuc, idemque manu superare potentes,  
439 innumerosque hostes dedit ; et vel nomine tantum  
440 insolitum Arabiis terrorem inferre, Syrisque,  
441 praecipitesque sua Turcas depellere sede :  
442 et nunc, quod glacie valles infesta nivali  
443 detinet et rara est cerealis copia victus,  
444 vinaque deficiunt, plenaequae obsonia mensae,  
445 creditis a nobis mentemque, animumque benignum  
446 avertisse Deum ? Tales plerumque per artes  
447 pertentare fidem solet ille et nosse suorum.  
448 Nec tamen extremis agitados casibus umquam  
449 deserit ; at, quod vos experti saepius estis,  
450 improvidus adest et opem pereuntibus affert.  
451 An vos, o miseri tutam per tela, per ignes,  
452 perque acies medias, inimicaque castra putatis  
453 invenisse viam certa sine numinis aura ?  
454 Et tandem incolumes penetrasse ad flumen Orontis ?  
455 Non nostrae hoc vires ; non victae ignavia gentis  
456 effecit ; legiove magis numerosa piorum.  
457 Major agit virtus ; majorque potentia nostra haec  
458 coepta juvat ; quam cui possint vel Bactra, vel Indi  
459 impune armatas opponere in agmine dextras.  
460 Huic ergo, o socii, si jam confidimus uni,  
461 nil desperandum tanto duce et auspice tanto."  
462 His dictis curas, tristesque e corde parumper  
463 amovere metus : sed enim penuria victus  
464 quottidie magis atque magis funesta premebat  
465 non modo confusam passim ac sine nomine plebem,  
466 verum etiam auctores belli, proceresque ducesque  
467 communem impulerat jam desperare salutem,  
468 qua fama rex Hassanus commotus amicos  
469 quorum consilio niti consueverat, ad se  
470 convocat et laetus fidas sic fatur ad aures.  
471 "Quod fore providi jam tum, cum tantus in armis  
472 obsedit nostram Gallorum exercitus urbem,  
473 ecce malis perit ipse suis, morboque, fameque,  
474 frigoribusque hiems vexatus et imbribus atris :  
475 jamque adeo ad paucos equites, peditesque redactus,  
476 si quicquam veri jactae praedicere sortes  
477 consuerunt, parat ille fugam, seu totus in iisdem  
478 haeret adhuc castris, veritus ne forsan euntes  
479 illicet invadam et vertentes terga trucidem

480 quod, nisi quis sese opponat casusque, Deusque  
481 ipse mihi et tantam invideant fata aspera laudem,  
482 perficere est animus, cum primum Aurora resurgens  
483 altera flammifero rubefecerit aethera vultu.  
484 Namque ad perdendos ingenti clade latrones,  
485 invasere manu qui regna aliena, suisque  
486 audent extorrem Mecmethum expellere templis,  
487 finitimae legere urbes atque oppida turmas.  
488 Quae simul aggressae primae sub tempora lucis  
489 irruerint, nos e portis facto agmine apertis  
490 erumpamus ; et unanimes in castra feramur  
491 undique fusuri signis victricibus hostes.  
492 Nunc autem, quoniam taciti speculemur oportet,  
493 securine sui maneant, an castra relinquunt  
494 confisi tenebris, noctisque silentibus umbris,  
495 ecquis erit vestrum, qui se committere nocti  
496 audeat obscurae, penetretque in castra latronum  
497 praemia laturus generosi ingentia facti ?  
498 Illi ego Sidonio tinctas bis murice vestes  
499 largiar et solido loricam ex aere rigentem.  
500 His donis accedet equus candore nivali,  
501 quem mater generosa Cilix, ubi Cydnus Amanum  
502 dissecat, aethereas in luminis edidit oras,  
503 per rupes assuetum altas intendere cursum,  
504 armorumque adeo strepitus horrescere nullos."  
505 Haec ille. Et dictis cuncti assensere silentes,  
506 nec quisquam tamen est cujus, milesve repertus  
507 auderet dubiis qui se committere rebus  
508 praeter Amasiadem Phormum, cui sector Iberus  
509 dives agris, dives positus in fenore nummis  
510 Malcus erat genitor ; veteri qui lege relicta  
511 Mosis, ad Abdaridae turpi se transfuga ritus  
512 contulerat, Turcasque inter compleverat aedes  
513 argento atque animum fastu cumularat inani.  
514 Ille igitur surgens. "Nihil est (ait) inclyte ductor,  
515 quod tu tam large mercedem et praemia cuiquam  
516 egregium ob facinus te polliceare daturum.  
517 Ipse etenim, nec dona moror, speculator abibo  
518 quo tu cumque jubes : vel si mihi et ipsa potentum  
519 sint adeunda ducum tentoria : nec metus ullus  
520 nec duri retrahat facies inimica laboris,  
521 ne castra explorem : tum, si res postulet, ipsis  
522 occurram auxiliis, dux ut, monitorque viarum  
523 usque adstem et certo cunctos hic tramite sistam.  
524 Tu vero tantum ob meritum, rex magne, daturum  
525 polliceare mihi, modo quem Goffredus acutum  
526 per medium Orchanem, mirantibus omnibus, ense  
527 exegit, totumque metu tremefecit Orontem."  
528 Talia magniloquo tumidus fundebat ab ore  
529 Phormus et insueto lateri poscebat honorem  
530 ipse suo : quem nemo ausus speraverat ante.  
531 Tum sic Hassanus : " Caelumque et sidera et ipsum  
532 testor Halyn, fore nullum alium, cui deferat ense  
533 Goffredi manus haec et tam memorabile factum  
534 deletura animo nulla umquam oblivia nostro."  
535 Haec ait. Et spoliis, armisque recentibus ornat

536 Ausonium in morem ; parmam fert laeva nigrantem ;  
537 aere caput tegitur ; rigido latus ense tuetur ;  
538 dextra gerit jaculum, tergumque et bracchia fulvae  
539 pelli obicit detracta lupae. Sic comptus ab urbe  
540 egreditur, qua pons longe porrectus ab amne  
541 saxeus, ad Caniae decurrit limina portae  
542 atque interjectae crebris vada pigra paludis  
543 arcubus amplectens Turcisque, Arabisque patebat  
544 liber et haud usquam premerent quem castra piorum.  
545 Tempus erat, primae quo pars decedere noctis  
546 incipit et vigiles abeunt statione relicta.  
547 Succeduntque alii, cum se Boemundus et una  
548 Aulercae pubis ductor Robertus agebant,  
549 exploraturi, num quae custodia pontem  
550 servaret, possetne capi vel fraude, vel armis.  
551 Dumque oculis circumspiciunt et cuncta pererrant  
552 et strepitus intenti omnes et murmura captant  
553 auribus, ecce vident extremo ab limine pontis  
554 discedentem ad se recta contendere gressum.  
555 Tum vero socii fidas Boemundus ad aures  
556 affatus. "Venit hic, inquit, speculator ab hoste  
557 Hassano, aut spoliis nostrorum ut onustus in urbem  
558 mox referat sese : sed nos e tramite ad amnem  
559 deflectamus et occulti observemus euntem :  
560 donec nos abiens paulum post terga relinquat,  
561 atque intercepto nusquam fuga libera detur."  
562 Sic ait et dicto citius secessit uterque  
563 ad flumen, caelo atque umbris contectus opacis,  
564 et sese in caecis taciti occulere latebris.  
565 Ille autem obscurae per amica silentia lunae  
566 incedit fidens animi, ignarusque futuri.  
567 Cumque viae spatium propere progressus abesset,  
568 quantum aliquis jactu volucris comprehenderet hastae,  
569 exsiluere ambo et curvos liquere recessus ;  
570 non secus ac par acre canum, cum forte cubili  
571 excitum strepitu leporem, cervumve sequuntur  
572 inque nemus, vallemque urgent ; fugit ille, sibique  
573 providus Eos cursu praetervolat Euros.  
574 Sic Phormum dux Aulercus, sic Appulus heros,  
575 instantes tergo et vestigia pressa sequentes  
576 cogebant rapidum longe contendere cursum  
577 a ponte et summos a laeva inscendere colles.  
578 Conjecto sed enim Daunius per inane veruto,  
579 illicit hinc atque hinc perstrinxit vulnere suras,  
580 tardavitque fugam, verbisque affatus acerbis.  
581 "Vel jam siste gradum, vel, tu hic moriaris, oportet,  
582 hasta, ait, hac nostra medium per pectus adacta."  
583 Constitit ille tremens, fuditque has ore loquelas.  
584 "O, quicumque estis, vitam hanc servate, satisque  
585 sit notas clausisse vias ingentibus ausis :  
586 et me constrictum vinclis in castra piorum  
587 ducite. Non erit haec vobis clementia fraudi.  
588 Namque pater Turcas inter ditissimus omnes,  
589 cui juga bis centum proscindunt rura, domique  
590 argentique aerisque gravis grave pondus et auri  
591 defossum tellure jacet, nec regia vestis

592 deest et odorata flagrant laquearia cedro,  
593 protinus ingenti redimet mercede, libensque  
594 thesauros, queis me servet, recludet avitus."  
595 Subjicit his Italum ductor. "Quis tanta recuset  
596 praemia et oblatam demens contemnat opum vim ?  
597 Interea flumen dic quae te causa coegit  
598 trajicere, et serae solum te credere nocti.  
599 An forte, ut spoliis nostrorum indutus opimis  
600 dives ad Hassanum redeas ? An castra piorum  
601 ingressus speculere fugam, bellumve paremus ?"  
602 Tunc ille, ex imo ducens suspiria corde :  
603 "Ipse equidem vobis (inquit) sine fraude recludam  
604 omnia, nec patriae faciet spes ulla juvandae,  
605 quominus effundam veras e pectore voces.  
606 Egit ad audendum tanta haec rex Persa, petenti  
607 qui mihi Goffredi dono promiserat ense,  
608 cum primum vos excisos ultricibus armis  
609 stravistis, toto permiscens funera campo."  
610 Subrisere duces. Mox illum Daunius heros  
611 affatur. "Magnum est munus, quod, amice, cupisti,  
612 sed gravius quam ferre queas. Verum quibus ille  
613 auxiliis fretus de se promitteret tantum  
614 audet ? An excisas vires ita credit, opesque  
615 Gallorum, ut quicquid superest, evertere ab imo  
616 ipse velit, tantumque unum se posse reatur ?"  
617 Phormus ad haec : "Non ille quidem spe motus inani  
618 haec fore confidit, nam cum nox postera toto  
619 incipiet secum tenebras abducere caelo,  
620 ingentes equitum turmae, peditumque manipuli  
621 finitimas nuper pubes collecta per urbes,  
622 improvisi aderunt a tergo in castra ruentes,  
623 cum late serpens fessos sopor irrigat artus.  
624 Sic mandat, fierique jubet dux ipse Bagoas,  
625 Hassani comes, et consanguinitate propinquus ;  
626 ille quidem florens annis, animisque superbus,  
627 cujus in effrena reliqui virtute quiescant.  
628 Et sperent se posse omnes delere Latinos.  
629 Sed mihi jam manibus duros innectite nodos,  
630 et quocumque libet vobiscum abducite vinctum :  
631 ut, nisi veridicas expressi e pectore voces,  
632 cogatis meritas leto persolvere poenas."  
633 "Immo, ait Aulercus ductor, poenamque reposcens  
634 delictum ob tantum, laqueo collum implicet et te  
635 ante oculos populi ligno suspendat ab alto,  
636 nunc morere et praesens tanti cape praemia facti."  
637 Haec ait, atque preces alias iterare paranti  
638 abscidit ense caput : spoliisque atque omnibus armis  
639 exutum canibus lacerandum, avibusque reliquit.  
640 His actis ambo rediere in castra sub ortum  
641 aurorae ; inque unum Gallis, Italisque coactis  
642 principibus, memorant illa quid nocte sit actum :  
643 quaeque adeo audierint instare pericula ab hoste  
644 externo ; et procerum, quae sit sententia, poscunt.  
645 Omnibus idem animus tacitis educere castris  
646 armatas equitum turmas, peditumque cohortes,  
647 cum primum terras nox atra involverit umbra,



648 atque improvise venientem invadere turbam.  
649 Excivere igitur castris ex omnibus illos,  
650 quos neque dira fames, neque saeva absumere pestis  
651 quiverat, aut clades bellorum abolere receptae.  
652 Jamque Atlantiaco Sol merserat aequore frontem,  
653 cum lectae coiere acies, tenebrasque per altas  
654 arripuere viam, qua ripam extendit Orontes  
655 in longum et mediam disternat agmine vallem.  
656 Et quoniam septem de tot jam millibus alae,  
657 atque equites alam centeni quamque secuti,  
658 vix reliqui fuerant, bellum qui sponte cierent,  
659 insedere locum, cujus latus alluit amnis  
660 a dextra, laevaue suis intercipit undis  
661 in vallem porrecta palus, mediamque relinquit  
662 planitiem angustam, brevibusque excursibus aptam.  
663 Nec mora. Turcarum properans equitatus easdem  
664 ingreditur fauces, cum vis ex aequore surgens  
665 Auroram caeli portis exciret apertis  
666 maturat quae stella diem praenuntia Solis  
667 et passim gelida conspergeret arva pruina.  
668 Ac jussi celerare gradum sine lege ruebant  
669 ad caedem et praedam, quo spes male sana vocabat.  
670 Ergo ut in insidias medii venere paratas  
671 in tutum unde illis nusquam fuga certa dabatur,  
672 compressere una gressum, subitoque pharetris  
673 eductas gravidis nervo imposuere sagittas,  
674 inque hostes densae fuderunt grandinis instar,  
675 cum praeceps in tecta ruit ; sed nulli (.....)  
676 inflixere pro clypeis aque aere repulsae.  
677 At non Ausonii, non robora lecta Britannii,  
678 obvia non Galli Turcarum in pectora frustra  
679 direxere suas innixi viribus hastas.  
680 Sed veluti totidem conjecta e nubibus atris  
681 fulmina, dejiciunt fracto nunc stipite quercus,  
682 nunc scopulos, altasque ruunt a culmine turres,  
683 sic illi, hostiles docti perrumpere turmas,  
684 deturbant ab equis alios, aliosque trucidant  
685 exacto penitus duro per viscera ferro.  
686 Densentur turmae, mediiue urgentur et iidem  
687 protrudunt primos, primique in terga ruentes  
688 involvuntur equis venientum atque agmine pressi  
689 expirant animas obscura morte diremptas.  
690 Ergo, ubi se angusto conclusum calle Bagoas  
691 vidit et haud quidquam numerum prodesse suorum,  
692 ad laevam deflexit iter, flumenque petivit ;  
693 unde ruens alam Gallorum invasit apertam,  
694 amissosque redire animos in pectora victis  
695 cogit et inceptae rursus confidere pugnae.  
696 Hic cadit accepto letali vulnere Talus  
697 Bellovacus ; cadit et clara virtute Neanthes  
698 Lexobius, Leucoque duci gratissimus Agnon.  
699 Ipse quoque obliqua cervicem caesus ab harpe  
700 labitur Ambarros inter notissimus Amphis :  
701 ancipitis dubiiue Amphis sermonis amator,  
702 sed non incertae sumptis virtutis in armis.  
703 Et jam jamque acies Belgae ducis, obruta densis

704 hinc atque hinc equitum turmis se vertere retro  
705 coeperat atque hosti fugiens dare terga sequaci :  
706 Oromedon cum ductor agens in proelia gentem  
707 Cenomanum, fuis superadvenit et ferus hostes  
708 adverso proturbat equo ; dat Carsona leto,  
709 exsultantem animis, qui sese e matre ferebat  
710 Hyrcana et claro Cambysae a sanguine cretum.  
711 Transadigit Laro fauces, mediumque Cynulco  
712 dividit ense caput, tum Sinam in bella vocantem  
713 agmina et angusto miscentem funera campo,  
714 sternit humi, miseramque simul sine nomine plebem  
715 ense metit, cadit illa ruens, ceu falce recurva  
716 gramina secta cadunt, cum prata virentia tondent  
717 agricolae et plenis stipant fenilibus herbas,  
718 in seram quae laeta boum sint pabula brumam.  
719 Nec multo post in pugnam se contulit acer  
720 Tancredus (Cilicum populis namque ille subactis,  
721 rettulerant sese properans in castra piorum)  
722 nec non et belli fulmen fortissimus heros  
723 Daunius et dextrae notus virtute Vitellus,  
724 consiliisque potens, armisque acerrimus Umber  
725 Ubaldu, cujus proles generosa Metauro  
726 imperat et populis ad se dat jura vocatis.  
727 Additus his Medix, unaque Ursanius ibat,  
728 inque hostem intenti vultuque, hastisque ruebant.  
729 Non secus atque repens Aquilonum a vertice turbo  
730 cum forte incubuit terris, coeuntia differt  
731 nubila et instantes toto fugat aere nimbos,  
732 infandam ruri stragem, silvisque minantes ;  
733 heroum sic Ausonidum manus agmine facto  
734 comminus aggreditur Turcas, passimque supinos  
735 fundit et immiti transfigit pectora ferro.  
736 Argymnum Medix puerum puer impiger hasta  
737 trajicit, ad mensam suetum dare grata Bagoae  
738 pocula et in bellum galeam praeferre comantem.  
739 At bonus auxilio venientem Ursanius Agrim  
740 interimit, gladio medium per pectus adacto.  
741 Andrantum Ubaldu, dirumque Agamanta Vitellus,  
742 Attius Afrorum ductorem gentis Oniscum,  
743 seque parem primis nota virtute ferentem  
744 et Charris regnantem acer Tancredus Abollam.  
745 Ipse tamen retinetque suos, subigitque Bagoas  
746 stare loco et telis invictam obvertere frontem.  
747 Omnia sed frustra tentanti et nota cienti  
748 nomina, fulmineo medium dux Appulus ense  
749 in thoraca ruens immani vulnere pectus  
750 discidit et vitae latebras patefecit opertas.  
751 Ille ruit, sonitumque gravem super arma dederunt.  
752 Tum vero conversa acies inimica refugit  
753 atque alios lacus ipse, alios absumpsit Orontes,  
754 exitium miseri dum forte evadere praesens  
755 nituntur, dubiisque putant se posse salutem  
756 pugnando amissa, nando reperire sub undis.  
757 Sed plures procerum tantorum interrita virtus  
758 sustulit et ferro turmas prostravit acuto.  
759 Postquam igitur deleti hostes cecidere, locumque

760 deseruere fuga et populis victoria cessit  
761 laeta piis, praedam ingentem pecudumque, boumque  
762 et molitam Cererem et flaventes farris acervos,  
763 omnia quae secum obsessis inferre Bagoas  
764 decreerat, densumque agmen post terga trahebat,  
765 Ausonii prae se, Gallique egere, nec ante  
766 occuluit caput Hesperiiis Sol mersus in undis,  
767 quam circum induti spoliis hostilibus omnes,  
768 agmine laetanti rediere in castra, ducumque  
769 Turcarum ante urbem capita imposuere verutis.  
770 Hoc visu concussi animi, magnusque per urbem  
771 it metus et dubiis incessit mentibus horror  
772 pars satius Gallis portas aperire patentes :  
773 esse ait, invictae ultro se dedere genti :  
774 dum spes ancipites animos et pectora versant  
775 atque inter populum dubius Mars errat utrumque.  
776 Pars tutandam urbem, dextrisque, animisque paratis,  
777 censet et adversis rebus virtute medendum.  
778 Armigeras superasse manus et robora pubis  
779 Persarumque, Arabumque brevi post tempore regem  
780 missurum auxilio ter centum lecta virorum  
781 millia, quae tota Gallos excedere cogant  
782 ex Asia aut tenebris et duro carcere vinctos  
783 usque doment, caesoque omnes sine honore sepulchri  
784 Abdaridum genti spectacula grata relinquunt.  
785 Haec dum illi inter se vario sermone volutant,  
786 portarumque aditus, turresque in moenibus altas  
787 alterna vigiles noctu statione tuentur,  
788 interdumque foras per pontem egressa juvenus,  
789 qua via tuta patet, longe semota latebris  
790 insedit, Gallosque jugis invasit iniquis  
791 palantes, praedamque ab agris in castra ferentes,  
792 unde ultra acceptas clades remeavit ad urbem,  
793 grassantemque famem vulgo solata levavit  
794 saepius et Gallos obsessa obsedit et aequae  
795 hos penes atque illos magno quaesita labore  
796 corporis excivere acres alimenta tumultus.  
797 Quocirca ut tanta Gallos formidine solvat  
798 et vetet egressos Turcas e moenibus urbis  
799 moliri insidias, ad se vocat Appulus heros  
800 Ausonios, verbisque omnes hortatur et urget.  
801 "Ite, ait, o socii, dextrisque invadite pontem,  
802 perniciem in nostram vinxit quem Persa rebellis  
803 praesidio, coeptisque pii pia vota moratur,  
804 ite viri et tanta vobis asciscite laudem.  
805 Laudem etenim pariet clari victoria facti  
806 immensam et nullo morituram tempore : namque  
807 ut nunc, quam volumus, cedant secus omnis : certe  
808 egregium fuerit magnis cecidisse sub ausis."  
809 Haec Robertiades Boemundus et Itala pubes  
810 una omnis ruit ad pontem, ducente Vitello :  
811 quaerit et instantem crebris assultibus hostem  
812 deturbare loco : verum ille interritus omnem  
813 propellit turbam et pontem statione tuetur :  
814 nec patitur portae se quemquam inferre patenti.  
815 Et jam jamque octo longa obsidione peractis

816 mensibus, ex animo cunctis spes omnis abibat  
817 expugnandae urbis, cum dux acerrimus armis  
818 Goffredus proceres ad sese in tecta vocatos  
819 affatur dubios, coeptis seu fortibus instent,  
820 seu res infectas, desertaque castra relinquunt.  
821 "O fratrum generosa cohors, o pectora sanctae  
822 debita militiae, non huc Deus impulit, ut nos  
823 perderet, aut salvos patriae revocaret ad oras  
824 turpiter, aeternum parituros dedecus omni  
825 Europae et nobis mutandam morte salutem.  
826 An vos cum primum voto obstrinxistis ad urbem  
827 venturos Solymam, mediosque iter omne per hostes  
828 facturos, penitus nostro sine sanguine et illam  
829 esse redempturos nullo sudore putastis ?  
830 Non ego vos tantos, tantisque a patribus ortos  
831 sive metu, sive ingenti molimine rerum  
832 abjecisse animos rear et nunc denique mentem  
833 mutasse infractam, quo nos e moenibus altis  
834 despiciens dictis irrideat hostis amaris,  
835 dum fugimus timidi, captamque relinquimus urbem.  
836 Quin potius, siqua est animis constantia nostris  
837 obsistamus et hic mortem, laudemve manentes  
838 quaeramus ; Deus est, uno quo praeside freti  
839 amissa quondam pro libertate piorum  
840 inferre Abdaridum genti decrevimus arma,  
841 inque Asiae templis cultus abolere nefandos."  
842 Dixerat Eustachides. Illi autem affixa tenebant  
843 ora solo et tristes mutabant pectore curas  
844 nunc huc, nunc illuc ; procerum cum laetus ad aures  
845 nuntius affertur pontem expugnare Latinos  
846 aggressos, urgere hostem et depellere in urbem.  
847 Ergo acres Tancredus agens in bella Sicanos  
848 subsidio currit, pugnamque instaurat et alto  
849 hortatur clamore suos. "Hoc vincite tantum  
850 o socii, hic vestras certatim intendite vires.  
851 Hic est ille dies, cum gloria maxima sese  
852 ostendat nobis, seu mors, seu vita supersit.  
853 Ponte etenim capto nullus patet exitus hosti,  
854 unde famem tolerare queat, vobisque per agros  
855 occursare, gravem dum praedam in castra refertis."  
856 Sic fatus Brisem aggreditur, Drapsimque, Paphumque  
857 huic caput, illi humeros rigido discriminat ense,  
858 perforat immisso Brisem per guttura ferro.  
859 Hic sese medios saltu coniecit in hostes  
860 Bocca audax animo, Pisisque oriundus Etruscis,  
861 disjecitque globos Turcarum in bella ruentem,  
862 Bocca, suis quem jam praefecerat ipsa maniplis  
863 Plintia et in Syriam Tancredo admorat eunti.  
864 Ergo illic acies inimico occumbere leto  
865 et fugere eversae, captumque relinquere pontem ;  
866 quem dum praesidio pubes Oenotria vincit,  
867 illae altos intra muros et tecta receptae,  
868 occlusere piis aditus et limina portae.

## LIBER DUODECIMUS

S\_12 v.1 Interea nigro terras velavit amictu  
 2 stellarumque choros nox caelo invecta reduxit  
 3 et circum crebris cinxerunt moenia Galli  
 4 excubiis, alii recreant dum corpora somno,  
 5 successu rerum laeti : spem pectore namque  
 6 concipiunt urbis potianda et gentis iniquae  
 7 delendae penitus quamprimum armisque, fameque.  
 8 At non Hassanum dulcis levis unda soporis  
 9 pellicit ; immitesque sinunt requiescere curae,  
 10 cuncta adversa suo tristi cum corde putantem.  
 11 Et nunc occlusa secum spatiat in aula  
 12 solus et ex imo ducit suspiria corde :  
 13 moenia nunc densa juvenum stipante caterva  
 14 invisit ; turres et propugnacula firmat :  
 15 et non consuetas vigiles permutat in horas :  
 16 incertus fidei cunctorum et conscius irae,  
 17 crudelisque odii : cui se, suaque omnia norat  
 18 civibus esse piis : quorum genus omne nefandis  
 19 affligens scelerum formis immane premebat.  
 20 Ergo ubi jam caelum, sole illustrante serenum,  
 21 restituit rebus proprios Aurora colores,  
 22 seque hinc atque illinc cinctum videt esse frequenti  
 23 Gallorumque, Italumque manu ; velut horrida Tigris,  
 24 Hyrcanus quam pastor agens in retia captam  
 25 inclusit cavea, furit acrior usque, fremitque,  
 26 conceptasque animo magis ac magis asperat iras ;  
 27 inque dies angens sese, vehementius atram  
 28 auget in immensum rabiem, studiumque nocendi.  
 29 Sic ille ad caedem stimulis agitatus iniquis,  
 30 Turcarum primos in regia tecta vocatos  
 31 alloquitur. "Venit, quod non speravimus umquam,  
 32 tempus, ait, Persis cum toto e ponte fugatis  
 33 obsessi circum claudamur moenibus urbis :  
 34 exitus et nusquam liber vacet : unde petatur  
 35 victus ; ut exhaustas recreent in corpore vires,  
 36 qui mea sunt mecum defendere regna parati.  
 37 Nam plebis non ulla movet me cura tuendae.  
 38 Stet modo militiae constans mihi robur et ordo,  
 39 quo longe infensos valeam depellere Gallos ;  
 40 si scalis forte appositis ad moenia tentent  
 41 irruere et summas murorum evertere turres.  
 42 Ergo ego, ne victos tandem nos dedere cogar,  
 43 impositoque jugo miserum submittere collum,  
 44 ejicere institui nostris e moenibus actos  
 45 Christicolas omnes, vel duro absumere ferro :  
 46 quos ego suspectos nullo non tempore habendos  
 47 esse reor generi Turcarum et fortibus armis :  
 48 sed tum praecipue, cum rerum summa vacillat ;

49 exitiumque ingens anceps fortuna minatur.  
50 Non regnet, quem vana animi clementis imago  
51 frangit et utilibus miserantem avertit ab ausis.  
52 Rebus in extremis temptandum extrema ; nec ullus  
53 effuso servavit adhuc sine sanguine regnum."  
54 Haec ubi dicta dedit solio sublimis ab alto,  
55 obstupuere animis patres, variumque per omnes  
56 murmur iit ; partim nusquam consulta probantes :  
57 partim etiam, qui mature properanda putarent  
58 omnia et e medio penitus genus omne piorum  
59 tollendum et solis linquenda ea moenia Turcis.  
60 Haec dum illi inter se dubio sermone volutant  
61 et simul instantis terrentur imagine caedis,  
62 quid damnent, quidve inde probent decernere mussant.  
63 Quos inter claro proavorum a sanguine natus  
64 consessu in primo primus Benserra sedebat,  
65 consilii bonus atque armis ad bella parandis  
66 praefectus, regique ipsi gratissimus et qui  
67 a puero cultum Abdaridae non sponte secutus  
68 Christum ipsum solum esse Deum, solumque putabat  
69 dignum, quem precibus supplex in vota vocaret ;  
70 Turcarumque metu clam sacra illius et aras  
71 interdum coleret, templumque occultus obiret.  
72 Ergo idem a miseris infandam avertere cladem  
73 cum cuperet, solitos primum praefatus honores :  
74 "Consilium, rex magne tuum, quis inutile dicat,  
75 exilium regno rebus minitantibus ? (inquit)  
76 sed quoniam nondum desunt alimenta, quibus se  
77 plebs alat et nobis Persae exspectantur in horas  
78 venturi auxilio, cunctique ad jussa parati  
79 Christicolae accurrunt ; operasque impendere pergunt,  
80 quisque suam, Turcisque levant, Arabisque laborem,  
81 dum muros illi insomnes, urbemque tuentur  
82 et procul audaces Gallos a moenibus arcent ;  
83 ipse ego in alterius tenebrosa silentia noctis  
84 hanc caedem differre velim ; cum nulla supersit  
85 spes alia, instanti quae nos defendat ab hoste.  
86 Immo, ait, Hassanus, cum primum e turre sacerdos  
87 venturae noctis mediam praedixerit horam,  
88 in vicos, omnesque domos immittere certum est,  
89 qui somno oppressos jugulent ; qui funditus omnem  
90 festinent ferro sceleratam excindere gentem :  
91 non sexus, non ullum usquam discriminet aetas ;  
92 sive senes, seu sint sugentes ubera nati.  
93 Sic volo, sic jubeo, sic stat sententia ; nec se  
94 quisquam alio nostram speret traducere mentem.  
95 Vos ite et tacitis quamprimum accingite coeptis  
96 immites dextras et vos explete nocentum  
97 sanguine, qui nostrae laeti gentisque, domusque  
98 excidium exspectant, quorum modo jussa facessunt."  
99 Haec graviter frendens imo de pectore fudit.  
100 Atque illi facinus quamprimum ad triste parandum  
101 discessere omnes animis immanibus acti.  
102 Non secus atque lupi, quos lux inimica, diesque  
103 in silvis retinet clausos, specubusque repostis,  
104 exspectant avidi noctem, densasque tenebras,

105 incustoditos una ut cum matribus agnos  
106 invadant, caulasque ipsas et ovilia vastent  
107 et multo exsaturent undantes fauces (.....)  
108 At non oblitus generis Benserra paterni  
109 ipse sui, cultusque pii discrimine tanto,  
110 impia per certos regis consulta ministros  
111 Christicolum primis reteggit, monstratque salutem  
112 sperandam unam animis extrema audentibus ergo  
113 advigilent, mediaeque adsint sub tempora noctis  
114 insomnes, imo ut portas a cardine vellant,  
115 inque urbem Gallosque vocent, Italosque patentem :  
116 se quoque opem tantis conatibus allaturum.  
117 His ita compositis, sublimi in turre morantem  
118 solus adit natum, quem paucis ante diebus  
119 exceptum pugna dimiserat Appulus heros  
120 et juvenem donis abeuntem ornaverat amplis :  
121 "Nate, ait, o veterum species expressa parentum,  
122 vade age et Ausoniae ductorem gentis adito :  
123 dic tempus capiendae urbis venisse supremum :  
124 ipse modo ad portae tacitus se limina sistat,  
125 cum terras densis nox intempesta tenebris  
126 texerit et dulces affuderit humida somnos :  
127 tempore quo pia gens formidine caedis iniquae  
128 conveniet, portaeque obices et claustra refringet,  
129 atque Italis aditum patefactam rumpet in urbem.  
130 Utque fidem dictis habeat, tu sponsor, et obses  
131 missus abi et primus valuis invade revulsis  
132 ingressum atque aciem tectis bipatientibus infer."  
133 Haec ille. Et juvenis parendi accensus amore  
134 carpit iter, notosque inter elapsus amicos,  
135 detulit Ausonio regi mandata parentis.  
136 Isque ubi primores secreta in parte coactos  
137 admonuit, petiitque simul, sententia menti  
138 quae foret et dubiis audax fiducia rebus,  
139 non eadem sensere omnes : pars maxima namque  
140 nil temere audendum censet : ne forte paratas  
141 lapsus in insidias poenas exercitus acres  
142 sanguine persolvat : pars esse audacter eundum,  
143 quo fors laeta vocat, nec opem poscentibus ullam  
144 Christicolum precibus (pietas quae vera) negandam.  
145 Haec inter nox Eois caput extulit undis  
146 discedente die, caelumque invecta retexit :  
147 atque animis illi incassum discordibus horas  
148 ducebant, Italum ductor cum Daunius heros.  
149 "Non hanc litem, inquit, non haec consulta, morasque  
150 res patitur ; ducam ipse meos discrimen in ipsum ;  
151 vos, quibus est suspecta fides in tecta vocantis,  
152 pandentisque ultro portas, permittite quaeso  
153 solus ut objiciam leto caput et mihi tantum  
154 imponam periturus onus, subeamque periculum."  
155 At pius Eustachides, postquam tibi vivida virtus  
156 exagitat pectus stimulis haud mollibus, inquit,  
157 "Vade, age, et oblatam decoris ne desere laudem.  
158 Nos hic, interea nequid secus accidat, ac res  
159 postulat, armati, signisque impensius omnes  
160 advigilare suis ductorum ad jussa paratos

161 cogemus, precibusque Deum, votisque rogantes  
162 successum rebus, tibi quem promittis et ipsi  
163 speramus, qui facta tuae immortalia dextrae  
164 novimus atque animi robus suspeximus alti."  
165 Haec pius Eustachides et castra per omnia certos  
166 dimittit, taciti cogant ut in arma maniplos  
167 et ducibus jubeant cunctos astare paratos.  
168 Ast Italum, quos jamdudum Trinacrius heros,  
169 invicti monitu Boemundi, accinxerat armis,  
170 in latebris occulta manus prope moenia sese  
171 abdiderat, muris scalasque paraverat aequas.  
172 Ac nondum instructis ad coepta ingentia Gallis  
173 Christicolum primos Benserra ad limina portae  
174 duxerat, aggressus vigilum dare corpora leto  
175 atque ipso aeratos a cardine vellere postes.  
176 Verum illi obnixi sese defendere et omni,  
177 qua poterant, ratione locum, portamque tuentes,  
178 Turcarum auxilia ingenti clamore vocabant ;  
179 amissuri urbem jam jam, poenasque daturi,  
180 ni properent, murisque hostem depellere tendant.  
181 Tum vero Ausonios inter fortissimus omnes  
182 dux Robertiades, laudi non aequus avitae,  
183 ingreditur primus, sequiturque Oenotria pubes  
184 omnis et excelsas in moenibus occupat arces,  
185 excubiis passim caesis ; tum laeta secundo  
186 successu, auxilium victrix pugnantibus affert.  
187 Nec minus interea gentis decus acre Sicanae  
188 Tancredus, piceos valuis arentibus ignes  
189 injicit et dura scindit tremefacta securi  
190 limina, ferratosque obices : labat ariete crebro  
191 janua et hinc atque hinc aditum dat aperta patentem.  
192 Immissae irrumpunt acies : fit vi via ferro :  
193 caeduntur vigiles ; fuso loca sanguine fervent.  
194 Hassanum interea regem saevissimus implet  
195 nuntius ; ingressos portis bipatientibus urbem  
196 Ausonios, Gallosque omnes, fortesque Britannos,  
197 nec vitae cujusquam ullam superesse salutem.  
198 Fervere caede domos : glomerari incendia tectis :  
199 quosque trucidari decreverat ipse, patentem  
200 insedissem vias omnes ultricibus armis  
201 ac, nisi praecipitem celeri fuga in avia sese  
202 conjiciat, venturum hostem, qui sanguine poenas  
203 expetat et regnum Turcarum vertat ab imo.  
204 Ille irae impatiens : "Potius ruat arduus aether  
205 in caput hoc, quam degeneri dent terga timori,  
206 et captae superem excidio perterritus urbis."  
207 Dixit et ore fremens, armisque indutus aenis  
208 deserit ingentes aedes, seque obvius infert  
209 Ausoniis, acri vastantibus omnia ferro.  
210 Et primum Evalci gladium in praecordia condit.  
211 Evalci, mollis regio quem culta Tarenti  
212 eduxit, veteri natum de gente Laconum,  
213 praefecitque suis Boemundum in bella secutis.  
214 Felix, qui patriae luxum, qui commoda vitae  
215 otia jucundae leto mutarit honesto,  
216 intuleritque animum moriens fulgentibus astris.



217 Cujus ob interitum poenas ut fumeret acres  
218 Harpalion, animo praestans, sed viribus impar,  
219 inter Hydruntinos claris genitoribus ortus,  
220 accurrit, clypeumque hastam percussit acuta :  
221 incassum : ternis tectus namque orbibus aeris  
222 protinus ad sese venientem reppulit ictum.  
223 At rabie fera corda tumens Hassanus in hostem  
224 irruit extemplo subiens, saevamque bipennem  
225 sustulit, inque altam media inter tempora frontem  
226 libravit, partesque caput disjecit in ambas.  
227 Non aliter, quam frondosa lignator in Ida  
228 disjicit impacta quercumve, ornumve securi :  
229 concidit Harpalion, cumque Harpalione Georgus  
230 et Caecus, Braetonque una, Dinonque, Phaonque  
231 et dejecit humi dextra armipotente peremptos,  
232 Sphaerumque et Mochum, Phaetumque et Paxamon acrem,  
233 qui primi portis urbem intravere revulsis.  
234 Jamque catervatim strages impune cruentas  
235 ediderat, letoque Italos prostrarat acerbo  
236 et versos ad portam omnes ex urbe fugasset,  
237 ni Robertiades, Normannae gloria gentis,  
238 objiciens sese fugientibus, arma, manusque  
239 cogeret in Turcas, regemque immane furentem  
240 vertere, quaque globus sese densissimus infert.  
241 "Hac vos poscit, ait, virtus, hac vi via vobis  
242 invenienda viri : posita est victoria vestris  
243 in manibus ; subeat vos esse e sanguine natos  
244 illorum, victo qui quondam ex hoste triumphos  
245 duxere et patriam positis auxere trophaeis.  
246 An muros, turesque urbis superavimus altas,  
247 ferratosque obices, portasque refregimus, ut nos  
248 victores victi deserta in castra repellant ?"  
249 Dixit et antefereus gressum, rotat arduus ense  
250 fulmineum, mediosque jacet se primus in hostes,  
251 disjectosque urget, caput huic detruncat et illi  
252 transadigit costas et funera miscet ubique.  
253 Utque Leo Mauris quem forte in saltibus Afer  
254 deprensus venator agit, si saeva Molossum  
255 urget turba canum, primos aggressus aduncis  
256 unguibus, exercet conceptas fervidus iras,  
257 mox juvenum praeceps densum petit agmen et illinc  
258 caede nova laetus silvarum in opaca refugit.  
259 Vibranti sic ille latus ferit ense Sohemi  
260 regis, Ituraeis praeerat qui solus, opemque  
261 ferret ut obsessi, in regia tecta tyranni  
262 Hassani se contulerat, nactusque superbum  
263 conjugium Cromnae, forma atque aetate nitentis,  
264 addiderat socero sese, pugnamque ciebat  
265 acrior atque Italum legionibus obvius ibat,  
266 ac multos prostrarat humi : sed Daunius ensis,  
267 ceu fulmen caelo emissum, compescuit una  
268 illius horribilesque minas, saevumque furorem.  
269 Quin etiam Hassanum cumulantem funera regem  
270 perculit et summa caput a cervice recidit,  
271 praefixumque hastae ferri sublime per urbem  
272 jussit et infestos deleri funditus hostes.

273 Jamque Aurora suo fulgore retexerat orbem  
274 terrarum atque oculis caedem ostentabat apertam.  
275 Strataque corporibus caesis adoperta viarum  
276 horrebant : fusoque solum passim omne natabat  
277 sanguine, perque domos ensesque, ignesque furebant.  
278 Nuntius ad proceres subitus cum venit abusque  
279 finibus Arabiae et Ginglam spectantis Edessae,  
280 millia tercentum Parthorum Euphratis ad undam  
281 consedissee : quibus dux Corbagus, unus et armis  
282 atque animis longe cunctos acerrimus, inter  
283 Arsacidam, qui vincla piis, mortemque minetur :  
284 ni Syria excedant quamprimum, urbemque relinquunt,  
285 et referant celeres illinc ad Thracia gressum  
286 Bosphora et angusto pelagi se limite servant.  
287 Ergo illi postquam Turcas cecidisse peremptos  
288 videre et spoliis sese, sceptrisque potitos  
289 Hassani Syriae late regnantis in oris,  
290 obfirmant animos, instaurant moenia, si qua  
291 parte labant ; explent opera interrupta, novisque  
292 aggeribus muros et propugnacula cingunt :  
293 imponuntque trabes et saxa ingentia, quae mox  
294 in clypeis contactam aciem dejecta ferantur.  
295 Jamque adeo Oceani vasto se gurgite Titan  
296 tertius extulerat, lucemque reduxerat orbi,  
297 cum valles, collesque altos exercitus ingens  
298 Persarum insedit, caelumque, Erebusque repente  
299 contremuit clamore virum, cantuque tubarum :  
300 et Libani, Casiique jugum subsedit et amnis  
301 substitit atque undis caput abdidit altus Orontes.  
302 Nec mora. Continuis cinxerunt moenia castris,  
303 atque omnes clausere vias, fuga ne qua piorum  
304 exciperet leto quemquam et servaret inultum.  
305 Ut cum venantes capreas, damasque fugaces  
306 rupibus in summis, aut vallibus in depressis  
307 deprehendere, plagis aditus ingentibus omnes  
308 impediunt : aliquae, ne dum oppugnantur et una  
309 urgentur densa juvenumque, canumque corona,  
310 forte per occultas nactae liberrima fauces  
311 effugia et tutos ad nota cubilia cursus,  
312 incustoditis e saltibus elabantur.  
313 At vulgo tremefacta novus per pectora Gallis  
314 insinuat pavor et capta decedere terra  
315 suadet et in patriam salsas remeare per undas :  
316 "Ostendat se siqua ollis fuga libera ; quando  
317 longinquo absumpti bello morboque, fameque,  
318 esse pares nequeunt pauci tot millibus et se  
319 Barbariae metuunt praedam fore : capta tueri  
320 moenia si pergant, jactis quae pontibus hostes  
321 corporibusque adeo caesorum ingentibus aequent ;  
322 ariete ni percussa prius dent cuncta ruinam."  
323 Haec passim inter se Gallique, Italique dolebant,  
324 et procerum miseri facta inconsulta vocabant.  
325 At bonus Eustachides, quem non avertere coeptis  
326 frigus et in vulgum pestis grassata, famesque,  
327 impavidum potuit, non usta caloribus ora  
328 Maeonia, Senonumque ducis fuga turpis ad urbem

329 Threiciam et castra innumeris deserta maniplis.  
330 "Quis metus aut quae tanta animis ignavia vestris  
331 venit ? ait. Sunt hic iisdem subjecta periclis  
332 lumina tot praeclara ducum, quorum inclyta virtus  
333 aeternam vobis peperit famamque, decusque :  
334 iidem etiam tanta vos obsidione solutos  
335 servabunt. Etenim causam (mihi credite) numquam  
336 deseret ipse suam divum pater atque hominum rex,  
337 castraque Persarum vobis concedet, opesque  
338 in praedam, modo vos precibus confidite nostris  
339 affore et hostiles staturum caede phalanges."  
340 His pius Eustachides, nec non et Daunius heros  
341 hortatur socios, omnesque ope sublevat omni,  
342 qua potis et somno indulgens parcoque, brevique  
343 tutatur totam crebris stationibus urbem :  
344 exploratque vias, turritaque moenia noctu  
345 circumiens, hostisque dolos frustratur et artes.  
346 Jamque adeo bis quindenos ex ordine soles  
347 perstiterant, nec venturi spes ulla dabatur  
348 subsidii, saevaque fame, morboque peribant :  
349 ipsi se miseros extrema in morte vocantes.  
350 Quod, ceu molle pecus, clauso morerentur ovili.  
351 Ergo iram ut summi precibusque et thure parentis  
352 placaret, gentisque piae delicta piaret  
353 Addemarus, quinum jejunia casta dierum  
354 indixit, culpasque suas de more fateri  
355 quemque sacerdoti, pacemque exquirere, jussit,  
356 Atque animos posthac insonti addicere vitae.  
357 Quo facto : pedibus nudis et supplice cantu  
358 lustravitque vias, arisque incendit honores.  
359 Tum vero ad solium, Deus unde altissimus imos  
360 aspectat tractus terrarum, hominumque labores,  
361 ille, piae cui militiae data cura tuendae,  
362 Caelicolum e fidis unus, lectisque ministris,  
363 constitit atque humilis supplex his vocibus infit.  
364 "O pater, o rerum cunctarum aeterna potestas,  
365 o, qui verberibus justis delicta tuorum  
366 corrigis et recto revocas a tramite lapsos ;  
367 si quando afflictis te te praebere benignum  
368 consuesti et justo pietatem aequare furori,  
369 Gallorum miserere, pater, quos impius hostis  
370 obsidet, absumitque ingens pestisque, famesque  
371 pugnantes sancti pro libertate sepulchri.  
372 Et placidos adverte oculos, fletusque precantum  
373 respice et aggressis pro te lacrimabile bellum  
374 ignovisse velis et moenia ad ipsa beatae  
375 sternere iter Solymae, populoque afferre salutem  
376 oppresso ac templis sceleratam expellere gentem.  
377 Quae ritus exosa tuos, praeceptaque, sanctas  
378 polluit infernis addicens pestibus aras.  
379 Vix ea desierat fari maestissimus ales,  
380 cum pater omnipotens : "Nihil est, o fide minister,  
381 quo crucieris, ait, fuso mihi sanguine poenas  
382 jamdudum solvit Gallorum exercitus omnis,  
383 quas mala quorumdam meruerunt facta nocentum.  
384 Nunc ego do veniam votis, iramque remitto,

385 eripere et reliquos leto et miserescere certum est.  
386 Ergo age : cum primum densae rarescere noctis  
387 incipiunt tenebrae atque artus mollissimus omnes  
388 pervadit somnus, curasque e pectore demit,  
389 i celer atque imas caeli decurre per auras  
390 et Laae de plebe homini, quo castior alter  
391 non fuit, aut nostras coluit sincerius aras,  
392 dic media ingentis subter testudine templi  
393 defossam tellure cava servarier hastam  
394 intactam et nulla penitus rubigine putrem :  
395 quae nati ferro pectus patefecit acuto,  
396 cum duri ex alto penderet roboris auctu.  
397 Hanc pius Addemarus saevi in certamina belli  
398 deferat, inque hostes intenta cuspidem nostros  
399 irruat et subita formidine terreat omnes.  
400 Namque ego subsidio mittam e caelestibus aptas :  
401 quae Persas, Arabasque fugent et sanguine totam  
402 perfundant vallem, qua se se agit altus Orontes."  
403 Sic fatus pater omnipotens, rutilantia caeli  
404 sidera et insolito tremefecit Persida motu.  
405 Quo terrore suos sese revocavit ad ortus  
406 Tigris et Euphrates ripae conterritus haesit.  
407 At Patris interpres summi, per inane profundum  
408 delapsus, venis et fulminis ocior alis,  
409 constitit ante humilis stratum non molle grabati,  
410 fessa ubi tum Laas recreabat corpora somno.  
411 Atque ait : "O civis tandem mollire severam  
412 vota, precesque piaae potuere et flectere mentem  
413 numinis aeterni, caeli cui sidera parent ;  
414 eia age, ne timeas. Altis tibi missus ab astris  
415 nuntius advenio, magnique haec jussa Tonantis  
416 exsequor, ipse ea te paucis, adverte, docebo,  
417 est aede in media, quam Petri e nomine dici  
418 Christicolae volvere patres, tellure sub ima  
419 hasta, olim Christo pectus quae fodit apertum.  
420 Eruat hanc procerum chorus, Addemaroque ferendam  
421 in pugnam attribuant, cum primum exire libebit  
422 in circumfusos urbis prope moenia Persas."  
423 Dixit et in tenues abiens evanuit auras.  
424 Tum vero Laas, tantis expergitus umbris,  
425 excutitur somno laetus : durumque cubile  
426 linquit et in caelo lacrimantia lumina fixus,  
427 pressit humum genibus : mox imo e pectore vocem  
428 edidit. "O rerum solus qui flectis habenas,  
429 dejicis e summa reges qui sede potentes  
430 cum libet et palmam victoribus eripis, iisque  
431 incutiens terrorem animos viresque resolvis  
432 et bello victis dextras, ac pectora ob armas,  
433 respice nos, pater omnipotens, et numine firma haec  
434 visa tuo, populos si te instigante rebelles  
435 ejecturi Asia, nostris excessimus oris."  
436 Vix ea fatus erat, clara cum luce repente  
437 vidit ab occasu totum discedere caelum,  
438 ingentemque globum flammaram erumpere nubem  
439 cum tonitru atque ignes Persarum infundere castris.  
440 Omne quo tollens animum se proripit et cum

441 Addemaro laetus communicat omnia at ille  
442 concilium cogit procerum, remque ordine pandit.  
443 Obstupuere animis omnes : pars vana putare  
444 somnia et accinctis tantum spem ponere in armis.  
445 Pars visis adhibere fidem. Non irrita semper  
446 edere divinam castis oracula mentem,  
447 supplicibus postquam lacrimis et vocibus iram  
448 placavere Dei et somno obrepente quierunt.  
449 Ast alii fraudem inventam, quo miles in hostem  
450 circumfusum urbi, cum res exposceret, ultro  
451 iret et haud dubium palmae speraret honorem.  
452 Non his consiliis, non hac ratione, nec arte  
453 temptandum esse Deum ; nec nos exosus ad unum  
454 perdat et iratus nostra haec commenta refutet.  
455 Haec inter (nam sic visum populique, patrumque  
456 principibus) propere Laas accitus et arae  
457 admotus sacrae, jurat se vera locutum.  
458 Quoque magis rata sint haec omnia. "Vos mihi sanctam  
459 hanc hastam date per flammam, ignesque ferendam,  
460 queis ego si nusquam laedar, si crine vel uno  
461 non minuar, vos, o proceres, ne pergite verbis  
462 indubitare meis : sin quid secus accidat ut me  
463 offendat calor, aut paulum remoretur euntem,  
464 mendacem arguite, ac templis, coetuque piorum  
465 exclusum penitus, solitis defigite diris  
466 et pater omnipotens caelestum a sede repellat."  
467 Haec ille. At proceres oculos atque ora tenentes  
468 conversa inter se, quaerendam protinus hastam  
469 consensu statuere uno tellure sub ima.  
470 Ergo adeunt aedem unanimes, sacrisque peractis,  
471 quae pius Addemarus fieri mandarat ad aram  
472 discipulos sancta complentem de super aura,  
473 heroes medii medio sub fornice templi  
474 defodiunt certatim omnes sola pervia ferro  
475 altius ac solidae penetrant in viscera terrae.  
476 Nec mora. Sese offert oculis venerabile robur  
477 felicitis hastae, longo post tempore visum.  
478 Effusi quod adhuc servabat signa cruoris :  
479 cuspide cum summo rerumque, hominumque parenti  
480 pectoris insontis latebras reclusit acuta.  
481 Tum vero exortus clamor, cunctique repente  
482 ad terram laeti genus inflexere, Deumque  
483 laudantes et regem unum, dominumque canebant.  
484 "Te patrem aeternum terrae colit orbis et uni  
485 ipse tibi chorus Aligerum, quae plurima caeli est  
486 militia acclamat, soli tibi sidera parent,  
487 aequoraque, et summae circumfluis ambitus aethrae.  
488 Tu nobis exercituum dominusque, Deusque  
489 Europa egressis, Asiamque petentibus ultro  
490 innumeras Turcarum acies superare dedisti,  
491 munitasque urbes caesis intrare tyrannis  
492 et tolerare famem et perferre incommoda belli,  
493 exustosque agros, tristesque evadere saltus  
494 Maeoniae et Tauri transcendere saxa nivosi.  
495 Nunc autem, quae magna tua est clementia, confers  
496 insperatum, insuetum, ingens, mirabile donum,

497 quo freti, circumfusos invadere bello  
498 non dubitemus et Arscidum concurrere turbae."  
499 Talia dum laeti memorant ; pater extulit hastam  
500 Addemarus : mox rite trium peragenda dierum  
501 et vulgi et procerum cunctis jejunia mensis  
502 indicit, tum quemque Deo se offerre fatentem  
503 cuncta sacerdoti vitae delicta nocentis,  
504 voce jubet : "Quartaque omnes post denique luce  
505 exire unanimes, hostemque invadere Persam :  
506 et sperare Deum felicibus affore coeptis".  
507 Haec pius Addemarus, primorumque inclytus ordo.  
508 At vulgo interea Laae promissa reposci  
509 atque unum signari oculis, vanumque vocari,  
510 ni, quod pollicitus verbis, re praebeat ipsa  
511 spectandum et tanto firmet sua visa periclo.  
512 Ergo ille ingentem stipulis arenibus ignem,  
513 et strue lignorum summas tendente sub auras  
514 imperat accendi ; totoque e corpore vestem  
515 abjicit ac dextra porrectam corripit hastam  
516 et caelum aspectans breviter sic ore precatur.  
517 "Summe pater, cunctorum hominum qui pectora solus  
518 scrutarisque, aperisque neque est te fallere cuiquam :  
519 ipse ego si vere tua sum praecepta secutus  
520 et monitus mihi nocte datos, si fraxinus haec est  
521 ipsa, tuum pectus quae cuspidem fodit acuta,  
522 elicuitque levem tepido cum sanguine rorem,  
523 da deinde auxilium, meque haec tua sancta ferentem  
524 dona manu incolumem per tanta incendia defer."  
525 Dixit et ardentem saltu se jecit in ignem.  
526 Abscessere procul flammae (mirabile dictu)  
527 hinc atque hinc ; multa ille premit vestigia pruna,  
528 perque aestum incedit medium, neque laeditur usquam  
529 et tandem egressus gelida se sistit in aura  
530 incolumem, meritasque hominum divumque parenti  
531 sospes agit grates ; tum vero exercitus omnis  
532 accurrens, passis illum complectitur ulnis :  
533 laetitiaque exsultat ovans, remorantur euntem,  
534 et plausum ingeminant, vocesque ad sidera jactant  
535 agmina et educi quamprimum e moenibus optant  
536 in Persam, vires spes omnibus addit et auget  
537 insolitum membris robur : clamatur ubique :  
538 "Vult Deus hoc fieri bellum : jubet arma moveri  
539 haec Deus : ad Solymos hinc jam victoria pandit  
540 parta viam et sanctam nobis adjudicat urbem,  
541 Bethlemiasque domos et, quae vestigia primis  
542 ipse pedum quondam plantis impressit Iesus."  
543 Has inter voces, interque optata dies se  
544 tertius Oceani liquidis demersit in undis.  
545 Et pius Eustachides curari corpora jussit :  
546 venturaeque alacres accingi ad proelia lucis.  
547 Quae simulatque oriens Tauri juga celsa retexit,  
548 armatas acies portis bipatientibus ipsi  
549 effudere duces, Persisque e ponte fugatis,  
550 instructis pariter legionibus incedebant.  
551 Addemarus quarum in medio pater arduus hastam  
552 defossam tellure cava portabat et omnes

553 ad decus et laudem dictis acuebat amicis.  
554 "Ite viri, hic demum coepti victoria nostri  
555 vertitur, hic quaerenda salus virtute, Deoque  
556 fidendum, a nobis quem stare haec lancea certos  
557 vos facit ; ite alacres jam nunc, Persasque fugaces,  
558 ignavosque Arabes ultrici invadite dextra."  
559 His ille atque aliis verbis hortatur euntes  
560 in pugnam et stimulos animis audacibus addit.  
561 Nec minus Eustachides Leucos, Morinosque trucesque  
562 Germanos, Celtasque suos acerrimus Ugon,  
563 Daunius Ausonios : bello Robertus uterque  
564 inclytus Armoricas gentes hic ille Britannos,  
565 atque Caledonios ad caedem incedere pergunt  
566 Turcarum, praeda in praesens, spoliisque relictis.  
567 Nuntius interea, sacri custodia belli  
568 tradita cui fuerat, caelesti ex ordine lectus,  
569 affatur regem aeternum, terraeque, polique.  
570 "Magne pater, cujus nutu pater urbis et orbis  
571 totius, Hesperias belli ad pia munia gentes  
572 impulit Urbanus, quo barbara claustra refringant  
573 Turcarum, Solymaeque tuae juga tristia demant,  
574 ecce ille ad pugnam videt ut gradiuntur iniquam ?  
575 Non opibus, numerove pares, non viribus aequis,  
576 quas pestis, quas dira lues, quas improba rerum  
577 absumpsitque fames, corpusque exhausit, ut esse  
578 non jam homines, sed cassa hominum simulacra ferantur.  
579 Ac, nisi subveniat pietas tua, protinus hosti  
580 succumbent, ceu molle pecus raptoribus olim  
581 praeda oblata lupis : neque enim concurrere pauci  
582 innumeris possunt, ut non victoria cedat  
583 hostibus et pugnae quaesitum addicat honorem."  
584 Talibus orabat custos, praesesque piorum  
585 aliger et supplex veniam implorabat, opemque.  
586 "Cum rerum dominus, caelique aeterna potestas,  
587 vade age fide vigil, nec te cura ulla moretur ;  
588 vitales etenim splendenti ex aethere rores  
589 depluere in nostros jamdudum jussimus, inquit,  
590 quo firmare animos, acresque resumere vires,  
591 et durum pugnae valeant tolerare laborem  
592 atque aestum ingentem medii perferre diei,  
593 arentes agros rapidus dum Sirius urit.  
594 Cetera si numero, pugnaque prementur iniqua  
595 ipse adero et Persas trepido terrore replebo."  
596 Sic ait et nutu terram, caelumque profundum  
597 concussit, Gallosque oculis respexit amicis.  
598 Quos super ut primum roris pluit uvidus imber,  
599 illicit amissae rediere in corpora vires :  
600 aucti animi, pugnaeque ardor geminatus et ipsi,  
601 ipsi, inquam, (quis credat) equi, quibus ipsa tegebat  
602 jam vix ossa cutis, laetis hinnitibus auras  
603 rumpebant, ultroque hostes in bella ciebant.  
604 At parte ex alia colles insederat altos  
605 ductor Achaemenidum, vallisque refugerat imae  
606 planitiem, in primis pugnae loca commoda equestri.  
607 Demens : qui pediti saltus elegerit aptos,  
608 difficilesque vias, aditusque in castra malignos,

609 quo defessam aciem Gallorum aestuque, viaque,  
610 insessum montem dum forte adversa subiret,  
611 exciperet, fusamque loco aggredere iniquo.  
612 Gallorum sed enim salebrosa per ardua collis  
613 incedens acies, primis sese intulit audax  
614 Persarum agminibus, tum vero ad sidera clamor  
615 exortus, vallemque omnem, montesque propinquos  
616 implevit, fugere ferae : tremuere reposti  
617 monstra maris, seseque imis mersere sub undis.  
618 Extemplo jaculis caelum, levibusque sagittis  
619 complectur, ceu cum Libycis e partibus Auster  
620 obscuram excivit nubem, solemque repente  
621 abstulit ex oculis, tenebrisque involvit obortis.  
622 Pronus ibi ante omnes cecidit Tigrane creatus  
623 ductor Achaemenidum, Itali cui velitis hasta  
624 perfodit pectus, factoque e vulnere in auras  
625 erumpentem animam Stygias demisit ad undas.  
626 Nec procul hinc Pacorum vibrantem immane verutum  
627 fudit humi, vitamque aufert rorarius audax  
628 glande gravi, mediae dirimens spatia ardua frontis :  
629 labitur infelix sparso super arma cerebro.  
630 Inque locum illius properans successit Orodes :  
631 isque manu atque acri fugientes voce repressit.  
632 Ergo, iis in pugnam rursus se ferre coactis,  
633 conservare manus acies ; nec jam datur ullum  
634 eminus injectis hostem cohibere sagittis :  
635 sed gladiis potius saevire in pectora adactis  
636 obvia et obstantes infringere comminus hostes.  
637 Hinc atque hinc igitur medio in certamine pugnae  
638 exanimes labuntur humi Turcaequae, Pique.  
639 Non aliter quam cum geminos discordia reges  
640 cogit agrum tectis in apertum exire relictis,  
641 stipatos studiis sectantum atque agmine gentis  
642 quemque suae : fit pugna atrox et ab aethere summo  
643 corpora caesarum complent labentia terram.  
644 Jamque adeo Persas castris effuderat omnes  
645 Corbagus et numero Gallis, Italosque premebat,  
646 defessos caede ingenti, quam vivida bello  
647 ediderat cujusque manus, nullius ut acres  
648 praeterea possent usquam subsistere vires.  
649 Namque ut quisque imo plures demiserat Orco,  
650 quos daret inde neci plures superesse videbat.  
651 Nec procerum virtus potis instaurare piorum  
652 circumventam aciem, nec jam retinere labantem ;  
653 cum Patris aeterni jussu delapsus Olympo  
654 caelituum insedit colles exercitus ingens  
655 armatorum equitum, vestis quibus alba tegebat  
656 ingentes humeros, pectusque : at tempora et ipsum  
657 cassis aena caput ; cui crux imposta superne  
658 stabat et ardentes spargebat in aera flammis :  
659 quadrupedumque acer fremitus, sonitusque tubarum  
660 undique clangentem, mugire per ardua circum  
661 visus Achaemenidis ; quo tum terrore repente  
662 contremuere animis omnes, celerique salutem  
663 quaesivere fuga, projectis turpiter armis.  
664 At pius Addemarus, cui tanta ex omnibus uni



665 Gallosque, Ausoniosque inter, fortesque Britannos,  
666 cernere monstra dedit summi regnator Olympi,  
667 extollens sublimem hastam : "Jam vicimus, inquit,  
668 vicimus, o socii. Deus est, Deus ; hostibus hunc qui  
669 terrorem incussit, viresque infregit et arcus,  
670 falcatasque harpes, hastasque excussit acutas  
671 e manibus. Vos ite animis audacibus aucti.  
672 Ite viri, properate viri, victoria vestra est ;  
673 vestrae et opes : modo vos sumpto ne parcite ferro :  
674 dum castris exutus Arabs, dum Persa fugaci  
675 fidit equo et vobis campo jam cedit aperto."  
676 His pius Addemarus Gallorum in pectora dictis  
677 spem revocat, reficitque acres ad proelia vires.  
678 Non aliter quam cum silvas agitantibus Euris  
679 augentur subitis excita incendia flammis :  
680 frondiferos quae per montes invecta vagantur,  
681 nec silvis nisi consumptis exstincta residunt.  
682 Ergo omnis pubes, quam quondam Oenotria, quamque  
683 Gallia progenuit, generoso accensa pudore,  
684 constitit ; inque Arabes, ipsosque acerrima Persas  
685 invadens, multo tepefecit sanguine terram.  
686 Non secus ac totidem florenti aetate leones  
687 in cervos, orygesque et confusae, (.....)  
688 praecipites et confusae dant stragis acervos,  
689 parcentes nulli, cujus praevertere cursum  
690 possint et saevo vestigia sistere morsu.  
691 Sic Itali, Gallique, securigerique Britanni,  
692 audaci assultu Persarum in terga ruebant,  
693 dedentes impune neci turbamque, ducesque.  
694 Jamque adeo quantum colles, vallisque reductae  
695 planities, quaqua versum seclusa patebat,  
696 fusa peremptorum complerant corpora ; quorum  
697 haud facile ingentes quisquam numeravit acervos.  
698 Et caput Hesperii abiens Sol merserat undis.  
699 Direptisque opibus castrorum hostilibus omnes  
700 signa reportarunt laetam victricia in urbem :  
701 crastina sed postquam terris Aurora reluxit,  
702 omnibus Addemarus templis indixit honores.  
703 Perque dies ter quinque Deo de more piorum  
704 jussit agi grates ad pulvinaria et aras,  
705 lustrarique urbem, precibusque et supplice cantu  
706 ipsum hominum, divumque patrem, natumque parenti  
707 aequaevum aeterno, cum virgine matre, piosque  
708 caelituum coetus omnes in vota vocari.  
709 Rite quibus summa cum religione peractis  
710 coeperunt placidae sensim indulgere quieti  
711 et rapidum relevare aestum frigentibus undis :  
712 tum plenas dapibus mensas onerare, diemque  
713 frangere certatim luxu, vinoque morantem  
714 et voti immemores vitam traducere inertem.  
715 Illic et cantus, illic et tibia dulces  
716 edere docta modos, dulces resonabat amores ;  
717 perque vias omnes florenti aetate puellae  
718 plaudebant pedibus choreas, motusque ciebant  
719 lascivos ; virtutis amor, laudisque cupido  
720 cesserat ex animis, qua quondam ardere solebant.

721 Quae pater omnipotens caeli e regione suprema  
722 aspiciens, oculos Syriis avertit ab oris ;  
723 continuoque Erebi pestes, ac monstra profundi  
724 libera fuderunt sese per inane, gravesque  
725 excivere aestus, funestisque imbribus agros  
726 infecere omnes, ingentesque aeris oras  
727 undique mortiferis afflarunt flatibus Austri.  
728 Defecere amnes, vivisque exaruit unda  
729 fontibus et nebulas exhalavere nocentes  
730 affusique lacus urbi, vallesque palustres.  
731 Hinc miseranda lues populos aggressa Latinos,  
732 aut morbo, aut tristi dedebat corpora leto :  
733 inque dies magis atque magis saevibat in omnes  
734 letifer Autumnus, perque urbem et compita passim  
735 spectabantur humi confusae stragis acervi.  
736 Quin et primorum generoso ex ordine multi  
737 occubuere duces indigna morte perempti.  
738 Occubuit pater Addemarus : dum visit egenos  
739 et quacumque potest miseros ope sublevat aegros.  
740 Dignus cui pietas vitae produceret annos  
741 in longum et meritos benefacta ingentia honores  
742 aetherea in terris deferrent lucefruenti.  
743 Visum aliter paribus mundum qui temperat horis.  
744 Nec tua te virtus, generis nec splendor aviti,  
745 Henrice Ascensis, leto subtraxit iniquo.  
746 Ipse etiam Arnoldus, quo se Germania mater  
747 jactabat, caeloque parem se laeta ferebant,  
748 occidit et pugnas animo reminiscitur acres,  
749 conquestus quod non hostili occumbere dextra  
750 contigerit, mixtoque una cum sanguine vitam  
751 fuderit, instantis solamen nobile mortis.  
752 Haec igitur pius Eustachides dum funera secum  
753 percurrit, periisse videt magnamque bonamque  
754 bellantum partem : quorum virtute, manuque  
755 fretus Achaemenium pugnando fregerat hostem.  
756 Et dubitat, ne saeva lues absumere pergat  
757 Gallorumque acies, Italosque, acresque Britannos,  
758 ni quamprimum omnes funesta excedere ab urbe  
759 inque agros sese jubeat conferre salubres.  
760 Haec agitanti animo fessos sopor occupat artus.  
761 Et jam nox medium cursu trajecerat orbem.  
762 Visa dehinc caelo descendere mater et ore  
763 affari ac nota solari voce dolentem.  
764 "Nate, ego ad egregios quem me peperisse labores  
765 glorior et claros ductorum ex hoste triumphos  
766 laetor ovans, tu te dignam modo suspice curam  
767 et coeptis incumbere piis ; non has tibi clades  
768 vallis Orontea solito corruptior aer  
769 attulit, Autumnusve gravis, vel turbidus Auster,  
770 sed populi delicta tui, cujus quoque si nunc  
771 reliquias cupis incolumes servare, necesse est  
772 inceptum contendere iter Jordanis ad amnem  
773 quamprimum atque ista cunctos avellere ab urbe,  
774 quos superesse aliis Deus omni ex ordine solos  
775 annuit et placidus morbo tutatus ab atro est."  
776 Sic ait et sedes repetit festina supernas

777        Ida parens, flentemque oculis et multa volentem  
 778        dicere deseruit, radiis afflata diei.  
 779        Talibus Eustachidae monitis expergita virtus  
 780        illicit e stratis duos exsuscitat artus :  
 781        conciliumque jubet cogi procerumque, ducumque.  
 782        Quos, ubi convenere, rogat sententia quae sit  
 783        cujusque et dubiae tandem quod quisque saluti  
 784        afferat auxilium, quo diram avertere pestem  
 785        possint et tristi sese subducere leto.  
 786        Hic proceres una clamant non esse morandum  
 787        praeterea et certae subeunda pericula mortis :  
 788        verum alias oras quamprimum urbesque petendas,  
 789        languida ubi recreent caelo sua membra salubri.  
 790        Tum pius Eustachides. "Num nos huc venimus, inquit,  
 791        o fratrum generosa cohors, ut corpora tantum  
 792        curemus laeti et riguis sedeamus in hortis,  
 793        delicias inter faciles atque otia vitae ?  
 794        Obliti quid quisque Deo promiserit et quid  
 795        expetat a nobis nostrorum antiqua parentum  
 796        gloria ? Quae nusquam duos exosa labores  
 797        rebus in adversis caelo caput extulit altum.  
 798        Hanc ne nos resides forte obscuremus, eundem  
 799        censeo quamprimum, quo res vocat ipsa, Deusque  
 800        tendendumque iter ad Solymos et amoena feracis :  
 801        arva Palaestinae, fontesque, aurasque tepentes  
 802        Carmeli et suaves celebris Jordanis ad undas :  
 803        quo nullus fluit in terris felicior amnis.  
 804        Hic nos fixuri sedes, hic nostra Tonanti  
 805        vota soluturi patriis discessimus oris.  
 806        Huc igitur jam nunc recta properemus ovantes,  
 807        si libet hoc caelum caelo mutare salubri."  
 808        Talibus Eustachidae dictis accensus eundi est  
 809        omnibus idem ardor ducibus ; jussique per urbem  
 810        vadere praecones, abitumque indicere turbae,  
 811        tertius Eois cum sol emersit ab undis  
 812        atque hac ut primum terris illuxit apertis,  
 813        corripuere viam laeti, qua litora monstrant  
 814        proxima, felicesque Aradi praedivitis agri,  
 815        perque imos Casii scopulos, perque invia saxa,  
 816        convallesque altas Libani, Sidonia, Tyrumque  
 817        venere et Tamyrae tranato fluminis alveo,  
 818        post saevas strages, post dura incommoda belli,  
 819        oppidaque et captas summis in montibus arces,  
 820        ingressi fines Galilaeae, orasque propinquae  
 821        Samariae, sanctam videre in collibus urbem  
 822        surgentem et celebrem per saecula cuncta Sionem.  
 823        Tum vero genibus flexis et vertice nudo  
 824        procumbunt omnes, Solymamque uno ore salutant.  
 825        "Ingentes et agunt grates tibi maxime caeli,  
 826        terrarumque opifex, cujus sub numine certo  
 827        incolumes tandem fortunatique laborum,  
 828        Judaeam intrarint, oculisque ea cernere detur  
 829        moenia, quae sanctum servant complexa sepulchrum."  
 830        Hic actis iter accelerant, murisque propinquant,  
 831        agmine composito, positos quos ordine castris  
 832        circumdant, celsasque parant attollere moles.

833 Interea Pharius regno depulsus avito  
834 Bocchoris, accitis propere firmaverat omnem  
835 praesidiis urbem, defensorumque corona  
836 cinxerat hinc atque hinc et sepserat undique muros :  
837 et circumfusos late vastaverat agros,  
838 nequid vitales usquam superesset ad usus,  
839 miscueratque herbas puteis, succosque nocentes,  
840 ac fontes terrae injecto celarat amictu.  
841 Quin etiam erumpens aversae a limine portae  
842 et densas equitum turmas educere et ultro est  
843 ausus adire pios et castra lacescere ferro.  
844 Quod Siculum ductor Phariis impune licere  
845 indignatus et assultus succedere laetos.  
846 "O flos Ausonidum juvenes, ait, ite volentes,  
847 ite viri mecum, laetique invadite Turcas  
848 moenibus agressos, portisque patentibus urbis  
849 irruite in muros, quamprimum ut turribus hostem  
850 dejiciamus humi, turba qui fretus equestri  
851 audaces inferre manus temerarius audet."  
852 Sic ait et raptio spirans immane veruto  
853 tendit in adversos gressum ; primumque Pheronem  
854 ducentem turmas, Gallosque in aperta vocantem  
855 proelia, per clypeiue orbis, thoracaque durum  
856 comminus, hostili media in praecordia adacto,  
857 fundit humi ; cadit ille ruens, terramque cruento  
858 ore petens, pedibus teneras diverberat auras.  
859 Huic comitem Arabiis regnantem in finibus addit  
860 Abbaron, Andronemque, Agamantaque, Carrhentemque  
861 omnes divitiis, omnes et sanguine claros.  
862 Tum Cindum, Lampumque ferit, Larumque, Tachumque,  
863 dat leto Ogdoum, nec non, quem regia Memphis  
864 eduxit, natum claris genitoribus, Apim.  
865 Sed neque quam multos vita spoliaverit heros  
866 Trinacrius, vel semineces devolverit, inque  
867 terga ferox raptas fugientum ingesserit hastas,  
868 enumerem, non si pleni jam fluminis instar  
869 verba mihi, numerique fluant et pectus anhelum  
870 effundat totidem voces, quot rauca comantes  
871 murmura dant Silvae Zephiro spirante ; quot undae  
872 Ionii scopulis quoties et litora plangunt.  
873 Concessere retro Pharii, mistisque Latinis  
874 praecipites repetunt urbem, portamque reclusam  
875 occupat Oremedon, Italosque hortatur, agitque  
876 ad decus aeternum, tantaeque ad praemia laudis.  
877 Illi adsunt : primoque acres in limine caedem  
878 caede nova accumulans ac ni se opponeret ollis  
879 Bocchoris et juvenum pubes stipata, ducumque,  
880 illo capta die Solyma et direpta fuisse.  
881 Reppulit ipse omnes atque irrumpentibus unus  
882 obstitit et calamum longe jaculatus ab arcu  
883 transfixit pectus ducis Oromedontis et acri  
884 funera miscentem dextra, Phariosque fugantem  
885 stravit humi ; ceu forte Aquilam, dum saeva dracones  
886 irruit in Lybicos, calamo venator iniquo  
887 Maurus ab excelsa dejectam rupe peremit.  
888 Sensit maesta cohors casum ductoris acerbum,

889       continuitque gradum, portaque exclusa patenti  
890       rettulit in castra exanimum et sine nomine corpus.  
891       At procerum delecta manus ductore perempto  
892       Cenomanum et Phariis portae intra limina clausis,  
893       ne quisquam posthac in apertum erumpere tentet  
894       aggeribus circumvallant ingentibus urbem,  
895       arietibusque parant altos evertere muros.  
896       Quos contra Pharius ductor firmarat, ut omnes  
897       undique respuerent ictus, tutique manerent,  
898       saxa intentarum venientia balistarum.  
899       Ipse autem Armoricum ductor Robertus et una  
900       filius Icem proles (tam) generosa parentis,  
901       ambo aetate pares, animisque et nomine eodem,  
902       hortati inter se scalis ascendere muros  
903       conantur, primique suos inducere in urbem,  
904       praeripere et reliquis tam pulchrae praemia laudis.  
905       Sed neque Lexobii, neque nati ad bella Caletes  
906       appositis scalis ad propugnacula possunt  
907       turribus in summis victricia signa locare :  
908       nec rursus Pharii subeuntes moenia Belgas  
909       dejicere et celsi depellere ab aggere muri,  
910       quem primum tenuere. Velut de finibus olim  
911       cum lis orta duos inter, propellit uterque  
912       utrumque, extremi ut spatium sibi vindicet agri,  
913       exiguum spatium et communem limitis oram  
914       non aliter Turcas dirimit lorica, piosque  
915       pugnantes, magnaue locum virtute tuentes.  
916       Jamque adeo fractis clypeis, galeisque revulsis  
917       certatim inter se multa vi vulnera miscent,  
918       exanimisque utrimque cadunt ; victoria neutris  
919       annuit ; huc etenim atque illuc incerta vacillat ;  
920       dum pinnae et turres et propugnacula fuso  
921       undique caesorum sparguntur sanguine : ceu cum  
922       decidit abruptis e nubibus horridus imber,  
923       atque agros, urbisque vias effusus inundat.  
924       Moenibus interea molem sublimibus aequam,  
925       quam Ligur Ebriacus mira fabricaverat arte,  
926       tergoribusve boum praecinxerat undique : vivum  
927       quo sulphur, piceosque globos contemneret ignis,  
928       admovit dux Goffredus. Stetit illa, trabesque  
929       comminus injecta muro junxere minantem,  
930       et solidi sese straverunt pontis in usum.  
931       Tum vero breviter fidos hortatus amicos :  
932       "Hunc, ait, hunc mecum jam nunc conscendite pontem,  
933       o socii, tandem venit haec optantibus hora,  
934       extremum finem nostro impositura labori.  
935       Este viri, memoresque Dei et virtutis avitae."  
936       Dixit et insiliens murum per tela, per ignes,  
937       namque ignes et tela simul, lapidesque pluebant  
938       grandinis in morem, seu densi turbinis instar,  
939       occupat et Pharios primus deturbat ab alto.  
940       Hic Memphrem, hic Thonim, Vesoremque, acremque Sesostrim  
941       obtruncat, primorum aciem ; quibus ense peremptis  
942       desilit e muro victor, turbamque fugacem  
943       comminus aggressus dat fortia corpora leto.  
944       Atque hos propellit clypeo, pede proterit illos ;

945 interea heroes, tanto dum moenia luctu  
946 miscentur, qua quisque a parte obsederat urbem,  
947 irrumpunt, omnesque domos et strata viarum  
948 corporibus caesorum implent : fluit, ater ut amnis,  
949 qua se cumque ferunt, tepidus cruor, atque ubi ventum  
950 ingens ad templum secreta in parte repostum,  
951 undique munitum portis et turribus altis,  
952 ingeminant stragem. Pharius nam Bocchoris huc se  
953 contulerat, longeque pios arcere parabat.  
954 Tancredus sed enim, Siculum comitantibus armis,  
955 irruit atque imo postes a cardine vellens  
956 aeratos, aditum Gallis patefecit : at olli  
957 ingressi multo Turcarum sanguine foedant,  
958 quas ante horrendis foedarant ritibus aras  
959 Abdaridae immanis gentes documenta secutae.  
960 Ipsum etiam audaci miscentem funera dextra  
961 ad Phlegethontes demisit Bocchorin undas :  
962 tum vero amisso Pharii duce, protinus omnes  
963 diffugiunt, captaque pii dominantur in urbe.  
964 Atque hic exhausti stet meta extrema laboris.  
965 Quem, si per totum tua divulgetur ut Orbem  
966 gloria et ad laudem Reges impellat eandem  
967 unanimes, justisque pios pius induat armis,  
968 susceptum potui noctes vigilare, diesque :  
969 da, Pater omnipotens, passim volitare per ora  
970 Christicolum et sanctis afflantem pectora flammis  
971 proferre incolumem ventura in saecula vitam :  
972 injicere et populis ardorem in bella ruendi,  
973 perdendique tuos diris cum ritibus hostes.